

ଅଭ୍ୟାସସଂଗ୍ରହ

ଶ୍ରୀଭୂପେନ୍ଦ୍ରନାଥ ସାନ୍ୟାଲ

ପ୍ରଣୀତ

ଶ୍ରୀ ଅରୁଣ କୁମାର ମୁଖୋପାଧ୍ୟାୟ

ଓ

ଶ୍ରୀ ସୁଧୀର କୁମାର ଚକ୍ରବର୍ତ୍ତୀ

କର୍ତ୍ତୃକ ସମ୍ପାଦିତ

প্রকাশক :
গুরুধাম প্রকাশন সমিতি
গুরুধাম মন্দার
পোঃ বাঁসী (মন্দার হীল)
জেলা : ভাগলপুর, বিহার

© গ্রন্থস্বত্ব গ্রন্থকার কর্তৃক সংরক্ষিত

মূল্য : ১২০ টাকা

মুদ্রক : পবন প্রিন্টার্স (কলকাতা)
শ্রী গোরচাঁদ চক্রবর্তী
মোঃ - ৯৮৩০৮ ১২২৩৪

প্রথম সংস্করণের ভূমিকা

হিন্দু-শাস্ত্রমতে বিপুল ব্রহ্মাণ্ডের প্রতি পরমাণু ভগবানের অনন্ত শক্তিতে পরিপূর্ণ। বিশ্বব্রহ্মাণ্ডে এমন স্থান কোথাও নাই, যেখানে তাঁহার অনন্ত সত্তার অস্তিত্ব নহি। সুতরাং, মানুষের মধ্যেও তাঁহার এই পূর্ণশক্তি বিরাজিত; কিন্তু মোহের প্রভাবে, অজ্ঞানের প্রভাবে, কদভাসের প্রভাবে, এই বিপুল শক্তি জড়ীভূত—ক্ষীণ অগ্নিসুন্দিলের ন্যায় মূঢ়—বীজনিহিত বৃক্ষশক্তির ন্যায় সূক্ষ্ম, অস্পষ্ট, অদৃশ্য।

উপযুক্ত সাধন দ্বারা যদি এই শক্তিকে বিকশিত করিয়া তোলা যায়, তাহা হইলে মানুষ অসাধা সাধন করিতে পারে।

বঙ্গের গৌরব শ্রদ্ধাস্পদ বঙ্কিমচন্দ্র এই সাধনের নাম দিয়াছিলেন “অনুশীলন”। ‘অনুশীলন’ পাশ্চাত্য নাম—ইহার শাস্ত্রীয় নাম “অভ্যাস”। বঙ্কিমচন্দ্র যে অর্থে ‘অনুশীলন’ শব্দ ব্যবহার করিয়াছেন, গীতা যোগবাশিষ্ঠ প্রভৃতি গ্রন্থে ঠিক সেই অর্থেই ‘অভ্যাস’ শব্দ ব্যবহৃত হইয়াছে। সুতরাং, এস্থলে আমাদের পক্ষে ভারতবর্ষীয় নাম গ্রহণ করাই বাঞ্ছনীয়। শুধু নাম নহে, বঙ্কিমচন্দ্রের সাধনার প্রণালীও পাশ্চাত্য। বঙ্কিমচন্দ্রের সাধনার আদর্শ ছিল—সকল বৃত্তির পূর্ণ পরিণতি ও সামঞ্জস্য; শাস্ত্রের আদর্শ—সকল বৃত্তির পূর্ণ পরিণতি ও বিসর্গ। “ভূতভাবোত্তবকরো বিসর্গঃ কাম্মসংজ্ঞিতঃ।”

বিসর্গ বলিতেই মনে হয়, কাহার জন্ত বিসর্গ?—সর্বভূতের জন্ত। প্রেম ভিন্ন ত্যাগ সম্ভব হয় না : এবং “সর্বভূতগুণমাখ্যানং সর্বভূতানি

চান্ননি" এ জ্ঞান না হইলেও, প্রকৃত বিশ্বপ্রেম উৎপন্ন হয় না। তাই, শাস্ত্রমতে এই সাধনা অর্থে ভগবানকে পাইবার সাধনা; বঙ্কিমচন্দ্রের আদর্শানুসারে, চেষ্টা দ্বারা, অভ্যাস দ্বারা, বৈরাগ্য দ্বারা বিমুখচিত্তকে ঈশ্বরানুভূতি করিবার সাধনায়, ভগবানের প্রয়োজন ছিল না। তাই তিনি আপনার অহুশীলন ধর্মকে পাশ্চাত্য অভিযুক্তিবাদের (Evolution) উপর প্রতিষ্ঠিত করিতে চাহিয়াছিলেন। তিনি মনে করিয়াছিলেন, অহুশীলন দ্বারা প্রত্যেক বৃত্তিকে পূর্ণপরিণত করিয়া মানুষ সম্পূর্ণ হইয়া উঠিতে পারে। কিন্তু এ সাধনা কার্যক্ষেত্রে কিরূপ অসম্ভব তাহা তিনি ভাবিয়া দেখেন নাই। অভিযুক্তিবাদের মতে অহুশীলন দ্বারা যেমন শক্তির পরিণতি সম্ভব, অব্যবহারে তেমনি শক্তির বিলোপ অবশ্যস্বাভাবী। একেবারে সকল শক্তির বিকাশের সাধনা অসম্ভব, এবং কোন শক্তিবিশেষের প্রতি বিশেষ মনোযোগে, শক্ত্যন্তরের প্রতি অমনোযোগ অবশ্যস্বাভাবী। বঙ্কিমচন্দ্রের সাধনাপ্রণালীর ইহা এক গুরুতর ত্রুটি। এ সাধনায় আদর্শমানবের উদ্ভব অসম্ভব।

শুধু ইহাই নহে। বঙ্কিমচন্দ্রের সাধন প্রণালীতে আর এক বিঘ্ন ত্রুটি স্পষ্ট। বঙ্কিমচন্দ্র নিজেও এ কথা বুঝিয়াছিলেন। কথাটা "সামঞ্জস্য" লইয়া। সকল বৃত্তির—সুপ্রবৃত্তির ও কুপ্রবৃত্তির—পূর্ণপরিণতি হইলে, মনুষ্যের পূর্ণতাল্লাভ দূরে থাক, কোন লাভই হয় না। তাই পূজ্যপাদ বঙ্কিমচন্দ্র নানা হুঙ্ক ও কুট তর্কের সাহায্যে বুঝাইতে চাহিয়াছিলেন যে, কোন কোন বৃত্তির সংঘমেই তাহার বিকাশ। কথাটা শুনিলেই একটা বড় রকমের গৌজামিল বলিয়া মনে হয়। কিন্তু তাহাতেও কথা উঠিয়াছিল, মানুষ আপনার স্বাভাবিক প্রবৃত্তিকে সংযত করিতে চেষ্টা করিলেও, ভগবানের আশ্রয় না পাইলে, শান্তি ও আনন্দ লাভ করিতে পারে কি? ব্রাহ্মসমাজ বঙ্কিমচন্দ্র এ কথা অস্বীকার করিতে পারেন নাই। অথচ, তাঁহার অহুশীলনধর্মে ভগবানের

প্রয়োজন ছিল না; কাজেই তাঁহাকে আর এক কুট তর্কের আশ্রয় গ্রহণ করিতে হইল। বঙ্কিমচন্দ্র বলিলেন সকল বৃত্তিই পূর্ণপরিণত হইলে ঈশ্বরসুখী হয়। নানা কৌশলে, নানা হুঙ্ক তর্কে, তিনি এ কথা বুঝাইতে চেষ্টা করিয়াছেন; কিন্তু এ কথা প্রমাণিত হয় নাই।

'অহুশীলন'-তত্ত্ব প্রতিপাদনের জন্ত পাশ্চাত্য অভিযুক্তিবাদের দিকে লোলুপ দৃষ্টি নিক্ষেপ না করিয়া, বঙ্কিমবাবু যদি তাঁহার আপনার দেশের ধর্মশাস্ত্রের উপর নির্ভর করিতেন, তাহা হইলে তাঁহাকে ভ্রান্ত সাধন প্রণালীর সমর্থনের জন্ত এত বিপুল চেষ্টা ও বিচার শক্তির অপব্যয় করিতে হইত না। হিন্দুশাস্ত্রের মতে প্রত্যেক বৃত্তির পূর্ণবিকাশের জন্ত পৃথক চেষ্টার কিছুমাত্র প্রয়োজন নাই; যিনি সকল শক্তির মূল, সকল জ্ঞানের আধার, সকল আনন্দের অমৃতনিকেতন, তাঁহাকে লাভ করিলেই, সকল বৃত্তি আপনিই স্বাভাবিক বিকশিত হইয়া উঠে, কুপ্রবৃত্তি আপনি সঙ্কুচিত হয়, সুপ্রবৃত্তি আপনি অনন্ত বিকাশ লাভ করে;— "যথা তরোমূলনিবেচনেন তৃপ্যন্তি তৎস্কন্ধভূজোহপি শাখাঃ।"

কিন্তু ভগবানকে লাভ করিবার জন্ত কঠোর সাধনার প্রয়োজন। এই সাধনার নাম "অভ্যাস"।—"অভ্যাসেন তু কৌন্তেয় বৈরাগ্যেণ চ গৃহ্যতে।" যে কদভ্যাসের জন্ত আমাদের শক্তি জড়ীভূত, বুদ্ধি মোহাচ্ছন্ন, জ্ঞান তমসাবৃত, সদভ্যাসের দ্বারা সেই বিকৃতি এবং মলিনতা অপসারিত করা প্রয়োজন; নহিলে উন্নতির অল্প উপায় নাই।

সেই জন্তই হিন্দুর নিকট হিন্দুশাস্ত্রোক্ত "অভ্যাসযোগ" প্রচারের প্রয়োজন। এই তমসাচ্ছন্ন, অবসাদবিজড়িত, কর্ষবিমুখ দেশে কণ্ঠের শক্তি এবং অভ্যাসের ক্ষমতার কথা বজ্রকণ্ঠে গুণাইবার দিন আদিয়াছে। কণ্ঠের দ্বারাই কর্ষকে অতিক্রম করা যায়, সদভ্যাসের দ্বারাই ভগবানকে লাভ করা সম্ভব হয়—আলম্বনপরায়ণ, মোহাভিভূত ভারতবাসীকে এ কথা না বুঝাইতে পারিলে, আর তাহার উদ্ধারের সম্ভাবনা নাই।

আমার কণ্ঠ ক্ষীণ, শক্তি ক্ষুদ্র; আমি যতটুকু পারিলাম, আমার স্বদেশবাসীকে এই অতয়বাণী শুনাইবার চেষ্টা করিলাম। যদি একজনও এই ক্ষীণকণ্ঠ শুনিয়া মোহনিত্রা হইতে জাগরিত হন, তাহা হইলে আমি সকল পরিশ্রম সফল মনে করিব।

পুরীধাম,
আষাঢ়, ১৩১৮

গেহুকার

সূচীপত্র

অধ্যায়	পত্রাঙ্ক
১ অদৃষ্টবাদ	১
২ দৈব ও পুরুষকার	৬
৩ পুরুষকার	১৫
৪ সদভ্যাস	৪৬
৫ কৰ্মযোগ ও ভক্তিয়োগ	৭৩
৬ উপাসনা ও চিন্তাশুদ্ধি	১২৯
৭ ব্রহ্মবিজ্ঞা—জ্ঞানযোগ	১৬৩
৮ ব্রহ্মবিজ্ঞা—যোগাভ্যাস	২০৯
৯ অভ্যাস বা পৌরুষ প্রযত্নের ফল	২৩৯
১০ সংযম অভ্যাস	২৫৭
১১ উপদেশ ও উপসংহার	২৭৩

প্রথম অধ্যায়

অদৃষ্টবাদ

সকল দিক দিয়া আমাদের যে অধঃপতন ঘটিয়াছে, সে বিষয়ে মতভেদে ঘটিবার সম্ভবতঃ আশঙ্কা নাই। কিন্তু এ অধঃপতনের মূল কি, এ বিষয়ে মতভেদে আমাদের বর্তমান যথেষ্ট। সমস্ত বিভিন্ন মতের মধ্যেই বে অল্প হ্রস্বতা বিস্তর সত্য নাই, তাহা নহে, কিন্তু তাহার মধ্যে অসত্যও যথেষ্ট বর্তমান। সেই সমস্ত প্রচলিত

মতের দোষোদ্ধাটন, নূতন কোন মতের সংস্থাপন অথবা কোন মতের আংশিক খণ্ডন বা গ্রহণ, বর্তমান প্রবন্ধের উদ্দেশ্য নহে। কোন মতানত লইয়া বিতণ্ডা করা আমার অভিপ্রায় নহে। বর্তমান সময়ে আমার স্বদেশ ও স্বদেশ-বাসীদিগের হৃদয় ও ক্রোধ দেখিয়া আমার মনে যে আন্দোলন উপস্থিত হইয়াছে, এবং তাহার শাস্ত্রীয় নীমাংসা আমার বুদ্ধিতে যতদূর প্রতিভাভ হইয়াছে, তাহারই আলোচনা এই প্রবন্ধের মুখ্য উদ্দেশ্য। যাহারা হৃর্ভাগ্যবশতঃ শাস্ত্রকে অত্রান্ত বলিয়া মানিয়া লইতে অশক্ত, আশা করি, তাহারাও “যুক্তিযুক্তমুপাদেয়ং বচনং বালকাদপি” এই নীতির অনুসরণ করিতে কৃপা অনুভব করিবেন না।

এই দেশব্যাপী হ্রস্বতার সহস্র কারণ বিদ্যমান থাকিতে পারে, কিন্তু আমার মনে হয়, ইহার মধ্যে সর্বপ্রধান অন্ধ, ভ্রান্ত, অবসাদকর অদৃষ্টবাদ। আমরা সকল বিষয়ে অদৃষ্টের দোষ দিতে শিখিয়াছি। দেশে যখন রোগ, দুর্ভিক্ষ বা মহামারী

উপস্থিত হইয়া জনপূর্ণ লোকালয়সমূহকে জনশূন্য করিয়া তুলে, তখনও আমরা ললাটে করাঘাত করিয়া নিশ্চেষ্ট থাকি, তাহার প্রতিকারের কোন উপায় অবেষণ না করিয়া হরহরকারে নিরুদ্বেগে কালযাপন করি। সব সংস্কৃত হইলে, (স্বাস্থ্য অদৃষ্টবাদ) যে অভয় আসিয়া মানবাশ্বাকে আশ্রয় করে, ইহা সে প্রকারের ভয়শূন্যতা নহে। ইহা আপাততঃ জড়তার এবং তজ্জনিত বাহ্য নিশ্চেষ্টতার ভয়াবহ পরিণাম। অবশ্য আমাদের জীবনের সমস্ত ব্যাপারে 'অদৃষ্ট' যে কিছুই কাজ করে না, সে কথা আমি বলিতে চাহি না, কিন্তু যে 'অদৃষ্টবাদে' জীবকে উত্তমহীন করে, মানুষকে জড়বৎ করিয়া তুলে, আমি সেরূপ অদৃষ্টবাদের পক্ষপাতী নহি। অতীত তোর তামসিকতা—আমি তাহাকে নাস্তিকতা বলিতেও কুণ্ঠিত নহি। নাস্তিক যেমন ঈশ্বর মানে না, তদ্রূপ এই জড়ভাবাপন্ন লোকেরা ঈশ্বরের নিয়ম মানে না—আত্মার শক্তিতে বিশ্বাস করে না। নিজের শক্তির উপর যদি বিশ্বাস না থাকে, তবে পরমুখাপেক্ষী হওয়া তাহার পক্ষে স্বাভাবিক; এবং অশ্রের করুণার উপর যাহার জীবন নির্ভর করে তদপেক্ষা দুঃখভাগী আর ইহ সংসারে কে থাকিতে পারে? এই যে আত্মশক্তির উপর অবিশ্বাস, ইহাই প্রকৃতপক্ষে ভগবানে অবিশ্বাস। যাহার ভগবানে বিশ্বাস নাই এবং বিশ্বাস করিবার প্রবৃত্তিও নাই, সে ভগবানের নিয়ম মান্য করিতে পারিবে কেন? সুতরাং, দুঃখকষ্টের কঠোর নিষ্পেষণ হইলেও নিষ্কৃতি লাভ করা, তাহার পক্ষে অসম্ভব ব্যাপার।

ভগবানের নিয়ম মানিয়া চলিলাম না, তারপর দুঃখ দারিদ্র্য, অকাল মৃত্যু, ব্যাধি, অস্বাস্থ্য স্বাভাবিক নিয়মেই যখন আমাদের প্রতি আক্রমণ আরম্ভ করিল, তখনও তাহার উপশমের জন্য কোন পুরুষার্থ অবলম্বন না করিয়া দেবতার দ্বারে দ্বারে কৃপা ভিক্ষা করিতে লাগিলাম এবং অবশেষে তাঁহাদিগকে মিষ্টান্ন উপঢৌকন দিয়া ও বিবিধ পূজোপচারের লোভ দেখাইয়াও যখন সফলমনোরথ হইলাম না, তখন কর্তব্য পালনের আর কিছুই অবশিষ্ট নাই ভাবিয়া বিষমমুখে 'সবই অদৃষ্ট' বলিয়া নিশ্চিত্ত রহিলাম। আমি জিজ্ঞাসা করি, ইহাই কি হিন্দু? এক দিন তো আমাদের দেশে এই কথাই প্রচারিত ছিল যে—

“উল্লোগিনাং পুরুষসিংহমুপৈতি লক্ষ্মী-

দৈবেন দেয়মিতি কাপুরুষা বদন্তি।

দৈবং নিহত্য কুরু পৌরুষমাশ্রজ্ঞাতা

যত্তে কৃতে যদি ন সিধ্যতি কোহত্র দোষঃ ॥”

কিন্তু আজকাল ঠিক ইহার বিপরীত পাথে আমরা চলিতেছি। আমাদের দেশে পৌরুষহীন এই দুর্বল ভাবের আত্যস্তিকতা কোথা হইতে আসিল, বুঝিতে পারি না। অদৃষ্টবাদই বাস্তবিক আমাদের এই অনিষ্ট করিয়াছে, অথবা আমরা ক্রমশঃ দুর্বলচিত্ত ও হীনবীর্ঘ্য হইয়া পড়তে, আমাদের বুদ্ধিবৃত্তিতে তমোগুণের আধিক্য ঘটায়, আমরা পৌরুষচ্যুত হইয়া ক্রমশঃ ঘোর অদৃষ্টবাদী হইয়া পড়িয়াছি, জানি না। কিন্তু যে কারণেই হউক, আমাদের কর্ম করিবার ইচ্ছা ও শক্তি

যেন একেবারে বিলুপ্ত হইয়াছে। কোন সহরে বা পল্লীগ্রামে যখন কোন সংক্রামক ব্যাধির প্রাচুর্য্য হইবে, তখন দেখিতে পাই, সেই ব্যাধির বিষদস্তে অভাগ্য আমরাই দলে দলে নিম্পিষ্ট হইয়া জীবলীলা সংবরণ করি—কিন্তু সেই স্থানেরই ইউরোপীয় পল্লীতে সে পীড়া প্রবেশ লাভ করিতে পারে না। অদৃষ্টবাদী সেখানেও অদৃষ্টেরই দোহাই দিবেন। আমি বলি, অদৃষ্টের ফল বলিতে হয় শেষে বলিও কিন্তু তাহার পূর্বে আমাদের প্রতিবাসীরা স্বাস্থ্যবিধানের যে নিয়মগুলি মানিয়া চলেন সেগুলিকে মানিয়া চলিলে কোন সুবিধা হয় কিনা একবার পরীক্ষা করিয়া দেখিলে ক্ষতি কি? আমার বিশ্বাস, যদি আমাদের ঘর দ্বার ও তাহার চতুঃপার্শ্ব বেশ সুপরিচ্ছন্ন থাকে, পানীয় জলের সুবন্দোবস্ত হয়, বস্ত্র ও অন্যান্য আবশ্যকীয় দ্রব্য বেশ সুপরিষ্কৃত অবস্থায় ব্যবহার করা যায়, আমরা যথাকালে জাগরিত ও নিদ্রিত হই, ভোজনে সংযম অভ্যাস করি, ইন্দ্রিয়সকলকে তাহাদের সংক্রান্ত হইতে রক্ষা করিয়া চলি এবং ব্যায়াম, অধ্যয়ন, উপাসনা, আনন্দ, প্রমোদ ও তদ্বিষয়ে সমস্ত নিয়মই যথাযথ পালন করিয়া চলি, তবে আধ্যাত্মিক ও আধিভৌতিক কোন পীড়ার আক্রমণ হইতে রক্ষা পাওয়া কিছুমাত্র দুষ্কর হয় না; কিন্তু উদ্যোগ চাই, ইহার জ্ঞান ঐকান্তিক চেষ্টার প্রয়োজন। ইহা সবেও যদি দেখি, আমরা অকাল মৃত্যুকে বাধা দিতে পারিতেছি না, তখন বুঝিব, নিয়তির কঠিন পাশ হইতে আমাদের উদ্ধারের আশা নাই। কিন্তু তাহার পূর্বে এ কথা উচ্চারণ করাও মহাপাপ।

অনেকে বলেন, অদৃষ্টবাদী বলিয়াই আমাদের দেশের লোকের চিন্তাবৃত্তি অস্বাভাবিক জাতির তুলনায় শাস্ত। ইহা হয়ত কতক পরিমাণে সত্ত্ব, কারণ আমাদের পূর্বপুরুষদের তপস্যা-লব্ধ তিতিক্ষা, উপরতি প্রভৃতি সাধনার ক্লেশ দ্বারা এখনও আমাদের অস্থি মজ্জায় গুপ্তভাবে সঞ্চারিত হইতেছে, কিন্তু তথাপি স্বীকার করিতে হইবে আমরাও যে আমাদের হৃর্তাগ্যকে সত্ত্ব চিন্তে স্বীকার করিয়া লইয়া থাকি ইহা সত্য কথা নহে। তবে হয়ত পাশ্চাত্য জাতিদের মত আমাদের ভোগপ্রবৃত্তি অতটা সুতীব্র নহে, কিন্তু ইহা যে কিসের পরিণাম তাহাও নির্ণয় করা কঠিন। কিন্তু এ বিষয়ে সন্দেহ কিছুমাত্র নাই যে, আমরাও ভোগলালসার বশবর্তী হইয়া বিষয়সমূহকে কামনা করিয়া থাকি, এবং বিষয় পাইলেই সুখী হই। সত্ত্বচিন্তিত হওয়া প্রকৃতই অদৃষ্টবাদের উপর নির্ভর করে না। মানুষের ভিতর হইতে যে আকাঙ্ক্ষা জাগিয়া উঠে, তাহাকে নিবৃত্ত করিবার দুইটি মাত্রই উপায় আছে। এক ভোগ্য বিষয়সমূহকে ভোগ করিয়া, দ্বিতীয়টি ভোগের পরিণামবিরম্ব ও ক্ষণস্থায়ী চিন্তা করিয়া তাহা হইতে নিবৃত্ত থাকা। এইটাই ভারতবর্ষের আৰ্য পন্থা। ইহাতেই ভোগেচ্ছা স্থায়ী ভাবে নিবৃত্ত হইতে পারে। প্রথমটির দ্বারা আকাঙ্ক্ষার সাময়িক নিবৃত্তি হইলেও উক্ত স্থায়ী সফল প্রদান করে না। সেই জ্ঞানই ভারতীয় ঋষিদিগের উপদেশ এই যে, আকাঙ্ক্ষিত ভোগ্যবস্তুর পিছনে পিছনে ছুটিয়া জীবনকে ব্যর্থ করিয়া লাভ নাই, ভোগ্যবস্তুর স্বরূপ অবধারণ করিয়া তাহা হইতে নিবৃত্ত থাকাই বুদ্ধিমানের কর্তব্য।

দ্বিতীয় অধ্যায়

দৈব ও পুরুষকার

অদৃষ্ট কি? “পূর্বজন্মকৃতঃ কৰ্ম্ম”ই তো অদৃষ্ট বা দৈব। না দৈব ভগবানের খেলা? যদি ভগবানকে আমাদের মত মনে কর, তবে কোন কথা বলারই প্রয়োজন হয় নাপার্থ দৈব কি? না। কিন্তু যিনি সত্য ও অমৃতস্বরূপ, পরিপূর্ণ মঙ্গল ও আনন্দই বাঁহার রূপ, তাঁহার রাজ্যে কি অবিচার হইতে পারে, না কোনও অনিয়ম ঘটিতে পারে? যিনি আছেন বলিয়া—

“ভয়াদস্মাগ্নিস্বপতি ভয়াৎ তপতি সূৰ্য্যঃ।

ভয়াদিস্তে’চ বায়ু’চ মৃত্যুর্ধাবতি পঞ্চমঃ ॥”

তাঁহার ইচ্ছা পরিপূর্ণ জ্ঞানময়ী। তাহাতে অজ্ঞানবিজ্ঞ স্ত্রিত কোন বাসনার ঔদ্ধত্য থাকিতে পারে না। পূর্ব জন্মের পাপ-পুণ্যানুসারেই লোকের কর্ম্মপ্রবৃত্তি জন্মিয়া থাকে। পাপ কর্ম্ম দ্বারা পাপের এবং পুণ্য কর্ম্ম দ্বারা পুণ্যের বৃদ্ধি হওয়ায়, উভয়বিধ কর্ম্মের উভয় প্রকারের এক একটি ‘অপূর্ব’ শক্তি জন্মিয়া থাকে, বাহাদের বলে উভয় প্রকারেরই এক একটি নূতন কর্ম্মের কারণ উৎপন্ন হয়; ইহা পূর্ব জন্মের কর্ম্মকে বাধা দিয়া বলপূর্বক আর একটি কর্ম্ম করায় বটে, কিন্তু এই কর্ম্মের কারণও তাহা হইলে সেই পূর্ব জন্মের কর্ম্মকেই বলিতে হইবে। তাহা যদি হয়, তবে এ কথা খুবই সত্য যে, আমাদের অদৃষ্ট আমরাই সৃষ্টি

করিতেছি; দৈব বলিয়া কোন একটা বলবান দৈত্য আমাদের পথ আঙুলিয়া বসিয়া নাই। স্বকর্ম্মের ফলপ্রাপ্তিই অদৃষ্ট, ইহা ছাড়া দৈব আর কিছুই নহে; সুতরাং, যে অদৃষ্টকে আমরা কর্ম্ম-বশে ছরদৃষ্টে পরিণত করিয়াছি, যদি আমরাই উদ্যোগী হইয়া মৎকর্ম্মশীল হই, তবে অদৃষ্টের সেই চক্রনেমিই আবার বিপরীত দিকে বিঘূর্ণিত হইয়া শুভফল দানে সমর্থ হইতে পারে। পূর্ব-কৃতকর্ম্মফলের বশে দারিদ্র্য, ক্রেশ, ব্যাধি যদি আসিয়া থাকে, আবার সেই নিয়মবলেই শুভ কর্ম্মের অনুষ্ঠানে স্বাস্থ্য, আরোগ্য, বিত্ত, চিত্তপ্রসন্নতা, উৎসাহ প্রভৃতি সৌভাগ্যশ্রী একে একে আসিয়া আমাদের আশ্রয় করিবে। “কর্ম্ম ফলায়ত্তম্”, ফল কর্ম্মেরই অধীন। শুভ কর্ম্মে শুভ ফল, অশুভ কর্ম্মে অশুভ ফল ফলিবে, ইহাই ভগবানের বিধান। তখন, ‘হা কষ্ট, হা বিধাতা, হা অদৃষ্ট’ বলিয়া উন্নতের মত ব্যাকুল হইয়া বেড়াইলেও কোন ফল নাই। কাঁদিয়া ধরাতল সিঞ্চিত করিলেও কোন লাভের আশা নাই।

জগৎ কর্ম্মক্ষেত্র। আমরা সকলেই এখানে কর্ম্ম করিতে আসিয়াছি। সুতরাং, অনাবশ্যক বাক্যব্যয় করায় বা নিজের অদৃষ্ট ভাল কি মন্দ, তাহা নির্ণয়ের জন্ত পুরুষকার গণৎকারের দ্বারস্থ হওয়ার লাভ কি? বরং বৃকে বল বাঁধিয়া কর্ম্মক্ষেত্রে কাঁপাইয়া পড়াই কর্তব্য। কর্ম্ম না করিলে যখন কোন উপায় নাই, তখন কর্ম্ম দ্বারা কর্ম্মপাশ ছিন্ন করিবার উত্তমই বুদ্ধিমানের কার্য। কোন মহাপুরুষ বলিয়াছেন, “যদি ইচ্ছুতে প্রবল চাপ না দিলে রস না বাহির হয় তবে নিরুপায়; চাপ দিতেই হইবে। শত্রু বেদনা

বিনা যদি চিন্তে প্রেমের উৎস উৎসারিত না হয়, তবে দাও প্রভো ভীষণ ষাতনা।” এই তো মানুষের মত কথা, বীরোচিত বাক্য, ইহাই তো ভক্তের বাণী। অনবরত “পুত্রং দেহি, যশো দেহি, ভাগ্যং ভগবতি দেহি মে” এই বলিয়া তাঁহার নিকট আশ্রয় করিব, আর প্রত্যহই পরম ঔদ্ধত্যভরে তাঁহার সমস্ত আদেশ অমান্য করিব—ইহারই নাম যদি ভক্তি হয়, তবে অবিশ্বাস ও অভক্তি আর কাহাকে বলে, জানি না।

তাই বলিতেছি, আবার যদি আমরা সচেতন হই, সবল হই, আবার যদি আমরা উজ্জ্বল হই, কৰ্মনিষ্ঠ হই, তবে শুভাদৃষ্ট সঞ্চিত হইবার পক্ষে কোন বিঘ্ন ঘটবারই সম্ভাবনা নাই। এক্ষেত্রে যে দেশব্যাপী দারিদ্র্য, দুঃখ—ইহাই সমস্ত দেশবাসীর অশুভ কৰ্মের ফল। এই যে দুঃখ এবং সুখ, দারিদ্র্য এবং সম্পদ, গীড়া এবং অনাময়, এ সমস্তই ব্যক্তিগতভাবে নিজের এবং ব্যাপকভাবে সমাজের দুষ্কৃতির ও সুকৃতির ফল। আমাদের দেশে এই সকলের জন্ম পূর্বের রাজাকে দায়ী করিত। কারণ, রাজাই সমস্ত সমাজের এবং প্রভার প্রতীক। এ বিষয়ে পরম প্রাজ্ঞ ভীষ্মের রাজ্যধি-রাজ ধর্মানুপ্রিয় যুধিষ্ঠিরকে সুন্দর একটি উপদেশ দিয়াছিলেন; ইহাতে পুরুষকারের অপূর্ব শক্তির কথা প্রকাশ পাইয়াছে। এ কথা স্বর্ণাক্ষরে হৃদয়ে অঙ্কিত করিলে, অনেক দুঃখ-দুর্গতি হইতে আমরা মুক্তিলাভ করিতে পারি। কথাটা উঠিয়াছিল যুগ পরিবর্তনে মানবের চরিত্র পরিবর্তিত হয়, না মানবের চরিত্র পরিবর্তনের সহিত যুগের পরিবর্তন হয়? কথাটা হাসিয়া উড়াইয়া দিবার মত নহে, যত্নের সহিত বিবেচ্য। বার্ষিক্য কেন

হয়?—না যৌবনের দোষে। যদি যৌবনে কেহ অকলঙ্ক জীবন কাটাইতে পারে, সর্বপ্রকার নিয়মকে শ্রদ্ধার সহিত মানিয়া চলিতে পারে, তাহা হইলে সেই অরোগী অপ্রমাদীর বয়স ফুরাইলেও যৌবন যায় না। আর যে অত্যাচারী, অসংযমী, তাহার যৌবনেই জরা উপস্থিত হয়। এমন কিছু ধরাবাঁধা নিয়ম নাই যে, চল্লিশ ফুরাইলেই যৌবন যাইবে, এবং চল্লিশের মধ্যে থাকিলেই যৌবন থাকিবে। যে রাখিতে জানে, তাহারই যৌবন থাকে। সুতরাং, যৌবন বা জরা এই যে কাল ইহা পুরুষের চেষ্টা ও সামর্থ্যের উপর নির্ভর করিতেছে। কালের প্রভাব যে নাই তাহা বলা চলে না। কালের পরিবর্তনের সহিত জীবের স্বভাবের পরিবর্তন হয়। কিন্তু জীবের স্বভাবের পরিবর্তনের সঙ্গে কালের পরিবর্তনও অস্বাভাবিক নহে। কেন যে জীবের স্বভাবের পরিবর্তন ঘটে তাহার কারণ নির্ণয় করা কঠিন। এক হইতে পারে যে, জীবের সমষ্টি কৰ্ম ও সমষ্টি বাসনার ফলরূপে এই পরিবর্তন ঘটে, কিন্তু কেন যে কৰ্ম ও বাসনা ধীরে ধীরে পরিবর্তিত হয়, তাহা অচিন্তনীয়। যে কালে যে রূপে যে জীব-সমূহের আবির্ভাব হয়, তাহাদের পূর্ব কৰ্মানুরূপ ভোগাদি প্রাপ্তির জন্ম পৃথিবী, জল, বায়ু প্রভৃতির সেই সেই রূপ পরিবর্তন ঘটা সম্ভব। কিন্তু মনুষ্যের ভোগাদি যখন তাহার স্বীয় কৰ্মের উপরই নির্ভর করে, তখন সত্য, কলি বলিয়া যুগসমূহের স্বতন্ত্র অস্তিত্ব—ঋতুসমূহের মত—থাকিলেও তাহার প্রভাবকে বৃদ্ধি ও হ্রাস করা মনুষ্যের আয়ত্তের মধ্যে। কলি আসিল বলিয়াই যে লোকে মন্দমতি হয় তাহা নহে, মন্দমতি জীবের প্রাচুর্যে সত্য-

কালও কলিকালে পরিণত হয়। এইরূপ কলিকালও সত্য-কালে পরিণত হইতে পারে। সত্য ত্রেতাাদি যুগেও বেণু রাজা, হিরণ্যকশিপু, রাবণাদির আবির্ভাব হইয়াছিল, আবার কলিযুগেও বুদ্ধদেব, অশোক, শঙ্করাচার্য্য ও চৈতন্যদেবের আবির্ভাব হইয়াছিল, এবং তাঁহাদের প্রভাবে এই কলিযুগই সত্যযুগের মত হইয়া গিয়াছিল। তাই ভীষ্মদেব বুঝাইতেছেন যে, কাল রাজার কারণ নহে, রাজাই কালের কারণ; এবং এ বিষয়ে তোমার সন্দেহ করিবার প্রয়োজন নাই। রাজা যখন দণ্ডনীতি অনুসারে সূচাক্রমে রাজ্য প্রতিপালন করেন তখনই সত্যযুগ নামে শ্রেষ্ঠ কাল উপস্থিত হয়। ঐ কালে বিন্দুমাত্রও অধর্ম্মসঞ্চার হয় না। সকল বর্ণেরই অস্ত্রঃকরণ বর্ষ্যবিষয়ে আসক্ত থাকে। প্রজাগণ অলঙ্ক বস্ত্র লাভ ও লঙ্ক বস্ত্র পরিবর্দ্ধন করে। বৈদিক কর্ম্মসমুদয় দোষশূন্য হয়; ধাতু-সকল নিরাময় ও সুধাবহ হইয়া উঠে। মানবগণের স্বর, বর্ণ ও মন নির্মল হয়। ব্যাধিসমুদয় তিরোহিত হইয়া যায়। প্রজাগণ দীর্ঘায়ুঃ হইয়া কালযাপন করে। বিধবা স্ত্রী বা কুপণ পুরুষ কুত্রাপি দৃষ্টিগোচর হয় না। পৃথিবী কৃষ্ট না হইয়াও শস্য উৎপাদন করে। ওষধি, ঙ্ক, পত্র ও ফল-মূল সমুদয় তেজঃ-সম্পন্ন হইয়া উঠে। অধর্ম্ম এককালে তিরোহিত হয় এবং ধর্ম্ম সর্বত্র পরিব্যাপ্ত হয়। সত্যযুগে এইরূপ ধর্ম্মেরই প্রাচুর্য্য হইয়া থাকে। রাজা যখন চতুষ্পাদ দণ্ডনীতির তিন পাদ গ্রহণ করিয়া রাজ্য পালন করেন, সেই কালকে ত্রেতাযুগ বলে। পাপ এক পাদ মাত্র সঞ্চারিত হয়। তখন পৃথিবী কৃষ্ট না

হইলে, প্রচুর পরিমাণে শস্যোৎপাদনে সমর্থ হয় না। যখন রাজা দণ্ডনীতির অর্দ্ধাংশ পরিত্যাগপূর্ব্বক অর্দ্ধাংশ গ্রহণ করিয়া প্রজাপালন করেন, সেই কালকে দ্বাপর যুগ বলে। দ্বাপর যুগে ধর্ম্মের দুই পাদ ভূমণ্ডলে সঞ্চারিত হয়। তখন পৃথিবী কৃষ্ট হইয়াও সত্যযুগে শকুণ্টাবস্থায় যে ফল উৎপাদন করিত, তাহার অর্দ্ধেক ফল উৎপাদন করে। যে সময়ে নরপতি একবারে দণ্ড-নীতি পরিত্যাগ পূর্ব্বক প্রজাগণকে বিবিধ প্রকারে কষ্ট প্রদান করেন, সেই কালকে কলিযুগ কহে। কলিযুগে সকলেই প্রায় অধর্ম্মানুষ্ঠানে নিরত হয়। ধর্ম্মানুষ্ঠান তিরোহিতপ্রায় হইয়া যায়। সকল বর্ণেরই স্বধর্ম্ম ত্যাগে প্রবৃত্তি জন্মে, শূদ্রেরা ভিক্ষা-বৃত্তি ও ব্রাহ্মণেরা দাস্যবৃত্তি অবলম্বন করিয়া জীবিকা নির্ব্বাহ করে। সমুদয় লোকই মঙ্গলহীন এবং সর্বত্র বর্ণসঙ্কর প্রাচুর্য্য হয়। বৈদিক কার্য্য সকল অপরিশুদ্ধ ও ধাতুসকল ক্লেশকর ও রোগজনক হইয়া উঠে। মনুষ্যগণের স্বর, বর্ণ ও মনোবৃত্তি হ্রাস হইয়া যায়। নানা প্রকার ব্যাধি ও অকাল মৃত্যু জীবগণকে আক্রমণ করিতে আরম্ভ করে। রমনীগণ বিধবা ও প্রজাগণ নৃশংস হইতে থাকে। নিরুপিত সময়ে বৃষ্টিপাত বা শস্যোৎপত্তি হয় না, এবং সমুদয় রসহীন হইয়া যায়। অতএব রাজাকেই সত্য, ত্রেতা, দ্বাপর ও কলিযুগের কারণ বলিতে হইবে। রাজাদিগের ব্যবহার নিবন্ধন সত্য, ত্রেতা, দ্বাপর ও কলিযুগের উৎপত্তি হইয়া থাকে। এই নিমিত্তই রাজা যুগস্বরূপ বলিয়া কীর্তিত হন।

উপরি উক্ত আধ্যাত্মিক হইতে স্পষ্টই প্রমাণিত হয় যে,

আমরাই এই সকল মুখ-হুঃখ, রোগ-অনাময় ও সুভিক্ষ-দুভিক্ষের
হেতু; কারণ, আমরা সকলে যেমন কর্ম করিব, আমাদের
কর্মফলও সেইরূপই প্রস্তুত হইতে থাকিবে। এই যে শস্যশ্যামল
সজল দেশে প্রতিক্রম স্থায়ী আসন গ্রহণ করিয়াছে, নিত্য নব নব
ব্যাধি ও পীড়ার আক্রমণে লোকে অবিরত উৎপীড়িত হইতেছে,
ইহাতেই বুঝা যায় আমাদের পাপ 'চারি পোয়া' পূর্ণ হইয়াছে।
আবার যদি আমরা এই সকলের প্রতিকারের জন্য পুণ্যসঙ্কে
সচেষ্টি হই, তবে আবার বস্তুরা শস্যপূর্ণা ও সমস্ত প্রজার রোগ-
হীন আনন্দমাখা মুখ সমুজ্জ্বল হইয়া উঠিতে পারে। ধনে ধাত্তে,
জ্ঞানে পুণ্যে সমস্ত দেশ পরিপূর্ণ হইয়া উঠিতে পারে। কিন্তু
হায়! ইহা যে আমাদের সকলের শুভ কর্মের উপরই নির্ভর
করিতেছে।

এখন আমরা প্রায় সকলেই অধর্মের 'গা ভাসান' দিয়াছি,
সুতরাং আমাদের চরিত্রগত বল ক্রমশঃই হ্রাসপ্রাপ্ত হইতেছে।
তাই দেশের লোক আর তেমন করিয়া দেশের কথা ও দেশ-
বাসীর কথা ভাবে না, মানুষ হইয়া মানুষের কষ্টের কথা বোঝে
না। ইহা কি অত্যন্ত মানসিক অবনতির অবস্থা নহে? এ অবস্থা
হইতে মুক্তিলাভ না করিলে মনুষ্যহলাভে আমরা চিরকালই
বঞ্চিত থাকিব। দেশে রোগ, দেশে দুর্ভিক্ষ, দেশের অধিকাংশ
লোক মূর্খ ও অজ্ঞান। ধনবানেরা বিলাস প্রমোদে মত্ত, দুর্ভিক্ষ-
দিগের দিকে একবার তঁহাদের তাকাইবারও অবকাশ নাই।
এই সকল জাতিগত ও সমাজগত দুর্বলতা আমাদেরকে ঘেরিয়া
আছে। যদি ইহা হইতে নিকৃতি পাইবার পথ অন্বেষণ না করি,

তবে সমস্ত পাপের বোঝা বৃহৎ ভারের মত আমাদের কন্ধে
চাপিয়া বসিবে এবং তাহা হইতে উদ্ধার পাইবার কোনও আশা
থাকিবে না। তাই বলিতেছি, আবার এই সুপ্ত অলস
হৃদয়কে জাগ্রত করিয়া তোল। ধন, শক্তি, বিদ্যা—যাহার যাহা
আছে—সমস্তই আজ বিশ্বেশ্বরের পাদপদ্মে অঞ্জলি দিবার জন্য
আপনাকে প্রস্তুত করিয়া তোল। তবে তোমার উন্নতি হইবে,
দেশবাসীর উন্নতি হইবে, দেশের উন্নতি হইবে, এবং এই পৃথিবীর
কল্যাণ সাধিত হইবে। প্রথমে কর্ম করিবার যোগ্যতা লাভ করা
চাই, এবং এজন্য লৌকিক বিদ্যা, ধন ও স্বাস্থ্য প্রচুর পরিমাণে
থাকা আবশ্যিক। বিদ্যা, ধন ও স্বাস্থ্য জীবনের প্রধান শক্তি,
সুতরাং এই তিনটি লাভের যাহা অন্তরায়, তাহা দূর করিবার
জন্য সমাজস্থ ও দেশস্থ সকলেরই প্রাণপণে চেষ্টা করা নিতান্ত
আবশ্যিক। যে স্বাস্থ্যহীন, সে অকর্মণ্য। তাহার দ্বারা কোন শুভ
কার্য হইবার আশা করা বিড়ম্বনা মাত্র। এই জন্য শরীরকে
সবল, পুষ্ট, সুস্থ ও কষ্টসহিষ্ণু করিবার জন্য, স্বাস্থ্যকর আহার,
বিশুদ্ধ পানীয় ও নির্মল বায়ু সেবন, যথাবিধি অঙ্গচালনা, ব্যায়াম
এবং ইন্দ্রিয় সংযম আবশ্যিক। এই সকলের জন্য আবার
অর্থের আবশ্যিক। সুতরাং সচুপারে অর্থ সংগ্রহ করিতে হইলে
বিদ্যাজ্ঞানের নিমিত্ত যত্নবান হইতে হইবে। অর্থোপার্জন
জন্য শারীরিক ও মানসিক পরিশ্রম করিতে হয়—এই জন্য
সুখাচ্ছ ভোজন, স্বাস্থ্যকর স্থানে বাস ও নিয়মিত ব্যায়াম, ক্রীড়া
প্রভৃতি করা আবশ্যিক। এই সকল বিষয়ে অবহিত হইলে
আমরা আধিভৌতিক বল লাভে একপ্রকার সমর্থ হইব।

তারপর হিত, অহিত, হেয় উপদেশ প্রভৃতি কি তাহা জানা এবং এই সকলের ত্যাগ ও গ্রহণের জ্ঞান মানসিক পটুতা ও বিচারবান হওয়া আবশ্যিক। সে জ্ঞান সন্ধিষ্ঠার আলোচনা এবং সজ্জন সমাজে যাতায়াত আবশ্যিক। কাম ক্রোধাদি রিপুসমূহ বিষয়াদি সংস্পর্শে অধিকতর উত্তেজিত হয়, তাহাদিগকে গ্রাহ্য পথে পরিচালনার জ্ঞান মনের দৃঢ়তা, সত্যভাষণ, কর্তব্যবুদ্ধি, সচ্চিন্তা, সদগ্রন্থের আলোচনা ও পরোপকারাদি বৃত্তিসমূহকে মার্জিত ও উন্নত করা একান্তই প্রয়োজন। সর্বোপরি আধ্যাত্মিক বৃত্তিসমূহকে সুপুষ্টি রাখা কর্তব্য হইবে এবং সে জ্ঞান দেব দ্বিজ গুরু ও প্রাজ্ঞের সেবা, সাধন ভজন, বৈরাগ্য ও সাধুসঙ্গ করার একান্ত প্রয়োজনীয়তা আছে। এই সকলের যথাযথ অনুষ্ঠানে জ্ঞান ও ভক্তির উদয় হয় এবং তাহার ফলে ধৈর্য্য, সন্তোষ, জ্ঞান ও শাস্তির বিকাশ হয়। চেষ্টা ও উদ্যোগ সহকারে আধিভৌতিক আধিদৈবিক ও আধ্যাত্মিক এই ত্রিশক্তিকে জাগ্রত করিতে পারিলেই আমাদের জীবন যথার্থ ভাবে কৃতকৃত্য ও ধন্য হইতে পারে।

পূর্ব কর্মফলে যে অদৃষ্ট সঞ্চিত হইয়া আছে, তাহার ফল ফলিতে আরম্ভ হইয়াছে; কিন্তু তাহার নিদারুণ অংশ ফলদানোন্মুখ হইবার পূর্বেই যদি আমরা শুভকর্মের দ্বারা শুভাদৃষ্ট সঞ্চয়ে আগ্রহ প্রকাশ না করি, তবে ভীষণ বিনাশ হইতে আমরা দিগকে কেহই রক্ষা করিতে পারিবে না।

তৃতীয় অধ্যায়

পুরুষকার

যোগবাশিষ্ঠের মুমুক্শু প্রকরণে জ্ঞানগুরু বশিষ্ঠদেব ত্রিলোক-পাবন শ্রীরামচন্দ্রকে নিম্নলিখিত উপদেশগুলি প্রদান করিয়া ছিলেন :—

“দৈবই বল প্রদান করে ইহা মৃত্যুর কল্পনা, কেননা পুরুষকার ভিন্ন সিদ্ধিলাভ সম্ভব নহে। সংপথ আশ্রয়পূর্বক কায়মনোবাক্যে সংকার্য্যের অনুষ্ঠান করাকেই পৌরুষ কহে। পৌরুষ কাহাকে দুর্বল ও বলবানে যুদ্ধ ঘাটিলে যে রূপ দুর্বলের বলে? পরাজয় হয়, দৈব ও পৌরুষ এই উভয়ের মধ্যে তেমনি দৈবেরই পরাজয় হইয়া থাকে। যে রূপ লজ্বনা দ্বারা অজীর্ণাদি রোগের উপশম হয়, তদ্রূপ ঐহিক পৌরুষ প্রাক্তন পৌরুষকে বিনষ্ট করে। কতশত মহাপুরুষ দৈবদুর্ভাগ্যকে দুর্নিবার দারিদ্র্যজনিত দুঃখে পতিত হইয়াও, পরে পুরুষকারপ্রভাবে মহেন্দ্রসাদৃশ্য লাভ করিয়াছেন। পুরুষকার বলে বৃহস্পতি দেবগণের ও গুত্র দৈত্যসমূহেরও আচার্য্য হইয়াছেন। দীন হীন পুরুষকার বড় না সামান্য ব্যক্তির পুরুষকারের আশ্রয়ে ইন্দ্র-দৈব বড়? তুল্য ঐশ্বর্য্য লাভ করে। পৌরুষবলেই পুরুষের অতীষ্টসিদ্ধি ও বুদ্ধিবিক্রম বুদ্ধিপ্রাপ্ত হইয়া থাকে। দুঃখের সময়ে নির্ব্বুদ্ধিতাবশতঃ দৈব আশ্রয় করা মনকে আশ্বাস দেওয়া মাত্র।

যাহার পৌরুষ নাই, সে আপনার অপেক্ষা উন্নতিশালী ব্যক্তি-
দিগের উন্নতিকে দৈবমূলক মনে করে। দৈবই যদি সমস্ত করে,
তবে অস্ত্রের নিকট উপদেশ গ্রহণের প্রয়োজন কি ?”

“ অদৃষ্টের অর্থ, যাহা দেখা যায় না। কার্যের মধ্যে যে ফল
নিহিত আছে তাহা বাস্তবিক কেহ দেখিতে পায় না অর্থাৎ
যাহা চেষ্টা ও পুরুষকারের সাহায্যে আয়ত্ত করিতে হয়।

গোলাপের কলমে তাহার নবীন পত্র-পল্লব,
দেব কি? পুষ্প-গন্ধ বা শোভা কিছুই থাকে না; জল-
সেচন করিতে করিতে, যত্ন করিতে করিতে

সেই কণ্টকমাত্রসার, শুষ্কপ্রায় শাখা হইতে নবীন পত্র-পল্লব
উদগত হইতে থাকে। ক্রমশঃ চেষ্টার ফলে তাহা বৃক্ষাকারে
পরিণত হয়, নব-নব পত্র-পল্লবে বিভূষিত হইয়া উঠে, এবং
আরও অধিকতর যত্নের ফলে পল্লবগুলিকে ভিন্ন করিয়া নবীন
শোভায় নব কলিকারাদি অঙ্কুরিত করে। কালক্রমে তাহাই
আবার পূর্ণ বিকাশ লাভ করিয়া অতুলনীয় সৌন্দর্য্য ও গন্ধে
জগৎকে মুগ্ধ করে। ইহা যদি আশ্চর্য্যজনক ও বিস্ময়কর না
হয়, দৈবপ্রভাব না হয়, তবে মনুষ্যের মধ্যে যে সুশুণ্ড গুণাবলী
বর্তমান রহিয়াছে, চেষ্টা ও যত্ন করিলে কেন তাহা প্রকাশিত ও
প্রস্ফুটিত না হইবে ?

অনেকে বলেন, দেখা যায় যে যথেষ্ট আগ্রহ, যত্ন, চেষ্টা
করিয়াও এক জনের কাজ সকল হয় না; আবার আর একজন
কিছুমাত্র চেষ্টা না করিয়াও, যথেষ্ট ফল লাভ করে; তখন
তাহাকে দৈব বলিব না তো কি বলিব? বরং ইহাই বুঝিব, যে

দৈবই বলবান, পুরুষকার নিষ্ফল চেষ্টামাত্র। অবশ্য, কতকগুলি
ঘটনা যে এরূপ ঘটে তাহা নিশ্চিত; তাহা হইলেও, পুরুষকারকে

নিরর্থক বলা চলে না। কারণ, তুমি যাহাকে
পুরুষকার কি দৈব বলিতেছ, তাহা পূর্বজন্মেরই কর্মফল।
নিষ্ফল চেষ্টা মাত্র?

পূর্বকৃত কর্মফলে যদি কাহারও খনলাভ
স্থির হইয়া থাকে, তবে স্বল্প চেষ্টা করিলে তাহার চলে বটে,
কিন্তু যাহার কর্মফলে দুর্ভাগ্যের সহিত, প্রতিকূল অবস্থার
সহিত বিরোধ করা অবশ্যস্বাবী হইয়া পড়ে, তাহার পুরুষ-
কার ভিন্ন আর উপায় কি? যতই অদৃষ্ট বিরূপ ও বিরুদ্ধ
শত্রুক, পুরুষকার দ্বারা কতকটা যে ভাগ্যের পরিবর্তন
ঘটাইতে পারে যায়, সে বিষয়ে সন্দেহ করা নিরর্থক।

পতিব্রতা সাবিত্রী ও রাজর্ষি ক্রবের জীবন
পুরুষকার সর্বথা
অবলম্বনীয় কেন? ইহার উজ্জ্বল দৃষ্টান্ত স্থল। তবে অবশ্য, সময়ে
সময়ে দৃষ্টান্তও দেখা গিয়াছে যে, সূচিস্থিত

পুরুষকারেও কোন ফল হয় নাই। ইহাতে পুরুষকারের কোন
দোষ নাই; সেখানে বৃষ্টিতে হইবে কোন উৎকট অতীত কর্ম
ফলদানোমুখ হইয়াছে, এবং সেই জন্মই তাহা ভীষণ বাধারূপে
বর্তমান উত্তত কর্মচেষ্টাকে ব্যর্থ করিবার প্রয়াস করিতেছে।
কিন্তু এরূপ বাধা অধিকাংশ স্থলে অধিক দিন থাকিতে
পারে না। কর্মফলের পরিভোগান্তে তাহা নবীন পুরুষকার-
শক্তিকে পথ ছাড়িয়া দিতে বাধ্য হয়, এজন্য শুদ্ধ ধৈর্য্য
আবশ্যক। যোগবাশিষ্ঠে আছে যে, পূর্বজন্মের কর্মফল, আর
এ জন্মের কর্ম, এই দুইটি পরস্পরকে পরাজয়েচ্ছ মেঘঘয়ের

মত বন্দন্য করে, এবং যাহার শক্তি কম হয়, সেই পরাক্রান্ত হয়। ঐহিক প্রবল পুরুষকার দ্বারা প্রাক্তন অশুভ কর্ম-ফল বিনষ্ট হইয়া থাকে। প্রাক্তন বশে যাহা পাওয়া যায় তাহাও তো পুরুষকারেরই ফল। অতএব পুরুষকারই অবলম্বনীয়।

শাস্ত্র, গুরুবাণী ও বিচার, এই তিনটিকে অবলম্বন করিয়াও যদি দেখা যায় যে, ইষ্টলাভ হইতেছে না, তাহা হইলে বুঝিতে হইবে, পূর্বের দুষ্কৃত ফল এখনও প্রবল রহি-পুরুষকার ব্যর্থ য়াছে। সুতরাং সেখানে আমার কর্তব্য এই হইলে কি উপায় হইবে যে, আরও দুষ্কৃত করিয়া শুভাদৃষ্ট গ্রহণ করা কর্তব্য? সক্ষয় করা, এবং পুরুষকারকে আরও প্রবল করিয়া তোলা। যে এই প্রযত্ন না করে, সে আত্মশক্তিকে অপমানিত করে। তাহার পক্ষে সম্বলতা-লাভ কখনই সম্ভবপর হয় না। তাই গীতায় ভগবানের উপদেশ যে,—

“অসংযতান্না যোগো হুপ্রাপ ইতি মে মতিঃ।

বশ্যান্না তু যততা শক্যোহবাশু যুগায়তঃ ॥”

অভ্যাস ও বৈরাগ্য দ্বারা যাহার চিত্ত সংযত হয় নাই, তাহার পক্ষে যোগ হুপ্রাপ্য, ইহা আমার মত। বশ্যান্না যে, অর্থাৎ চিত্ত যার বশবর্তী, তিনি অভ্যাস ও বৈরাগ্যরূপ উপায় দ্বারা প্রযত্ন করিলে যোগপ্রাপ্ত হইতে পারেন।

ঋষি বিখ্যামিত্র ক্রিয় হইয়াও এই প্রযত্নের ফলেই ব্রহ্মবি

হইয়াছিলেন; এবং ঐব পুরুষকার দ্বারাই ভগবৎসাক্ষাৎকারলাভে সমর্থ হইয়াছিলেন। যত্ন চেষ্টা না করিলে, জগৎসেই দৈবকে কিছুই হইবার নহে। যুগ কখনো সুপ্ত বড় মনে করে। সিংহের মুখে স্বয়ং আসিয়া প্রবিষ্ট হয় না। যাহারা পৌরুষবিহীন তাহারাই দৈবকে বড় বলিয়া মানে। যদি গভ জন্মের পুরুষকার (অর্থাৎ দৈব) এক্ষণের পুরুষকারকে ব্যর্থও করে, তথাপি পুরুষকারই অব-লম্বনীয়; কেননা এইজন্মের পুরুষকার পরজন্মে দৈবশক্তি-রূপে আবির্ভূত হইবে। গীতায় আছে—

“ভ্রুং তং বুদ্ধিসংযোগে লভতে পৌর্কদেহিকম্।

যততে চ ততো ভূয়ঃ সংসিদ্ধৌ কুরুনন্দন ॥

পূর্বাভ্যাসেন তেনৈব ত্রিয়তে জবশোহপি সঃ।”

(৬ষ্ঠ অঃ)

যোগজ্ঞেয় ব্যক্তি পৌর্কদেহিক বুদ্ধিসংযোগ লাভ করেন; এবং উহা লাভ করিয়া এ জন্মে পূর্কদেহাশুভিত কর্মসংসাধনে অধিক-তর প্রযত্নপর হন। তিনি অনিচ্ছুক হইলেও পূর্ককৃত অভ্যাস তাঁহাকে অবশ করিয়া পূর্ককৃত কর্মে প্রবর্তিত করে।

দেখা গেল এই যে অধিক প্রযত্ন করিবার ইচ্ছা, ইহাও পূর্ককর্মসাপেক্ষ। যদি গভ জন্মের কর্ম ভাল নাই থাকে, এবং তৎকর্তৃ যদি স্বাভাবিক সংপ্রবৃত্তির নূনতাই ঘটিয়া থাকে, তাহা হইলেও দস্তে দস্ত নিষ্পেবণ করিয়া অসৎকর্মকে বাধা দিবার ক্রম প্রাণপণ চেষ্টা করিতে হইবে। কারণ এ জন্মে যদি চেষ্টা না করি, তবে আগামী জন্মে বাধা আরও প্রবল-

রূপ ধারণ করিয়া আমরাগিকে অধঃপাতিত করিবার চেষ্টা করিবেই করিবে। পাশ্চাত্য জ্ঞানীদিগের শীর্ষস্থানীয় মহাশয় সফ্রেটিসকে একজন মুখচিহ্নাভিজ্ঞ (Physiognomist) ব্যক্তি বলিয়াছিলেন যে, তিনি বড় কামুক। তাহাতে তাঁহার শিষ্যমণ্ডলী ত্রুদ্ব হইয়া সেই গণৎকারকে লাঞ্চিত করিতে চেষ্টা করে। তখন সত্যপ্রিয় সফ্রেটিস শিষ্যদিগকে বাধা দিয়া বলেন, “কেন তোমরা উঁহাকে পীড়ন করিতেছ? উনি সত্য কথাই বলিয়াছেন; বাস্তবিকই আনি ভয়ানক কামুক। তবে সাধারণ লোক হইতে আমার পার্থক্য এই যে, আমি উদ্দাম ইন্দ্রিয়কে বলপূর্বক অশ্রীর কৰ্ম হইতে নিবৃত্ত রাখিতে পারি, অশ্রী লোকে তাহা না পারিয়া অশ্রীর কৰ্ম করিতে বাধ্য হয়।” ইহা দেবায়ী প্রকৃতির হস্ত হইতে পুরুষকার দ্বারা কিরূপে নিষ্কৃতি পাওয়া যাইতে পারে, তাহারই একটি উৎকৃষ্ট উজ্জ্বল দৃষ্টান্ত। এইরূপ প্রযত্ন সকলকেই করিতে হইবে; নচেৎ এ জন্ম তো গেলই, জন্ম জন্মান্তরও নষ্ট হইয়া যাইবে।

অবশ্য একটি কথা মনে হয় বটে যে, সাধক সাধ্যবস্ত লাভের জন্ম প্রাণপাত করিয়া চেষ্টা করিতেছেন, অথচ সিদ্ধি মরুভূমির মরীচিকার মত অনায়ত্ত্ব হইয়া রহিল। এরূপ অবস্থায় নবীন সাধকের পক্ষে ধৈর্য্য রক্ষা করা কঠিন নহে কি? কঠিন তো বটেই কিন্তু তথাপি চেষ্টা বা পুরুষকারের সাহায্যে এই দুর্গম ভীষণ পথকে অতিক্রম না করিলেই নয়। জ্ঞানীরা এই জগুই ইহাকে ক্ষুরধার দুর্গম পথ বলিয়া নির্দেশ করিয়াছেন। বহু চেষ্টাতেও যখন বাঞ্ছিতবস্তুপ্রাপ্তি নিতান্তই অসাধ্য হইয়া পড়ে, তখন

সাধকের প্রাণে শতবৃশ্চিকদংশনজ্বালা অনুভূত হয় সত্য, তবুও যিনি ক্ষোভে ছুঃখে ব্যাকুল না হইয়া নিরন্তর পুরুষকারে বাধা তাঁহার উত্তম চেষ্টাকে নাগ্নিকের অগ্নির দ্বিগ্ন সিদ্ধিলাভ। মত জ্বালাইয়া রাখেন, এবং বৎসের প্রতি হ্রতবৎসা গাভীর স্থায় দৃষ্টিকে সেই লক্ষ্যাভি-মুখেই একান্ত উন্মুগ করিয়া রাখেন, সহশ্র বিঘ্ন পুনঃ পুনঃ বাধা দিয়াও বাঁহাকে নিরুৎসাহ করিতে পারে না, সেই সার্থকজন্ম পুরুষেরই সিদ্ধি করতলগত হয়। তাঁহার ছুঃখের ঘনঘোরঘটা অপসারিত করিয়া সাধনাসিদ্ধির নিশ্চল কোমুদী সমস্ত চিন্তা-কাশকে এক অপূর্ব জ্যোৎস্নায় বিনশিত করিয়া তুলে।

বৃদ্ধদেবের কথা তো সকলেই শুনিয়াছেন। তপস্যায় দেহ কঙ্কালসার হইয়াছে, প্রাণ কণ্ঠাগত হইয়াছে, তথাপি তিনি সুমেফর স্থায় অটল। বিবিধ নায় ও রাশি রাশি প্রলোভন তাঁহার তপোভঙ্গ করিতে প্রাণপণ চেষ্টা করিতে লাগিল, কিন্তু সেই আদর্শ তপস্বীর তপস্যেজের নিকট সেই সমস্ত কাম্যবস্ত ও মায়ামোহ ভস্মীভূত হইয়া গেল। তিনি গন্তীরশ্বরে বলিলেন :—

“ইহাসনে শুশ্রূ মে শরীরং
স্বগস্থিমাংসং প্রলয়ঞ্চ যাতু।
অপ্রাপ্য বোধিং বহুকল্পদুর্লভাং
নৈবাসনাৎ কায়মিতশ্চলিয্যতে ॥”

এই আসনে আমার শরীর শুষ্ক হইয়া যাক, হৃক অস্থি মাংস নষ্ট হউক তথাপি বহুকল্পের দুর্লভ যে জ্ঞান তাহাকে

লাভ না করিয়া কিছুতেই আসন ছাড়িয়া উঠিব না।—এই ত
যথার্থ পুরুষকার !

পুরুষকার করিতে হইবে বলিয়াই যে, যে-সে কৰ্মে তাহার
প্রয়োগ বৃদ্ধিমানের কর্তব্য নহে। শক্তি
অনুসারে সংকল্প করিতে চেষ্টা করাই সফলতা
লাভের একমাত্র উপায়। অবশ্য অমানুষিক
পৌরুষে অসাধ্যসাধনও সম্ভব হয় ; কিন্তু
প্রথম অভ্যাসীর পক্ষে বিশেষ সাবধানতা
আবশ্যক। অনাবশ্যক কৰ্মে পৌরুষ প্রকাশ করিয়া লাভ নাই।
শাস্ত্র বলিয়াছেন—“অনর্থক কার্যে যত্ন করা মত্ত চেষ্টামাত্র।”
শ্রদ্ধা ভক্তি হইতে সমুপ্ত বিবেক বৈরাগ্য এবং তজ্জুৎপন্ন জ্ঞান
ও প্রেম দ্বারা ভগবৎ সাক্ষাৎকার লাভ করাই জীবনের গূঢ়
উদ্দেশ্য এবং আনাদের সমস্ত শাস্ত্র সেই উদ্দেশ্যকে লক্ষ্য রাখিয়া
নানাবিধ নিয়ম পালনের উপদেশ প্রদান করিয়াছেন। যদিও
মানুষের স্বাভাবিক প্রবৃত্তিগুলিই তাহাকে কৰ্মে প্রবৃত্ত করে,
কিন্তু সে সকল প্রবৃত্তিমূলক কৰ্ম দ্বারা আত্মসাক্ষাৎকার হইবার
সম্ভাবনা কম। এই জন্ম স্বাভাবিক হৃদয় প্রবৃত্তিগুলিকে
সংযত করিয়া পরনার্থীভিমুখ করাই শাস্ত্রের সবিশেষ প্রযত্ন।
জীবকে সংযত করিবার জন্মই তাহার প্রবৃত্তিমূলক চেষ্টা-
গুলিকেও নানা উপায়ে নিয়মিত করিবার চেষ্টা করিয়াছেন।
সমস্ত চেষ্টাকে তদভিসুখী করিতে শাস্ত্র তো আদেশ করিয়াছেন,
কিন্তু যাঁহাদের অন্তঃকরণ মুকুরের মত স্বচ্ছ নহে বরং অমার্জিত,
ভগবৎপদকে সর্বার্থসিদ্ধিপ্রদ বলিয়া মনে যাঁহাদের ধারণা নাই,

এবং সেই জন্মই সংসারবাসনা স্বৰ্ঘ্যোদয়ে শক্কাবের মত
যাঁহাদের হৃদয়াকাশ হইতে অপগত হইতে পারে নাই, পুরুষকার
তাঁহাদিগকেও অভীষ্ট দানে সমর্থ হইবে। সংসারে বিষয়লাভের
জন্ম চেষ্টিত হওয়াও বরং অধিকতর বাঞ্ছনীয়, তথাপি অলস ও
অকৰ্মণ্য হইয়া ঘৃণা জীবন বহন করা নিতান্তই মূঢ়তা ও আধ্য-
সংস্কারবিগর্হিত। সুতরাং মুক্তির জন্ম যদি চেষ্টা কেহ নাও
করেন, তথাপি সংসারযাত্রানির্বাচনের জন্ম যতটা পুরুষকারের
প্রয়োগ আবশ্যক, তাহা না করিলে সর্বত্রই বিনিব্দিত হইতে
হয় ; এবং ইহ পরত্র সর্বত্রই তাহার জন্ম দুঃখ অপেক্ষা করে,
ইহা স্বরণ রাখা কর্তব্য।

অনেকে বলিতে শুনি—“যাহা ভগবানের ইচ্ছায় হয়
তাহাই হইবে, আমি চেষ্টা করিয়া কি আর নিজেকে উদ্ধার
করিতে পারি ? যদি অদৃষ্টে মুক্তি লেখা থাকে—তবেই সেদিকে
চেষ্টা আসিবে, নচেৎ চেষ্টাই হইবে না।” ইহা অত্যন্তই ভ্রান্ত
ধারণা। যদি আপনাকে মুক্ত বা উদ্ধার করিবার উপায়
আপনার হাতে না থাকিত, তবে ঋতি স্মৃতিতে “ইহা কর, উহা
করিও না” প্রভৃতি বাক্যের এত বাতল্য থাকিত না। অসৎ কাৰ্য
হইতে নিবৃত্ত থাকিবার জন্ম এবং সংকার্যের অন্তর্গতনের জন্য এত
সতর্ক করিবার কোন আবশ্যকতাই ছিল না। বিষয় ভোগ এবং
তাহা সংগ্রহ করিবার জন্য দৈবের উপর নির্ভর করা বরং চলে
কিন্তু অপবর্গ লাভের জন্য চেষ্টা ও যত্ন করিতেই হইবে। যাহা
শরীর ও ভোগ সম্বন্ধে বলা হইয়াছে, পরমার্থ বিষয়েও সেই একই
সিদ্ধান্ত করিতে গিয়া লোকে ভুল করিয়া বসে : পূর্বকর্মানুরূপ

ভোগাদি যাহা আসিয়া পড়ে আশুক, তাহার জন্য ব্যাকুল হইয়া সমস্ত চেষ্টাকে সেই দিকে উন্মুখ করিয়া রাখায় কোন লাভ নাই। সে যেমন ভাগ্যে আছে তাহাই শুউক, তাহার বেশী চাহিয়াও বিশেষ ফল নাই। কিন্তু যাহা আমার নাই, যাহা সংগ্রহ করিতেই হইবে; এইরূপ বিমুক্তিলাভের সাধনান্তেও দৈবের উপর নির্ভর করিয়া নিশ্চেষ্ট থাকা বুদ্ধিমানের লক্ষণ তো নয়ই, কস্ম-বিমুখ আলম্পপরায়ণ ব্যক্তির ইহা এক প্রকার আপনাকে আপনি ছলনা করা মাত্র। কাশীর সুপ্রসিদ্ধ রাজযোগী, পূজ্যপাদ শ্যামাচরণ লাহিড়ী মহাশয় বলিতেন “পূর্বজন্মের কস্মফলে এ দেহটা পাওয়া গিয়াছে। ইহাতে সুখ দুঃখ দুই-ই পূর্ব কস্মানুরূপ ভোগ হইয়া যাইবে। তা রাজাই হও, আর ভিখারীই হও। সুতরাং সংসার যাত্রার জন্য, যাহা না করিলে নয়, তাহাই করিবে, উহার জন্য বহু প্রয়াস করিয়া লাভ নাই। শরীর যখন ধারণ করিয়াছ তখন সুখ দুঃখ আসিবেই, আহার, বাসস্থান, আচ্ছাদন ভালই হ'ক, মন্দই হ'ক, মিলিয়া যাইবে। কিন্তু তোমার মুক্তির সম্বল যথেষ্ট নাই, তাহা যদি থাকিত তুমি জন্মাইতে না, অতএব তোমার সমস্ত পৌরুষ এই দিকে প্রয়োগ কর, যাহাতে জন্ম মৃত্যুর হাত এড়াইতে পার। এই নরতন্ত্র ধারণের যে উদ্দেশ্য তাহা যেন বিফল না হইয়া যায়।”

কেহ কেহ বলেন কস্মে বন্ধন অনিয়ন করে, অতএব ভাল মন্দ কোন কস্ম না করাই ভাল। তাহাও ঠিক নহে। কস্মে যাহার অধিকার, তাহার কস্ম না করা অকর্তব্য। সাংখ্যাচার্যেরা যে অবস্থায় কস্ম ত্যাগের উপদেশ করেন তাহা সকলে বুঝিতে

না পারিয়া কস্ম বন্ধনের হেতু ভাবিয়া কস্মমাত্রকেই ত্যাগ করিয়া থাকেন। তাহার উত্তরে ভগবান গীতায় বলিয়াছেন “যজ্ঞার্থং কস্মগোহৃত্ত্ব লোকোহয়ং কস্মবন্ধনঃ।” ঈশ্বর প্রীতির জন্য ভগবানকে লক্ষ্য রাখিয়া যে কস্ম অনুষ্ঠিত হয় তাহা ছাড়া অন্য কস্মে পুরুষকে আবদ্ধ করে। সেই জন্যই নগ্নাট হেতু বা দুঃখ বোধ হেতু কস্মবিমুখ অর্জুনকে ভগবান বলিলেন কস্মেই তোমার অধিকার, তোমার সম্বন্ধশুদ্ধি হয় নাই, তুমি বৈরাগ্যের বৃথা ভাণ করিলে কর্তব্য অকরণ হেতু বশ্মভ্রষ্ট হইবে। অতএব “নিয়তং কুরু কস্ম হুং কস্ম জ্যায়োহাকস্মণঃ। শরীর যত্রাপি চ তে ন প্রসিধোদকস্মণঃ ॥” কস্মের অননুষ্ঠান হইতে কস্মানুষ্ঠান “জ্যায়ঃ” প্রশস্ততর। সর্বকস্মশূন্য হইলে তোমার শরীর নিকর্ষাই যে হইবে না।

শাস্ত্রীয় ও অশাস্ত্রীয় দুই প্রকার পৌরুষ আছে তন্মধ্যে শাস্ত্রীয় পৌরুষে পরমার্থসিদ্ধি ও অশাস্ত্রীয় পৌরুষে অনর্থসিদ্ধি হইয়া থাকে।

“পরাচঃ কামাননুযন্তি বাল্যশ্চে

শাস্ত্রীয় পুরুষার্ধ মৃত্যোর্ধস্তি বিততস্ত পাশম্।
যার অনর্থ নিবৃদ্ধি অথ ধীরা অমৃতং বিদিত্বা
ও তাহার লক্ষ্য।

ধ্রুবমধ্রুববিহি ন প্রার্থয়ন্তে ॥” কঠোপনিষৎ।

অল্পবুদ্ধি মানবেরা বাহ্য কাম্য বস্তুসমূহ অনুসরণ করে ও তাহাতে সর্বব্যাপী মৃত্যুর পাশে আবদ্ধ হয়; কিন্তু মেধাবীগণ ধ্রুব অমৃতকে জানিতে পারিয়া সংসারে অধ্রুব পদাথের মধ্যে কিছুই প্রার্থনা করেন না।

শারীরিক পুরুষকার
কি কি ? গীতার
অভিযত।

“দেবদ্বিজগুরুপ্রাজ্ঞপূজনং শৌচনাজ্জবম্ ।

ত্র্যক্ষর্ধ্যামহিসা চ শারীরং তপ উচ্যতে ॥

অনুদ্বৈগকরং বাক্যং সত্যং প্রিয়হিতঞ্চ যৎ ।

স্বাধ্যায়াত্যাসনং চৈব বাঙময়ং তপ উচ্যতে ॥

মনঃপ্রসাদঃ সৌম্যঃ সৌম্যাস্ত্রিনিগ্রহঃ ।

ভাবসংশুদ্ধিরিত্যেতত্তপো মানসমুচ্যতে ॥”

তপস্বী তিন প্রকার। শারীরিক, বাচিক ও মানস। দেব
দ্বিজ, গুরু এবং জ্ঞানীদের পূজা, শৌচ, সরল ব্যবহার, ত্র্যক্ষর্ধ্যা
এই তপস্বীগুণি শরীর দ্বারা সম্পাদিত। বাহ্যতে লোকের উদ্বেগ
না হয় এরূপ বাক্য, সত্য বাক্য, প্রিয়বাক্য, হিতকর বাক্য, এবং
বেদাভ্যাস এইগুলি বাক্যসাধ্য তপস্বী; আর চিত্তের প্রসন্নতা
অক্রুরতা, মৌনাবলম্বন, ইন্দ্রিয় নিগ্রহ ও ভাবশুদ্ধি (মনে
একখানা মুখে আর একখানা নয়) প্রভৃতি মানসিক তপস্বী
অর্থাৎ মনের দ্বারা সম্পাদিত।

“সর্বদা দান ও ত্রতাদির অনুষ্ঠান করিবে, বেদাভ্যাস ও
ত্র্যক্ষর্ধ্যাবলম্বন করিবে, ইন্দ্রিয়রূপ অশুদিগকে সংযত করিয়া
শান্তিমার্গে বিচরণ ও সর্বভূতে সমদর্শিতা-
সহকৃত দয়া প্রদর্শন করিবে; সরলতা অবলম্বন
করিবে, ও পরজন্মে লোভ বিসর্জন করিবে,
এবং জীবমাত্রের অনিষ্ট চিন্তার পরিহার ও পিতা-মাতা প্রভৃতি
গুরুজনের যথাবিধি সেবা করিবে। ইহাই মুখ ও বর্ষনাভের
উপায়, এবং ইহাকেই সনাতন ধর্ম বলে। যে ব্যক্তি এই
সকলের অনুষ্ঠান করেন, তাঁহাকে কখন দুর্গতি ভোগ করিতে

হয় না। যোগপরাধন পুরুষগণ এই প্রকার সদনুষ্ঠানসংস্কৃত
ব্যক্তিগণ অপেক্ষাও শ্রেষ্ঠ, কারণ যোগবল ভিন্ন সংসারবন্ধন
ছেদনের সহজ উপায় আর নাই। উল্লিখিত দয়াদি সদাচার
দ্বারা বহুকালে সংসারমুক্তি লাভ হয় বটে, কিন্তু যোগবলে অচিরে
মুক্ত হইতে পারা যায়।”

“যুতিঃ ক্ষমা দমনোহস্ত্রয়ঃ শৌচনিগ্রয়নিগ্রহঃ ।

ধীর্বিজ্ঞা সত্যমক্রোধো দশকং ধর্মলক্ষণম্ ॥”

“স্বাধ্যয়েনাচেষ্টেদ্বীন হোতৈর্দেবান্ যথাবিধি ।

পিতৃন্ শ্রাদ্ধৈশ্চ নুননৈভূতানি বলিকর্মণা ॥”

যুতি, ক্ষমা, দমন, অচৌর্ধারিত্তি, শৌচ, ইন্দ্রিয়নিগ্রহ, তত্ত্বজ্ঞান,
বিজ্ঞা, সত্যপালন এবং অক্রোধ এই দশটি ধর্মের লক্ষণ।

বেদাধ্যয়ন দ্বারা ঋষিদিগের, হোমকর্ম দ্বারা দেবতাদিগের,
শ্রাদ্ধদ্বারা পিতৃগণের, অন্নদ্বারা মনুষ্যাগণের ও ইত্যর জীবগণকে
আহার দ্বারা সংস্কার করিবে।

দেহাদির ক্রেশ ও উচ্ছ্বল চিত্তের কত শত অসংখ্য মান-
বান্ধাকে নিরস্তর ব্যাকুল করিয়া রাখে। সুতরাং হোমবজ্রাদি
ক্রিয়াযোগ, গায়ত্রী-উপাসনাদি মন্ত্রযোগ ও যমনিয়মপ্রাণায়ামাদি
লয়যোগ দ্বারা চিত্তকে বিশুদ্ধ করিতে পারিলে,
বিদিসংগত পুরুষ জন্মজন্মার্জিত দুর্কৃতির নিকৃতি ঘটে, অল্প
কারের সর্বার্থক উপায় নাই। অতএব প্রকৃষ্ট সংগ্রামের জন্য
সজ্জিত হওয়া আবশ্যিক। আমি দুর্বল বলিয়া,
বসিয়া বসিয়া একটু তাঁহার কাছে প্রার্থনা করিলেই যে, তিনি
আমাদের শিরে জয়ত্রী ও সৌভাগ্য বর্ষণ করিবেন এ আশা করা

বাতুলতা মাত্র। চেষ্টা না করিয়া অকস্মাৎ কেহ স্থিরচিত্ত যোগী হইতে পারে না; ইহাতে দৈব দুর্দৈবরই মত কার্য করে এবং শুধু মনুষ্যের চিরন্তন উন্নতির পথকে অবরোধ করিয়া রাখে মাত্র। সুতরাং, ভবরোগপীড়িত পুরুষের পক্ষে পৌরুষট একমাত্র পথ। শাস্ত্রমন্ত্র ও বিবিদসম্মত পুরুষকার প্রয়োগে যদি কিছু না হইবারই হইত, তাহা হইলে আনি বলিতাম, এই জগতে নিয়ম, শৃঙ্খলা, সত্য, জ্ঞান, ধর্ম, এ সমস্তই ধীমা, শুদ্ধ ফাঁকিমাত্র। জীবের সুখদুঃখাদি সমস্তই নিয়তির কঠোর নিষ্পেষণে নিপীড়িত, এ জগতে সত্য ও স্মারের মর্যাদা নাই। ভগবান যদি থাকেন তবে তিনিও মস্ত্র একটি ভণ্ড ও প্রতারক। তিনি এ পর্য্যন্ত মনুষ্যকে যে সমস্ত আশ্বাসবাণী শুনাইয়াছেন, তাহাও প্রতারণা বই আর কিছুই নহে। কিন্তু ভগবানকে সে কলঙ্কের ভাগী করা যায় না; তাহার বাক্য অক্ষরে অক্ষরে সত্য। নিষ্ফলত্ব তিনি, কেন কলঙ্ক বহন করিবেন? ভক্তেরা তাই তাঁহাকে আদর করিয়া 'নিরঞ্জন' বলেন। তিনি নিজ হস্তে ভক্তের কলঙ্ককালিমা বরং মুছাইয়া দেন; তাই ভক্তেরা তাঁহাকে আর একটা নাম দিয়াছেন 'কলঙ্কভঞ্জন'! আশা করি ভগবান শ্রীকৃষ্ণকে সত্যবাদী বলিতে কাহারও সম্ভবতঃ দ্বিধা নাই; অতএব তাঁর শ্রীমুখের বাণী, আর একবার স্মরণ করিয়া দেখুন। তিনি বলিতেছেন:—

“উদ্ধরেদাশ্বনাশ্বানং নাশ্বানমবসাদয়েৎ।

আশ্বৈব হ্যাশ্বনো বন্ধুরাশ্বৈব রিপুরাশ্বনঃ ॥” গীতা
বিবেকযুক্ত মনের দ্বারা জীবাত্মাকে উদ্ধার করিবে, জীবাত্মাকে

অবসন্ন বা অধঃপাতিত করিবে না; যেহেতু এই মনই জীবাত্মার বন্ধু, মনই জীবাত্মার শত্রু।

“ইন্দ্রিয়স্বেন্দ্রিয়স্বাথে রোগদেবৌ ব্যবস্থিতৌ।

তয়ো ন বশমাগচ্ছেৎ তৌ হ্যশু পরিপত্তিনৌ।”

ইন্দ্রিয়ের ইন্দ্রিয়বিষয়ে অনুরাগ ও বেব নির্দিষ্ট আছে, তাহাদের বশবর্তী হওয়া উচিত নহে; যেহেতু তাহারা মুগ্ধ জীবের পরম বিরোধী।

“উদ্ধরেৎ,” “ন অবসাদয়েৎ,” “তয়ো ন বশমাগচ্ছেৎ,” এই সকল বিধি বাক্যাংশলি প্রয়োগ করা নিতান্তই অসঙ্গত হইত, যদি পুরুষকার বা চেষ্টা আনাদের মধ্যে মোটেই না থাকিত, অথবা ভগবানের অভি- জড়তাপক্ষে অবসন্ন হইয়া পড়িবার সময়ে প্রেরিত নিয়ম। তাহাকে বাধা দেওয়ার কোন ক্ষমতাই

আনাদের না থাকিত এবং “তয়ো ন বশমা- গচ্ছেৎ” এ কথা বলিয়া সাবধান করিবারও কোন প্রয়োজন থাকিত না। আমাদের সঙ্গে ভগবানের পরিহাসের কোন প্রয়োজন আছে বলিয়া মনে হয় না। একদিকে সাবধান করিবেন, এবং অশুদিকে আমাদের নিষ্ফলতার জন্য প্রতীক্ষা করিয়া হাসিতে থাকিবেন, ভগবানের এমন ভাব, তাহার অসুয়াকারী নাস্তিকেরাও বোধ হয় কখন কল্পনা করিতে পারে না। সুতরাং যখন বঞ্চিত হইবার আশঙ্কা নাই, তখন তিনি যে সম্বলগুলি আমাদের সঙ্গে দিয়া এই ভবসংসারে পাঠাইয়াছেন, সেইগুলিকেই কাম্পোপযোগী সুশাগিত করিয়া রাখাই কি

আমাদের জীবনের লক্ষ্যস্থলে পৌঁছবার প্রকৃষ্ট উপায় নহে
অতএব হে বন্ধুগণ, অনর্থক ভয়বিহ্বল হইয়া সংগ্রামক্ষেত্র হইতে
পলাইবার চেষ্টা হইতে বিরত হও! যথার্থ যে শক্তি আমাদের

মধ্যে রহিয়াছে, তাহাকে অবিশ্বাস করিও
না। আমাদের মধ্যে শক্তি যথেষ্ট আছে
বলিয়াই, ভগবান্ মানুষের স্বরণার্থ এই
কথাগুলি গীতার তাঁহার ভক্ত সখাকে
শুনাইয়াছিলেন। আজও তাঁহার ভক্ত

সেবকেরা তাঁহাদের নিহৃত অন্তঃকরণে
ভগবানের এই উপদেশবাণী স্মরিত হইতেছে শুনিতে পান।

ইহা শুনিয়া কেহ কেহ বলিবেন একি কথা! সকলের কর্তা
ভগবান, আমরা তো তাঁহার রুস্তে ক্রীড়াপুত্তলিকামাত্র, আমাদের
আবার কনতা কি? তিনি যা করেন তাই হয়, অহঙ্কার-বিমূঢ়া-
স্বারাই আপনাকে কর্তা বলিয়া মনে করে, ইত্যাদি। অবশ্য
এ সব কথায় যথেষ্ট বিনয় প্রদর্শন হয় সত্য, কিন্তু ইহাতে যে
সত্যের নর্যাদা যথেষ্ট ক্ষুণ্ণ হয় তদ্বিবয়ে সন্দেহ নাই। অহঙ্কার করা
বড়ই দোষের, এ সম্বন্ধে কোন মতবিরোধ ঘটিতে পারে না; কিন্তু
যথার্থই যে শক্তি আমাদের মধ্যে রহিয়াছে, তাহাকে স্বীকার
করিলে ঈশ্বরকে অনাশ্র করা হয় বলিয়া আনার ধারণা নাই।
বরং তদ্বিপরীতেই তাঁহার অবমাননা করা হয় বলিয়া আমার
বিশ্বাস। আমার মধ্যে যে শক্তি আছে, সে শক্তি আমি
কোথা হইতে পাইয়াছি? এও তো সেই ঐশী শক্তি। আমার
মধ্যে তাঁহারই শক্তির লীলা, এ তাঁহারই মহিমা। মুঢ়তা-

বশতঃ আপনার মধ্যে ভগবানের প্রত্যক্ষ শক্তিকে উপেক্ষা
করিয়া যে মিথ্যা কল্পনার মোতে বিভ্রান্ত হয় এবং পুরুষকার-
প্রয়োগে সেই আত্মশক্তিকে বহুধা কেশ্বর
মধ্যে বিনিয়োগ করিয়া ভগবৎপ্রদত্ত শক্তির
মাহাত্ম্য বৃদ্ধিতে না চায়, পরন্তু অলোক
দৈবের উপর নির্ভর করিয়া বসিয়া থাকে,
সেই অলস উৎসাহহীন ব্যক্তি পদে পদে প্রো-
রিত ও লাঞ্চিত হয়, এবং সর্বত্র উপহাসিত
হইয়া থাকে। বেদ জীবের ও ঈশ্বরের মহিমা কীর্তন করিয়াছেন।

“দ্বা সুপনা সযুজা সখায়া
সমানং বক্ষং পরিমম্বজাতে।
তয়োরন্থঃ পিপ্ললং স্বাদন্ত্য-
নশন্নন্তো অভিচাকশীতি ॥” যুগুৎ উঃ

“সর্বদা একসঙ্গযুক্ত ও পরস্পর সখ্যভাবপ্রাপ্ত দুইটি পক্ষী
একই বৃক্ষকে আলিঙ্গন করিয়া রহিয়াছে। তাহাদের মধ্যে
একটি স্বাচ্ছন্দ্য ভক্ষণ করে, অপরটি ভোজন না করিয়া দর্শন
করে।”

“সমানে বৃক্ষে পুরুষো নিমগ্নো
অনীশয়া শোচতি মুহমানঃ।
ভেদ ছল জ্ঞ্য নহে। জুষ্টং বদা পশ্যত্যন্যনৌশয়
অন্থ মহিমানমিতি বীতশোকঃ ॥” যুগুৎ উঃ

“জীব একই (শরীররূপ) বৃক্ষে নিমগ্ন হইয়া দৈন্যবশতঃ
মুহমান হয় ও শোক করে; কিন্তু সে যখন আপনা হইতে ভিন্ন

সুখ-দুঃখের অতীত ঈশ্বরকে ও তাঁহার মহিমাকে দর্শন করে তখন হইতেই বিগতশোক হয় (অর্থাৎ তাহার ক্ষুদ্র সত্ত্বা অসীম অনন্ত সত্ত্বায় হারাইয়া ফেলে। তখন সে শোক দুঃখ প্রভৃতি বন্দভাবের অস্তিত্বই বুঝিতে পারে না)।

আমরা যে 'আমি' 'আমি' করিয়া অহঙ্কারে উন্নত হই, সে 'আমি' মিথ্যা 'আমি', তাহার কোন যোগ্যতাই নাই। এই তুচ্ছ মোহকর মিথ্যা অহঙ্কার, কুস্মাটিকা যেমন সমুজ্জল সূর্যালোককে ঢাকিয়া রাখে, তেমনি প্রকৃত "আমি" বা আত্মজ্ঞানকে ঢাকিয়া রাখে। সাগর যেমন বেলাভূমি অতিক্রম করিতে না পারিয়া গর্জন করিতে থাকে, তদ্রূপ এই মন সত্য পদার্থকে বুঝিতে না পারিয়া নিরন্তর বিষয় হইতে বিষয়ান্তরে দ্রুতবেগে ধাবিত হইতেছে, এবং তাহাতে শক্তি আনন্দ কিছুই না পাইয়া নর্মভেদী স্বরে রোদন করিয়া উঠিতেছে। মন যে এত কষ্ট পাইতেছে, তবু তাহার কিছুতেই মোহ ঘুচিতেছে না; অভিমানও ছুটিতেছে না। এইরূপ আনন্দের অভিমান যথার্থ অহঙ্কার বটে, কিন্তু আমার সত্য 'আমিও' আছে—যাহা সনাতন, যাহা নিত্য ও ধ্রুব। এই সত্যের মহিমা দর্শনেই জীব বিগতশোক হয়। এই 'আমি'কে অস্বীকার করাও যা সত্যকে অস্বীকার করাও তাই।

অনেকে বলিতে পারেন, বিশ্বশক্তির তুলনায় আমার শক্তি তুচ্ছ, নগণ্য; তাহার উপর নির্ভর করা একপ্রকার পাগলামি। আমি বলি পাগলামি কিছুতেই নয়। পরমাত্মারই ক্ষুলিঙ্গ তো এই জীব; ইহার মধ্যেও সেই ঐশী শক্তি বিরাজ

করিতেছে। ভগবান্ সত্যসঙ্কল্প, স্মতরাং তাঁহার সমস্ত সঙ্কল্পই সত্যের রূপ ধারণ করে। মানবের সঙ্কল্পও জীবের সহিত সমস্ত সিদ্ধ হইতে পারে, কেবল তাহার ঈশ্বরের ভেদ চিন্তকে বিশুদ্ধ করিতে পারিলেই হইল। এই চিন্তের অবিশুদ্ধতাই ঈশ্বর হইতে তাহাকে পৃথক করিয়া রাখিয়াছে। এই জীব যখন আবার বিশুদ্ধ হইয়া সত্যসঙ্কল্প হয়, তখন এ জগতের কোন বস্তুই তাহার অনায়ত্ত্ব থাকে না। এইরূপ বিশুদ্ধ চিন্তেই "বাদশী ভাবনা যস্য সিদ্ধির্ভবতি তাদৃশী" হইয়া থাকে।

স্মতরাং যখন আমি নিরহঙ্কার হইয়া অপ্রমত্তভাবে আমার শক্তির উপর নির্ভর করি, তখন আমার তাঁহারই শক্তির উপর নির্ভর করা হয়। এই যে আমার মধ্যে তাঁহার শক্তি তাহা নগণ্য নয়, ক্ষুদ্রও নয়। আমার মূঢ়তাই সেই অসীম শক্তিকে ক্ষুদ্র বলিয়া ভ্রম জন্মাইতেছে; ইহারই নাম অবিद्या। যেমন আমার চক্ষুর শক্তির অভাববশতঃই আমি সূর্য্যকে ক্ষুদ্র দেখি, কিন্তু সূর্য্য বাস্তবিক ক্ষুদ্র নয়, তদ্রূপ সূক্ষ্ম দৃষ্টির অভাববশতঃই আমি আমার ভিতরকার শক্তিকে সামান্য মনে করি। কিন্তু ইহা কি সত্য নয় যে, একটি প্রকাণ্ড অগ্নিকুণ্ডেও যে শক্তি বিরাজিত, একটি ক্ষুলিঙ্গের মধ্যেও সেই প্রচণ্ড বিশ্বদাহিকা শক্তি বিद्यমান, এবং আধার পাইলেই সে আপনাকে বৃহৎ হইতে বৃহত্তররূপে প্রকাশ করিতে পারে? তদ্রূপ শোকে মোহে বিমূঢ় এই জীবই আবার যখন আপনাকে জানিতে পারে, তখন সংশয়শূন্য বাধাহীন জ্ঞান, অনন্তস্পর্শী প্রেম,

চিন্ময় মধুর রসের প্রকাশ, তাহাকে নিত্য সত্য নির্বিকার বন্দ্যাতীত ব্রহ্মের সহিত অভিন্ন বলিয়া বুঝাইয়া দেয়; তখন আর সে রোগে শোকে ও দেহেজ্বরের বিকারসম্বিত মোহে প্রিয়মান সামান্য ক্ষুদ্র জীব নহে; তখন সেও পূর্ণশক্তিমান, অসীমবীর্ঘ্যসম্পন্ন, শুদ্ধ, অপাপবিদ্ধ, আনন্দ-শান্তির নিত্য নিবারণ, অগ্নান বসন্তকুম্বের মনোহর সৌরভে চিরপ্রফুল্ল ব্রহ্মানন্দরূপ অমৃতপানে অমর, পরমাত্মার প্রিয়তম অভিন্নহৃদয় সখা।

অনন্তের মহিমাই এই যে, তাহা সর্বত্রই অনন্ত, সর্ব্বাধারেই সীমাবিহীনভাবে অবস্থিত। প্রত্যেক জীবও সেইজন্ম একপ্রকার অসীম অনন্ত। তবে যে সকল মহাত্মারা বলেন, ঈশ্বর ভিন্ন আর কাহারও কর্তৃত্ব নাই, তাঁহারা কি ভুল বলেন? এবং তাহা হইলে “ঈশ্বরঃ সর্বভূতানাং হৃদয়েশেজ্জ্বন তিষ্ঠতি। ভ্রাময়ন সর্বভূতানি যজ্ঞাক্রান্তানি মায়য়া ॥”—গীতার এই শ্লোকেরই বা অর্থ কি? ইহাও মিথ্যা নহে। ইহা অনুভবসাধ্য এবং ইহারও অনুভবের একটি সময় (stage) আছে। প্রাকৃত জনের মত ঈশ্বরবাক্যে কখন আস্থা থাকিতে পারে না। অতএব ইহারও মানে আছে, বুঝিবার অবস্থা আছে। অবস্থাভেদে ভাবের ভেদ হয়। ছেলে মানুষের মুখে যদি বুড়ার মত কথা শোনা যায়, তাহাকে আমরা জ্যাঠামি বলি; কিন্তু বৃদ্ধের মুখে সে কথা শুনিলে প্রাজ্ঞাচিত বাক্য বলিয়া তাহাকে শ্রদ্ধা করি। এই ছইটি অবস্থার কথা আরও একটু ভাল করিয়া বুঝিতে চেষ্টা করা যাক। বাল্যকাল, যৌবন-কাল বা প্রৌঢ়াবস্থা একই মানুষের তিনটি অবস্থা বটে, কিন্তু

অবস্থাভেদে কাৰ্য্যের ভেদ আছে। বাল্যকালে বালকের প্রত্যেক কাৰ্য্যের প্রতি আমরা দৃষ্টি রাখি; তাহার অশন, উপবেশন, ভ্রমণ, অধ্যয়ন, শয়ন, ক্রীড়া সকল অবস্থার মধ্যেই তাহাকে খানিকটা চোখে রাখিবার আবশ্যিকতা আছে। নচেৎ মনুষ্যের যে বৃহৎ আদর্শ তাহার মধ্যে আছে, তাহা পরিস্ফুট হইবার পক্ষে বিলক্ষণ বাধা পায়। পিতা মাতা সেই বাধাগুলি সরাইয়া দিয়া বালকের জীবনপথকে বাধাশূন্য করিবার চেষ্টা করেন; কিন্তু সেই বালকই যখন বড় হয়, বয়সের সঙ্গে সঙ্গে বেশ প্রাজ্ঞ হইয়া উঠে, তখন আর ততটা নজর রাখার আবশ্যিক হয় না। কারণ, তখন সে নিজেকে নিজে রক্ষা করিবার শক্তি লাভ করিয়াছে। একই মানুষকে যেমন বিভিন্ন অবস্থায় বিভিন্নভাবে চলিতে হয়, সেইরূপ মানুষের অন্তঃশক্তিবিকাশভেদেও কর্তব্যের বিভিন্নতা স্বীকার করিতে হয়। বাস্তবের কর্তব্য যেমন আমরা কোন প্রকারে করিয়াই খালাস, অন্তঃশক্তি বিকাশের জগৎ ও কতকগুলি কর্তব্য আছে তাহা কোন প্রকারে করিলেই যে সব হইয়া গেল তাহা নহে। তাহা জোর জবরদস্তি, ধস্তাধস্তিতে যে বাড়িবে তাহাও নহে; নির্বাকুলচিত্তে সেই কর্তব্যগুলি পালন করিতে করিতে তবে অন্তঃশক্তি স্বীরে ধীরে বিকশিত হইতে থাকে; এবং সঙ্গে সঙ্গে তদনুরূপ সার্থকতা লাভ হইতে থাকে, এবং দেহ ও মনের আবরণগুলি টুটিতে থাকে। ইহার প্রথম অবস্থায় ‘অচং-ভাব’ থাকে, না থাকিলে, সাধনাতে প্রবৃত্তিই আনিতে পারে না। সেইজন্ম সব সাধনাতেই প্রথম অবস্থায় (সকাম অবস্থায়) যদি সাধনায় প্রবৃত্তি না আসে, তবে তদ্ব সাক্ষাৎকার হইবে কোথা

হইতে? প্রথমেই তো অজ্ঞানাকার দূরীভূত হইয়া জ্ঞানালোক প্রজ্জ্বলিত হয় না! তাই ভগবান্ শ্রীকৃষ্ণ গীতার প্রথম ভাগে কর্তব্যাকর্মে দৃঢ়তা এবং যাহা মনুষ্যের শক্তিসাধ্য, তাহা আয়ত্ত করিবার জন্য অর্জুনকে পুনঃ পুনঃ উপদেশ দিতেছেন। যথা— “মামেব স্মর,” “যুধ্য চ”; “জহি শক্রং মহাবাহো কামরূপং হুরাসদম্;” “যুধ্যস্ব বিগতজ্বরঃ”; “যে মে মতমিদং নিত্যমনু- তিষ্ঠন্তি মানবাঃ। অন্ধাবস্তোহনশ্চয়স্তো মুচ্যন্তে তেহপি কৰ্ম্মভিঃ ॥” “তস্মাৎ ব্রহ্মিন্দ্রিয়াণ্যাদৌ নিয়ম্য ভরতর্ষভ। পাপনানং প্রজহিহেমনং জ্ঞান-বিজ্ঞান-নাশনম্ ॥” “কুরু কৰ্ম্মেব তস্মাৎ ত্বং পূৰ্বেঃ পূৰ্ব্বতরং কৃতম্।” “তদ্বিদ্ধি প্রণিপাতেন”; “অন্ধাবান লভতে জ্ঞানং তৎপরঃ সংযতেন্দ্রিয়ঃ।” “হিষ্টৈশ্বনং সংশয়ং যোগমার্তিষ্ঠোত্তিষ্ঠ ভারত।” “শক্ৰোতীহৈব যঃ সোচুঃ প্রাক্ শরীরবিমোক্ষণাৎ। কামক্রোধোদ্ভবং বেগং স যুক্তঃ স সুখী নরঃ”—ইত্যাদি উপদেশ করিলেন।

গীতার এই সকল উপদেশে সম্পূর্ণ বুঝা যায় যে, মানুষকে চেষ্টা করিয়া ব্রত করিয়া এই সকল সাধনাভ্যাসে উৎসাহী হইতে হইবে। “ভগবান্ সব করিবেন”—বলিয়া আলস্তে সময়ক্ষেপ করিলে চলিবে না। যদি চলিত, তবে অর্জুনের মত ভক্তকে এত রাশি রাশি উপদেশ দিবার কোন প্রয়োজন ছিল না। ভগবান করিয়া দিলে অনেক দিন আগেই তাহা করিয়া দিতেন।

মনুষ্যের মধ্যে যতটুকু শক্তি আছে, সেই শক্তি দ্বারা সাধন-প্রভাবে যখন তাহার চিত্ত অন্তর্মুখী হইতে থাকে, তখনই নিবিড়ভাবে ঐকান্তিক ধ্যানের দ্বারা সমস্ত বাহ্যবিষয় ও ইন্দ্রিয়-

বিষয় হইতে চিত্ত উপরত হইতে থাকে, তখন সে নিজে নিজেই বৃষ্টিতে পারে এবং দেখিতে পায় তাহার পৃথক সত্তা বা শক্তি কিছুই নাই; সবই পর-ভগবানের শক্তিতেই জীবের মাত্মার শক্তি বা যাহা কিছু সবই আত্মসত্তা শক্তি, তাহার পৃথক দ্বারা পূর্ণ। তখন জীব সেই জ্ঞানময় পরি-পূর্ণ আত্মসত্তার দ্বারা পূর্ণ। তখন জীব সেই জ্ঞানময় পরি-পূর্ণ আত্মসত্তার দ্বারা পূর্ণ। তখন জীব সেই জ্ঞানময় পরি-পূর্ণ আত্মসত্তার দ্বারা পূর্ণ। তখন জীব সেই জ্ঞানময় পরি-পূর্ণ আত্মসত্তার দ্বারা পূর্ণ।

এই অবস্থাকে লক্ষ্য করিয়া কোন সাধক গাহিয়াছেন;—

“আমাতে যে আমি, সকলে সে আমি,

আমি যে সকল, সকলি আমার।

আমি নিরাকার, নিত্য নিরিবিকার,

আমার আনন্দ, জগতে প্রচার ॥

জনকরূপেতে জন্মাই সন্তান,

জননী হইয়া করি স্তনদান

শিশুরূপে পুনঃ করি স্তনপান,

এ সব নিমিত্ত কারণ আমার ॥
 সম্ভবাসম্ভব আমাতে সম্ভব,
 অসম্ভব ভাব হয় জীবভাব,
 (আমি) ভাবময় ভাব নাম সদাশিব,
 ভাবুক ভকত ভাবে ভাবাকার ॥
 নামরূপে হই জগতে প্রচার,
 সে সব অনিত্য আমি নিত্য সার,
 আমার আনিবে উন্নত সংসার,
 সত্য তব আমি, আমি সত্যকার ॥
 আধেয় আধার আমি সর্বময়,
 স্থূলসূক্ষ্ম-রূপে ব্যাপ্ত জগন্ময়,
 রূপ রস গন্ধ আমি অমুবন্ধ,
 উৎপত্তি নিবৃত্তি আমাতে সবার ॥
 সৃষ্টি স্থিতি লয় বারে বারে হয়,
 রবি শশী গ্রহ আসে পুনঃ যায়,
 সোহইং আমি সত্য অচ্যুত-অব্যয়,
 চরমে তুরীয় আমি মাত্র সার ॥

ইহাই সত্য “আমি” ।

এই “অহং” যে কি তাহা প্রত্যহই অন্ততঃ একটিবার
 স্মরণ করিয়া দেখিবার বিধি শাস্ত্রে ব্যবস্থাপিত হইয়াছে ।

“অহং দেবো ন চাত্মোহস্মি ব্রহ্মৈবাহং ন শোকভাক্ ।

সচ্চিদানন্দরূপোহহম্ শুদ্ধমুক্তস্বভাবান্ ।”

ইহাই প্রকৃত অহং শব্দের লক্ষ্য । এই যথার্থ সত্য “অহংকে”

বিস্মৃত হইয়া মোহবশে যখন এই দেহটাকে “অহং” বলিয়া
 মনে করি, তখনই আমরা খুব ভুল করি । আত্মাকে উপ-
 লক্ষিত যে “অহং” তাহাই প্রকৃত “অহং” । আর যে অভিমানাত্মক
 অহংকার—যাহাকে আমরা ভ্রমবশতঃ আত্মার সহিত এক
 করিয়া ফেলি—তাহা আত্মা নহে, উহা প্রকৃতিজ গুণ মাত্র ।
 অব্যক্তবস্থা বা সাম্যাবস্থা হইতে প্রকৃতির বিচ্যুতি ঘটিলেই
 সৃষ্টিকার্য্য আরম্ভ হয় । সৃষ্টির প্রথম অবস্থায় (first stage)
 সত্ত্বগুণ প্রবুদ্ধ হইয়া জ্ঞানাত্মক বা সুখাত্মক মহত্ত্ব বা বুদ্ধির
 আবির্ভাব হয় । রজস্তমোগুণ প্রবুদ্ধ হইয়া অভিমানাত্মক
 অহংকারের উৎপত্তি হয় এবং এই অহংকারের সাত্ত্বিক অংশ
 প্রবুদ্ধ হইয়া পঞ্চ জ্ঞানেন্দ্রিয়, পঞ্চ কর্মেন্দ্রিয়ের ও মনের উৎপত্তি
 হইয়াছে । এই অভিমান হইতেই স্থূল হইতে স্থূলতর দশা
 প্রাপ্ত হইয়া জীব আপনার জালে আপনি বদ্ধ হইয়া পড়ে, আর
 পালাইবার পথ খুঁজিয়া পায় না । আবার এই স্থূলশরীরকে
 “অহং” বলিয়া জানাই সর্ব্বাপেক্ষা ভীষণ অহংকার, ইহার নামই
 অজ্ঞান । ইহার কবল হইতে নিষ্কৃতি পাওয়ার নামই মুক্তি ।

একই জল কূপ, তড়াগ ও গঙ্গায় আসিয়া পড়িতেছে ;
 কিন্তু গঙ্গায় মিলিলেই উহা পবিত্র গঙ্গাজল হয়, কূপে পড়িলেই
 কূপজল হয়, তদ্রূপ “অহং” একই, যখন ইহা দেহকে আশ্রয়
 করিয়া থাকে তখন তাহা অপবিত্র, বিবিধ দোষের আকর এবং
 মোহোৎপাদক । কিন্তু সেই “অহং”ই যখন ঈশ্বরাস্থিত (সেব্য
 সেবক সম্বন্ধ) বা তাঁহার সহিত যোগযুক্ত হইয়া থাকে, তখন
 তাহা পরম পবিত্র ও পাপনাশক বলিয়া কীর্তিত হয় ।

বশিষ্ঠদেব “অহং”কে চারিপ্রকারে নির্দেশ করিয়াছেন।
যথা—(১) দেহোহহম্, (২) সৃষ্টোহহম্, (৩) সর্বদৃশ্যোহহম্, ও
(৪) শৃঙ্খোহহম্। প্রথমটি তৃষ্ণা ও বাসনার হেতু বলিয়া, উহা
বন্ধনের হেতু।

“এতেষাং প্রথমঃ প্রোক্তস্তৃষ্ণয়া বন্ধ-যোগ্যতা।

শুদ্ধতৃষ্ণাত্ময়ঃ স্বচ্ছা জীবমুক্ত বিলাসিনঃ ॥”

প্রথমটিতে বিষয়তৃষ্ণাহেতু বন্ধ হইবার যোগ্যতা লাভ
করিয়াছে; অশুদ্ধ তিনটিতে শুদ্ধ অমল তৃষ্ণা অর্থাৎ বিষয়
ভোগেচ্ছাশূন্য তৃষ্ণা থাকায়, জীবমুক্তেরা ইহাতে বিলাস
করিয়া থাকেন।

এইরূপভাবে “অহং”কে বুঝিবার চেষ্টা করিলে ক্রমশঃ
তাঁহার বোধ হয়—

“প্রকৃত্যেব চ কৰ্ম্মাণি ক্রিয়মাণানি সৰ্ব্বশঃ।

যঃ পশ্যতি তথাঙ্গানমকর্তারং স পশ্যতি ॥”

শুভাশুভ কর্ম্মে প্রকৃতিরই কর্তৃৎ। প্রকৃতি দেহেন্দ্রিয়াকারে
পরিণত হইয়া শুভাশুভ কর্ম্মের অনুষ্ঠান করে। আত্মার দেহা-
ভিমান হেতু কর্তৃৎ বোধ হয় মাত্র, স্বতঃ কর্তৃৎ আত্মার নাই।
ইহা যিনি দেখেন তাঁর দেখাই ঠিক। আত্মার যদি কর্তৃৎ না
থাকে, তবে আমার কর্তৃৎ কিসের ?

নিজেকে যতক্ষণ কর্তা বলিয়া মনে হয় ততক্ষণ শাস্তি নাই
সত্য, কিন্তু যতদিন ‘পরাবর’কে দর্শন করিয়া হৃদয়গ্রন্থি ছিন্ন
না হয়, ততদিন এই অহং ভাব বা দেহাঙ্গবোধ কিছুতেই যায়
না। কিন্তু সাধকের বা কর্ম্মীর যে অহং ভাব, তাহা তাদৃশ

মোহোৎপাদক নয়। বন্ধজীবেরা আপনাদের দৈশ্যবশতঃ
জ্ঞানাভাবহেতু আত্মাকে না জানিয়া যেরূপ মোহ বিভ্রান্ত হয়,
আরুক্ষুদের সেরূপ মোহবিভ্রান্ত হইবার সম্ভাবনা নাই।
কণ্টকের দ্বারা কণ্টক বাহির করার স্থায় “অহং”-এর সাহায্যেই
তাঁহার অহংকে তাড়াইয়া দেন। শাস্ত্রের উপদেশ এই “নারার্থী
হি ভবেৎ তাবদ্ যাবৎ পারং ন বিন্দতি।”

যেমন অহংকার অন্তর্হিত হইল, অমনি এই মায়ী-যবনিকা
সরিয়া গেল, ভেদজ্ঞান তিরোহিত হইল। শাস্ত্রত অভয়পদ
প্রকাশিত হইল। আর অভিমানাত্মক অহং থাকিবে কি করিয়া ?
প্রভুকে সম্মুখে দেখিলে ভৃত্যের এ ভ্রম হওয়া অসম্ভব যে, সে
নিজেই নিজের প্রভু। তখন সে পুরুষোত্তম নারায়ণকে
আপনার হৃদয় সিংহাসনে স্বমহিমায় বিরাজিত দেখিতে পায়।
তখন সমস্ত অনর্থের মূল এই অহংকার গলিত পত্রের মত
ঝরিয়া পড়ে। তখন কি আর নিজ পুরুষকার বা কর্তৃৎ-
ভিমান থাকিতে পারে ? তখন “ভিগ্নতে হৃদয়গ্রন্থিশ্চিহ্নন্তে
সর্বসংশয়াঃ। ক্ষীয়ন্তে চাস্ত কৰ্ম্মাণি তস্মিন্ দৃষ্টে পরাবরে ॥”
ইহার জগ্গাই জীবনব্যাপী সাধনা এবং তজ্জগ্গাই বেদ
বলিয়াছেন—

“তস্মৈ তপো দমঃ কৰ্ম্মেতি প্রতিষ্ঠা।”—তপস্যা, দম ও কর্ম্ম
এই জ্ঞানের আশ্রয়। এই জ্ঞান প্রাপ্তির জগ্গাই তপস্যা, ইন্দ্রিয়-
নিগ্রহ নিষ্কাম কর্ম্ম এবং সাধনাদি করা কর্তব্য।

কিন্তু অপকারস্থায় আমরা যতই ‘ভগবানই সব’ বলিতে
থাকি, তাহাতে আমাদের কর্তৃৎভিমান নষ্ট হয় না, কারণ ঐ

অবস্থাটি অনুভব করিতে হয়, এবং যিনি এই অবস্থা অনুভব করেন, তাঁহার কতকগুলি বাহ্য ও আভ্যন্তরিক লক্ষণ প্রকাশ পায়। শুধু ঐ মহাবাক্য পশুপক্ষীর মত আওড়াইলে কোন ফল হয় না। আমরা তো অনেক সময়েই বলি 'তিনিই কত্তা, তিনিই সব, আমরা যন্ত্র মাত্র।' কিন্তু কার্যকালে অহঙ্কারের মাত্র কিছু কম দেখা যায় না। কথাটার বেশ চটক আছে এবং উহা শ্রুতিমধুরও বটে; তাই আমরা যখন ঐ কথাগুলি কাহারো মুখে শুনি তখনই তাঁহাকে নিরতিমান পুরুষ, প্রেমিক ভক্ত বলিয়া মনে করি; কিন্তু তাঁহার কার্য সনালোচনা করিলে দেখা যায় যে, ও সব কথা তাঁহার অন্তরের কথা নয়, কেবল দৈত্যের ভাষণমাত্র।

যখন পরিপূর্ণ প্রেমে ভক্ত তন্ময় হইয়া থাকেন, তখনই 'আত্মসমর্পণ' সম্ভব হয়। ব্যাপারটা কতকটা পক্ষীশাবকের পক্ষ-উদগমের মত। কক্ষের দ্বারা চিত্ত সবল হইলেই জ্ঞানপক্ষ বিস্তৃত হয়; তখনই সে চিদাকাশে উড়িয়া যায়। মায়ারাজ্যের সুদূর দেশে সাধনপর্ব্বতের শিখরস্থিত প্রেমফল লাভ করে ও তাহা ভোজন করিয়া পূর্ণানন্দে পূর্ণ হয়।

বহু তপস্যার ফলে, অনেক সাধ্য-সাধনার পরে, এই সৌভাগ্যলাভ হয়। তখন ভক্ত দেহের মধ্যে আপনাকে আবদ্ধ দেখিতে পান না। নিজের পৃথক সত্ত্বাও আর বুঝিতে পারেন না। তখন তাঁহার

মনস্ত কৰ্ম, সমস্ত চেষ্টা, এই দেহ, মন, প্রাণ, সমস্তই ভগবানের বলিয়া মনে হয়, তখন ভক্ত যথার্থভাবে আপনাকে 'অকর্তা' মনে করেন। তখন তিনি দেখেন, এই সমস্ত পৃথক শক্তি কিছুই নয়, সবই এক অখণ্ড আনন্দশক্তি হইতে নিঃসৃত;—

“এতস্মাজ্জায়তে প্রাণো মনঃ সর্বেচ্ছিয়ানি চ।

খং বায়ুর্জ্যোতিরাপঃ পৃথিবী বিশ্বস্ত ধাত্রী ॥”

তখন প্রেমাকুল ভক্ত আনন্দাক্রমপূর্ণ নয়নে গাহিরা উঠেন:—

“তোমার চরণে আমার পরাণে লাগিল প্রেমের ফাঁসি।

নিশ্চয় করিয়া একমত হয় হইল চরণে দাসী ॥”

কিন্তু যতদিন এ অবস্থা না আসে, যতদিন এ অনুভব প্রগাঢ় না হয়, যতদিন ব্যর্থ অভিনানের মত আমার চারিদিক ঘেরিয়া থাকে, ততদিন আমার শক্তিকে অস্বীকার করিলে চলিবে না; সেই শক্তিকেই ঐশী শক্তি মনে করিয়া সাধন করিয়া যাইতে হইবে। এইরূপে আমার মধ্যে আমার যথার্থ 'আমি'র পরিচয় লইতে হইবে। আমি যে ক্ষুদ্র নহি, আমি যে দীন নহি, ইহা বুঝিতেই হইবে। ক্ষণিকের মোহকে দ্বাবহার ও বিধ্বস্ত করিয়া প্রবৃত্তির চটুল চপলতাকে তদ্বারা লক্ষ্যতল দূরে সরাইয়া দিয়া সংস্কারের ঘূর্ণমান প্রাপ্তি। বেগকে সবলে বিভিন্নমুখ করিয়া সত্যের পথে, জ্ঞানের পথে, প্রেমের পথে চলিতে হইবে।

যতদিন জগৎকর্তাকে সত্যরূপে বুঝিতে না পারা যায়, ততদিন আপনার শক্তিতেই তাঁহার পথে চলিতে শ্রয়স্ত ও অভ্যাস করিতে হইবে। এই অভ্যাসবলেই 'আমি কে', বুঝিতে

পারিবে এবং আত্মা দ্বারাই আত্মজয়ী হইবে। ইহাতে সিদ্ধির সম্ভাবনা যথেষ্ট; আমাদের মধ্যে সে শক্তি আছে; তাই ভগবান্ বলিতেছেন;—“বন্ধুরাত্মানন্তশ্চ ধেনাঐবাত্মনা জিতঃ।”

মনের দ্বারাই মনকে জয় কর। আগে আত্মজয়ী হও, তাহার পর তাঁহাকে আত্মসমর্পণ করিবার শক্তি লাভ করিবে। আগে আমি আমার হই, তাহার পর তাহা সমর্পণ করিলে চলিবে; নচেৎ যাহা আমার নয়, তাহা কিরূপে অর্পণ করিব? সুতরাং, আগে আমাকে আমার আয়ত্তের মধ্যে আনি, তাহার পর একদিন মঙ্গল প্রভাতে পক্ষী যেমন পক ফলকে গ্রহণ করে, ভগবানও তেমনি আমাকে গ্রহণ করিবেন। তাহার পূর্বে জীবন সমর্পণ করিব বলিলেই কিছু সমর্পণ করা হইবে না। ইহাও সাধনসাপেক্ষ।

বাহাদের সামর্থ্য আছে, তাহারাই সুমিষ্ট গুরুপাক জব্য অনায়াসে ভোজন ও পরিপাক করে; কিন্তু যোগ্যতা না থাকিলে সে শক্তি লাভ করিবার পূর্বেই, যে দুর্ভাগ্য যোগ্য ব্যক্তির বার্থ লোভবশতঃ গুরু ভোজনে প্রবৃত্ত হয়, গুরুদ্রব্য অহুঙ্করণে বিপরীত পুষ্টিকর হইলেও, তাহা তাহার পাকযন্ত্রকে দুর্বল এবং অকর্মণ্য করিয়া তোলে। অতএব অগ্রে পুরুষকার ও কর্মের দ্বারা শক্তি আয়ত্ত হউক, তাহার পর আপনা-আপনি জ্ঞান, প্রেম, ভক্তির লহরী-লীলা তোমার চারিদিকে নৃত্য করিয়া বেড়াইবে। নচেৎ যে মধুররস ভাবরাজ্যের চরম, অপকাবেস্থায় তাহারও স্বাদগ্রহণে

সুফল ফলে না; বরং ভাববিকার ঘটাইয়া চিরদিনকার মত চিত্তবৃত্তিকে দুর্বল করিয়া ফেলে। জয়দেবের মধুর কোমল পদাবলী শ্রীমদ্গৌরাঙ্গদেবের ভাবতরঙ্গ উদ্বেল করিত, কিন্তু প্রাকৃত জনের পক্ষে তাহাই বিষের মত কার্য্য করিয়াছে; ইহাতে অপর-ভক্তের প্রেম বর্দ্ধিত না হইয়া বিকার বর্দ্ধিত হইয়াছে। অতএব সর্বপ্রথমে আপনাকে উপযুক্ত করিবার জন্য পুরুষকার অবলম্বন পূর্বক কর্মযোগ আশ্রয় করাই কর্তব্য। ইহাই একমাত্র আমাদিগকে বথার্থ মঙ্গলদানে সমর্থ।

চতুর্থ অধ্যায়

সদভ্যাস

সংসারে আধি-ব্যাদি ও জরা-মৃত্যুর প্রভাবে, মানুষ চিন্তে বিন্দুমাত্র শান্তি পায় না, অথচ এমনি মোহ যে, এ সকল হইতে উদ্ধারের পথ অন্বেষণ করিবারও তাহার কোন উৎসাহ বা প্রবৃত্তি দেখা যায় না। নিরন্তর সংসার তাপে জ্বলিয়া পুড়িয়া মানুষ যে কি ছুঃখ সম্ভাপ ভোগ করে, তাহা স্থিরচিন্তে একবার চিন্তা করিয়া দেখিলে, এই সংসারের প্রতি কাহারও আস্থা থাকিতে পারে না। সংসারে আস্থা থাকিতে পারে না বলিয়া, কেহ যেন এমন মনে না করেন যে, সংসার হইতে পলায়ন করাকেই আমি শ্রেষ্ঠপথ বলিতেছি। বাস্তবিক তাহা নহে। সংসারের মধ্যে থাকিয়াও সেই সত্য বস্তুকে চিনিয়া লইতে হইবে, কারণ সত্য পদার্থকে বুঝিতে না পারিলে, মানবকে অতলস্পর্শ ছুঃখের মধ্যে ডুবিয়া যাইতে হয়। কারণ মানবের মনই মানবকে প্রতিদিন ছুঃখের সাগরে নিপাতিত করিতেছে; মন এত চঞ্চল, এত অস্থির যে, কোন বস্তু পাইয়াও তাহার সুখ নাই, না পাইয়াও স্বস্তি নাই। অবিরত বিষয় ভোগের লালসা তাহার মধ্যে বৃদ্ধিপ্রাপ্ত হইতেছে, অথচ ভোগদ্বারা সে লালসা কিছুতেই প্রশান্ত হইতেছে না। সৌমাবিশিষ্ট জড় পদার্থে যতই সুখের অন্বেষণ করা যাক, মানুষ

যথার্থ সুখ তাহা হইতে পাইতে পারে না। সেই আনন্দ এই জড় পদার্থে বা বহুবিধ বিলাসোপকরণের মধ্যে কখনই কেহ খুঁজিয়া পায় না। বরং সে সকল ছুরবস্থা হইতে মুক্তিলাভের উপায়ই হইল বৈরাগ্য। আজকাল কি ব্রাহ্মণ, কি শূদ্র, কি ভদ্র, কি ইতর সকলেই বিলাসভোগে প্রসক্ত। ইহাতে প্রকৃত সুখ পাইতেছি কিনা তাহা একবার কেহ স্থিরচিন্তে ভাবিয়া দেখে না। সকলেই ধনীদিগের মত বিষয়ভোগে উন্মত্ত ও সম্পৎ-প্রাপ্তির ছুরাকাঙ্ক্ষায় ব্যাকুল। এই ভয়ঙ্কর ছুরাকাঙ্ক্ষা বর্তমান থাকিতে, কেহ কখন শান্তিলাভ করিতে পারে না, বা যথার্থ সুখের মুখও দেখিতে পায় না। কেন যে আমার এত উপকরণের প্রয়োজন, ইহা কেহ না ভাবিয়াই শুদ্ধ ছুরাকাঙ্ক্ষার ও মিথ্যা বাসনার বশবর্তী হইয়াই চাহিয়া বসে, এবং অনবরত তাহারই চেষ্টায় ব্যাকুল হইয়া ছুটাছুটি করে। যেটুকু না হইলে নয়, তাহা সংগ্রহ করা অবশ্য মানুষমাত্রেই কর্তব্য; কিন্তু অতিরিক্ত লোভ করিলে বিশুদ্ধ প্রজ্ঞা নষ্ট হইয়া যায়। “তেন ত্যক্তেন ভুঞ্জীথা না গৃধঃ কস্মশ্চিদ্ ধনম্।”—ভগবান আমার জন্ম যাহা কিছু ব্যবস্থা করিয়াছেন, তাহাই সন্তুষ্ট হইয়া ভোগ কর, অপর কাহারও ভাগ্যের প্রতি লোভ করিও না। ইহার অর্থ এও হয় যে, যখন সমস্তই ভগবৎ সন্ডায় পূর্ণ, তিনি ছাড়া অণু কিছু নাই, তখন ভোগবুদ্ধি দ্বারা পৃথিবীস্থ যাবতীয় পদার্থকে গ্রহণ না করিয়া, ইহা ভগবৎপই এইরূপ ত্যাগবুদ্ধি দ্বারা অনাসক্ত হইয়া ভোগ কর।

ঋষি বালক নটিকেতা যমরাজপ্রদত্ত ভোগৈশ্বর্য লাভের

বর কিরূপে প্রত্যখ্যান করিয়াছিলেন, তাহা ভারতবর্ষীয় ঋষি
সন্তানদের কখনই ভুলিয়া যাওয়া উচিত নহে। নচিকেতা
বলিয়াছিলেন—

“শ্বোভাবা মর্ত্যস্য যদন্তকৈতৎ
সর্বেন্দ্রিয়াণাং জরয়ন্তি তেজঃ।”

“ন বিজ্ঞেন তর্পণীয়ো মনুষ্যঃ”

“অজ্ঞীর্ঘাতামমৃতানামুপেত্য

জীর্ঘ্যামৃত্যুঃ কধঃস্বঃ প্রজানন্।

অভিধ্যায়ন্ বর্ণরতিপ্রমোদান্

অতিদীর্ঘে জীবিতে কো রমেত ॥” (কঠ)

হে যমরাজ! ভোগ্যবস্তুসমূহ ক্ষণস্থায়ী এবং মরণশীল
জীবের সর্বেন্দ্রিয়ের যে তেজ তাহা ভোগ দ্বারা নষ্ট হইয়া যায়।
আর মনুষ্য প্রভূত বিত্ত পাইয়াও তৃপ্ত হয় না। অতএব
জরামরণশীল কোন ব্যক্তি পৃথিবীর ভোগশুখ সমূহের অনিত্যতা
জানিয়া এবং চক্ষের সম্মুখে তাহার অনিষ্টকারিতা উপলব্ধি
করিয়া, তাহার ভোগের জন্ত দীর্ঘজীবন কামনা করিবে?

ইহাই বেদোক্ত উপদেশ। হায়! এমন অমৃতময় বাক্য
মানিয়া চলিতে কেন আর আমাদের প্রবৃত্তি হয় না।
যাহাতে মনে এই বিবিধ উপকরণের প্রতি লোভ জন্মিতে
না পারে, তজ্জন্ত বৈরাগ্য এবং তিতিক্ষার আশ্রয় লওয়া
মনুষ্য মাত্রেরই কর্তব্য। কিন্তু যতক্ষণ সাধুসঙ্গ প্রভাবে কি হয়
কি উপাদেয়, এইরূপ মনে মনে বিচার করিবার স্বতঃ ইচ্ছা না
জন্মে ততক্ষণ বৈরাগ্য আসিতে পারে না। অন্ধকার রাত্রিতে

পথিমধ্যে পতিত রজ্জুকে যেমন সর্প বলিয়া ভ্রম হয়, তদ্রূপ
অজ্ঞানান্ধকারাচ্ছন্ন সংসারপথে বিবিধ সুখদুঃখাদি অজ্ঞানীদিগের
মোহ উৎপাদন করে। এই সমস্ত অনর্থের হেতুহৃত অজ্ঞানতা
দূরীভূত না হইলে, কিরূপে এই বাসনাতরঙ্গবিক্ষোভিত
মোহতটিনীর ধ্বংসসাধন হইবে? অতএব বশিষ্ঠদেবের নিরূপম
উপদেশ পুনঃ পুনঃ স্মরণ করা কর্তব্য। তিনি রানচন্দ্রকে
বলিতেছেন, “শান্তি, বিচার, সন্তোষ ও সাধুসঙ্গ এই চারিটি
মোক্ষদ্বারের দ্বারপাল। সর্বিশেষ যত্ন-পূর্বক এই চারিজন
এবং মসক্ত হইলে, তিন, দুই অথবা একজনের সেবা করিবে।
কেন না, ইহাদের একজন বশ হইলে, অবশিষ্টেরাও বশ হইয়া
থাকে। বৃষ্টিকালে জল যেমন ঘন হইয়া গিলা হয়, অতদ্বজ্জ
মুদ্রগণ তেমনি প্রগাঢ় অজ্ঞানবশে স্বাবরাদি-যোনি লাভ করে।
সুর্ঘোদয়ে পদ্ম যেমন প্রফুল্ল হয়, জ্ঞানালোকে হাওয়াও তেমনি
বিকশিত হইয়া থাকে। যাহার জ্ঞান নাই, সে জড়; যাহার
বিবেক নাই, সে অবস্ফ; যাহার বিজ্ঞা নাই, সে পশু, এবং
যাহার বিচার নাই, সে নামে মাত্র মনুষ্য। যাহাতে বিনাশ নাই,
তুনি বৈরাগ্য ও যোগাভ্যাসসহায়ে সেই শান্তিলাভে ও সৌন্দর্যরূপ
পরম সম্পৎসঙ্কয়ে কৃতযত্ন হও এবং সর্বদা সৎ-শাস্ত্রালোচনা,
ইন্দ্রিয় সংযম ও তপস্যা দ্বারা স্বীয় প্রজ্ঞা বর্দ্ধিত কর;
সংসার হইতে মুক্তিলাভ করিবে।”

বৈরাগ্য ব্যতীত জ্ঞান উৎপন্ন হয় না। জ্ঞান না হইলে
পুনঃপুনঃ সংসারক্লেেশের নিবৃত্তি নাই। বৈরাগ্য মানেই ইন্দ্রিয়ের

বিষয় সমূহে আসক্তিহীন হওয়া। যাহার ইন্দ্রিয় বশীভূত নহে, তাহার প্রজ্ঞাই উৎপন্ন হইতে পারে না, বুদ্ধির প্রতি হওয়া তো দূরের কথা। ইন্দ্রিয়ের বিষয়সমূহে ইন্দ্রিয়ের লোলুপতা নষ্ট না হইলে কেহই স্থিতপ্রজ্ঞ হইতে পারেন না। “বশে হি যন্তেন্দ্রিয়াণি তস্য প্রজ্ঞা প্রতিষ্ঠিতা।”

অনেকে বলেন, বৈরাগ্য ও মুক্তিই যদি জীবনের লক্ষ্য হয় তবে প্রথমতঃ মনুষ্যের সংসারে কর্ম করিতে প্রবৃত্তি হইবে কেন দ্বিতীয়তঃ, মুক্তিই যদি সর্বপ্রধান লক্ষ্য হয়, তবে এত কর্ম বোঝা অনর্থক বহিয়া মরায় লাভ কি? যাহা ত্যাগ করিতে হইবে, তাহাকে পূর্ব হইতে ত্যাগ করাই বৈরাগ্য ও মুক্তি। শ্রেয়ঃ; পক্ষ মাখিয়া ধুইয়া ফেলিবার প্রয়োজনীয়তা কি? আদৌ পক্ষ না মাখিলেই হয়। এইখানে ভারতবর্ষীয় আর্ধ্যঋষিদের কর্মরহস্য জ্ঞাত হওয়া আবশ্যিক; পরবর্তী অধ্যায়ে তাহা বিস্তৃতভাবে আলোচনা করিব। মোটামুটি একটা কথা এখানে বলিয়া রাখি।

বৈরাগ্য বলিলে, ঠিক নিষ্কাম্য ভাব বুঝায় না। যথার্থ কর্ম-বীরই বৈরাগ্য-সম্পন্ন হইতে পারেন। কারণ মঙ্গল কর্ম করিতে গেলেই সন্তুসংস্কৃতি হওয়া আবশ্যিক। ফলকামী স্বার্থান্ধ নীনাঙ্গারা কখনও মঙ্গল কর্মে দীক্ষিত হইতে পারে না। সন্তুসংস্কৃতি না হইলে যথার্থ মঙ্গল কর্মের কেহই অধিকারী হইতে পারে না। সুতরাং শুভ-কামী ব্যক্তিমাত্রকেই বৈরাগ্যবান হইতে হইবে। বৈরাগ্য-বিহীন ব্যক্তি কখনই নিষ্কামভাবে, নিঃস্বার্থ ভাবে জগতের হিতের জন্ত আত্মোৎসর্গ করিতে পারে না। অনেকে

মনে করেন, অর্থোপার্জনই বুঝি সমস্ত কর্মের একমাত্র উদ্দেশ্য, তাই তাহারা কোন কর্মে যদি আর্থিক বা সাংসারিক লাভ না দেখেন, তবে তাহারা তাহাকে কর্ম বলিতেই প্রস্তুত নহেন। বুদ্ধির এই বিপর্যয় সংসারে ঘোর আপদের মত কার্য্য করিতেছে। লাভ না থাকিলেও যে কার্য্য করা যায় এবং সেরূপ কার্য্যেও কর্মীর কিছুমাত্র শৈথিল্য থাকে না, বর্তমান যুগে স্বার্থান্ধ মানবের পক্ষে তাহা উপলব্ধি করা কঠিন হইলেও ইহা অসম্ভব নয়, একথা যেন আমরা ভুলিয়া না যাই। যাহারা খুব হিসাবী লোক, কড়া ক্রান্তিটির পর্য্যন্ত খবর রাখেন, তাহাদের পক্ষে তাহার মর্ম্ম বুঝা একটু শক্ত বটে, তথাপি যিনি সত্যের মর্ধ্যাদা রাখিতে চান, তাহাকে বলিতেই হইবে, জগতে শুধু নিজের শৈথিলে চলিবে না, শুধু স্বার্থ খুঁজিলে চলিবে না। সে-ই পরম সুরিত্ত যাহার বাসনার অন্ত নাই এবং যাহার স্বার্থ আপনার ক্ষুদ্র গণ্ডীর মধ্যেই আবদ্ধ। প্রকৃত বৈরাগ্য ও নিষ্কাম কর্মের রহস্য অবগত হইতে হইলে কিছুকাল নিবিষ্টচিত্তে সাধনা করা আবশ্যিক ও চিন্তকে বিচারবান করিতে হইবে। বিচার করিলে দেখিতে পাওয়া যাইবে—“বাসনাই পুনর্জন্মের হেতু, বাসনা হইতেই সংসার বন্ধন সংঘটিত হয়। প্রতিদিন যথা বিধানে পরাৎপর পরমাঙ্গার স্মরণ, মনন ও উপাসনাদি দ্বারা চিন্তের মালিন্য দূর হইলেই বাসনা বিনষ্ট হইয়া থাকে। বাসনার ক্ষয় হইলে বাসনাসমূহের আক্রমণ মনও বিগলিত হইয়া যায়।” (যোগবাশিষ্ঠ)

এই বিচার ও সাধনাভ্যাসের বলেই সাধকের নিকটে

সত্যের স্বরূপ প্রকাশ পায়। তখন আর সত্যবস্তুর
বুঝিতে কষ্ট পাইতে হয় না। এই সত্য যতদিন অপ্রকাশ
থাকে, ততদিন বিবিধ সদভ্যাসের দ্বারা সত্যানুসন্ধানের প্রযত্নকে
দূত করিতে হইবে। ভগবান শ্রীকৃষ্ণ রণক্ষেত্রে অর্জুনকে
স্বজনবধ-রূপ ঘোর কশ্মে প্রবৃত্ত করাইতে গিয়াও নিষ্কাম কশ্ম ও
বৈরাগ্যের উপদেশ দিয়াছিলেন, এবং বলিয়াছিলেন “হে অর্জুন
তোমাকে কশ্ম করিতেই হইবে; ইহাতে কশ্ম বন্ধনে পড়িবে সে
ভয় করিও না, যদি আত্মস্বখেচ্ছা না থাকে। ঈশ্বর্যর্পিত চিত্ত হইয়া
কশ্ম করিলে কশ্মবন্ধন ঘটিবার সম্ভাবনা নাই।” বাঁহারা মনে
করেন কিছু লাভের আশাই আমাদিগকে কশ্মে উত্তেজিত
করে, সুতরাং ফলাশা ত্যাগ করিয়া কশ্ম করা অসম্ভব, তাঁহাদের
এ কথা সমীচীন নহে। ভগবানে অর্পিত চিত্ত নিষ্কামী পুরুষেরা
কশ্ম করিয়া ফলের আশা করেন না, অথচ সকামীদের মতই
তাঁহাদের কশ্মেৎসাহ থাকে। শ্রীকৃষ্ণ নিজ জীবনে এইরূপ
ভাবে কশ্ম করিয়া জগৎকে নিষ্কাম কশ্ম বুঝাইয়া গিয়াছেন।
শ্রীকৃষ্ণ কংসকে বিনাশ করিয়া দুষ্টির দমন করিলেন, কিন্তু
সিংহাসন গ্রহণ করিলেন না। সাংসারিক লোভ তাঁহার ছিল
না, কিন্তু বাহ্য কর্তব্য ও ধর্ম তাহা হইতে তিনি কখনও আপনাকে
বিমুখ করিয়া রাখেন নাই। এরূপ মহাপুরুষ এই পার্থিবতা-
সর্বস্ব সভ্যতার যুগে বিরল হইলেও ছলভ নহে। শুভকশ্ম
করিলে সেই স্কৃতির ফলে প্রকৃত বৈরাগ্য উৎপন্ন হয়, কারণ
শুভকার্য্য করিতে করিতে মঙ্গলগুণের উদয় হয়, তখন স্বতঃই হৃদয়ে
কশ্মফলে স্পৃহা থাকে না, অথচ কর্তব্যকশ্ম করিতে কখনও

বিগতস্পৃহ সাত্ত্বিক ব্যক্তির আলস্য বা ঔদাস্য দেখা যায় না;
বরং তিনি সকাম ব্যক্তি অপেক্ষা আরও দৃঢ়তার সহিত কর্তব্যকশ্ম
সম্পন্ন করেন। তাই ত্রিলোকপূজ্য শ্রীকৃষ্ণের এই উপদেশ:—

“যস্ত্বিত্ত্বিয়ানি মনসা নিয়ম্যারভতেহর্জুন।

কশ্মেদ্ভিযৈঃ কশ্মযোগমসক্তঃ স বিশিগ্যতে।

তস্মাদসক্তঃ সততং কার্য্যং কশ্ম সনাচর।

অসক্তো হ্যচরন্ কশ্ম পরমাপ্নোতি পুরুষঃ ॥”

যে সকল ব্যক্তি জ্ঞানেন্দ্রিয়গণকে মনদ্বারা সংযত করিয়া
অর্থাৎ বিষয় ভোগে অতিমাত্র লোভযুক্ত না করিয়া, কশ্মে-
দ্ভিযের দ্বারা কশ্ম সকল করিয়া থাকেন—সেই অসক্ত ব্যক্তিই
বিশিষ্ট অর্থাৎ এরূপ পুরুষের চিত্তশুদ্ধি হেতু জ্ঞান প্রাপ্তি
হইয়া থাকে, অতএব হে অর্জুন, তুমিও অনাসক্ত হইয়া অর্থাৎ
কর্তব্যভিমান রহিত হইয়া অবশ্যকর্তব্য কশ্মের অনুষ্ঠান কর।
অনাসক্ত হইয়া কশ্ম করিলে চিত্তশুদ্ধি হয় এবং শুদ্ধচিত্ত ব্যক্তি
পরং অর্থাৎ মোক্ষ প্রাপ্ত হয়।

বৈরাগ্য-বিহীন চিত্তের শাস্তি নাই; সুতরাং প্রকৃত শাস্তি
লাভের জন্মই যে বৈরাগ্য হওয়া চাই। বিচারবশীকৃত চিত্তে
বিষয়ের প্রতি তাদৃশ লোভ থাকিতে পারে না, অতএব ইহা স্থির
নিশ্চয় যে বিচার প্রভাবেই বৈরাগ্যের উদয় হয়। বৈরাগ্য
দ্বারাই চিত্ত নিশ্চল হয়। বতক্ষণ বিষয় গ্রহণ স্পৃহা বলবতী
থাকে, ততক্ষণ চিত্ত বিক্ষিপ্ত থাকে। বিক্ষিপ্তাবস্থাই চিত্তের
মলিনতা। সমল চিত্তে ঠিক বিচার আসে না, সুতরাং কি হেয়
কি উপাদেয় বুঝিতে পারা যায় না। প্রকৃত হেয় ও উপাদেয়

কি ঠিক না হইলে, আপাতমধুর বিষয়সকল উপেক্ষা করা যায় না, এবং বিষয় না পাইলে চিত্ত অশান্তিপূর্ণ হইয়া উঠে। শরীরকে সর্ব্বশ্রম মনে করিয়া লওয়া এ অবস্থায় স্বাভাবিক বলিয়া তাহারই আরাধনায় দিব্যাত্ম ব্যাপৃত থাকা অসম্ভব নহে। এই যে দেহাত্মবোধ ইহাই জ্ঞানিজ্ঞান বা প্রমাদের নিকেতন। এই প্রমত্তভাবে থাকিতে সুখলাভের আশা হ্রাশা মাত্র। দেহাত্ম-বাদীরা দেখে তাহার চারিদিকে যাহারা আছে তাহাদের অনেকের অবস্থা হয়ত উন্নত; তাহাদের অপেক্ষা অনেকেই ভাল খায়, ভাল পরে—তাহাদের মত আমারও হইতে ইচ্ছা করে; তাই বহুবিধ অধর্ম্মের দ্বারা সর্ব্বদা ধনার্জনের চেষ্টায় ব্যাকুল হইয়া ফিরি। সুতরাং এরূপ যাহাদের চিত্তের অবস্থা তাহারা সত্যানুসন্ধান করিবে কি প্রকারে? সত্যকে না বৈরাগ্য কিরূপে চাহিয়া আনরা যাহা চাই, তাহা না হয় উদয় হয়। পাইলাম; কিন্তু সে সব পাইলেই কি সুখ আছে? আবার লুক্কের মত আরও অধিক চাহিয়া বসি। এইরূপে আশা বাড়িয়াই চলে, আমরাও উন্মত্তের মত আশার পশ্চাতে পশ্চাতে ছুটিয়া ক্লান্ত হইয়া পড়ি—তবু আশাকে ছাড়িতে পারি না। কত পরিশ্রম করি, কত চেষ্টা করি তবু দেখি আশা আর ফুরায় না, বাঞ্ছিত বস্তু চির অলঙ্কই রহিয়াছে। আশা মরীচিকার মত, পার্থিব সুখ স্বল্পদৃষ্ট পদার্থের মত, কখনই কাহারও আয়ত্তের মধ্যে আসিয়া পৌঁছায় না, চিত্তও আমাদের সেই জন্ম কোন শাস্তি লাভ করে না। সুতরাং প্রকৃত সুখ কি এবং তাহা কোথায় ও কিরূপে পাওয়া যায়,

তাহা সন্ধান করিয়া বাহির করিয়া লইতেই হইবে, নচেৎ এ ধরীর ধারণাই ব্যর্থ হইয়া যাইবে। অনুসন্ধান করিলেই আমরা বুঝিতে পারিব যে আমরা ঠিক গন্তব্য পথে চলিতেছি না, আমরা কুসঙ্গী ও কুদৃষ্টান্ত দ্বারা পথহারা হইয়া কুপথে চলিয়াছি। প্রকৃত পথের অন্বেষণের জন্ম এইখানে আমাদের গতিকের বন্ধ করিয়া একবার দাঁড়াইতে হইবে; বিচার করিয়া দেখিতে হইবে কোন পথ ধরিলে আমরা লক্ষ্যাভিমুখে অগ্রসর হইতে পারিব। কোন্ কোন্ সাধীকে সঙ্গে লইতে হইবে এবং কাহার সঙ্গেই বা ত্যাগ করিতে হইবে। জ্ঞানিজ্ঞান এখানেও যৎপরোনাস্তি বাধা দিবার চেষ্টা করিবে, কিন্তু মিথ্যা সাহের ঘোরে ভুলিলে আর চলিবে না। মিথ্যা সুখের যে মাহ তাহা চিত্ত হইতে মুছিয়া ফেলিতেই হইবে, নচেৎ সুখ শাস্তি লাভের জন্ম কোন উপায় নাই। এখন দেখা যাক্ কিসে এই মোহ ঘুটিবে? শাস্ত্র বলিয়াছেন, সাধুসঙ্গ দ্বারাই চিত্তের এই বিকলতা নষ্ট হয়। সাধুদের নিৰ্ম্মল চরিত্র, পবিত্র ভাব, গৃহীদের চিত্তের স্থৈর্য্য ও আনন্দ আমাদের এক অভিনব মপার্শ্বিক চিন্ময় রাজ্যের সংবাদ আনিয়া দেয়। যে সত্যের স্বর্ণ-জ্যোতিঃ তাহাদের নিৰ্ম্মল অন্তঃকরণে উদ্ভাসিত হইয়াছে— তাহারই কিরণধারা আমাদের মৌহযুক্ত চিত্তের অন্ধকার বিধ্বংস করিয়া এক অপূৰ্ব্ব জ্ঞানময় আলোক বিকীর্ণ করিবে। সেই জন্মই সাধুসঙ্গের এত মহিমা। শ্রীমদ্ভাগবতে মহাত্মা ভরত ছগণকে উপদেশ করিতেছেন :—

রত্নগণ তত্তপসা ন যাতি
ন চেজ্যয়া নৈবাপনাদ্ গৃহাদ্ বা ।
ন হন্দসা নৈব জলাগ্নিস্থৈধী
বিনামহৎপাদরজোহভিষেকং ॥

সাদু রূপা ব্যতীত এই পরম ছুষ্কতির নিষ্কৃতি কোথায় ? এই সাদুকুপাতেই আমাদের জীবনের লক্ষ্যপথ কি বৃষ্টিতে পারি, এবং তাহারাই পথপ্রদর্শক হইয়া এই অপার ভব-সংসারের অপার পারে আমাদেরিগকে উত্তীর্ণ করিয়া দেন ।

এইরূপে সাদুসঙ্গ, সন্তোষ, বিচার ও শাস্তি এই চারিটিকে আশ্রয় করিয়া আমরা ক্রমশঃ মুক্তি-পথে অগ্রসর হই। উপরোক্ত

চারিটির মধ্যে প্রথম তিনটি কারণস্বরূপ ও চতুর্থটি তাহাদের ফলস্বরূপ প্রকাশ পায়। প্রথম তিনটির সাধনা দ্বারাই আমাদের চিত্তমল নষ্ট হইয়া যায়। চিত্তশুদ্ধি না হওয়া

পর্যন্ত আমরা অধ্যায়মার্গে প্রকৃতপক্ষে প্রবেশ লাভ করি না। যাহাতে চিত্তশুদ্ধি ঘটে ও মোক্ষ-মার্গের কবাট উন্মুক্ত হয় তজ্জন্ম সকলেরই যথাসাধ্য পুরুষকার প্রয়োগ করা কর্তব্য। বর্তমান কালে আমাদের চিত্তশুদ্ধি হয় না বলিয়াই আমরা যে কর্মের যে ফল তাহা লাভ করিতে পারি না। অপরিণত বৃক্ষের অসময়ের ফলের মত আমাদের শুভ ইচ্ছাগুলিও যথাযথরূপে পুষ্ট হইয়া উঠিতে পারে না। তাহার অকালে উদ্ভিত হয় এবং অকালেই ধ্বংস হয়, সুতরাং পুনঃপুনঃ বিফলতার নির্মম কষাঘাতে জর্জরিত হইয়া পড়ি। সাত্ত্বিক কার্য, কোন হিতানুষ্ঠান,

অথবা জ্ঞানার্জন এ সকলের জন্ম আমাদের চিত্ত সময়ে সময়ে ব্যাকুল হয় বটে, কিন্তু দীর্ঘকাল চেষ্টা করিয়া সেগুলিকে আয়ত্ত করিবার মত ক্ষমতা যেন আমরা হারাইয়া ফেলিয়াছি। তাহার কারণ শিক্ষার অভাবে মন ঠিক আমাদের গঠিত হয় নাই। আমরা গৃহী হইতে চাই অথচ গৃহস্থালী করিবার পটুতা আমাদের নাই—আমাদের সন্ন্যাসী ব্রহ্মচারী হইতে ইচ্ছা হয়, কিন্তু আঞ্জমোচিত মর্যাদা রক্ষা করিতে পারি না—শুধু মং সাজা মাত্র সার হয়। সেই জন্মই আমার মনে হয়, গোড়া হইতে কতকগুলি সদভ্যাসে অভ্যস্ত হওয়া আমাদের বিশেষ প্রয়োজন, এবং প্রথম হইতে চেষ্টা করা কর্তব্য। যেমন কেহ যদি বিদ্যালিক্ষা করিতে চায়, অথচ পাঠাভ্যাসে মনঃসংযোগ না করিয়া শকট চালনায় ব্যতিব্যস্ত হয়, তবে তাহার ফল কি হইবে অনুমান করা কাহারও পক্ষেই কঠিন নয়, তদ্রূপ আমরা যাহা হইতে চাই প্রথম হইতেই তদনুকূল শিক্ষা প্রণালীর অনুসরণ না করিলে সফলতা লাভ একেবারেই অসম্ভব, ইহা বলাই বাহুল্য। সুতরাং প্রাণপাত করিয়া লক্ষ্য লাভে চেষ্টা করিতে হইবে। ইহা নিশ্চয় করিয়া বলা যাইতে পারে, যে শাস্ত্রানুমোদিত পুরুষকার প্রয়োগ করিলে কোন কর্মই অসম্পন্ন হইয়া থাকিতে পারে না। শাস্ত্র বলিয়াছেন ;—

“যদ্‌ ছুস্তরং যদ্‌ দুৰাপং যদ্‌ দুর্গং যচ্চ দুষ্করম্ ।

সর্ব্বশু তপসা সাধ্যং তপো হি ছুরতিক্রমম্ ॥”

যে কেহ, যে কিছুর জন্ম তপস্যা করিবেন, তাহার অন্ততঃ আংশিক সফলতা লাভ হইবেই হইবে। তপস্যার এমনই

প্রভাব। এই তপস্বাই—সদভ্যাস। পাঠক যদি অদৃষ্টবাদী হন তাহা হইলেও চেষ্টা করা তাঁহার কর্তব্য। নিশ্চেষ্টতা জড়ের ধর্ম, চেতনের নহে। অতএব চেষ্টাহীন হইয়া থাকা সর্বথা অন্য় ও নিরমবিরুদ্ধ, তাহা বুদ্ধিমান মাত্রেই প্রণিধান করিয়া দেখা কর্তব্য।

যাঁহারা অদৃষ্টবাদী অর্থাৎ পুরুষকার মানিতে চান না তাঁহাদেরই ত বরং আরও অধিকতর চেষ্টাশীল হইবার কথা। কারণ তাঁহারা আপনাদের শক্তির উপর বিশ্বাস করেন না; জ্ঞান বুদ্ধির অতীত সর্বশ্রেষ্ঠ শক্তিসম্পন্ন ঈশ্বরের শক্তির উপরই তাঁহাদের বিশ্বাস, সুতরাং তাঁহাদের পক্ষে অধিকতর চেষ্টাশীল হওয়াই স্বাভাবিক। বরং যাঁহারা নিজের শক্তির উপর নির্ভর করে, তাঁহারা সামর্থ্যের অভাববশতঃ সময়ে সময়ে ভ্রমোন্মত্ত হইলেও হইতে পারে, কিন্তু যাঁহারা দৈবকেই সকল সফলতার হেতু বলিয়া বুঝিয়া রাখিয়াছেন, তাঁহাদের কার্যে উৎসাহহীন হইবার কোন কারণ দেখা যায় না। এই জন্মই গত শতাব্দীর ইয়োরোপের সর্বশ্রেষ্ঠ বীর ও ধীমান পুরুষ সম্রাট নেপোলিয়ন অদৃষ্টবাদী হইয়াও কখনও পৌরুষ হইতে বিচ্যুত হন নাই। তিনি জানিতেন অদৃষ্টে যাহা আছে তাহা ত হইবেই, সুতরাং কাপুরুষের মত নিশ্চেষ্ট বসিয়া থাকায় কোন লাভ নাই। এই জন্ম তুলু সংসারের মধ্যে বা ভীষণ আগ্নেয়াস্ত্রের সম্মুখে আসন্ন মৃত্যু বুঝিয়াও তিনি অদৃষ্টে যাহা আছে তাহা খণ্ডিত হইবার নহে ভাবিয়া সে সকল বিপদপাতের মুখে বীরদর্পে অগ্রসর হইতে কুণ্ঠিত হইতেন না; আর আমরা হুর্ভাগ্যবশতঃ

সেই অদৃষ্টকে প্রবল বলিয়া স্বীকার করিয়াও আসন্ন বিপদের ভয়ে এতই ব্যাকুল হই, যে তাহা দেখিলে শ্রীলোকদিগেরও লজ্জানুভব হয়। পুরুষকারবাদীরাও যে অদৃষ্টকে মাগ্ন করেন না তাহা নহে; তবে তাঁহারা “যাহা হইবার তাহা হউক” বলিয়া চেষ্টাকে আরও প্রবল করিতে চেষ্টা করেন, কারণ পূর্বকর্মকে বর্তমান কর্মই নষ্ট করিতে সক্ষম; সেইজন্য শাস্ত্র ও সদাচারকে মাগ্ন করিয়া কর্ম হইতে তাঁহারা কখনই নিবৃত্ত হন না। কিন্তু আত্ম-দৃষ্টিহীন জড়বুদ্ধি মূর্খেরা ‘যা হবার তা হবেই’ ভাবিয়া একেবারে লেপ চাপা দিয়া শুইয়া পড়ে। ‘রোগস্থান সহস্রানি ভয়স্থান শতানি চ’ ইহাই এই জড় সংসারের নিয়ম, মূর্খেরা সেই সব স্থলে হাত পা ছাড়িয়া দিয়া বসিয়া পড়ে, কিন্তু পণ্ডিতেরা সে সব স্থলে কিছুতেই অবসন্ন হন না। অবশুস্তাবী হুর্ভাগ্যের জন্ম তাঁহারা খেদ করেন না; চেষ্টা দ্বারা যাহা হইবার তাহাই আয়ত্ত করিবার জন্ম দৃঢ় প্রযত্ন করিতে থাকেন। দেহাত্মবাদী মূর্গদের নিকট সবই দুঃখ, সবই ভয়, সবই মৃত্যু, সবই অন্ধকার বলিয়া বোধ হয়, কিন্তু আত্মদৃষ্টিসম্পন্ন পুরুষের নিকট সমস্তই আনন্দ, সমস্তই ব্রহ্মের কনককিরণোন্মাসিত—তাঁহার কাছে কিছুই প্রহেলিকা নয়—সবই স্পষ্ট, সবই সহজ বলিয়া বোধ হয়। সুতরাং তাঁহার কাছে শোকও নাই, দুঃখও নাই, বিরহও নাই, সন্তাপও নাই—‘সমস্তই পূর্ণানন্দপূর্ণ ভবে’; তিনি বলেন “অমৃত করিয়া পান, অমর হয়েছি এবে।”

কেহ কেহ বলেন “চেষ্টা আসে না যে, করি কি?” ঠিক কথা, চেষ্টা সব সময় আসে না; কিন্তু চেষ্টা কেন আসে না তাহা

কি ভাবিয়া দেখিয়াছ? গীতার আছে “অযুক্তঃ প্রাকৃতঃ স্তব্ধঃ শঠো নৈকৃতিকোহননঃ। বিবাদী দীর্ঘশ্বত্রী চ কর্তা তামস উচ্যতে।” অর্থাৎ ‘অনবহিত, বিবেকহীন, উদ্ধত, শঠ, পরাপমানকারী, অলস, বিবাদী ও দীর্ঘশ্বত্রী কর্তা তামস বলিয়া উক্ত হয়।’ অর্থাৎ যে সকল তামসিক প্রকৃতির লোক তাহারা স্বভাবতঃই নিশ্চেষ্ট, অনস ও বিবেকহীন। তাহাদের বুদ্ধিও তনোগুণাস্কন্ন বলিয়া তাহারা ধর্ম্মার্থ কিছুটা ঠিক করিতে পারে না, স্তত্রাং আসক্তি-শূন্য, অহং-অভিমানশূন্য, বৈর্যা ও উৎসাহযুক্ত, সিদ্ধি ও অসিদ্ধিতে বিকারশূন্য, সাত্বিক কর্তার অবস্থা তাহারা কিরূপে লাভ করিতে পারিবে? এইজন্যই তামস প্রকৃতির লোকদিগের জন্ম শাস্ত্রে যে সকল কর্ম্ম বা অনুষ্ঠানের বিধান আছে, সে সব অনুষ্ঠানগুলি ঠিক ঠিক মত করিয়া গেলে তাহাদের সাত্বিক বুদ্ধির বিকাশ হইতে পারে। আলস্য তনোগুণের লক্ষণ। অতএব প্রথম প্রথম বৃত্তিগুলি রাজসিক ভাবাপন্ন হওয়াও মন্দ নহে, তনোগুণের নিশ্চেষ্টতা অপেক্ষা বহুগুণে তাহা শ্রেয়ঃ। তবে এইটুকু লক্ষ্য রাখিলেই হইল যে রজোগুণের প্রাবল্যে চিত্ত অভ্যস্ত বিক্ষিপ্ত হইয়া না পড়ে। রজোগুণ অত্যধিক বাড়িলে আবার তনোগুণ প্রবল হইবার সম্ভাবনা। স্তত্রাং নিত্য নিয়মিত সদালাপ ও ভগবদ্বিষয়ক আলোচনা ও কথাদি শ্রবণ করিবার অভ্যাস করিলে ঐরূপ বিড়ম্বনা না ঘটতেও পারে। এইরূপে তনোগুণ, এবং ক্রমশঃ রজোগুণ অতিক্রম করিলে চিত্ত ক্রমশঃ নির্মল হইয়া আসিবে। চিত্ত যতই নির্মল হইতে থাকিবে ততই অনিত্যবস্তুর প্রতি

বিরাগ এবং নিত্যপদার্থের জন্ম আকাঙ্ক্ষা জাগ্রত হওয়া স্বাভাবিক; চিত্ত এইরূপে ক্রমশঃ সাত্বিক হয়। সত্ত্বের স্বভাবই প্রকাশ, সত্ত্বগুণ যত বৃদ্ধি পাইতে থাকিবে ততই নিত্য সত্য শ্রব পদার্থের জ্ঞান আপনা আপনিই পরিষ্কৃত হইয়া উঠিবে। অবশ্যই প্রথমে বিবেক বৈরাগ্য সমুদিত হয় না—এই নিরতিশয় বিবয়-লোলুপ চিত্তে প্রথম প্রথম মুমুকুতা জাগিবার আশাও বিড়ম্বনা মাত্র। তবে যিনি দীর্ঘকাল সাধুসঙ্গ করিবেন এবং তাঁহাদের মুখ হইতে ভগবদ্-গুণানুকীর্ণন শ্রবণ করিবার মৌভাগ্য লাভ করিবেন, তাঁহাদের স্বর্ষের প্রতি এবং তদনুকূল অনু-ষ্ঠানাদির প্রতি শ্রদ্ধা বৃদ্ধি জন্মিবেই। জীবন এইরূপেই কৃতার্থ হয়।

বৈরাগ্যাদি কিরূপে উপন্ন হইতে পারে শাস্ত্রে তাহার উপদেশ এই :—

“স্ববর্ণাশ্রমধর্মেণ তপসা হরিতোষণাৎ।

সাধনাচ্চ ভবেৎ পুংবাং বৈরাগ্যাদি চতুষ্টয়ম্ ॥”

‘স্ব স্ব বর্ণাশ্রম বিহিত ধর্ম্মের অনুষ্ঠানের দ্বারা এবং তপস্যার দ্বারা হরিতোষণ হয় এবং এইরূপে বৈরাগ্যাদি সাধন চতুষ্টয় সম্পন্ন হইয়া থাকে।’ ইহার ফল কি তাহাও শাস্ত্রে বলিয়াছেন “সারাবলোকিনী-বুদ্ধির্জায়তে দীপকোপনা।” অর্থাৎ সাধুসঙ্গ ও তপস্বাদ্বারা বঁহাদিগের পাপ ক্ষয় হয়, তাঁহাদিগেরই পরমার্থ-দর্শিনী সমুজ্জল বুদ্ধি সমুদ্রুত হইয়া থাকে। অতপস্ক ব্যক্তির পরমার্থ প্রাপ্তির যোগ্যতা লাভ হয় না এবং ব্রহ্মধিবয়িনী বুদ্ধিরও উদয় হয় না। মনের আবার দুইটি দিক আছে একটি

মলিন ও আর একটি স্বচ্ছ। সমুদ্রের যেমন উপরেই তরঙ্গ কিন্তু তাহার গভীর নিম্নপ্রদেশ স্থির, তদ্রূপ মনের বাহিরের দিকটাই বিষয়-বিষ-জর্জরিত, তাহার ভিতরের দিক খুব স্বচ্ছ ও নির্মল। মনের সেই স্বচ্ছাংশে পৌঁছিতে হইবে। মনের যে অংশটি নির্মল, নির্বিকার ও জড়বাদি গুণ বর্জিত সেখানে স্বতঃই আত্মবিচারশক্তির বিকাশ হয়। সেই স্বচ্ছাংশে পৌঁছিবীর উপায় কি তাহা বশিষ্ঠদেব এইরূপ বলিয়াছেন—

বিচারের প্রকৃতি
কিরাপে হয়।

“ক্রিয়াক্রমেণ মহতা তপসা নিয়মেন চ।

দানেন তীর্থযাত্রাভিচ্চিরকালং বিবেকতঃ ॥

হৃদ্বতেঃ ক্ষয়মাপনে পরমার্থবিচারণে।

কাকতালীয়যোগেন বুদ্ধিজন্তোঃ প্রবর্ততে ॥”

‘দীর্ঘকাল যজ্ঞদানাদি ক্রিয়াকলাপ, স্নানহং তপস্যা, নিয়ম ও তীর্থযাত্রাদ্বারা বিবেক বৃদ্ধি হয় এবং তদ্বারা হৃদ্বতে ক্ষয়প্রাপ্ত হইলে কাকতালীয় ঞ্চায়ে মনুষ্যের পরমার্থ বিচারে বুদ্ধি প্রবৃত্ত হয়।’

প্রত্যহ নিয়মিত পূজার্চনা, হোম, সন্ধ্যা, তর্পণ এবং সদাচার অনুষ্ঠান করিতে করিতে একটু একটু করিয়া মলিন বাসনাসমূহ ক্ষয় হইতে থাকে, চিন্তাও ক্রমশঃ নির্মল ও প্রশান্ত হইয়া আইসে।

‘জ্ঞানমুৎপত্ততে পুংবাং ক্ষয়াৎ পাপশ্চ কর্মণঃ ॥’

এইরূপ নির্মল চিন্তেই আত্মার স্বরূপ জ্ঞান কিরাপে প্রতিবিম্বিত হয়। ‘অস্তঃকরণসংস্কৃদ্ধৌ স্বয়ং জ্ঞানং প্রকাশতে।’ তখনই এই জগতের নাম-রূপ মিথ্যা বলিয়া প্রতিপন্ন হয়। সূর্য্যোদয়ের

সঙ্গে সঙ্গে যেমন অন্ধকার অপসারিত হইয়া যায়, তদ্রূপ জ্ঞানোদয়ের সঙ্গে সঙ্গে দেহান্নবুদ্ধি অন্তর্হিত হইয়া যায়, তখনই যথার্থ বিবেক-খ্যাতি ও পরা বৈরাগ্যের উদয় হয়। এতদ্বুদ্ধি লাভের জন্তই বিচারনিষ্পন্ন-ধ্যান ও সাধননিষ্পন্ন-স্থিরবুদ্ধির আবশ্যিকতা। মলিন মনোবুদ্ধি থাকিতে এরূপ বিচার সুনিষ্পন্ন হইবার নহে। বাহ্যবস্তুর বিচার শাস্ত্রের লক্ষ্য নহে। কারণ তাহা ত সাধারণ বৈষয়িক বুদ্ধি দ্বারাই সুসম্পন্ন হইতে পারে। তজ্জন্ত সংযম, নিয়ম, তপস্যা, তীর্থ-পর্য্যটনের কোনই প্রয়োজন নাই। শাস্ত্র তাহাকেই বিচার বলিয়াছেন যাহাতে আত্মজ্ঞান সঙ্গত হয়। তাহার প্রণালী এইরূপ—

“কোহহং কথমিদং জাতং কোবৈ কর্তাস্তু বিদ্বতে।

বিচার প্রণালী উপাদানঃ কিমন্তীহ বিচারঃ সোহয়মীদৃশঃ ॥”

“আমি কে, কি প্রকারে এই দৃশ্য জগত সমুদ্ভূত হইল, ইহার কর্তাই বা কে এবং এই জগতের উপাদানই বা কি, এই সকল অনুসন্ধানকেই বিচার কহে।”

এইরূপ বিচার করিতে করিতে করিতেই ক্রমশঃ সম্যক পরমার্থতত্ত্ব জানিবার স্পৃহা বলবতী হইয়া উঠে, তখন সে আর ভ্রামানুসন্ধান না করিয়া কিছুতেই থাকিতে পারে না। এইরূপ অবস্থায় ভগবদ্ কৃপা যাহা আলোকতরঙ্গের মত সমস্ত বিশ্বকে বেঁটন করিয়া আছে, তাহার উপলব্ধি হইতে থাকে। ভগবানকে পাইবার জন্ত যে ব্যাকুল তাহাকে ধরা দিবার জন্ত তিনিই তাহার ব্যবস্থা করেন।

ভগবান্ শ্রীকৃষ্ণ বলিয়াছেন—

চেষ্টাশীল ব্যক্তির
ভগবদ্‌কৃপা লাভ
হয় এবং ভগবদ্‌কৃপা
দ্বারা জ্ঞান লাভ
হয়।

“তেবাং সততযুক্তানাং ভক্ততাং শ্রীতিপূর্ব্বকম্।
দদামি বুদ্ধিযোগং তং যেন মাং উপযাস্তি তে।”
এইরূপে “অনন্তচেতাঃ সততং যো
মাং স্মরতি নিত্যশঃ।

তস্মাহং সুলভঃ পার্থ নিত্যযুক্তস্য যোগিনঃ॥”

শ্রীতি পূর্ব্বক আনার যে ভজনা করে

তাহাকে আমিই জ্ঞান দান করি। অনন্তচিত্ত

হইয়া অর্থাৎ জগতের আর কিছু না চাহিয়া যে কেবল আমাকেই
চায় তাহার পক্ষে আমি খুবই সুলভ।

ইহাতে আরও একটি কথা স্পষ্ট বুঝা গেল, যে পরমাশ্রম
নিত্য স্মরণ চিন্তন করিতে করিতেই তাঁহার সঙ্গে যোগযুক্ত হওয়া
যাইতে পারে। এইরূপ যোগযুক্ত যতদিন না হওয়া যায়, তত-
দিন এই দৃশ্য পদার্থ এবং অক্‌ন্দন ঐহিকভোগের প্রতি চিন্তের
একান্ত আসক্তি কমিবার নহে। বিশিষ্টদেব বলিতেছেন—

“ন তপোভিন্দানেন ন তীর্থৈরপি জায়তে।

ভোগেচ্ছার নিবৃত্তি ভোগেনু বিরতির্জস্টোঃ স্বভাবালোকনাদৃতে ॥”
কিভাবে হয়?

আত্মদর্শন ব্যতীত তপস্যা, দান, কিংবা

তীর্থদর্শন দ্বারাও ভোগেচ্ছার নিবৃত্তি হয় না।

কেহ বলিতে পারেন আত্মদর্শন ব্যতীত যদি ভোগেচ্ছার
নিবৃত্তি না হয়, তবে তীর্থ পর্য্যটনাদি করিয়া ফল কি? সম্পূর্ণ
ভোগেচ্ছানিবৃত্তি যদিও আত্মদর্শন ব্যতীত হয় না, কিন্তু
আত্মদর্শনের জন্ত মনোনিবৃত্তির প্রয়োজন, এবং মনোনিবৃত্তির
জন্ত পাপক্ষয় ও বাসনাশুদ্ধির প্রয়োজন। তীর্থপর্য্যটন, দান

এবং তপস্যা দ্বারা বাসনাশুদ্ধি ও পাপক্ষয় ঘটয়া থাকে,
তাহা পূর্ব্বক বলিয়া আসিয়াছি।

জানি না কেমন করিয়া ঐশ্বর্য্য প্রভাবে ঐশ্বরোপাসনা
ও তপস্যা দ্বারা সাধকের অন্তঃকরণের মধ্যে জ্ঞানের উন্মেষ হইতে
থাকে। কিন্তু হয় যে তাহা নিশ্চিত। একবার এই জ্ঞানালোক
প্রত্যক্ষীকৃত হইলে মন তাহার দিকে চাহিয়া পড়িবেই, এবং মনের
পূর্ব্ব সংস্কারসমূহ একে একে অদৃশ্য হইতে থাকিবে। তখন
কোন কর্ম্মই চিন্তে আর তেমন দাগ রাখিয়া যাইতে পারে না।
তখনই সমস্ত কর্ম্ম বিষ্ণুপ্রীত্যর্থ সম্পন্ন হয়। এই অবস্থা পরিপক
হইলেই সাধক যথার্থ ভাবে নিষ্কান হইতে পারেন; ‘তিনিই সব
তাঁহারই সব’, ‘আমি কিছু নয়, আমার কিছু নয়’, এ অবস্থা তিনিই
স্পষ্ট উপলব্ধি করিতে সমর্থ হ’ন। সুতরাং তাঁহার শ্রীপুত্র
সংসার থাকিলেও, প্রকৃত পক্ষে তাঁহার কিছুই থাকে না। তিনি
সকল অবস্থাতেই,—সকল ঘটনার মধ্যেই আপনাকে সর্ব্বভো-
ভাবে ‘অকর্তা’ বলিয়া দেখিতে পান এবং উক্তভাবে সর্ব্ব কাৰ্য্য
করিতে অভ্যস্ত হইয়া যান। কোন কাৰ্য্যের লাভালাভ, সুখ
দুঃখ তাঁহাকে আর তখন তাহাকে বিন্দুমাত্র বিচলিত করিতে
পারে না। এইরূপে যোগীরা পুরুষকার প্রভাবে অর্থাৎ শ্রদ্ধা,
বীৰ্য্য ও নিত্য অবিস্মৃতি দ্বারা অত্যন্ত অসম্ভব ব্যাপারকেও
সম্ভব করিয়া তুলেন, অর্থাৎ মানসিক ব্যাপার-শূন্য বুদ্ধিকে
নিশ্চল করিয়া তুলিলে ব্যাপার-নির্ব্বাহ সম্ভবে স্মৃতি সাধন দ্বারা
তাঁহার কর্ম্ম করিয়াও বদ্ধ হন না। কারণ কর্ম্মফলে তাঁহারা স্পৃহা-

শূন্য। মনের এরূপ অবস্থা লাভ করা কেহ যেন অসম্ভব মনে না করেন।

শ্রীরামচন্দ্র বন্ধুদিগের প্রতি উপদেশ দিয়াছেন—হে বন্ধুগণ, এ সংসার কিছুই নহে, সুতরাং তুমি আমি কেহই কিছু নহি। সর্বদা এই প্রকার নিশ্চয় করিয়া কোন বিষয়েই বন্ধ ও আসক্ত হইবে না। ইহাই পরমপদরূপ অত্যাচ্ছ প্রাসাদে আরোহণের সুখময় সোপান। হে সুহৃদর্গ, সংসার যখন কিছুই নহে, তখন শত্রু মিত্র আত্মীয় ও অনাত্মীয় সমুদায়ও কল্পনামাত্র। ‘আমি কিছু নয়’ ‘আমার কিছু নয়।’ যাহা কিছু দেখিতেছি, শুনিতেছি, স্পর্শ করিতেছি ও আশ্বাদন করিতেছি—অর্থাৎ ইন্দ্রিয়বর্গের যাহা গোচর হইতেছে, তাহা সমস্তই তাঁহারই প্রকাশ—অতএব তিনিই সব, তাঁহারই সব,—এইরূপ দৃঢ় ভাবনা করিতে করিতে ও এইরূপ বিচার প্রণালী অবলম্বন করিয়া তত্তৎ বিষয়ে ধ্যান লাগাইতে লাগাইতে, আত্মা অনাত্মা কি, বস্তু ও অবস্তু কি, এ সমস্ত ধারণা দৃঢ়ভাবে জন্মিতে থাকে। তখন যথার্থই মন হইতে বিষয়-লালসা ও ‘আমিদের’ অভিমান খসিয়া পড়ে। তপস্যা, স্বাধ্যায় ও পরমাত্মার নিত্যস্মরণ-বন্দনরূপ ঈশ্বরপ্রার্থনা দ্বারা, সাধক পরমাত্মাতে আপনার অভিমান “আমিত” হারাইয়া ফেলেন। এরূপ হওয়া কিছু মাত্র বিচিত্র নহে, মনকে নির্বিবয় করা যায়, কেবল চেষ্টার আবশ্যিক। চেষ্টা করিয়া দেখিলে সকলেই নিজ জীবনে ইহার সাফল্য অনুভব করিতে পারিবেন। মনের একটি বিচিত্র শক্তি এই যে মন যখন কাহাকেও ভাল বলিয়া ধারণা

করে, তখন তাহার সমস্ত কার্য্যই মনের নিকট ভাল বলিয়া প্রতীত হয়—আবার যদি কোন কারণ বশতঃ তাহার প্রতি প্রতিকূল ধারণা জন্মে, তখন মনের সমস্ত শক্তি তাহার বিরুদ্ধাচরণে প্রবৃত্ত হয়। সেই একই তো মন, কিন্তু এরূপ অনুকূল বা প্রতিকূল অবস্থা গ্রহণ করা তাহার পক্ষে সহজ ও স্বাভাবিক। মনের ধর্ম্মই এই। জল যখন যেরূপ পাত্রে থাকে সেইরূপ পাত্রের আকারে আকারিত হয়, মনও যখন যে ভাবে আশ্রয় করিয়া থাকে তখনই সেই ভাবে ভাবিত হইয়া যায়। সুতরাং যে চিন্তা এখন সংসার বাসনার অভিনিবিষ্ট হইয়া নিতান্ত মলযুক্ত হইয়া আছে, সেই চিন্তাকে চেষ্টার দ্বারা ব্রহ্মভাবে ভাবিত করিলে সে তখন ব্রহ্মের নিশ্চল ভাব গ্রহণ করিতে করিতে নিশ্চল নির্বিকার ব্রহ্মের সহিত একই ভাবাপন্ন হইয়া যায়।

অভ্যাস ও বিচার সাহায্যে মনের এইরূপ স্থিতিসাধন করিয়া দেওয়া সকলেরই কর্তব্য ও ধর্ম্ম।

সেই জগুই বশিষ্ঠদেব জোর করিয়া বলিয়াছেন যে, চিত্ত আছে বলিয়াই সংসার রহিয়াছে, অতএব ‘তস্মিন্ ক্লীণে জগৎ ক্লীণং’—সুতরাং রোগ আর অস্থ কোথাও জন্মে নাই, রোগ এই চিন্তেই জন্মিয়াছে অতএব তাহারই চিকিৎসার বিধান কর। শাস্ত্রে বলিতেছেন :—

“পরশু পুংসঃ সঙ্কল্পময়স্বং চিন্তমুচ্যতে।

অচিন্ত্যমসংকল্পান্মোক্ষস্তেনাভিজায়তে ॥”

পরম পুরুষের যে সঙ্কল্পময়ত্ব, তাহাকেই চিন্তা কহে, উক্ত সঙ্কল্পের অভাবে, চিন্তেরও অভাব হয় ; তাহা হইলেই মুক্তিলাভ ঘটে।

“সঙ্কল্প করিব না” বলিয়া দৃঢ়ভাবে বলিয়া মনে সঙ্কল্প বিকৃত আসিতে দিও না, দেখিবেন শীঘ্রই সঙ্কল্প ক্ষীণ হইয়া আসিতেছে ও পরিশেষে সঙ্কল্পশূন্য হইয়াও থাকিতে পারিবে। এইরূপ স্থিতি যত বাড়িতে থাকিবে, আমরা ততই মুক্তির নিকট হইতে পারিব। কিন্তু উঠিয়া পড়িয়া লাগা চাই, ‘করছি করবো’ ভাবে হয় না।

আত্মজ্ঞান না হওয়া পর্যন্ত মানুষের কিছুতেই মুক্তি নাই। বিবিধ বিষয়বাসনা এই আত্ম-জ্ঞানলাভের অন্তরায়। প্রাচীরের পর প্রাচীর রচনা করিয়া যেমন অন্তঃপুরকে ছুর্ভেদ্য করিতে বিচার ও পাহারা যায়, তদ্রূপ মনের কল্পনাজাত অসংখ্য বাসনাসমূহ বাসনাই আত্মজ্ঞানের ছুর্ভেদ্য প্রাচীর। এই কল্পনা-প্রাচীর বিধ্বস্ত করিতে হইলে বিচাররূপ আগ্নেয়াস্ত্রের সাহায্য লওয়া আবশ্যিক। বিচারের দ্বারাই সাধন চতুষ্টয়ের প্রধান সাধন ‘নিত্যানিত্য বস্তু বিবেক’ অকণালোকের জ্ঞান সাধকের হৃদয়াকাশে সমুদিত হইতে থাকে। ইহার পর ইহামুক্ত, কলভোগবিরাগ, শম, দম, উপরতি, তিতিক্ষা, সমাধান ও শ্রদ্ধারূপ বটসম্পত্তি মুমুক্শুর বাহা অধিকার তাহা জন্মিতে থাকে। বলিয়া আসিয়াছি বিচার কি? এক কথায় “আত্মা কি এবং আত্মা কি নয়”—এই তত্ত্ব নিরূপণই প্রকৃত বিচার। পূর্বেই বলিয়াছি শুদ্ধ বাহিরের বিচারেই বিবেকের উদয় হয় না—এই জন্ম মনন, নিদিধাসন, ধ্যানাজ্ঞান করিতে হইবে। এই ধ্যান দ্বারাই মন প্রকৃত সঙ্কল্প-রহিত অবস্থা প্রাপ্ত হয়, এবং বাসনা-শূন্য অবস্থা প্রাপ্ত হইয়াই যোগী মুক্ত হ'ন। তখন তাঁহার চক্ষে

এই লোক, এবং এই লোকস্থ জীব এবং পদার্থাদি সমস্তই ব্রহ্ম বলিয়া মনে হয়। রজ্জুকে যতক্ষণ সর্প বলিয়া বোধ থাকে, ততক্ষণ ভয় হয় কিন্তু সর্পভ্রম দূর হইলে আর ভয় থাকে না, তদ্রূপ এই জগৎ, জীব এবং তাহার সুখদুঃখাদি ততক্ষণই প্রতীতি হয়, যতক্ষণ এই চরাচর ব্রহ্মময় বলিয়া বোধ না হয়। সাধকেন্দ্রেরা এই মনকে ব্যোমস্বরূপে এবং ব্যোমকে পরব্যোমের সহিত অভিন্ন-ভাবে দেখিতে পাইয়া সর্বচিন্তা হইতে বিনির্মুক্ত হইয়া থাকেন। এ জগৎ বা দেহাদি অনাত্মপদার্থ হইতে আত্মবোধ তিরোহিত হইলেই মানবের আধ্যাত্মিক জাগরণের অবস্থা লাভ হয়। গীতা বলিয়াছেন :—

“যা নিশা সর্বভূতানাং তস্যাং জাগতি সংযমী।

যস্যাং জাগতি ভূতানি সা নিশা পশ্যতো মূনেঃ ॥”

এইরূপ জাগ্রত হইবার অভ্যাস যিনি না করেন, তাঁহার মনের সন্দেহ কখনই নিটে না এবং তিনি দেহাতিরিক্ত আত্মার অস্তিত্বও কখনও উপলব্ধি করিতে পারেন না। যাহারা যথার্থ সত্যকে আকাজক্ষা করেন, তাহারা এইরূপ “প্রবুদ্ধ” হইবার জন্ম প্রাণপণ চেষ্টা করিবেন। তাহা না করিয়া জ্ঞানালোচনা প্রভৃতি মৌখিক জল্পনা মাত্র। এখন দেহেন্দ্রিয়ে যে আত্মবুদ্ধি রহিয়াছে ইহাই প্রকৃত অবিচার বন্ধন। শ্রোত্রাদি ইন্দ্রিয় সমূহের কার্যে ও দেহাদি বাহ্যবস্তু প্রভৃতিতে অভিমান তিরোহিত হইলেই কল্পনার “অহং” জ্ঞান বিলুপ্ত হইয়া যায়, তখন উহা পরিপূর্ণ চৈতন্য সমুদ্রে অবগাহন করিয়া অমৃতত্ব লাভ করে। এই জন্মই সর্বদা বিচার করা প্রয়োজন। বিচার ছাড়িলেই আমাদের

ইন্দ্রিয়াদি পূর্বাভ্যাস্ত বিষয়ের অনুসরণ করে। সেই জন্ম আত্মস্বরূপ প্রতিপাদক শ্রুতিবাক্য সমূহ পুনঃ পুনঃ শ্রবণ ও মনন কর্তব্য। আত্মা ব্যতীত যাহা কিছু তাহা সমস্তই অনিত্য ও দুঃখের মূল ইহা নিশ্চয় জানিয়া নিত্য শ্রবণ ও মননভ্যাগে আত্মবিষয়ক স্মৃতিধারা প্রবাহিত হইতে থাকিলে চিন্তবৃত্তি নিরোধ হইয়া আসে। আত্মস্বরূপ প্রতিপাদক বাক্যার্থ শ্রবণে আত্মবিষয়ক জ্ঞান লাভে স্পৃহা বলবতী হয় এবং আত্মধ্যান দ্বারা আত্মবিষয়ক অজ্ঞান নষ্ট হইয়া যায়। কিন্তু এই স্মৃতিধারার বিচ্ছেদ ঘটিলে আবার মোহ আসিয়া আচ্ছন্ন করে। সেই জন্ম আত্মবিষয়ক জ্ঞান বিদিত হইয়া থাকিলেও পুনঃ পুনঃ তাহাই আলোচনা করিবে যেন কিছুতেই স্মৃতিধারার বিলোপ না ঘটে। পূর্ব বিচারিত বিষয়ই পুনঃপুনঃ বিচার করিবে। “বিজ্ঞায় অপি প্রজ্ঞানং কুর্ক্বীত” ইহাই শ্রুতি-শাসন। যে অজ্ঞান হেতু জীব বন্ধ, সূত্ররাজ জন্ম-মরণাদি দুঃখ ক্রেশে নিরন্তর জর্জরিত, কিছুতেই আপনাকে আপনি বৃষ্টিতে পারিতেছে না, সেই জন্ম মাতার ন্যায় কল্যাণময়ী শ্রুতি, দুঃখদাবাগ্নিক্রিপ্ত জীবের পরিত্রাণের জন্ম এবং যে অজ্ঞান হেতু জীবের এই পুনঃ পুনঃ দেহ ধারণ সেই অজ্ঞান নিবারণ জন্ম জীব-ত্রফের অভেদ প্রতিপাদক বাক্য সমূহ উপদেশ করিয়াছেন। জ্ঞেয় পদার্থের (আত্মার) স্বরূপ জ্ঞান অবরুদ্ধ হইলেই তৎসম্বন্ধে বিপরীত জ্ঞান জন্মিবেই। যেমন রজ্জুতে সর্প ভ্রম হইবার আগে, রজ্জুতে রজ্জু জ্ঞান আচ্ছাদিত হয়, অমনি সঙ্গে সঙ্গে “তাহা সর্প” এই অভিনব-জ্ঞান সমুৎপন্ন হয়, তদ্রূপ অনাদি অবিদ্যা প্রভাবে আত্মার স্বরূপ-জ্ঞান আচ্ছন্ন হওয়াতে

তাহাতে কর্তৃত্ব, ভোক্তৃত্ব, স্থ লভ, হ্রস্বত্ব, স্থখীত্ব, হুঃখীত্ব প্রভৃতি অনাত্ম ধর্ম পরিকল্পিত হইতে থাকে। শ্রুতি সেই জন্ম “অয়মাত্মা ব্রহ্ম” “প্রজ্ঞানং ব্রহ্ম” “সর্বং খণ্ডিতং ব্রহ্ম” প্রভৃতি মহাবাক্য দ্বারা জীবের মোহ-মূচ্ছা ভঙ্গ করিতে প্রয়াস করিয়াছেন। এই মহাবাক্য শ্রুতিকে ধ্যান ও বিচার করিতে করিতেই মোহপাশ হইতে মুক্তিলাভ ঘটে। এ সম্বন্ধে আর একটি নিগূঢ় কথা এই যে, তত্ত্বজ্ঞান লাভ করিতে হইলেই স্থূল চক্ষু প্রভৃতি ইন্দ্রিয়ের অগোচর সূক্ষ্ম দেহকে ও কারণ দেহকে বৃষ্টিতে পারা চাই। সূক্ষ্ম দেহকে দেখিলেও অনেক ভ্রম বিদূরিত হয়। কারণ সূক্ষ্ম তেজোময় দেহ প্রকাশ পাইলে তবে আত্ম-বিষয়িনী অস্তিত্ব গূঢ় রহস্য সকল উদঘাটিত হয় এবং সমস্ত ভ্রান্তি ঘুচিয়া যায়। সূর্য্য, চন্দ্র, অগ্নির আলোকে যেমন সমস্ত রূপ আমাদের চোখের সম্মুখে স্পষ্ট হইয়া উঠে, তদ্রূপ অধ্যাত্ম জগতও ব্রহ্মালোকে উদ্ভাসিত হইয়া আমাদের জ্ঞান-নেত্রে ভাসিয়া উঠে; সংশয়, সন্দেহ চিরদিনের মত অন্তর্হিত হইয়া যায়।

এই সকল বিষয়ে পুরুষকার প্রয়োগ না করিয়া আনরা কত অনর্থ বিষয়ের জন্ম নিরন্তর রথা পরিশ্রম করি এবং অবশেষে ‘নাস্তিক’ হইয়া দাঁড়াই। কারণ মস্তিষ্কে যে শক্তি থাকিলে দৈশ্বরাস্তিত্ব সহজে বৃষ্টিতে পারা যায়, তাহা কদাচার ও কুব্যবহারে মলিন করিয়া ফেলিয়াছি, তাই মাথায় এখন সে কথা আর প্রবেশই করিতে চায় না। ভারতবর্ষীয় আর্ধ্যদিগের মধ্যে ত্রিবর্ণের, বিশেষতঃ ব্রাহ্মণের আস্তিকতাই (‘জ্ঞানবিজ্ঞান-মাস্তিক্যং ব্রহ্মকর্ষ্মম্ভাবজম্’) স্বাভাবিক, কিন্তু এমনই কর্ষ্মের

ফের যে সেই আর্ধ্যকুলোদ্ভব ঋষি-বংশধরদিগকে এখন আবার ঈশ্বরের অস্তিত্ব তর্ক করিয়া বুঝিতে হয়। এ সকল বিড়ম্বনার একমাত্র কারণ যে আমরা আর পূর্বের মত আর্ধ্য সদাচার সমূহ নিষ্ঠার সহিত পালন করি না। অনভ্যাসে অনভ্যাসে চিন্তের মধ্যে এতই আবর্জনা জমিয়া উঠিয়াছে, যে এখন আর সহজে তাহা দূরীভূত করিবার উপায় নাই। তাই আবার আসাদিগকে বিচারবান হইয়া অনুকূল সদাচারের অভ্যাসে পূর্বাবস্থা ফিরিয়া পাইবার জন্ত বিশেষভাবে যত্ন করিতে হইবে। এখনও যদি যত্ন করি, এখনও যদি অভ্যাসে দৃঢ়তা দেখাইতে পারি, তবে এই বিড়ম্বিত অবস্থাতেও আর্ধ্যজনোচিত মনঃপ্রাণ, আর্ধ্যজনোচিত নিয়ম নিষ্ঠা, আর্ধ্যজনোচিত সদাচার ও সভ্যতা ফিরাইয়া পাওয়া কিছুমাত্র বিচিত্র হইবে না। ভারতবর্ষীয় আর্ধ্য-ঋষিসন্তান বলিয়া পরিচয় দিতে যাঁহারা গৌরব অনুভব করেন তাঁহারা ভারতের এই ছঃসময়ে পুরুষকার দ্বারা পূর্ক গৌরব ফিরিয়া পাইবার জন্ত কি অভ্যাস ও প্রযত্ন করিবেন না ?

—●—

পঞ্চম অধ্যায়

কর্মযোগ ও ভক্তিরোগ

অভ্যাস যোগ বুঝতে হইলে অগ্রে কর্মযোগ বুঝা আবশ্যক, সুতরাং কর্ম কি, অগ্রে তাহাই বুঝাইতেছি।

“কর্মণ্যেবাধিকারস্তে মা ফলেষু কদাচন।”

‘কর্মেই তোমার অধিকার, কর্মফলে নহে’—একথা হিন্দু-দেরই ঘরের কথা, তাই প্রাচীন মনীষীগণ নিরলস হইয়া কর্ম করিতেন। তাঁহারা কর্ম করিয়া কিন্তু হাতে হাতে ফল পাইবার জন্তও আকুল হইতেন না। একটি ব্রাহ্মণোচিত ধৈর্য তাঁহাদিগকে কর্মের শুভাশুভ ফল এবং তজ্জনিত সুখ ও দুঃখ হইতে উদাসীন করিয়া রাখিত। ভূদেব ব্রাহ্মণগণ যাগ, যজ্ঞ, তপস্যা বাহা কিছু করিতেন, সমস্তই বিষ্ণুপ্ৰীত্যর্থ, সমস্তই ভূমার জন্ত, সমস্তই বহুজনের শুভ সংসাধনার্থ—কেবলমাত্র আপনার কথা বা আপনার মঙ্গল চিন্তা করিয়াই তাঁহারা সন্তুষ্ট থাকিতেন না। ‘বিষ্ণুপ্ৰীতি’ই তাঁহাদের সকল কর্মের লক্ষ্য ছিল।*

* ‘বিষ্ণুপ্ৰীত্যর্থ’ মানে বহুজনের মঙ্গলার্থ কেন বলিলাম, তাহার হেতু আছে। ‘বিষ্ণুপ্ৰীত্যর্থ’—‘বিষ্ণুকে আনন্দিত করিবার জন্ত’ ইহার অর্থ নহে। যিনি স্বয়ং সচ্চিদানন্দ নিত্য নিশ্চল স্বভাব, তাঁহাকে আনন্দিত করার প্রয়োজনীয়তা কি? তাঁহার তো কোন দিন কোন মুহূর্তে আনন্দের অভাব নাই,—তিনি নিত্য আনন্দরসপূর্ণ। তবে ‘বিষ্ণুপ্ৰীত্যর্থ কর্মের’ মানে কি? সচ্চিদানন্দময়ের বিশ্বব্যাপী যে আনন্দ, তাহাই

স্থ বৃঃ যত বড়ই হউক, তাহা যে কিছুই নয়, এ কথা তাঁহার সাধনসুলভ দৃষ্টিপ্রভাবে বিলক্ষণ উপলব্ধি করিয়াছিলেন, তাই তাঁহাদের উপদেশবাণীর মধ্যে নিকাম ধর্মের প্রশংসা সূমধুর বংশী-ধ্বনির মত মনঃপ্রাণকে শীতল করিয়া দেয়—এক অনির্বচনীয় শান্তির সূমধুর স্নিগ্ধতা হৃদয়কে মুগ্ধ করে। ক্ষত্রিয়েরও তাই— তাঁহার রাজ্যশাসন, করগ্রহণ প্রভৃতি সমস্তই লোকস্বিত্তির জন্ত— তাঁহার নিজের জন্ত কিছুই নহে। তাই ভুবন বিজয় করিয়াও রঘু যুৎপাত্রে ভোজনরত! সমস্ত ধার্মিক রাজারাই যজ্ঞাদি করিয়া তাঁহাদের প্রায় সর্বস্বই দান করিতেন। প্রার্থীদের প্রার্থনা অপূর্ণ রাখিয়া, দীনের দৈন্ত্য না ঘুচাইয়া, আর্তের গুণ্ণাবার ব্যবস্থা না করিয়া কখনই তাঁহারা হৃদয়ে শান্তি পাইতেন না। এমনই তাঁহাদের বিশ্বপ্রীতি ছিল, এমনই তাঁহারা নিকাম উদার স্বভাব-সম্পন্ন ছিলেন! আশ্রয় লাভার্থ উপস্থিত শ্বেন পক্ষীর জন্ত শিবি আপনার শরীর হইতে মাংসখণ্ড কাটিয়া কাটিয়া ব্যাধকে প্রদান করিতেছেন। পক্ষীরও প্রাণ রক্ষা চাই, আবার ব্যাধেরও ক্ষুন্নিবৃত্তি হওয়া তো চাই। পক্ষীটী সামান্য প্রাণী লাভ করা যে কর্মের অর্থ অর্থাৎ প্রয়োজন! বিশ্ব-মানবকে প্রীতি করা, বিশ্বের সকল জীবকেই সমান ভাবে ভালবাসা, হইতেছে বিষ্ণুপ্রীতি। সুতরাং সকল জীবের কল্যাণার্থ যে কর্ম করা যায়, তাহাই বিষ্ণুপ্রীত্যর্থ কর্ম হয়। বিষ্ণুর ধাতুবর্চিত্ত অর্থ দেখিলেও উহার লক্ষ্য ভূমা বা বিশ্ব বলিয়া মনে হইবে। বিশ্ব—ব্যাপনে হৃক্। শাস্ত্রে আছে—“ব্রহ্মাৎ বিশ্বমিদং সর্বং তত্ত্ব শক্ত্যা মহাত্মনঃ। তন্মাদেবোচ্যতে বিষ্ণুর্বিশ্বাতোঃ প্রবেশনাৎ।”

বলিয়া, ব্যাধ ইতর জাতি বলিয়া উপেক্ষা করা নাই। এমনই নিকাম ধর্মের সাধনা! কর্ণ নিজের বক্ষঃ চিরিয়া কবচ প্রদান করিতেছেন, আপনার মৃত্যুর কথা ভাবিতেছেন না। হৃৎখিত শক্রপীড়িত পাণ্ডবদিগের পিতামহ ভীষ্ম আপনার মৃত্যুর উপায় বলিয়া দিতেছেন! ধর্মরাজ যুধিষ্ঠির পরম শত্রু আততায়ী হৃষীকেশের প্রাণ মান বাঁচাইবার জন্ত ব্যাকুল! বনবাস ক্রেশ, বিবিধ উৎপীড়ন কিছুতেই শক্রদিগের বিপদে তাঁহাকে উদাসীন করিয়া রাখিতে পারিল না—এমনই ধর্মপ্রাণ, এমনই আশ্রিত-বৎসল হৃদয়! এই পরম পবিত্র ধর্মের অন্তর্গত আশ্রিত-বর্ষেই অন্তর্গত হইত; এরূপ জগতপাবন ধর্মের কথা জগতের অন্যান্য জাতির ইতিহাসে বিরল। যে সকল বিষয়াসক্ত পুরুষেরা ধনধান্য উপার্জনে অধিকতর মনোযোগী হইলেন তাঁহারা বৈশা হইলেন; কারণ তাঁহারা ফলকামী ও লোভী, অতএব নিকাম ধর্ম অন্তর্গত অসমর্থ। তাই ভগবান শ্রীকৃষ্ণ গীতায় সেই সকল লোকদিগকে স্মরণ করিয়া “কৃপণাঃ ফলহেতবঃ” এই কথা বলিয়াছেন। শূদ্রদের চিন্তের অবস্থা আরও মলিন, তাই তাঁহারা বেদবিধির বহির্ভূত হইলেন। যাহাদের হৃদয় দুর্বল, যাহাদের বুদ্ধি অপরিমার্জিত, যাহারা অত্যন্ত ব্যসনাসক্ত, এবং অত্যন্ত শোক মোহের বশীভূত তাহারা বেদবিধি গ্রহণে সম্পূর্ণ অযোগ্য—সুতরাং তাহারা শূদ্র। আজ শুদ্র দ্বারাই সমস্ত ভারতবর্ষ পরিব্যাপ্ত। তাই আমরা নিকাম ধর্মের কথা শুনিলে শিহরিয়া উঠি। প্রকৃতই বর্তমান যুগে আমরা কেবল আশাপাশবদ্ধ কামোপভোগপরায়ণ হইয়া বিষয়ভোগকেই পরম পুরুষার্থ

বলিয়া ভাবিতেছি—অর্থসংগ্রহের বিপুল আগ্রহে আমরা সকলে
আবদ্ধ। 'ত্যাগাচ্ছান্তি নিরন্তরম্' এ কথার অর্থ কয়জনেই আ
আমরা উপলব্ধি করিয়া থাকি? 'কুঃ ধর্ম?—ভূতে দয়া' ইহা
বা কয়জনে প্রতিপালন করিয়া থাকি? পরমার্থ চিন্তায় মনঃ
প্রাণকে নিঃশেষে নিমজ্জিত করিয়া রাখিবার আগ্রহ ও সামর্থ
আমাদের মধ্যে কয়জন আছে? আমরা কয়জনই বা পরা
আত্মত্যাগের জন্য দৃঢ়প্রতিজ্ঞ হইয়া বসিয়া আছি? বিশ্বের
বিষয় এই, তথাপি আমরা ব্রাহ্মণ, পণ্ডিত, বিদ্বান, ভদ্রলোক, সা
দেশ-হিতৈষী, সমাজ-সংস্কারক, ধর্ম-প্রচারক বলিয়া পরিচয় দি
কোন লজ্জা অনুভব করি না, এবং আজকাল আমাদের খু
উন্নতি হইতেছে ভাবিয়া কেহ কেহ আবার স্পর্ধাও করি
থাকি! এই তো আমাদের বিচারের ক্ষমতা। আসন্নকালে
'বিপরীত বুদ্ধি' যেমন হইয়া থাকে আমাদেরও ঠিক তাহাই
হইয়াছে। তাই আমরা সম্যকদর্শী অশ্রান্ত ঋষিবাক্যের প্রতি
আস্থা স্থাপন করিয়া কৃতকৃত্যতা লাভ করিতে পারি না
পাশ্চাত্য প্রথা ও সভ্যতার ব্যর্থ অনুকরণের মোহে আমরা অন্ধ
নিজের ঘরের পানে ফিরিয়া চাহিবার তাই আমাদের অবসর
নাই। তাহাদের অনুকরণ করিবার জন্য আমরা এত লালায়িত
তাহারাই তাহাদের সভ্যতার বিষপানে জর্জরিত হইয়া তাহা
হইতে মুক্তিলাভের জন্য রোদন করিয়া ফিরিতেছে। * পাশ্চাত্য
* কয়েকজন পাশ্চাত্য মনীষী তাহাদের সভ্যতার ও দেশের অবস্থা
কথা উল্লেখ করিয়া আক্ষেপ করিয়াছেন, তাহা এইখানে উদ্ধৃত করিয়া
দিলাম।

গুরুরা, তাহারা তাহাদের সভ্যতায় সমৃদ্ধ ন'ন—কিন্তু শিশুদের
তাহাতে ভক্তি অচল! এমনই অদৃষ্টের উপহাস!! এই সকল

"To be dignified is the glory of civilization. To
suppress natural laughter, and smile instead, is grand ;
to "put the best side out" and to conceal the natural ;
to pretend to be greater, or better than we are ; to
think more of our looks, walk, manners, clothing, and
the wealth we have robbed the poor of—this is civili-
zation.

To turn away from one poorly clad, not deigning?
an answer to a civil question ; to look coldly in the
eye of a stranger, without speaking when accosted,
because you have not been introduced : this is dignity ;
this is fashionable * * * * to murder each other with-
out enmity—this is to be civilized.

The earth is drenched with human gore, and her
fair fields are rich with the bone dust of humanity.
The glory of one nation is the destruction of another.
* * * * Man has made this earth one vast pandemo-
nium—a cesspool, out of which came malarial vapours
and malarial beings, distorted in body, deformed in
mind, dwarfed in spirit.

Alas ! how we degrade nature or God in the bare
dea. Not willing to assume the responsibility that

লোকেই আবার সেই শাস্ত্রপ্রণেতা ভূদেব আপ্তকাম ঋষিদিগকে স্বার্থপর বলিয়া গালি দেন। শূদ্রেরা যদি বেদ বহিষ্ঠৃত না হইত তবে এতদিন ধর্ম বলিয়া কোন পদার্থ জগতে থাকিত কি না সন্দেহ। অবশ্য শূদ্র বলিতে আমি বর্তমান শূদ্রজাতিকে শুধু লক্ষ্য করিতেছি না। শূদ্র তাহারাই, যাহারা বেদবিধি গ্রহণে অসমর্থ—ব্রহ্মজ্ঞানলাভের অযোগ্য। শাস্ত্রে কাহাকে ব্রাহ্মণ বলিয়াছেন দেখুন—

“ক্ষান্তং দান্তং জিতাস্বানং জিতক্রোধং জিতেন্দ্রিয়ং।

তমেবং ব্রাহ্মণং মন্ত্রে শেবাঃ শূদ্রা ইতি স্মৃতঃ ॥”

নিষ্কাম ধর্মটা লইয়া আজকাল খুবই নাড়াচাড়া চলিতেছে।

nature puts upon him, he, Adam like, hides behind the fig leaves his nakedness, and ascribes to fate, nature, chance or necessity the actions he is ashamed of.

আবার অল্প দিকে ভারতবর্ষের উচ্চ অধ্যাপক জ্ঞানের অমর জ্যোতিঃতে মুগ্ধ হইয়া বিশ্ববিখ্যাত অধ্যাপক ম্যাক্সমুলার তাঁহার “What can India teach us” গ্রন্থে civil service পরীক্ষায় উত্তীর্ণ ছাত্রদিগকে সম্বোধন করিয়া যে মন্তব্য প্রকাশ করিয়াছেন—তাহা এখানে উদ্ধৃত করিয়া দিলাম।

If I were to look over the whole world to find out the country most richly endowed with all the wealth, power, and beauty that nature can bestow—in some parts a very paradise on earth—I should point to India. If I were asked under what sky the human

‘নিষ্কাম ধর্ম, নিষ্কাম ধর্ম’ আজকাল শিশুর মুখেও শুনিতে পাওয়া যায়। যেন এটা খুবই সোজা জিনিষ এবং নিষ্কাম ধর্ম। যেন তাহা আয়ত্ত করাও খুব অনায়াসসাধ্য। গীতার সংস্করণের উপর সংস্করণ হইতেছে, বহুলোকে গীতা ব্যাখ্যা ও প্রকাশ করিতেছেন সত্য, কিন্তু নিষ্কাম ধর্মটা মানবের মনে কোন বিশেষ সংস্কার রাখিয়া যাইতেছে কি না সন্দেহ হয়। আজ কাল যত লোক গীতা পড়ে, তাহার সহস্র ভাগের একভাগ লোকও যদি নিষ্কাম ধর্মটা বুঝিতে পারিত তবে ভারতবর্ষের আধ্যাত্মিক অবস্থা অন্তরূপ ধারণ করিত।

mind has most fully developed some of its choicest gifts, has most deeply pondered on the greatest problems of life, and has found solutions of some of them which well deserve the attention even of those who have studied Plato and Kant—I should point to India. And if I were to ask myself from what literature we, here in Europe, we who have been nurtured almost exclusively on the thoughts of Greeks and Romans, and of one Semitic race the Jewish, may draw that corrective ‘which is most wanted, in order to make our inner life more perfect, more comprehensive, more universal, in fact more truly human, a life, not for this life only, but a transfigured and eternal life, again I should point to India.

হায় ভগবান্! তুমিই না অর্জুনকে বলিয়াছিলে;—

“ইদন্তে নাতপস্কায় নাভক্তায় কদাচন।

ন চাশুশ্রাববে বাচ্যং ন চ মাং যোহভ্যাসূয়তি ॥”

‘এই গীতার্থ পরম তত্ত্ব, হে অর্জুন! তুমি অতপস্ক, অভক্ত, শুশ্রূষা-বিহীন অসূয়াকারীকে কদাচ বলিও না।’

ধর্মই কি বুঝিলাম না তার “সকাম” আর “নিকাম”, সুতরাং আমার মত অতপস্ক ব্যক্তি গীতা পাঠ করিয়া কি ফললাভ করিবে? সর্বশাস্ত্রসারভূতা গীতার মর্মার্থ কি সাধারণ লোকের ধারণা করিবার উপায় আছে? আমাদের হৃদয় গীতার একটি শ্লোকার্থও ধারণ করিতে অসমর্থ—তাই গীতা পাঠ করিয়া আমাদের চিন্তাশক্তি হওয়া নূরে থাক্, আমাদের দেহাত্মাভিমান আরও বাড়িয়া উঠে। আমরা জানি না যে—

“সাধোগীতাস্তসি স্নানং সংসারমলনাশনম্।

শ্রদ্ধাহীনস্ত তৎ কার্যং হস্তিস্নানং বৃথৈব তৎ ॥”

গীতারূপ সলিলে সাধুর স্নান, সংসার মলনাশক হইয়া থাকে, কিন্তু শ্রদ্ধাহীন ব্যক্তির তাদৃশ কার্য হস্তিস্নানের ত্রায় বৃথা।

ম্যাক্সমুলরের উক্ত গ্রন্থের—“Truthful character of the Hindoos” অধ্যায়টি হিন্দুমাঝেরই পাঠ করিয়া দেখা উচিত। তিনি চীন, মুসলমান, ইংরাজ এবং অজ্ঞাত ইয়ুরোপীয় সকল শ্রেণীর গ্রন্থকর্তা এবং উচ্চ রাজকর্মচারীদের মন্তব্য উদ্ধৃত করিয়া দেখাইয়াছেন—যে হিন্দুরা সত্যের কি পরিমাণে আদর করিতেন; বাহুল্য ভয়ে এখানে সেগুলি উদ্ধৃত করিতে পারিলাম না।

বক যতই গস্তীরভাবে চক্ষু মুদ্রিত করিয়া ধ্যানের ভাণ দেখাক, তাহার লক্ষ্য কিন্তু “মৎস্যের উপর”—সেইরূপ আজ-কাল “নিকাম ধর্ম” লইয়া আমরা যতই বাড়াবাড়ি করি না কেন, আসলে আমাদের দৃষ্টি “কামোপভোগ”কে আজও অতিক্রম করিয়া উঠিতে পারে নাই,—ইহা আমি প্রত্যহই প্রত্যক্ষ করিতেছি। যাঁহারা মুখে “নিকাম ধর্ম” লইয়া বড়াই করেন, আসলে ‘নিকাম ধর্ম’ যে কাহাকে বলে তাহাও তাঁহারা অবগত নহেন। তাঁহারা প্রকৃত নিকাম ধর্মের অধিকারী হইলে তাঁহাদের হৃদয়গত দুর্বলতা বিদূরিত হইত। কিন্তু তাহা হয় নাই বলিয়াই মুখে তাঁহারা যাহা বলেন, কার্যকালে তাহার বিপরীত অনুষ্ঠান করেন। এইরূপ কপটতাই শূদ্রের লক্ষণ, ইহাদের নিকট কখনই মিত্য সত্য বেদজ্ঞান উদ্ভাসিত হইতে পারে না। মুখে উচ্চ জ্ঞান-বিজ্ঞানের কথা উচ্চারণ করিলেও, কপট, ইন্দিয়ারাম, দেহাত্মাবাদীদের নিকট, দেহ হইতে যে আত্মা পৃথক, এই উচ্চ অধ্যাত্ম বিজ্ঞান সম্যক প্রস্ফুটিত হইতে পারে না; সুতরাং নিকামধর্ম যে কি, তাহা তাঁহাদের কখনই বুদ্ধিগম্য হইতে পারে না। আবার এই সকল লোকই যখন ধর্মোপদেশের আসন গ্রহণ করিয়া ধর্মোপদেশ প্রদান করেন, তখন ধর্মজগতে এক অভিনব উচ্ছৃঙ্খলতার দ্বার উন্মুক্ত হয়। ধর্ম অনুষ্ঠানগত, ধর্ম শুধু বাক্য মাত্র নহে। বাক্যার্থ বুঝিলেই ধর্ম বুঝিতে পারা যায় না, ধর্ম বুঝিতে হইলে অনুষ্ঠান করিয়া দেখিতে হয়। আমরা অনুষ্ঠান করিয়া দেখিব না, ধর্মকে জানিতে হইলে যে সব নিয়ম

পালন আবশ্যিক তাহা পালন করিব না, অথচ তাহার গুঢ়ার্থ বুঝিয়া লইব—এরূপ কখনই হইতে পারে না। এরূপ অবস্থায় যিনি “ওসব কিছুই নয়” বলিয়া সিদ্ধান্ত করেন—ইহাতে তাঁহার হঠকারিতাই প্রকাশ পায়। সাধু পুরুষেরা এরূপ বুদ্ধিকে কখনই প্রশংসা করেন না। অনুষ্ঠান ও অভ্যাসের মধ্য দিয়া যিনি আপনার জীবনকে বিশুদ্ধ করিয়াছেন, যাঁহার হৃদয়-কপাট উন্মুক্ত হইয়াছে, যিনি আত্মার মধ্যে পরমাত্মার দিব্য জ্যোতিকে প্রত্যক্ষ করিয়াছেন—তিনিই ঋষিদিগের অলৌকিক শক্তি ও অসামান্য জ্ঞান পরিদর্শন করিয়া আনন্দিত হন; তিনি লৌকিক তর্ক দ্বারা অতীন্দ্রিয় বিষয়ের প্রতিষ্ঠা অসম্ভব জানিয়া মৌনাবলম্বন করিয়া থাকেন। সেই সকল আন্তিক্যবুদ্ধিসম্পন্ন মনীষীগণ আচরণের দ্বারা ধর্মের ও ঋষিপ্রণীত শাস্ত্রের মথার্থতা উপলব্ধি করিবার চেষ্টা করেন, বৃথা তর্কের দ্বারা সময়ক্ষেপ করিতে ইচ্ছা করেন না। এই সকল সংপুরুষেরা একদিন উপদেষ্টা হইলেও হইতে পারেন, কিন্তু তাঁহাদিগকেও বলিতে হয় “ভূয় এব তপসা ব্রহ্মার্চন্যেণ শ্রদ্ধয়া সংবৎসরং সংবৎস্যথ, যথা কামং প্রশ্নান্ পৃচ্ছত, যদি বিজ্ঞাস্তামঃ সর্বং হ বক্ষ্যামঃ।” “তোমাদিগকে আরও সংবৎসর কাল তপস্যা, ব্রহ্মার্চ্যা ও শ্রদ্ধা অবলম্বন করিয়া বাস করিতে হইবে। তাহার পর তোমরা ইচ্ছানুসারে প্রশ্ন কর, আমি যদি জানি তোমাদিগকে সমস্তই বলিব।” কিন্তু আজকাল আমরা শিষ্ণুবিত্ত অপহরণ করিবার জন্ত সকলেই গুরু সাজিয়া ‘সবজ্ঞাস্তা’ হইয়া বসিয়া আছি। ধর্ম এত সহজে বুঝিবার জিনিষ তো নয়! এত সহজে বুঝিতে

পারিলে বুদ্ধদেবকে ঘর ছাড়িয়া ঘোরতর তপস্যায় প্রবৃত্ত হইতে হইত না, শঙ্করাচার্য্যাকে সন্ন্যাস লইতে হইত না এবং চৈতন্য-দেবকেও কাঁদিয়া কাঁদিয়া পথে পথে বেড়াইতে হইত না। ধর্মের ব্যাকুলতা ক্ষুধার তাড়না অপেক্ষাও ভয়ঙ্কর—একবার যাহার অন্তরে স্থান পাইয়াছে, তাহাকে পাগল করিয়া ছাড়িয়াছে। তা ছাড়া শাস্ত্র ও সদাচার না মানিয়া শুধু আপনার বিকৃতমস্তিষ্ক ও গায়ের জোরে কেহ কখনও ধর্মলাভ করিতে পারে না। আমরা নিজাম ধর্ম বুঝিব কি, আমাদের এমন নীচ অন্তঃকরণ যে আমরা নরকে আছি কি পৃথিবীতে আছি, তাহা স্থির করা সময়ে সময়ে ত্বরূহ হয়। আমাদের মধ্যে এমন অনেক লোক আছেন যাঁহাদের বলিতে শুনিয়াছি ‘আমি মাথার ঘাম পায়ে ফেলিয়া খাটিয়া মরি, আর আমার কষ্টোপার্জিত অর্থ পাঁচভূতে খাইয়া নষ্ট করিবে—ইহা কিরূপে সহ করি’—হায়, ভারতবর্ষীয় আর্ধ্য সম্ভানগণ! তোমরা তোমাদের পিতামহ ঋষিদের বাক্য কি সমস্ত একবারে বিস্মৃত হইলে? তাঁহারাই যে বলিয়াছেন— ‘অতিথি দেবো ভব’; এই দেশেই ভক্ত প্রহ্লাদ প্রার্থনায় বলিয়াছিলেন “নৈতান্ বিহায় কৃপণান্ বিমুক্ষো একঃ” ‘অগ্ন্যাগ্ন অভক্ত অশুর বালকদিগকে পরিত্যাগ করিয়া একা আমি মুক্তি-লাভ করিতে ইচ্ছা করি না’—আর একজন ভক্ত তাঁহার ক্ষুধানিবৃত্তির জন্ত অন্তর্পূর্ণার নিকট অন্ত প্রার্থনা করিতেছেন— কিন্তু তাঁহাকে বলিতেছেন “মা এ ক্ষুধা আমার একার নয়— আমি একার জন্ত তোমার নিকট ভিক্ষা করিতে আসি নাই “জায়াসুতাপরিজনোহতিথয়োন্নহকামা”—সকলের জন্তই আজ

তোমার নিকট ভিক্ষার বুলি পাতিয়াছি—সে দেশের লোকে কেমন করিয়া একথা বলিতে শিখিল যে “তোমরা সকলে মিলিয়া খাইলে আমার অর্থের অপব্যয় হইবে।” আপনার ক্ষুদ্র গণ্ডি ছাড়া আর কাহাকেও আপনার মনে করিতে পারি না এ কি সামান্ত হীনতার কথা! আমি ও আমার স্ত্রীপুত্র ছাড়া অন্য কেহ ভোগ করিলে তাহাকে লোকমান বোধ করা, এ যে কতটা স্থূল-দৃষ্টি তাহা সেই স্থূলধীগণ কিছুতেই বুঝিতে পারে না। ইহা কি প্রকৃতই সত্য কথা নহে যে আমার উপার্জিত অর্থ সকলেরই অধিকার আছে? আনার শরীর মনকে পুষ্ট করিবার জন্ত কত যুগ ধরিয়া কত লোক পরিশ্রম করিতেছে তবে আমি মানুষ হইতে পারিয়াছি—মানুষের উপযোগী জ্ঞান ও অধ্যাত্মবিজ্ঞান লাভ করিতে সমর্থ হইয়াছি তাহা একটু চিন্তা করিয়া দেখিলেই বুঝা যায়। এ ঋণ পরিশোধের জন্ত আমি বিশ্বমানবের নিকট দায়ী। এই অধিকারকে সর্বাস্তঃকরণে স্বীকার করা এবং এই বিশ্ব-নিয়মের নিকট প্রণত হওয়া—ইহাই যথার্থ নিষ্কাম ধর্মের ভিত্তি। বিশ্বের মধ্যে, সমস্ত জড় ও চেতনের মধ্যে এই ধর্মের প্রবাহ নিরন্তর অবিশ্রান্ত গতিতে বহিয়া চলিয়াছে; মুঢ় আমরা তাহা চাহিয়া দেখি না। বায়ু বহিতেছে, সূর্য আলোক ও উত্তাপ দিয়া সমস্ত জগতের জীবনসঞ্চার করিতেছে, চন্দ্র স্নিগ্ধ জ্যোৎস্নায় নিখিল জগতকে প্রসন্ন ও শীতল করিতেছে; অগ্নি, জল, আকাশ, মৃত্যু সকলেই তাঁহার নির্দেশমত জগৎ কার্যের শৃঙ্খলা সম্পাদনের জন্ত আপনাদিগকে নিয়ত নিযুক্ত রাখিয়াছে—ওজ্জ্বল তাহার কাহারও নিকট কিছুমাত্র প্রার্থী নহে। অথচ সকলেই কাজ

করিতেছে—কেহ কিছু পাইবে না বলিয়া কাজ কর্ম বন্ধ করিয়া বসিয়া নাই। এই অনন্ত জীবনপ্রবাহ শতমুখী হইয়া ভগবানের চরণসিঙ্হু পানে ছুটিয়া চলিয়াছে—পথে তার বিরাম নাই, বিশ্রাম নাই, ‘কেন চলিতেছি’ এ প্রশ্ন নাই। কারণ এই তাঁহার আদেশ। এইরূপ নির্বিচারে তাঁহার আদেশ মানিয়া চলাই নিষ্কাম কর্ম—ইহাতে কর্মবন্ধন হয় না। আর যা কিছু করিবে, সকলেতেই বন্ধন—সকলেতেই মোহের ফাঁস।

ভগবান গীতায় কর্মের উপদেশ দিয়াছেন, এবং যেরূপভাবে কর্ম করিলে কর্ম বন্ধন ঘটে না, তাহাও তিনি অর্জুনকে শুনাইয়াছেন। নিষ্কাম কর্ম কিরূপে হয় সেই কথা বুঝাইতে গিয়া বলিয়াছেন “বুদ্ধ্যা যুক্তো যয়া পার্থ কর্মবন্ধং কর্ম সম্বন্ধে গীতার অভিপ্রায়।

প্রহাস্যসি।” ইহার টীকায় শ্রীধর স্বামী বলিয়াছেন—“যয়া বুদ্ধ্যা যুক্তঃ পরমেশ্বরার্চিত কর্মযোগেণ শুদ্ধান্তঃকরণঃ সংসৃতঃ প্রসাদলক্ষ্যাপরোক্ষজ্ঞানেন কর্ম্ম-অকং বন্ধং প্রকর্ষণে হ্যস্তসি ত্যক্ত্যসি।” অর্থাৎ ঈশ্বরার্চিতচিত্তে কর্ম করিতে করিতে চিত্তশুদ্ধি ঘটে। তখন ভগবৎ প্রসাদ-লক্ষ্য অপরোক্ষ জ্ঞানদ্বারা কর্মবন্ধন সব ক্ষীণ হইয়া যায়। ভগবান আরও বলিয়াছেন “ময়ি সর্বাণি কর্ম্মাণি সংশ্রাস্থ্যাত্মচেতসা। নিরাসীর্নির্মমো ভূত্বা যুধ্যস্ব বিগতজ্বরঃ ॥” ইহার শঙ্কর ভাষ্য এই :—“ময়ি বাসুদেবে পরমেশ্বরে সর্বক্ষেত্রে সর্বাঙ্গনি সর্বাণি কর্ম্মাণি সংশ্রাস্য নিষ্কিপ্য অধ্যাত্মচেতসা বিবেকবুদ্ধ্যাং কর্তে-শ্বরায় ভৃত্যবৎ করোমীত্যনয়া বুদ্ধ্যা। কিঞ্চ নিরাসীঃ ত্যক্তাশীঃ। নির্মমো মমভাবশ্চ নির্গতো यस্য তব স ভব। নির্মমো ভূত্বা

যুধ্যস্ব। বিগতজ্বরো বিগতসস্তাপো বিগতশোকঃ সন্নিত্যর্থঃ।
 ত্রীধর স্বামী এই শ্লোকের টীকায় ‘অধ্যাত্তেতসা’র অর্থ লিখিয়া-
 ছেন—অস্তধ্যাত্ম্যধীনৈহিং কৰ্ম করোমীতি দৃষ্ট্যা—মোটের উপর
 দুজনের একই কথা। কৰ্মের ফলাকাঙ্ক্ষা না করিয়া কৰ্মেতে
 মনন বুদ্ধি না রাখিয়া—বিবেকবুদ্ধিযুক্ত হইয়া অর্থাৎ জগৎকর্তা
 পরমেশ্বরের ভৃত্য আমি তাঁহার নির্দেশ পালন করিয়া চলিতেছি
 ইহার ভালমন্দ ফলাফল কিছুই বুদ্ধি না—এইরূপভাবে কৰ্ম
 করার নামই নিষ্কাম ভাবে কৰ্ম করা। কৰ্ম যদি মননবুদ্ধি না
 থাকে তবে কৰ্মের লাভালাভে হর্ষ বা সস্তাপ হইবার সম্ভাবনা
 নাই।

কৰ্ম সম্বন্ধে এখনও সমস্ত কথা বলা হয় নাই, কিন্তু নিষ্কাম
 নিষ্কাম কৰ্ম ভাবে কৰ্ম করিবার সামর্থ্যালাভ কিসে হয়
 করিবার সামর্থ্য- সে কথাটা এখানে বলিয়া রাখা আবশ্যক
 লাভ হয় কিসে? ভগবান বলিয়াছেন,—

“জরামরণমোক্ষায় মামাশ্রিত্য যতস্তি যে।

তে ব্রহ্ম তদ্বিহুঃ কৃৎস্নমধ্যাং কৰ্ম চাখিলম্ ॥”

জরামরণের নাশ জন্ম আমাকে আশ্রয় করিয়া যাহারা প্রযত্ন
 করেন (এই প্রযত্নের কথা—অভ্যাসের প্রভাব উল্লেখের সময়
 পাঠককে স্মরণ রাখিতে হইবে) তাঁহারা সেই পরব্রহ্মকে,
 অধ্যাত্মকে এবং সমুদায় কৰ্মকে অবগত হ'ন।

এখন বোধ হয় বুঝিলাম সরহস্ত কৰ্মকে অবগত হইলে
 ভগবদাশ্রয় গ্রহণ করিতে হইবে—প্রপন্ন হইয়া তাঁহার শরণাগত
 হইতে হইবে। এইরূপ প্রযত্নে যাহারা অভ্যাস্ত তাঁহাদের সমস্ত

কৰ্মই নিষ্কাম কৰ্মে পরিণত হয়। তাঁহার শরণাগত হওয়াও ঠিক
 সোজা নয়, শুধু মুখে “শরণ লইছ তুয়া পায়” বলিলে হইবে না।
 সেই যথার্থ শরণাগত হইতে পারে যে দৃঢ় ভজনকারী, যাহার
 পাপ ক্ষয় হইয়াছে, এবং যে পুণ্যকৰ্মদ্বারা মোহনিশ্চুক্ত হইয়াছে।
 ভগবান বলিয়াছেন,—

“যেবাং বস্তগতং পাপং জনানাং পুণ্যকৰ্মণাম্।

তে হৃদমোহনিশ্চুক্তা ভজন্তে মাং দৃঢ়ব্রতাঃ ॥”

‘কিন্তু যে সকল পুণ্যকৰ্মকারী জনগণের পাপ নষ্ট হইয়াছে,
 হৃদয়জনিত মোহ হইতে যাহারা মুক্ত, তাঁহারা দৃঢ়ব্রত হইয়া
 আমাকে ভজনা করেন।’ এই হৃদয়জনিত মোহ ঘুচিয়া যাওয়া
 কি সহজ কথা? ইচ্ছাধেব হইতেই এই হৃদয়মোহ জাত—
 সেই ইচ্ছাধেব এই স্থূল শরীর হইতেই হয়। সুতরাং সর্বপ্রথমে
 এই স্থূল শরীরের মোহ হইতে আপনাকে উদ্ধার করিতে হইবে।
 স্থূল-শরীরের মোহ যাহার ঘুচে নাই তিনি নিষ্কামভাবে কৰ্ম
 করিবেন কিরূপে? অতএব “প্রযত্নাদ্ভবতমানস্ত যোগী সংশুদ্ধ-
 কিৰিষঃ। অনেকজন্যসংসিক্তস্ততো যাতি পরাং গতিম্ ॥” ‘কিন্তু
 প্রযত্ন সহকারে উত্তরোত্তর যোগে অধিক যত্নশীল যোগী নিষ্পাপ
 হইয়া অনেক জন্মে সাধন-সংবর্ধিত-যোগ দ্বারা সিদ্ধি-লাভ
 করিয়া অনন্তর পরমা গতি প্রাপ্ত হ'ন।’ যোগাভ্যাসের বলে মনে
 মাত্তিক ভাবের সঞ্চার হয়, মনের সঞ্চার বিকল্প নষ্ট হয়, চিন্ত
 স্থির হয়। সেই অবস্থায় ভগবানের সহিত যোগযুক্ত হওয়া
 যায়, পাপক্ষয় প্রযুক্ত তখন নিরন্তর ভগবৎ স্মরণ হইতে থাকে।
 এইরূপে যোগী অনন্তচিন্ত হইয়া তাঁহাকে স্মরণ করিতে পারিলে

সেই নিত্যযুক্ত যোগীর পক্ষে তিনি স্থলভ হ'ন এ কথা তিনি নিঃস্বখেই স্বীকার করিয়াছেন।

পূর্বে যে ভাবে কর্ম করার কথা বলা হইয়াছে, সেই ভাবে কর্ম করিয়া মুগ্ধুরা মুক্তিলাভ করিয়া থাকেন। কিন্তু কর্ম-রহস্য বড়ই জটিল ও দুর্বোধ্য—বুদ্ধিমান পণ্ডিত ব্যক্তিদেরও ইহাতে সময়ে সময়ে ভ্রম হইয়া থাকে, তাই বলিয়াছি নিষ্কাম ভাবে কর্ম করিলেই হইল না। ভগবান অর্জুনকে বুঝাইতেছেন।—

“কর্মণ্যকর্ম যঃ পশ্চাদকর্মণি চ কর্ম যঃ।

স বুদ্ধিমান মহুগ্ধেষু স যুক্তঃ কৃৎস্নকর্মকৃৎ ॥”*

‘যিনি কর্মে অকর্ম ও অকর্মে কর্ম দেখেন, মহুগ্ধগণের মধ্যে তিনিই বুদ্ধিমান এবং সর্বকর্মকারী হইলেও তিনি যুক্ত।’ অর্থাৎ কর্মবন্ধনের ভয়ে অথবা আলস্য বা কায়ক্লেশ ভয়ে যিনি কর্ম করিতে অনিচ্ছুক, তিনি কর্ম না করিলেও, কর্তব্য কর্ম অকরণের জন্য পাপভাগী হ'ন। কিন্তু যিনি জানেন যে ঈশ্বরার্পিতচিত্তে কর্ম করিয়া কর্ম-বন্ধন হয় না, তিনি কর্ম করিতে কখনই ভয় পান না। তিনি সহস্র কর্তব্য-কর্মের মধ্যে আপনাকে নিযুক্ত করিয়াও কর্মবন্ধন প্রাপ্ত হন না। সুতরাং তাঁহার কর্ম—কর্ম

* শ্রামিকৃত টীকা :—পরমেশ্বরারাদনলক্ষণে কর্মণি কর্মবিষয়ে। অকর্ম কর্মদং ন ভবতীতি যঃ পশ্চৎ। তস্ত জ্ঞানহেতুত্বেন বন্ধকত্বাভাবৎ। অকর্মণি চ বিহিতাকরণে কর্ম যঃ পশ্চৎ। প্রত্যবায়োৎপাদকত্বেন বন্ধহেতুত্বাৎ। * * * য এবজ্জুতঃ স তু সর্বেরু মহুগ্ধেষু বুদ্ধিমান পণ্ডিতঃ ॥

না করারই সমান হইল। আর যিনি কর্ম করিলেন না—তাঁহার অকর্মই কর্ম হইল অর্থাৎ কর্তব্য অপালন হেতু তাহাতেই কর্ম-বন্ধন ঘটিল। সুতরাং যে গৃহে থাকে (ভগবদর্পিতচিত্ত গৃহী) এবং যে গৃহ ত্যাগ করে (সন্ন্যাসী) ইহার মধ্যে লাভবান কে অধিক হয়, তাহা নির্ণয় করা সময়ে সময়ে বড়ই কঠিন হইয়া পড়ে। আসল কথা কর্ম করিয়া যখন আনন্দ হয়, কর্ম যখন শুধু কর্তব্য প্রণোদিত হইয়াই করিতে হয় না—তাহার মধ্যে বেশ শ্রীতি, আনন্দ—নির্ঝরির ধারার মত ফুটিয়া বাহির হয়, তখন সে কর্ম করিতে চিত্তবিজ্রোহ উপস্থিত হয় না—আর তাহাই নিষ্কাম—তাহাই ভগবৎ অর্পিত কর্ম। আর যে কর্মে নিরানন্দে হৃদয়কে ভরিয়া রাখে, যাহা করিতে ভার বোধ হয়, চিত্ত বিমুখ হইয়া বসে—বুঝিতে হইবে সে কর্ম কখনই ঈশ্বরার্পিত কর্ম হইতে পারে না। কারণ ভক্তের কাছে ভগবানের কর্ম বড়ই আনন্দের—বড়ই স্মখের। ভক্ত কবি গাহিয়াছেন :—

“তুমি যত ভার দিয়েছ সে ভার করিয়া দিয়েছ সোজা

আমি যত ভার জমিয়ে তুলেছি সকলি হয়েছে বোঝা।”

সুতরাং কি ভাবে কর্ম করিলে কর্ম অকর্ম না হইয়া যথার্থ নিষ্কাম কর্ম হইবে তাহা ভগবান গীতার অষ্টম অধ্যায়ে আরও বিশেষ ভাবে ব্যাখ্যা করিয়াছেন। অর্জুনের “কর্ম কি ?” এই প্রশ্নের উত্তরে তিনি বলিয়াছেন :—

“ভূতভাবোদ্ভবকরো বিসর্গঃ কর্মসঞ্জিতঃ ॥”*

* ভূতানাং ভাবো ভূতভাবঃ তশ্চোদ্ভবো ভূতোভাবোদ্ভবঃ। তং হ্রয়োতীতি ভূতভাবোদ্ভবকরঃ। ভূতবন্তুৎপত্তিকর ইত্যর্থঃ। বিসর্গো-

“ভূতানাং ভাবঃ ভূতভাবঃ, তেষাং উদ্ভবকরঃ বিসর্গঃ ত্যাগঃ।”
যে ত্যাগ ক্রিয়া জীবের ভাবের উদ্ভাবন করিয়া থাকে, উহারই নাম কর্ম। জীবের অন্তরস্থ অফুটন্ত ভাবনিচয় যাহা প্রসুখ অবস্থায় আছে উহাদিগকে ফুটাইয়া তোলার নাম কর্ম। দেবোদ্দেশে ত্যাগরূপ ক্রিয়া দ্বারা, এই ভাবকুসুম ফুটানরূপ কার্য সংসাধিত হয়। যে বিসর্গ বা ত্যাগ ভূতগণের ভাবের বিকাশক এবং যাহা দেবোদ্দেশে ব্যয়িত হইয়া নিষ্পন্ন হয়, তাহাই কর্ম শব্দবাচ্য। কিন্তু যাহা দ্বারা শক্তির অপব্যয় হয় তাহার নাম অকর্ম। সূত্রাং একই কর্ম কর্তার ভাবানুরূপ কর্ম, অকর্ম ও বিকর্ম অবস্থা প্রাপ্ত হয়। ফুটনোটে শ্রীমদশঙ্করাচার্য ও শ্রীমদ্ শ্রীধরস্বামী যেরূপ ব্যাখ্যা করিয়াছেন তাহা উদ্ধৃত করিয়া দিলাম। পাঠক দেখিবেন আপাতদৃষ্টিতে এই অর্থের সহিত ভাষ্য ও টীকার অর্থের ভিন্নতা লক্ষিত হইতে পারে। কিন্তু ভাবিয়া দেখিলে খুব বেশী পার্থক্য আছে বলিয়া বোধ হইবে না। উঁহারা “ভূতভাব” শব্দের অর্থ “জীবের উৎপত্তি” করিয়াছেন আর আমরা বলিতেছি জীবের অন্তরের ভাব। জীবের উৎপত্তি

বিসর্জনং দেবতোদ্দেশেন চরুপুরোডাশাদেদ্রবাস্তু পরিত্যাগঃ। স এব
বিসর্গলক্ষণো বজ্জঃ কর্ণমজ্জিতঃ কর্ণশব্দিত ইতোত্যং। (শঙ্কর)।

ভূতানাং জরায়ুজাদীনাং ভাব উৎপত্তিঃ। উদ্ভবশ্চ অগ্নৌ প্রাস্তাহতি
সমাগাদিত্যমুপতিষ্ঠতে। আদিত্যাজ্জায়তে বৃষ্টিঃ বৃষ্টেরনং ততঃ প্রজাঃ।
ইত্যুক্ত ক্রমেণ বৃদ্ধিঃ। তৌ ভাবোদ্ভবৌ করোতি যৌ বিসর্গৌ দেবতো
দ্দেশেন দ্রবত্যাগরূপো বজ্জঃ। সর্লকর্ণণামুপলক্ষণমেত্যং। স চ কর্ণ
শব্দবাচ্যঃ। (স্বামিকৃত টীকা)।

মানেই সৃষ্টি। সৃষ্টি মানেই তো ভাবের বিকাশ। জগৎপিতা পরমে-
শ্বরের অন্তরে, জগৎ যাহা ভাবরূপে বিद्यমান রহিয়াছে, কর্মদ্বারা
তাহারই বিকাশ সাধন করাই সৃষ্টি। সেই জন্ম ব্রহ্মা সৃষ্টির
পূর্বে তপস্বী করিয়াছিলেন ‘স তপাংস্তপ্যত’—অর্থাৎ যে সৃষ্টি
ভাবরূপে বিद्यমান ছিল, তপস্বী প্রভাবে, তাহাই ক্রমশঃ জমাট
বাঁধিয়া জগৎ রূপে পরিণত হইল। দৃশ্যমান সমস্ত পদার্থই ভাব-
রূপে বিद्यমান ছিল বলিয়াই তাহাদের এই রূপ পরিগ্রহ সম্ভব-
পর হইয়াছে। তা ছাড়া এ জগতে মনুষ্য যাহা কিছু গড়িয়া
তোলে, তাহা কি ভাবরূপে (ঠিক চিত্রকরের চিত্র ভাবনার স্থায়)
মনুষ্যের চিত্তাকাশে অগ্র হইতে রূপ পরিগ্রহ করিয়া বর্তমান
থাকে না?

ইহাই ভারতবর্ষীয় আৰ্য ঋষিদিগের “কর্মের” বিশেষত্ব।
যাঁহারা নিজে বুঝেন এবং লোককে বুঝাইতে চান যে
পূর্বতন ঋষিরা কেবল সংসারকে অবজ্ঞা করিয়া আপনাদের
মুক্তির কথাই ভাবিতেন, তাঁহারা যে ভ্রান্ত সে বিষয়ে
সন্দেহ নাই! *

* শাস্ত্রে ব্রাহ্মণের লক্ষণ বলিয়াছেন;—

“শমো দমস্তপঃ শৌচং ক্ষান্তিরার্জবমেব চ।

জ্ঞানং বিজ্ঞানমাস্তিক্যং ব্রহ্মকর্ম স্বভাবজম্ ॥”

‘শম, দম, তপস্বী, শৌচ, ক্ষমা, সরলতা, জ্ঞান, বিজ্ঞান, আস্তিক্য
এই সকল ব্রাহ্মণদিগের স্বভাবজ কর্ম।’ এজন্য ব্রাহ্মণ সন্তানকে বিশেষ
শিক্ষা দীক্ষা গ্রহণ করিতে হয় না। অন্ততঃ কিছু না কিছু এই সকল

ফুলটি সূচ্যরূপে ফুটিলেই তাহার শোভায় ও গন্ধে দিব
দিগন্তকে আমোদিত করিয়া রাখে—ইহা হইলেই ফুলজীবনের
পূর্ণ সার্থকতা হইল। এইরূপ ফুটন্ত ফুলই দেবপূজায় প্রশস্ত।
মহুগ্জীবনটিও ঠিক এই ফুলের মত। ভগবচ্চরণে পূজোপহারের
জন্মই তাহার জীবন, এবং ইহাতেই তাহার চরম সার্থকতা। ফুল
যেমন বৃক্ষশাখাকে ভেদ করিয়া বৃন্ত হইতে উদগত হয়, এবং
ক্রমশঃ যতই সে ফুটিতে থাকে, ততই সে বৃন্ত হইতে আপনাকে
পৃথক করিয়া প্রকাশ করে, ক্রমে পূর্ণ পরিষ্ফুট হইলে, অতি
সহজেই বৃন্তচ্যুত হইয়া স্বাবীন হয়, তদ্রূপ এই বৃক্ষরূপ কলেবর

লক্ষণ ব্রাহ্মণের মধ্যে থাকিবেই থাকিবে। যদি না থাকে, তবে বৃষ্টিতে
হইবে তিনি ব্রাহ্মণ নন।

শ্রুণ, কর্ম ও নাম এই তিনটি দ্বারা ব্রাহ্মণ বর্ণ সিদ্ধ হয়। বাঁহার
প্রথমোক্ত দুইটি লক্ষণ না থাকে তিনি নাম মাত্র ব্রাহ্মণ। বাঁহারা বলেন
সে কালের ব্রাহ্মণেরা স্বার্থপর ছিলেন তাঁহারা ব্রাহ্মণের লক্ষণগুলি ভাল
করিয়া বুঝিয়া দেখিবেন। “জ্ঞান” একটি ব্রাহ্মণের গুণের মধ্যে, এই
জ্ঞান তাঁহারা কাহাকে বলিতেন দেখুন “সর্গভূতেষু যেনৈকং ভাবমবায়-
নৌক্ষতে। অবিভক্তং বিভক্তেষু তজ্জ্ঞানং বিদ্ধি সাত্বিকম্ ॥” বাহা দ্বারা
বিভক্তরূপ সর্গভূতে অবিভক্ত এক বিকারহীন ভাব অবলোকিত হয়
সেই জ্ঞানকে সাত্বিক জ্ঞানিবে। স্ততরাং যে উদারতা ও যে জ্ঞানের
অধিকারী না হইলে ব্রাহ্মণ হওয়াই অসম্ভব সেরূপ ধীমান পুরুষেরা
স্বার্থাক হইয়া কখনই শাস্ত্র রচনা করিতে পারেন না। বরং তাঁহাদের
মত এতটা উদার ও পবিত্রভাব পৃথিবীর আর কোন জাতির মধ্যে
আছে কি ?

হইতেই সাধন ও অভ্যাস বলে আত্মা আপনাকে স্বতঃ প্রকাশিত
করিতে থাকে এবং ক্রমশঃ দেহের বন্ধন হইতে আপনাকে পৃথক
করিয়া ফেলিবার অবসর পায়। মনুষ্যের মধ্যে যে সব অফুটন্ত
ভাব, কুসুমকলিকার গন্ধের মত সুপ্ত ও মুদিত থাকে—সেই
সকল ভাবগুলি * যদি ফুটিতে পায়, তবে তাহার গন্ধে ও মাধুর্যে
মানব-সমাজে আনন্দের নিত্য নব উৎস ছুটিতে থাকে, কাল
তাহাকে ধ্বংস করিতে পারে না, জরা তাহাকে জীর্ণ করিতে
পারে না। ভারতবর্ষে এইরূপ কত জীবন-পুষ্প পূর্ণ পরিষ্ফুট
হইয়া ভগবচ্চরণে পুষ্পাঞ্জলিরূপে প্রদত্ত হইবার যোগ্যতা লাভ
করিয়াছে তাহার সংখ্যা নাই। সর্বদেশে সর্বকালে এই পুষ্পগুলি
অপ্রত্যাশিতভাবে সময়ে সময়ে ফুটিয়া উঠে। একদিন জেফ্রজে-
লামে এই ফুল ফুটিয়াছিল, আজ সমগ্র খ্রীষ্টিয়ান জগৎ তাহার
শোভায় মুগ্ধ। লুথার, হাওয়ার্ড, ফাদার ডামিয়েন, মুলার,
নাইটিঙ্গেল, কার্পেটার, টলষ্টয়, ইমার্সন, কালহিল, হার্বার্ট
স্পেন্সার, কাট, গেটে প্রভৃতি উদারচরিত মহানুভব মানবাত্মা
যুরোপ খণ্ডে ও জন্মগ্রহণ করিয়া পাশ্চাত্য দেশকে জয় করিয়াছেন।
ভারতবর্ষ এই ফুলের বাগান। অতীত যুগ হইতে বর্তমান যুগ

* গীতাতেও ভগবান এইগুলিকে “ভাব” বলিয়াছেন :—

“বুদ্ধি জ্ঞানমসংমোহঃ ক্ষমা সত্যং দমঃ শমঃ ।

সুখং হুঃখং ভবোহভাবো ভয়ঞ্চাভয়মেব চ ॥

অহিংসা সমতা তুষ্টিস্তপো দানং যশোহযশঃ ।

ভবন্তি ভাবা ভূতানাং মন্ত এব পৃথগ্ধিধাঃ ॥”

পর্যন্ত সর্বযুগেই ভারতবর্ষ শোভন-পুষ্পের উজানভূমি। এখানে শ্রীরামচন্দ্র শ্রীকৃষ্ণ, ব্যাস বশিষ্ঠ, জনক যাজ্ঞবল্ক্য, কপিল অষ্টা-বক্র, বৃদ্ধ শঙ্করাচার্য্য, ধ্রুব প্রহ্লাদ, নারদ শুকদেব, যুধিষ্ঠির বিচুর, ভীষ্ম অর্জুন, সীতা সাবিত্রী, মৈত্রেয়ী গার্গী, দময়ন্তী শৈব্যা, কুন্তী গান্ধারী প্রভৃতি কত ফুলই ফুটিয়াছিল, এখনও সমস্ত জগৎ যাহাদের সুগন্ধে আকুল। চারি শত বৎসর পূর্বে বঙ্গদেশে আবার কয়েকটি ফুল ফুটিয়াছিল—নবদ্বীপ আলো করিয়া শ্রীমদ্ গৌরানন্দেব তাহাদের মধ্যে শীর্ষস্থান অধিকার করিয়াছিলেন। ভক্তের কথায় বলিতে গেলে “যার রূপ লাগি আঁখি বুঝে, গুণে মন ভোর।” আমাদের ঘোর দুর্দশার দিনেও, এই অতি অল্প-কাল আগেও ধর্মবীর রাজা রামনোহন ও দেবেন্দ্রনাথ, ভক্ত-বীর পরমহংস রামকৃষ্ণ, দানশীল দয়্যাসেদ্ধ বিদ্যাসাগর, দ্বিজশ্রেষ্ঠ ভূদেব, যোগীশ্রেষ্ঠ ত্রৈলোক্যস্বামী ও শ্যামাচরণ, বাগীশ্রেষ্ঠ কেশব, শ্রীকৃষ্ণানন্দ ও বিবেকানন্দ, ভাবুকশ্রেষ্ঠ বঙ্কিমচন্দ্র, মহাত্মা গান্ধী, রবীন্দ্রনাথ, বিজেন্দ্রনাথ, অশ্বিনীকুমার প্রভৃতি মহাত্মন্য পুরুষেরা এই পুণ্যভূমিকে পুণ্যময় করিয়া রাখিয়াছেন। এ তো সব লোকোত্তর পুরুষের কথা—এখনও লোকচক্ষুর অন্তরালে কত সুনির্মল শোভাময় সঙ্গীতময় জীবনপুষ্প সঙ্গোপনে প্রস্ফুটিত হইতেছে—তাহাদিগের কয়জনের খবরই আমরা রাখিয়া থাকি? যাহাদের গোপন হৃদয়ের মাধুর্য্য আমাদের অজ্ঞাত ক্ষেত্রের মধ্যে বিস্তৃত হইয়া চরম সার্থকতা লাভ করিতেছে, ইহাদের সংখ্যাও অল্প নহে।

জীবনের এই ভাবটুকু মাধুর্য্যটুকু ফুটাইয়া তোলা এবং তাহা

দেবোদ্দেশে ত্যাগ করিতে পারার নামই “কর্ম”। তাব কুসুম যখন ফুটিয়া উঠে, তখন তাহা অতি সহজে আপনাআপনি ভগ-বচ্চরণে লুটাইয়া পড়ে। তখনই ইহাকে প্রেমভক্তি বলে—ইহাই ঈশ্বরে পরানুরাগ। কর্মে যদি ঈশ্বরানুরাগ না হয় তবে বৃদ্ধিতে হইবে সে সে কর্ম নিষ্কাম কর্ম নহে, তাহা অকর্ম ও ব্যর্থশ্রম মাত্র।

শুভকর্মের দ্বারা নিষ্কাম ভাব যতই বৃদ্ধি পাইতে থাকে, ততই জ্ঞান ও প্রেম প্রগাঢ় হইয়া উঠে। ইহাই মনুষ্য-জীবনের চরম লক্ষ্য। ইহাই মনুষ্য জীবনের পরম সমাপ্তি। অনেকে ভক্তি কথাটি লইয়া বড়ই ভুল করেন। ভক্তি শুধু ভাবপ্রবণতা নহে।

যাহারা কর্মের দ্বারা অশুভ বাসনাকে অপ-নিষ্কাম কর্ম দ্বারা সারিত করিতে না পারিয়াছেন, যাহাদের ভক্তিনাভ।

চিত্ত জ্ঞানের নির্মল আলোকে প্রদীপ্ত হইয়া উঠে নাই, সমুদ্রবক্ষে নাবিক-হীন তরলীর স্তায় যাহাদের চিত্ত সতত বিঘূর্ণিত ও বিক্ষুব্ধ, তাহারা কখনও ভক্তিনাভ করিতে পারেন না। যে ভক্তি সাধনা মনুষ্যকে মনুষ্য-সাধনে দীন করিয়া রাখে, জড়বৎ করিয়া সমস্ত কর্ম চেষ্টা হইতে বিমুখ করিয়া তুলে, কোন প্রকার ঝগাটের মধ্যে পড়িতে যাহাদের চিত্ত বিদ্রোহ উপস্থিত করে, তাহারা হরিনাম করিয়া যত অশ্রুই বর্ষণ করুন, যত ভাবোন্মত্ততার অভিনয়ই করুন তাহা কখনই প্রেমশব্দবাচ্য নহে। তাহা শুদ্ধ ভক্তির ভাণ মাত্র। সাধনসিদ্ধ ভক্ত কবীর যথার্থই বলিয়াছেন ‘প্রেম প্রেম সব কোঙ্গি কহে, প্রেম ন জানে কোঙ্গি।’ প্রেমিককে

আপনার মস্তক প্রেমময়ের পদে অগ্রে বলিদান দিতে হয় তবে তিনি প্রেমিক হইতে পারেন। প্রেম “বিরিখের ফল” নহে যে হাত বাড়াইলেই পাওয়া যাইবে। ভক্ত যিনি তিনি সরল ও বীঘাশালী হইবেন, সর্ব কৰ্মে সুদক্ষ হইবেন। * সর্বভূতে সমদর্শী ও সর্বভূতের আশ্রয় স্বরূপ যিনি হইবেন, তাঁহার নিৰ্বোধ হইলে চলিবে না এবং সে ব্যক্তি কৰ্মকে কখনও অবজ্ঞা করিয়া জড়বৎ নিশ্চেষ্ট হইয়া থাকিতে পারে না! সুস্থ দুঃখের অতীত, সর্বপ্রকার কৰ্ম অকৰ্মের বহির্ভূত জীবমুক্ত পুরুষেরাও লোক রক্ষার জন্য কৰ্ম করিয়া থাকেন। তাই দেখিতে পাওয়া যায় অরণ্যবাসী, প্রতিগ্রহ-হীন, ষোড়শর্ধ্যযুক্ত মুক্ত পুরুষেরাও সময়ে সময়ে এই বিচিত্র কৰ্মের রঙ্গভূমি সংসার-ক্ষেত্রে আসিয়া দাঁড়াইতে বাধ্য হইয়াছেন। তাঁহাদের লাভালাভে আসক্তি না থাকিলেও, তাঁহারা “বহুজনহিতায়” কৰ্ম করিয়া থাকেন। নচেৎ লোকরক্ষা এবং সমাজরক্ষা হয় না।

* গীতায় ভক্তের লক্ষণ বলিয়াছেন :—

“অদ্বেষ্টা সর্বভূতানাং মৈত্রঃ করুণ এব চ।

নির্ঘামো নিরহঙ্কারঃ সমদুঃখসুখঃ ক্ষমী ॥

সন্তুষ্টঃ সততং যোগী যতাত্মা দৃঢ়নিশ্চয়ঃ।

মর্যাপিত মনোবুদ্ধির্যো মে ভক্তঃ স মে প্রিয়ঃ ॥

অনপেক্ষঃ গুচিদক্ষ উদাসীনো গতবাপঃ।

সর্বীরন্তপরিত্যাগী যো মত্তক্তঃ স মে প্রিয়ঃ ॥

তুলানিন্দাস্ততির্মোনী সন্তুষ্টো যেন কেনচিৎ।

অনিকেতঃ স্থিরমতির্ভক্তিমান যো প্রিয়ো নরঃ ॥”

ভক্তচূড়ামণি প্রহ্লাদ অশুরবালকগণ কর্তৃক জিজ্ঞাসিত হইয়া ভক্তির লক্ষণ ও ভগবদ্ভজনা যে কি তাহা এইভাবে বুঝাইয়াছিলেন :—

“সর্বত্র দৈত্যাঃ সমতামুপেত। সমত্বমারাধনচ্যুতস্ত ॥”

“হে দৈত্যগণ, তোমরা সমতাকে প্রাপ্ত হও, অর্থাৎ সকলকে সমান ভাবে দেখিতে শিক্ষা কর। কাহারও প্রতি ঘেব হিংসা করিও না। কারণ এই ‘সমভাব’ই অচ্যুতের উপাসনা।” এই এই যে সমত্বের বা একেবারে উপলব্ধি এবং সর্বত্র সমদৃষ্টি—ইহা কৰ্মযোগ সাপেক্ষ, পরে ইহাই বিশ্বপ্রেম বা ভগবদ্প্রেমে পরিণত হয়। বহু সাধ্যসাধনায় এই অবস্থা লাভ হয়। ভক্তকে অনেক কষ্ট সহ করিতে হয়। যিনি বলবান তিনিই দুর্বলের উপদ্রব সহ করিতে পারেন; বলহীন কখনও ভক্তের পরপীড়ন উপদ্রব সহ করিতে পারে না। যাহারাই নহন।

জগতের ও জীবের মঙ্গলসাধন করিতে যান, জগতের হিরণ্যকশিপুদের অত্যাচার তাঁহাদিগকে সহ করিতেই হয়। তাই মঙ্গলকামী সাধকেন্দ্ররা অপমান অত্যাচার আপনাদের মাথার মুকুট করিয়া লইয়াছেন। নচেৎ এ জগতের মঙ্গল করা এক প্রকার অসম্ভব ব্যাপার হইত। সক্রেটিস্ বাহাদের অজ্ঞানাঙ্ককার দূর করিতে চাইলেন, তাহারাই তাঁহাকে বিষ দান করিল; যিনি জীবের দুঃখে ব্যথিত হইয়া সত্যধর্মের আলোক প্রদান করিতে লাগিলেন, সেই মহর্ষি যিশুকে তাঁহারই স্বদেশবাসীরা ক্রুশবিদ্ধ করিল; যিনি ধর্মকে কখনই পরিত্যাগ করিবেন না বলিয়া কৃতসঙ্কল্প, মনুযুকের উচ্চাদর্শ ভারতবর্ষীয়

আর্য্যসভ্যতার অত্যাৎকৃষ্ট ফল ধর্ম্মরাজ মুখিষ্ঠিরকে পদে পদে কত লাঞ্ছনাই ভোগ করিতে হইয়াছিল। জগৎপূজ্যা সাধ্বী-শিরোমণি না জানকীর মাথার উপর দিয়া অজ্ঞ মনুষ্যসমাজের কত নির্ধ্যাতনই চলিয়া গিয়াছে! আদর্শ মানব শ্রীরামচন্দ্র কতই না বিড়ম্বিত হইলেন। ঋব প্রহ্লাদ নিতান্ত আত্মীয় স্বজনের নিকট হইতে কত না অমানুষিক ক্রেশ প্রাপ্ত হইলেন! মহামুনি দধীচি পরহিতের জ্ঞাত তনু ত্যাগ করিলেন; ভক্ত হরিদাস, ভক্ত কবীর কত না উৎপীড়িত হইলেন। কিন্তু এই সকল আদর্শ পুরুষেরা উৎপীড়িত হইয়াও কদাপি একদিনের জ্ঞাত অত্যাচার-কারীদের অমঙ্গল কামনা করেন নাই কারণ তাঁহাদের হৃদয় ভগবদ্‌প্রেমে বিভোর।

মঙ্গলাকাশ অমঙ্গলের কুজ্জটিকা ধারাই আচ্ছাদিত থাকে; এই কুজ্জটিকা যে শ্রদ্ধালব্ধ ভক্তিমার্জিত পৌরুষ বলে অপ-সারিত করিতে পারে, সে-ই মঙ্গল-লক্ষ্মীর নিরাবরণ ফুলকমল-সদৃশ শুভ্র মুখ, জ্যোৎস্নাবিগড়িত চন্দ্রমার স্তায় অবলোকন করিয়া ধন্য হয়। এই পথ চিরদিনই অত্যন্ত বিপুলসঙ্কুল ও কষ্টক-ময়। সে পথে বিচরণ করিতে গেলেই পদে পদে ক্ষতবিক্ষত ও শোণিতাপ্লুত হইতে হয়। প্রেমের পথ কখনও সহজ হইয়া প্রেমিকের ক্রেশ নিবারণ করে নাই। প্রেমই প্রেমের পুরস্কার ও পথপ্রদর্শক। যাঁহারা 'কিনিবেচি' করিতে চান, তাঁহারা এ পথের পথিক হইতে পারেন না, তাঁহারা 'অব্যবসায়ী'। সুতরাং শ্রীচৈতন্যের 'তৃণাদপি সুনীচেন' প্রভৃতি বৈষ্ণবলক্ষণ চর্কবলকে কখনই আশ্রয় করিতে পারে না। বিষয় ভোগ বিলাসকে

তুচ্ছ করিয়া, ঐহিক পদমর্ধ্যাদা ও মন্ত্রম প্রতিপত্তিকে পদ-দলিত করিয়া—সেই ভূমার মধ্যে সমস্ত ইন্দ্রিয়ের সমস্ত বাসনার ক্ষোভকে নিঃশেষে কে নিমজ্জিত করিতে পারে? তাঁহার বিরাট আত্মত্যাগ এবং প্রতিদিনের অনলস চেষ্টা—কেহ দেখিল বা না দেখিল তজ্জ্ঞান যিনি বিন্দুমাাত্রও উদ্ভিন্ন ন'ন—এরূপ বীর পুরুষ কে?—যিনি প্রেমবলে জ্ঞানবলে বলীয়ান, যিনি ভগবানের ত্রিলোকশরণ্য অভয় চরণাসুজে পরমাশ্রয় লাভ করিয়া বীত-শোক হইয়াছেন—যাঁহার জীবনমুকুল পরিস্ফুটিত হইয়াছে, যিনি বিপদ ও মৃত্যুর মাঝখানেও নির্ব্বাত প্রদীপের মত স্থির ও অবিকম্পিত—যিনি তাঁহার 'মহদ্বয়ং বজ্রমুত্তমং' মূর্ত্তির অন্ত-রালে করুণার শান্ত স্নোহন মুখচ্ছবি দেখিয়া পরম নিশ্চিত হইতে পারিয়াছেন—তিনিই প্রকৃত ভক্ত—তিনিই যথার্থ কর্ম্মী। তাঁহার "জীবন মৃত্যু পায়ের ভৃত্য, চিত্ত ভাবনাহীন।" ভক্ত হৃৎ শোকের মধ্যেও ভগবানকে দেখিতে পাইয়া নির্ব্ব্যাকুল। ভক্ত বলেন;—

“হৃথের বেশে এসেছ বলে’

তোমাতে নাহি ডরিব হে।

যেখানে ব্যথা তোমাতে সেথা

নিবিড় করে ধরিব হে।

আঁধারে মুখ ঢাকিলে, আমি,

তোমাতে তবু চিনিব আমি,,

মরণরূপে আসিলে, প্রভু,

চরণ-ধরি' মরিব হে।”

এইরূপ আত্মনিবেদিত ভক্তকেই যথার্থ জ্ঞানী ও প্রেমিক বলা যাইতে পারে। বেদের এই অবিদ্যার বাণী যেন নিরন্তর আমাদের স্মরণ-পথে সমুদিত থাকে যে “নায়-
 দুর্বল চিত্তের ভক্তি আত্মা বলহীনেন লাভ্য”। দুর্বল ব্যক্তির এই
 ও জ্ঞান লাভে আত্মাকে লাভ করিতে পারে না। অতএব
 অবোগ্যতা। ভক্ত হওয়া মুখের কথা নয়। শুধু চোখের
 দুই ফোঁটা জল ফেলিলেই হইবে না।
 ভক্তকে অগ্নি পরীক্ষা দিতে হইবে। হরিদাসের মত বাইশ
 বাজারে বেত্রাদ্বারা জর্জরিত হইয়া, প্রহ্লাদের মত শত
 নির্ঘাতনে উৎপীড়িত হইয়া, যিশুখৃষ্টের মত ক্রুশবিদ্ধ হইয়া,
 ভক্ত কবীর সাহেবের মত অপমানিত ও লাঞ্চিত হইয়াও,
 যাঁহারা তাঁর সুরাসুর-সেবিত অখিলবন্দিত চরণকমলের
 আশ্রয় পরিত্যাগ করিতে পারেন না—তাঁহারা হই ভক্তনামের
 যোগ্য; তাঁহারা হই যথার্থ প্রেমিক। বহু তীর্থ সাধনা, বহু জন্ম
 তপস্যার ফলে মনুষ্যের এই সৌভাগ্যোদয় হইয়া থাকে। যাঁহারা
 বলেন “প্রেমের পথ বড় সহজ, ভক্তির পথ বড় সুখকর বড়
 আরামের”—যাঁহারা বলেন “আর কিছুই করিতে হইবে না,
 কেবল তাঁর মাধুর্যরস সন্তোষে মত্ত হও”—নিশ্চয়ই জানিয়া রাখুন
 তাঁহারা প্রেমিক নহেন, তাঁহারা প্রতারক। অখিল জগতের
 নাথ, সর্বজীবের প্রাণারাম ও প্রিয়তম শ্রীকৃষ্ণের সেবক হইতে
 পারা কি অন্ন সৌভাগ্যের বিবরণ? যোর তমসচ্ছন্ন দুর্বলচেতার
 কখনই তাঁর অনুগ্রহ লাভ করিতে পারে না। ব্রজ গোপিকাদের
 প্রেমের ছায়াও স্পর্শ করিবার শক্তি তাহাদের কোথায়? ভক্তকে

লইয়া তো ভগবান ভাঁটা খেলা করেন, তাহা সহ্য করিতে
 পারেন কেবল তিনিই—যিনি যথার্থ ভক্ত। স্বামীর আবদার ও
 অত্যাচার সাধ্বী স্ত্রীই নীরবে সহ্য করিতে পারেন—আর যিনি
 বিলাসিনী, তিনি তো স্বামীর শুধু সোহাগ কুড়াইয়া বেড়ান। যথার্থ
 পতিরতা ভক্তিমতী সাধ্বীর মুখেই এই কথা বাহির হইয়াছে—

“উপপত্নী তোমার নতি তাইত ভুলাওনাকো।

মিথ্যা স্মৃতি মিথ্যা মানে দূরে ফেলাওনাকো ॥

পতিব্রতা সতী আমি তাই তো তোমার ঘরে।

হে ভিখারী সব দারিদ্র্য আমার সেবা করে ॥

তোমার স্মৃতির ভৃত্য নহি (তাই) চাইনা স্মৃতির দান।

আমি তোনার প্রেমের পত্নী এই ত আমার মান ॥

কুণ্ঠা বিনা সকল দুঃখ দিচ্ছ আনায় দান।

বঞ্চিত করোনা প্রভু, এই ত আমার মান ॥”

জগতের সমুদয় ভার ভক্তের স্কন্ধে। সে ভার ভক্তির
 জোরেই বহন করা যায়—শুধু ঢালাকী করিয়া কেহই সে
 সৌভাগ্য লাভ করিতে পারে না। লোককে ঠকানো সহজ কিন্তু
 ভক্তি পাওয়া দুর্লভ। দেবতারাও সহজে পান নাই। নারদের
 মত অগ্রগণ্য ভক্তকেও বহু বেগ পাইতে হইয়াছিল। ভক্ত
 কবীর তাঁহার গাথায় বলিয়াছেন—

“ভক্তি ভেখ্ বড় অন্তরা ব্যায়সে ধরণী আকাশ।

ভক্ত যো স্মরে রামকো, ভেখ্ জগৎ কি আশ ॥”

যথার্থ ভাবে যিনি ভক্তি লাভ করিতে ইচ্ছুক, তিনি সেই
 জন্মই কর্মকে বা জ্ঞানকে কখনই অবজ্ঞা করিবেন না। জ্ঞান ও

কর্ষের মধ্য দিয়াই ভক্তি পূর্ণতা লাভ করে—তাই প্রেমিক ভক্ত শরীর ও মনকে তাঁহার জীবননাথের সেবায় নিযুক্ত করেন—যিনি বিশ্বরূপে এই জগৎ-জীবরূপে নিত্য প্রকাশিত। তিনি তাঁর প্রাণের অভীষ্ট দেবতাকে কোন একটি মূর্ত্তিবেশের মধ্যে আবদ্ধ রাখেন না, অথচ কোন মূর্ত্তিকে অশ্রদ্ধাও করেন না। তিনি সর্বত্র তাঁহার প্রেমময়ের ভাবমদিরাপূর্ণ মুখশোভা দেখিতে দেখিতে আত্মহারা হইয়া যান। ভক্তের জাতি মান সেই সময় সব মিটিয়া যায়। তখন তিনি বলেন “আপনার নাম মোর নাহি পড়ে মনে, পরাণ হরিল রান্ধা নয়ন নাচনে।” ভক্ত সর্বজীবের মধ্যে তাঁহার করুণ-কোমল লোচন-কমল ছুটি দেখিতে দেখিতে বিহ্বল হইয়া পড়েন। তখন এই জগৎকে আর জড় বলিয়া তাঁহার কাছে বোধ হয় না—সমস্তই ব্রহ্মরস-পূর্ণ বা ব্রহ্মময় বলিয়া বোধ হয়। মাধুর্য্যরসে তখন ভক্তের মন প্রাণ মধুময় হইয়া উঠে। তখন তাঁহার নিকট এই নীলাকাশ, এই ধরণীধূলি, এই তরুলতাপুষ্প শোভিত কানন, নদ নদী গিরিশ্রেণী, মলয় বায়ু, পবন হিল্লোল, বিকোমিত সাগর-তরঙ্গ, বিহগ-কাকলী, জলকলতান সমস্তই অপরূপ সুসমায় ভরিয়া উঠে—তখন বাস্তবিকই ভক্তের নিকট বোধ হয় “মধু বাতা ঋতায়তে, মধু ক্ষরন্তি সিন্ধবঃ, মাধ্বী ন সন্ধ্যাবধীঃ মধুমৎ পার্থিবং রজঃ”—সর্বত্রই মধু, সর্বত্রই প্রেমানন্দ। এইরূপে সর্বজীবের মধ্যে, সমস্ত বিশ্বের মধ্যে, ভক্ত তাঁহাকে পূজা করিয়া কৃতার্থ হন। ভগবান বলিয়াছেন—

ভক্তের আত্ম-
বিস্মৃতি ও সর্বস্ব-
বোধের বিকাশ।

“যো মাং পশ্যতি সর্বত্র সর্বত্র ময়ি পশ্যতি।

তস্মাহং ন প্রণশ্যামি স চ মে ন প্রণশ্যতি ॥”

ভক্ত কিছুতেই তাই ভয় পান না, কিছুতেই তাঁহার হৃদয় দমিয়া যায় না। তিনি বিপদে সম্পদে, রোগে শোকে, সুখে দুঃখে, জীবনে মরণে চিন্তকে অবিচলিত রাখেন। সরোবরবক্ষ-শোভিত কমলের মত ভগবানের অরুণরাগরঞ্জিত পাদপদ্ম ছুটি ভক্তের হৃদয় সরোবরে নিরন্তর প্রেমবায়ুভরে হিল্লোলিত হইতে থাকে। আর তাঁহার চিন্তে ভয় বা শোক আসিবে কোথা হইতে ?

“আনন্দং ব্রহ্মণো বিদ্বান্ মা বিভেতি কদাচন ॥”

ভগবৎ কৃপা সম্বন্ধেও লোকের অত্যাশু একটা কুসংস্কার আছে। কেহ কেহ বলেন “চেষ্টা চরিত্র করিলে কি হইবে বাপু, ভগবৎ কৃপা ব্যতীত যে কিছুই হয় না।” এ কথাতে এমনি মনে হয় ভগবান যেন স্বেচ্ছাচারী সম্রাট বিশেষ, ভগবৎ কৃপা।

তিনি আপনার খেয়াল মত কৃপা করিয়া থাকেন ; ব্যক্তি বিশেষের কর্ম, অকর্ম, যোগ্যতা, অযোগ্যতার কথা কিছুই বিচার করেন না। তাঁহার সম্বন্ধে এরূপ ধারণা পোষণ করা আন্তিক্য বুদ্ধিসম্পন্ন ব্যক্তির কর্তব্য নহে। যিনি “যমঃ সংযমতামহং”—যিনি সাক্ষাৎ নিয়মস্বরূপ, তাঁহার বিধানের মধ্যে কি অনিয়ম (lawlessness) থাকিতে পারে ? তিনি আপনার নিয়মকে আপনি কখনও ভঙ্গ করেন না এবং অশ্রু কেহ ভঙ্গ করিয়া যে নিষ্কৃতি পাইবেন তাহার উপায়ও নাই—দেবতারাও পান না। জগৎকর্তা যিনি, তিনি যদি নিয়মকে

শ্রদ্ধা না করিতেন, তবে এই জগতের আজ কি দুর্দশা হইত, আমরা করনাও করিতে পারি না।

তিনি যে পরম কৃপালু ইহা তাঁহার জাগতিক নিয়ম শৃঙ্খলা দেখিলেই বুঝা যায়। তাঁহার নিয়মই তাঁহার অনন্ত করুণার পরিচায়ক। মানুষের মত গলিয়া যাওয়া ভাব—যাহা কতকটা দুর্বলতারই পরিচায়ক—সেরূপ দয়া তাঁহার আছে কিনা বলিতে পারি না, কারণ সেরূপ দয়া—দয়াই নয়। তাঁহার কৃপা সূর্যালোকের মত, সর্বত্র সমস্ত প্রাণীর উপরেই নিরন্তর বর্ষিত হইতেছে—তাঁহার কৃপার কোন স্থানে বা কোন কালে অভাব হইতে পারে না। আমরাই সে কৃপা গ্রহণ করি না। যদি কেহ দরজা, জানালা বন্ধ করিয়া বসিয়া থাকে, সূর্যালোক যেমন তাহার গৃহমধ্যে স্বাধীন ভাবে প্রবেশ করিতে পারে না, তদ্রূপ যে চিন্তবৃত্তিকে তদভিমুখী করিতে পারে নাই, পরন্তু বিবিধ অসচ্চিত্তা ও অসৎ কার্য দ্বারা আপনার চারিদিকে একটি দুর্ভাসনার প্রাচীর গ্রথিত করিয়াছে, সেও এই নিরন্তর প্রবাহিত, অসীম অফুরন্ত ভগবৎ করুণাকরণ-কিরণ লাভে আপনাকে আপনি অযোগ্য করিয়া তুলে, এবং চেষ্টা করিয়া তাহা হইতে আপনাকে বঞ্চিত করে। তুমি সদভ্যাসে রত হও, চেষ্টা কর, হাতে হাতে ভগবৎকৃপা দেখিতে পাইবে; অসদাভ্যাসে রত হও, অতপঙ্ক হও, তাঁহার করুণা কিরণ তোমারই কক্ষ-মেঘে আচ্ছাদিতবৎ প্রতীয়মান হইবে। তাই ভগবানের উক্তি এই—

“সমোহং সর্বভূতেষু ন মে দ্বেষ্যোস্তি ন প্রিয়ঃ।

যে ভজন্তি তু মাং ভক্ত্যা ময়ি তে তেষু চাপ্যহম্।”

‘আমি সর্ব ভূতেই সমান, অতএব আমার দ্বেষ বা প্রিয় নাই; কিন্তু আমাকে যাহারা ভক্তি সহকারে ভজন করেন, তাঁহারা আমাতে মগ্ন থাকেন এবং আমিও জানভক্তিহীনের তাঁহাদের মধ্যে আছি বলিয়া তাঁহাদের দুর্গতি। প্রতীতি হয়’। তুমি কিছুই চেষ্টা করিবে না, আর অকস্মাৎ ধ্রুব প্রহ্লাদ হইয়া উঠিবে, এরূপ দুরাশা স্বপ্নেও মনে স্থান দিও না। সে-ই তাঁহার কৃপা বুঝিতে পারে, যে কর্মী—যে চেষ্টাশীল। অকর্মণ্য অলস ব্যক্তির চিরদিনই তাঁহার কৃপায় বঞ্চিত। তাঁহাদের অকর্মণ্যতার জন্ত তাঁহারা দৈবকেই দায়ী করিয়া পরম নিশ্চিত থাকে। তাঁহাদের সম্বন্ধেই ভগবানের এই উক্তি :—

“আসুরীং যোনিমাপন্ন মূঢ়া জন্মনি জন্মনি।

মামপ্রাপ্যৈব কোন্তেয় ততো যান্ত্যধমাং গতিম্॥”

‘হে কোন্তেয়, মূঢ়গণ জন্মে জন্মে আসুরীযোনি প্রাপ্ত হইয়া, আমাকে না পাইয়া আরও অধমা গতি প্রাপ্ত হয়।’

আমি পূর্বে বলিয়াছি দয়া প্রেম জ্ঞান প্রভৃতি যে সকল ভাবকুশুম অফুটন্ত ভাবে আমাদের মধ্যে বর্তমান রহিয়াছে, (the latent energies) তাহার বিকাশ সাধন করিতে হইবে। শক্তির এই বিকাশ সাধনের নামই ‘কর্ম’। তা ছাড়া সবই অকর্ম। এই কর্ম আবার ‘নিষ্কাম কর্ম’ হওয়া প্রয়োজন। আপনার মধ্যে সমস্ত শক্তিগুলি বিকশিত হইবে, সমস্ত বৃত্তিগুলি পরিষ্কৃত হইয়া বিভিন্ন শক্তির মধ্যে বিরোধ

উপস্থিত করিবে না এবং যখন তাহা পরার্থে * উৎসৃষ্ট হইবে, তখনই কর্ম যথার্থ নিষ্কাম হইবে। এইরূপ নিষ্কাম কর্মই ভগবানের অভিপ্রেত। জপ তপ নিয়মাদি অনুষ্ঠান করিতে করিতে এবং সদ্ধিচালক জ্ঞানের আলোচনা করিতে করিতে, মানসিক শক্তি বৃদ্ধি প্রাপ্ত হয়, অজ্ঞানান্ধকার বিদূরিত হয়। কিন্তু শুধু নিজের অন্তঃকরণের অন্ধকার ঘুচিলেই চলিবে না—আমার অর্জিত বিদ্যা বেন অপরের অবিদ্যা তমঃকে অপসারিত করিতে পারে—ইহাতেই বিদ্যার সম্যক সার্থকতা। আবার অর্থের সার্থকতাও ঐ প্রকারে করিতে হয়। আমার কষ্টোপার্জিত অর্থ অপরের প্রয়োজন সাধনে নিযুক্ত থাকিয়া অর্থকে 'অনর্থ' অপযশ হইতে মুক্তিদান করিবে। এই শরীরও অন্যের কল্যাণার্থে নিযুক্ত থাকিবে, তজ্জন্য কোন প্রকার আলস্য বা ক্লেশ অনুভব করিবে না। কারণ এই 'আমি' তো শুধু আমার শরীরটি নহে। এই 'আমি' অথগু মণ্ডলাকারে বিশ্বভুবনে পরিব্যাপ্ত হইয়া রহিয়াছে। এই সর্বব্যাপী বৃহৎ অহংকে স্বীকার না করিলে, কোন কিছুকেই স্বীকার করা হয় না। এই জন্মই সমস্ত জগতের মধ্যে, সমস্ত

* জগতের মঙ্গলের জন্য ঋষিরা ব্রহ্ম করিতেন। তাঁহারা অগ্নিতে যে মন্ত্রঃপূত হবি নিষ্কেপ করিতেন, তাহা প্রথমে আদিত্যমণ্ডলে গিয়া, পরে তথা হইতে বৃষ্টিরূপে পতিত হইয়া এই শস্য ও প্রজা সকলের উৎপত্তির কারণ হইয়া থাকে। সূত্রং ইহাও পরার্থে কর্ম।

জীবের মধ্যে আপনাকে উপলব্ধি করার উপদেশ শাস্ত্রে পুনঃপুনঃ কথিত হইয়াছে। শ্রীমদ্ভাগবতে ভগবান বলিতেছেন ;—“সকল প্রাণীতে আমার ভাবনা করা, ধৈর্য ও বৈরাগ্য, মহদ্ব্যক্তির প্রতি বহুমান প্রদর্শন, দীনের প্রতি অনুকম্পা, আপনার তুল্য লোকের প্রতি মৈত্রী, যম ও নিয়ম, আধ্যাত্মিক শাস্ত্রের কেবল মাত্র প্রতিমা পূজা শ্রবণ, নাম সঙ্কীর্্তন, সরলভাব, আর্ধ্য সঙ্গ, দ্বারাই ভগবানকে নিরহঙ্কার এই সকল গুণ দ্বারা শোভিত হইয়া যে পুরুষ ভগবৎকর্মের অনুষ্ঠান করেন— লাভ করা যায় তাঁহার চিত্ত অত্যন্ত বিশুদ্ধ হয়। আমি সকল না। ভূতেই আত্মরূপে অবস্থিত, যে ব্যক্তি সেই ভূতের অবজ্ঞা করে অথচ আমাকে প্রতিমাদি দ্বারা অর্চনা করে— তাহার অর্চনা বৃথা বিড়ম্বনা। সর্বভূতে আত্মরূপে অবস্থিত আমাকে ঈশ্বর জ্ঞান না করিয়া মূঢ়তা প্রযুক্ত যে ব্যক্তি প্রতিমার অর্চনা করে—সে কেবল মাত্র ভ্রমশ্চি টালে। মানগর্বিবত, ভিন্নদর্শী, যে ব্যক্তি পরের শরীরে দ্বেষ করে, ভূতের প্রতি বদ্বৈর সেই ব্যক্তি শান্তিলাভ করে না। যদি কেহ ভূতগ্রামের অবমাননা করিয়া মূল্যবান দ্রব্যদ্বারা আমার প্রতিমার অর্চনা করে—সে অর্চনা দ্বারা আমি পরিতুষ্ট হই না।”

এইরূপ সত্যভাবে আপনাকে ও পরমাত্মাকে জানিতে পারাই জীবনের সর্বশ্রেষ্ঠ সার্থকতা। নচেৎ ‘মৃত্যোঃ স মৃত্যুমান্নোতি য ইহ নানেনব পশুতি।”

ভাব সমূহের বিকাশ ও তাহা পরার্থে উৎসর্গই নিষ্কাম কর্মের প্রাণ এবং ইহাই কর্মের নিগূঢ় রহস্য। কর্মকে

এইভাবে দেখিতে না শিখিলে শাস্তিলাভ হয় না। বিধিবৎ
কর্মের অনুষ্ঠানে দৈবশক্তি সংবর্ধিত
প্রকৃত কর্ম কি? না হইয়া অস্বাভাবিক শক্তিকে পরিপুষ্ট করে।
সুতরাং সমস্ত পরিশ্রমই পণ্ড্রম হয়।

ইচ্ছায় হউক, অনিচ্ছায় হউক, সকলকেই এই কর্ম করিতে
হইবে। পাশ্চাত্যদেশীয়গণ এই কর্মের সাধনা আরম্ভ করিয়াছেন
—তাই তাঁহাদের এত উন্নতি! শুধু আর্থিক উন্নতি নয়, মানসিক
উন্নতিও তাঁহাদের বখেটে হইতেছে। তাই দেখি তাঁহাদের মধ্যে
ফ্রোডপতি ধনী যদি নিঃসন্তান হ'ন, তবুও তিনি পোস্তপুত্র
গ্রহণ * করেন না। তাঁহার ধনরাশি তিনি জীবের মঙ্গলার্থ—
হয় ধর্ম প্রচার, নয় জ্ঞানোন্নতির সাহায্য জন্ত অথবা দারিদ্র্য
দূঃখ অপনোদন বা পীড়িতের সেবার জন্ত—উৎসর্গ করিয়া যান।
আর আমাদের দেশের ধনীদের অর্থ অধিকাংশ সময়েই 'ন দেবায়

* আমাদের শাস্ত্রে দত্তক গ্রহণের বিধি আছে। এই দত্তক গ্রহণের
প্রধান উদ্দেশ্য তাহাকে বিষয়ের অধিকারী করিয়া যাওয়া নহে! রংশের
অনুষ্ঠিত কর্ম ও বিশেষ সাধনার প্রবাহ বিলুপ্ত না হয় এবং পূর্ব
পিতামহদের জলপিণ্ডাদি অক্ষুণ্ন রহিবে বলিয়া এই ব্যবস্থা। কিন্তু হায়,
সে দিন চলিয়া গিয়াছে। এখন গুরদজাত সন্তানেরাই পূর্বপুরুষকে বড়
জলপিণ্ড দেয়—তার আর পোস্তপুত্র! কেহ বলিতে পারেন যে আজকাল
বিশ্বাস নষ্ট হইয়াছে—তাই জলপিণ্ডদানাদি আর কেহ করিতে চায় না।
ভাল কথা—বিশ্বাস মতই কার্য করিয়া যাও কিন্তু পোস্তপুত্র লওয়া
কেন? বিষয় থাকে, দেব সেবায় বা 'বহুজনহিতায়' কোন কর্মের জন্ত
ত্যাগ করিতে পার—ইহাতে কোন কুসংস্কার স্পর্শ করিবে না।

ন ধর্মায়'—কেবল ভূত ভোজনে ব্যয়িত হয়। প্রাণ থাকিতে
এই যে আমরা পরার্থে ত্যাগ করিতে পারি না, ইহা আমাদের
আধ্যাত্মিক দুর্বলতা ও ধর্মের প্রতি অনাস্থার ফল। ইহা
আমাদের নিজকৃত দুঃকৃত কর্মের পরিণাম—ইহা অদৃষ্ট নহে।

আপনাকে আপনি ফোটাইয়া তোলা এবং এই জীবনটিকে
ভগবানের কর্মের যোগ্য করিয়া লওয়া
জীবনকে ভগবদ্-মানবের সম্পূর্ণ ইচ্ছার অধীন। মানবের
মুখী করা মানবের ইচ্ছাধীন বলিলাম তাহার হেতু আছে।
ইচ্ছাধীন। তোমার হস্তটিতে কত শক্তি আছে তাহা
বুঝিবার উপায় নাই, যদি তুমি তোমার
হস্তটিকে কোন প্রকার কর্ম করিতে না দাও। কেহ যদি
স্বভাবিক দুর্বল হয়, সেও নিয়মিত ব্যায়ামের অনুশীলন
করিয়া সবল হইতে পারে। অনেককে এক্ষণ হইতে আমরা
প্রত্যক্ষ করিয়াছি। সুতরাং পিতামাতার নিকট হইতে
স্বভাবিক দুর্বল দেহ প্রাপ্ত হইলেও অনুশীলনের ফলে প্রায়
অধিকাংশ স্থলেই সেই ক্রটির সংশোধন হইতে পারে।
অনুশীলন দ্বারা সর্বপ্রকার শক্তিরই উৎকর্ষ সাধন বর্তমান
বিজ্ঞান শাস্ত্রেরও অনুমোদিত। শক্তি আমাদের মধ্যেই
রহিয়াছে, কেবল অনুশীলন দ্বারা শক্তির উৎকর্ষ সাধন করার
যা কিছু অপেক্ষা।

শরীরকে বলবান করা যেমন আমাদের ইচ্ছার ও চেষ্টার
ফল, মনকে ও মানসিক শক্তি নিচয়কে শক্তিসম্পন্ন ও বিকশিত
করাও তদ্রূপ আমাদের চেষ্টা সাপেক্ষ। যে প্রকৃতির এই নিগূঢ়

রহস্য মানিতে পারে না, সে-ই অন্ধ অজ্ঞান, এবং সে-ই প্রকৃতপক্ষে অধার্মিক। কারণ তাহার আত্মশক্তির উপর বিশ্বাস নাই। এ কথা তাহা হইলে অবশ্যই সত্য যে আমরাই আমাদের রক্ষাও করিতে পারি, ধ্বংসও করিতে পারি। ঐ ক্ষমতা আমাদের মধ্যে আছে। ঠিক যেমন অগ্নি। অগ্নিকে বুদ্ধির সহিত চালাও, সে তোমার গৃহের অন্ধকার নাশ করিবে, রক্ষনাদি করিয়া তোমাকে তৃপ্তিদান করিবে, সমস্ত আবর্জনা পুড়াইয়া স্থানগুলিকে পরিচ্ছন্ন করিয়া দিবে; রোগ, সংক্রামক ব্যাধি, অস্বাস্থ্যকে বিতাড়িত করিয়া দিবে। আবার সেই অগ্নির অপব্যবহারে ধন, সম্পত্তি, গৃহ, উপকরণ এমন কি শরীর পর্য্যন্ত ভস্মীভূত হইয়া দারুণ দুঃখের অভিনয় উপস্থিত করিতে পারে। ইহাতে অগ্নির দোষ বা গুণ নাই। অগ্নি শক্তিময়—ব্যবহারকর্তার গুণে কিম্বা দোষে অগ্নির শাস্ত বা প্রলয়মূর্ত্তির প্রকাশ হইয়া থাকে। মনুষ্য জীবনেই ঐ অগ্নির মত। ঠিক পথে চালনা কর—এই মনুষ্য জীবনেই স্বর্গের শোভা দেখিয়া মুগ্ধ হইবে। বিপথে চালাও—জীবন দুর্গন্ধ স্ফোরকময় হইবে, প্রাণে নরকের অন্ধকার ছাইয়া থাকিবে।

তুমি আপনি আপনার কথা ভাবিয়া শিহরিয়া উঠিবে। তুমি হয়তো ইহাকেও অদৃষ্ট বলিয়া মানিবে। আমি বলি ইহাকে অদৃষ্ট বলিতে হয় বল, কিন্তু এই অদৃষ্টের কর্তা আর কেহ নয়—তুমিই স্বয়ং। অবশ্য এই যে একজন অনায়াসে ভাল হইতে পারে, স্বভাবতঃই মঙ্গলের পথে চলে; আর একজন তেমনি সহজেই মন্দ হইয়া উঠে, স্বভাবতঃই অমঙ্গলের পথে

চলিতে তাহার প্রবৃত্তি হয়—ইহার কি কোন পূর্বাপর কারণ পরস্পরের সংযোগ সম্বন্ধ নাই? ইহা কি সমস্তই আকস্মিক ঘটনা? অবশ্যই তাহা নহে। যাঁহারা জন্মান্তর স্বীকার করেন, তাঁহারা ইহাকে পূর্বজন্মের কর্মফল বলিয়া মানিবেন; আর যাঁহারা পূর্বজন্ম স্বীকার করেন না তাঁহারাও ইহা আকস্মিক বলিতে পারেন না। কারণ এই যে আমার বর্তমান আমি—ইহা আমার অতীত চিন্তা, সংসর্গ ও কর্মের ফল মাত্র। এ সিদ্ধান্ত তাঁহাদের নিকটও অখণ্ডনীয়। আমরা সকলেই জানি যে যদি কাহাকেও বাল্যকাল হইতে সাধু সমাজ, সংসঙ্গ ও সংসান্নিধ্যের (environments) মধ্যে রাখিয়া তাহার সংশিক্ষার ব্যবস্থা করিয়া দেওয়া যায়, তবে স্বভাবতঃই সেই বালকের প্রবৃত্তি উত্তরকালে কল্যাণমুখে প্রবাহিত হইয়া থাকে। আবার স্বভাবতঃ সাধু সচ্চরিত্র শাস্ত ও তীক্ষ্ণবুদ্ধি সম্পন্ন হইয়াও, যদি তাহার অসাধু সমাজ ও অসংসর্গে বাস হয়, তবে তাহার তীক্ষ্ণ প্রতিভা ও স্বভাবশুদ্ধ বুদ্ধি কিছুই তাহাকে কল্যাণের পথে লইয়া যাইতে পারে না। অনেক দেশী ও বিদেশী শ্রেষ্ঠ ও নিকৃষ্ট লোকের জীবনী পর্যালোচনা করিলে ইহার যথার্থ্য প্রতিপন্ন হইবে। সময়ে সময়ে এই নিয়মের ব্যভিচার দৃষ্ট হয় সত্য, যেমন হিরণ্যকশিপু পুত্র প্রহ্লাদ—কিন্তু সে জন্ম ইহাকে নিয়ম বলা চলে না, বরং নিয়মের ব্যতিক্রম বলা চলিতে পারে। অবশ্য এই ব্যতিক্রমের মূলও ভগবানের কোন বিশেষ নিয়ম কার্য্য করে, যদিও আমরা তাহা অবগত নহি। স্মরণ্য জন্মান্তর কেহ মাহুন বা নাই মাহুন, কর্মফল মানিতেই হইবে। কর্মই যে আমা-

দের শুভাশুভ গতির ব্যবস্থাপক ও নিয়ন্তা এ কথা অস্বীকার করিবার উপায় নাই। সুতরাং এ কথা ইহলোক এবং পরলোক উভয়তেই খাটে। তাহাই যদি হয় তবে কর্ম যাহাতে শুভ কর্ম হয় এবং অকর্ম না হয়, আগাগোড়া সেই চেষ্টাই আমাদিগকে করিতে হইবে; এবং চেষ্টা না করিলেও নিষ্ফলিতাভের কোন সম্ভাবনা নাই। পুরুষকার দ্বারা ছন্দকে শুভাদৃষ্টে পরিণত করিতে পারা যায়—তাহা না করিয়া যে মূঢ় সহস্র দুর্গতি সহ্য করে, এবং তৎস্বয়ং আপনার অদৃষ্টকেই দিকার দেয়—কোন প্রতীকারের চেষ্টা করে না, জ্ঞানীর নিরোমণি বশিষ্ঠদেব সেই সকল ক্ষীণকর্ম ক্ষীণপুণ্য উৎসাহ-উত্তমশৃঙ্খলা পুরুষকে গর্দভের সহিত তুলনা করিয়াছেন।

অনেক সময় দেখিতে পাওয়া যায়, যে ভালকে ভাল বলিয়া ও মন্দকে মন্দ বলিয়া জ্ঞান থাকা সত্ত্বেও বহুলোক শুভের পরিবর্তে অশুভকে, কল্যাণের স্থানে অকল্যাণকে বরণ করিতে বাধ্য হয়। কেন এরূপ হয়? কেন তাহারা এই জড়তা পঙ্ক হইতে আপনাকে উদ্ধার করিতে পুনঃ পুনঃ অকৃতকার্য্য হয়? বেশ সুচিন্তিত ও খুব সুবিচারিত বিষয়েও প্রমাদ আসিয়া উপস্থিত হয়, কে যেন আমাদিগকে বলপূর্বক বিহ্বল করিয়া ছুর্কর্মে আসক্ত করে। তাই অর্জুনের চায় মহাপুরুষের মুখেও এই কাতরোক্তি উথিত হইয়াছে “অথ কেন প্রযুক্তোহয়ং পাপং চরতি পুরুষঃ। অনিচ্ছন্নপি বাঞ্চয়্য বলাদিব নিয়োজিতঃ॥” জীবের এই মর্শ্শভেদী কাতর ক্রন্দনে বাস্তবিকই প্রাণকে অবসন্ন করিয়া ফেলে। প্রবৃত্তি যদি বলপূর্বক আমাকে অসৎ-

কর্মে নিয়োগ করে এবং আমারও তাহাকে বাধা দিবার ক্ষমতা না থাকে, তবে তো জীবন দুর্বিষহ বোঝার মত কষ্টদায়ক। তবে চেষ্টা চরিত্র সবই ব্যর্থ, সবই পণ্ডশ্রম। শৃঙ্খলাবদ্ধ ব্যাঘ্র যেমন নিষ্ফলিতাভের বিফল চেষ্টার পরিশ্রমে ক্লান্ত হইয়া কেবল ফেণ উদগীরণ করে মাত্র, আমাদের সকল চেষ্টারও কি সেইরূপ দুর্শাশার ব্যর্থতায় পরিসমাপ্তি হয়? এত বড় মানব জীবনের কি এই পরিণাম? ভাবিলে হৃৎকম্প হয়। না তাহা নহে—ইহা কখনই সম্ভব নহে। শাস্ত্রবক্তা ঋষিরা আস্ত ন'ন। তাহারা জীবের অমৃত লাভের কথা পুনঃপুনঃ উল্লেখ করিয়াছেন। “এবোহস্ত পরমঃ সম্পদ্ এবাস্ত পরমাগতিঃ”—তিনিই জীবের পরম সম্পদ, তিনিই জীবের পরমাগতি। তাহাকে লাভ করিয়াই মানবাত্মা পূর্ণতা লাভ করে। খ্রীষ্টিয়ানরা মানবাত্মাকে যেরূপ ‘অপূর্ণ’ বলেন, মানবাত্মা সেরূপ ভাবে ‘অপূর্ণ’ নয়; বীজনিহিত বৃক্ষের মত অপূর্ণ মধ্যেই পূর্ণ পরমাশ্রম বিরাজ করিতেছেন—সুতরাং জীব অপূর্ণ হইবে কি প্রকারে? * আপাতদৃষ্টিতে মানবের যে অপূর্ণতা বোধ হয় তাহা বিচার-বিভ্রম মাত্র। ভ্রমশৃঙ্খলা হইয়া সংস্কার-(আবর্জনা) বর্জিত হইয়া দেখিলে—ইহাকে আর অপূর্ণ বা অপবিত্র বলিয়া মনে হইবে না।

* এ সম্বন্ধে ইংরাজ কবির একটি সুন্দর কবিতা আছে—

A dim miniature of the Greatness Absolute
A frail child of dust.
A worm A God.

জলকে সমল বোধ হয়, লবণাক্ত বোধ হয়, কিন্তু মল ও লবণকে সরাইয়া লইলে ইহা যে বিশুদ্ধ জল সেই বিশুদ্ধ জলই থাকিয়া যায়। এই জন্মই সম্ভব হইয়াছে যে এই শোক-মোহযুক্ত মানবাত্মাই একদিন পরমাত্মার মধ্যে অবসান লাভ করিবে। অমলে সমল, গুণোত্তমে গুণহীন, কপনও মিলিতে পারে না। তাঁহার পরস্পরের কখনও সখা হইতে পারেন না। আদিতে হই-ই একবস্তু, তাই এই সুদীর্ঘ জীবন যাত্রার একমাত্র উদ্দেশ্য সেই পরমবন্ধু জীবনমরণের সখা, পরমাত্মীয় পরমাত্মার সহবাস লাভ। ইহাই প্রকৃত ব্রহ্মানন্দ—ইহাই অনন্তে আত্মবিসর্জন। ভূমানন্দের মধ্যে এইরূপ নিমজ্জনই এই সুচির জীবন-যাত্রার একমাত্র অমৃতময় অবসান। স্মৃতরাং নিরাশ হইলে চলিবে না, নিশ্চেষ্টে রহিলে চলিবে না। পৌরুষ প্রভাবে অভ্যাস সহায়ে আপনাকে আপনার কল্যাণপথে অটল-প্রতিষ্ঠ করিয়া তুলিতে হইবে।

আমরা প্রবৃত্তি কর্তৃক 'বলাদিব নিয়োজিত' হই বটে, কিন্তু সে দোষ কার? প্রবৃত্তির দাসত্ব করিতে আমরা ভালবাসি বলিয়াই আজ সে আমাদের ঘাড়ে চাপিয়া বসিয়াছে, নামিবার নামটি করে না—এখন 'হায়! হায়!' করিলে কি হইবে? প্রবৃত্তিকে প্রশ্রয় তো আমরাই দিয়া আসিয়াছি। কত জন্ম এইরূপে কাটিয়া গিয়াছে—এখন সে আমাদের নিকট বলপূর্বক দাসত্বের দাবী করে। কিন্তু এরূপ দাবীও সে কতক্ষণ করিতে পারে? যতক্ষণ আমরা আমাদের সখার ভবনে যাইবার জন্ম দৃঢ় সঙ্কল্প না করি। মস্তকে বহুভার, বহুদূরে বিপথে চলিয়া

আসিয়াছি; 'কোথা পথ' বলিয়া তবুও ভাবিবার প্রয়োজন নাই। তাঁহাকে খুঁজিবার জন্ম বাহির হইয়া পড়িলেই পথ দেখিতে পাইবে। ব্যাকুল অন্তঃকরণে 'কোথা তুমি' বলিয়া ডাকিলেই তাঁহার পাঞ্চজন্ম-শঙ্খনিদাদ শুনিতে পাইবে! এমন বন্ধুও আর কেহ নাই, এত নিকটেও আর কেহ নাই। যখনই যে ডাকে তখনই সে তাঁহার সাড়া পায়। পাপী বলিয়া ঘৃণা নাই, পূর্বে ডাকি নাই বলিয়া অপরাধ গ্রহণ করা নাই—ডাকিবামাত্রই তখনই আসেন। কিন্তু এই ডাকাই বড় শক্ত। তাঁহাকে পাওয়া কঠিন নয়, তাঁহাকে চাওয়াই বড় শক্ত। জীব কতদিন হইতে কত চেষ্টা করে, তবু তাঁহাকে ডাকিবার মত চাহিবার মত অবসরই করিয়া উঠিতে পারে না। তথাপি ইহা সত্য, এই প্রবৃত্তির সঙ্গে লড়াই করিতে করিতেই একদিন এমন শুভক্ষণ আসিয়া উপস্থিত হয়, যে আমার অজ্ঞাতে আমার অনিচ্ছাসত্ত্বে তাঁহার শুভজ্যোতি আমাদের হৃদয় মনকে প্রাবিত করিয়া এক দিব্যধামের দ্বার উদঘাটন করিয়া দেয়, তখন মন প্রাণ অনন্তের পানে উধাও হইয়া ছুটিয়া যায়। সেই জন্মই বলিতেছি অভ্যাস ত্যাগ করিলে চলিবে না। অভ্যাসের প্রদীপটিকে প্রতিনিয়ত প্রজ্জ্বলিত রাখিতে হইবে। নিজের চিরন্তন কুমভ্যাস ও কুসংস্কারের উপরে উঠিতেই হইবে। ভক্ত কবি তাই বলিয়াছেন "হরসো লাগা রহ ভাঙ্গি, তেরা বনত বনত বন যাঙ্গি।" 'সদা সর্বদা লাগিয়া থাক, লাগিতে লাগিতে একদিন ঠিক লাগিয়া যাইবে'!

চিত্ত কেন প্রবৃত্তি দ্বারা পরিচালিত হয় এবং প্রবৃত্তি পরিচালিত চিত্তকে যেরূপে আবার স্ববশে আনিতে হয়, তাহার উপায়

বলিতেছি। ভগবান অর্জুনকে যে উপায় বলিয়াছেন সে কথা পরে বলিব।

প্রধান উপায় বিচার পূর্বক লক্ষ্য স্থির করা। পরে বিচার ও চেষ্টা দ্বারা লক্ষ্যাভিমুখে পৌঁছিতে চেষ্টা করা। প্রথমে বেশ করিয়া আপনার হৃদয় অনুসন্ধান করিয়া দেখ তুমি 'তঁাহাকে' চাও কি না? যদি তঁাহাকে চাওয়াটা ঠিক হয় তবে তঁাহাকে পাইবার প্রতিবন্ধক গুলিকে ভাল করিয়া বুঝিয়া দেখা দরকার। সাধু মহাত্মাদের উপদেশ, শাস্ত্রচিন্তা ও আত্মচিন্তা প্রভাবে যাহা বুঝিতে পারিলাম, তাহা ধারণা করা দরকার। এইরূপ ধারণা-বশীকৃত চিন্তাধারা লক্ষ্য বিষয়ে স্থিতি লাভ হয় এবং তখন সমস্ত অনর্থের (বিষয়েচ্ছা, ভোগেচ্ছা) উপশান্তি হয়। নচেৎ শুধু বাক্যের পণ্ডিত হইয়া রহিলাম, কার্যে কিছুই করিলাম না, ইহাতে কিছুতেই দুঃখ নিবৃত্তি হইতে পারে না। এ সম্বন্ধে প্রথম উপদেশটাই এই—“যে হি সংস্পর্শজা ভোগা দুঃখযোনয় এব তে”—ইন্দ্রিয় ও বিষয় জনিত যে সমস্ত ভোগ সুখ—তাহাই অসীম দুঃখের কারণ বলিয়া মনে দৃঢ় ধারণা কর, কারণ বিষয়াদি জনিত যে সুখ—তাহা চিরস্থায়ী নহে, অত্যল্প কালের মধ্যেই উহা হইতে দাউ দাউ করিয়া দুঃখাগ্নি জ্বলিয়া উঠে। ইহার পরিণাম এইরূপ নিশ্চিত জানিয়াই “ন তেষু রমতে বৃধঃ”—বিবেকী তাহাতে আসক্ত হ'ন না। এই এক কথা, তারপর ভগবানের আর একটি উপদেশ মনে রাখিতে হইবে—

“ইন্দ্রিয়স্বেন্দ্রিয়স্বার্থে রাগদ্বৈবো ব্যবস্থিতৌ।

তয়োঁ বশমাগচ্ছেত্তৌ হৃদ্য পরিপস্থিতৌ ॥”

প্রত্যেক ইন্দ্রিয়েরই নিজ নিজ অনুকূল বিষয়ে লোভ এবং প্রতিকূল বিষয়ে 'দ্বेष' অর্থাৎ বিরাগ অবশ্যস্বাভাবী। তবে উপায় কি? 'তয়োঁ বশমাগচ্ছেৎ'—বিষয় স্মরণ হেতু রাগদ্বৈব উপস্থিত হইলেও, তাহাদের কর্তৃক পরিচালিত হইও না। বিষয়-লোভ না ঘুটিলে মনে শান্তি পাওয়া যায় না, সুতরাং বিষয়ে দোষদৃষ্টি থাকা কর্তব্য। ইন্দ্রিয়সংযম ব্যতীত স্থিতপ্রজ্ঞতা লাভ হয় না। অথচ আত্মসাক্ষাৎকার না হওয়া পর্যন্ত বিবয়ের প্রতি আসক্তিও সম্পূর্ণ দূর হয় না, প্রকৃত বিবেক উৎপন্ন হয় না। কিন্তু বিচারশীল ও আত্মধ্যানপরায়ণ হইলেই বুদ্ধি আত্মাতে প্রতিষ্ঠিত হয় এবং ইন্দ্রিয়-বিষয়ে অনাসক্তি হেতু স্থিতপ্রজ্ঞের অবস্থা লাভ হয়। এইরূপে জীবন কৃতার্থ হয়। যেহেতু মোক্ষার্থে যত্নবান বিবেকী পুরুষকেও ইন্দ্রিয়গণ বলপূর্বক বিষয় ভোগে রত করে, আর ইন্দ্রিয়গণও প্রমাথী, লোভী এবং দৃঢ়; অতএব যোগলাভেচ্ছু ব্যক্তিকে ঐ সমস্ত ইন্দ্রিয়গণকে সংযমন করিয়া মৎপরায়ণ হইতে হইবে। এইরূপে ধীরে ধীরে “স্থিতপ্রজ্ঞ” হওয়া যায়।

তৃতীয় কথা—বিষয়-চিন্তা ত্যাগ। ভগবান বলিতেছেন—

“ধ্যায়তো বিষয়ান্ পুংসঃ সঙ্গস্তেযু পজায়তে।

সঙ্গাৎ সংজায়তে কামঃ কামাৎ ক্রোধোহভিজায়তে ॥”

বিষয় চিন্তা করিলেই সেই বিষয়ে আসক্তি বা প্রীতি বৃদ্ধি হয়—অর্থাৎ আরও অধিক চিন্তা করিতে ইচ্ছা করে। এই আসক্তি হইতে সেই সেই বিষয়ে আরও তৃষ্ণা (কাম) বৃদ্ধি হয়। তাহাতেই জীবের সর্বনাশ হয়। অর্থাৎ পরমাশ্রুচিন্তন ও তজ্জনিত বিশুদ্ধ প্রজ্ঞার উদয় হয় না, এবং প্রজ্ঞার উদয় না

হইলে মোহপাশ ছিন্ন হয় না। মোহপাশ ছিন্ন না হইলে জন্ম মৃত্যুর হাত হইতে অব্যাহতি লাভ করা যায় না। ইহারই নাম মহাবিনাশ। সেই জন্ম শুভকামী ব্যক্তির অনর্থ চিন্তা মনে আসিতে দেওয়ারই উচিত নহে; আসিবামাত্রই মনকে বুঝাইতে হইবে, যদি এ বিষয়ে চিন্তা করি, এখনই এই বস্তুর জন্ম চিন্তের উৎকর্ষা বৃদ্ধি পাইবে এবং অনর্থক দুঃখ ভোগ করিয়া মরিতে হইবে। বিষয়চিন্তার বেগ আসিলে তাহা বন্ধার মত মনকে ভাসাইয়া লইয়া যায়। সুতরাং কামসঙ্কল্প উৎপন্ন হইবামাত্রই বিচার দ্বারা এবং ধৈর্যযুক্ত বুদ্ধি দ্বারা তাহাকে অক্ষুরেই নষ্ট করিয়া দেওয়া উচিত। একটু ধীরতা অবলম্বন করিলে দেখা যায়, যে প্রবৃত্তিটি আমার ঘরে সিঁধ দিবার জন্ম উঁকি বুঁকি দিয়া অবসর অন্বেষণ করিতেছিল, তাহা আমার গৃহস্থিত বিচার-খড়্গের ভীষণ ধার দেখিয়া দূর হইতেই ভয় পাইয়া পলাইয়া যাইবে। দুইবার দশবার প্রবৃত্তিকে এইরূপ নিরস্ত করিতে পারিলেই তাহারা আর মাথা তুলিবার চেষ্টা করিবে না। অবশ্য বিষয়গুলি যে হয় এবং উহারাই তোমাকে বিপদ সাগরে ডুবা-ইবার চেষ্টা করিতেছে, ইহা পুনঃ পুনঃ বিচার সাহায্যে দৃঢ় ধারণা করিয়া রাখিতে হইবে। এখন ভগবান অর্জুনকে যাহা বলি-তেছেন তাহা বুঝিয়া দেখা যাক।

“কাম এষ ক্রোধ এষ রজোগুণ সমুদ্ভবঃ।

মহাশনো মহাপাপমা বিদ্বেননিহ বৈরিণম্ ॥

ধূমেনাত্রিয়তে বহির্ন্যথাদর্শো মলেন চ।

যথোষ্মেনাবৃত্তো গর্ভস্তথা তেনেদমাবৃত্তম্ ॥

আবৃত্তং জ্ঞানমেতেন জ্ঞানিনো নিত্যবৈরিণা।

কামরূপেণ কোশ্বেয় দুঃস্পূরণানলেন চ ॥

ইন্দ্রিয়াণি মনো বুদ্ধিরস্মাধিষ্ঠানমুচ্যতে।

এতৈর্বিমোহয়ত্যেব জ্ঞানমাবৃত্ত্য দেহিনম্ ॥”

ইচ্ছা না থাকিলেও চিত্ত যে প্যাপ কলুষিত হইয়া নিরস্তুর দগ্ধ হইতেছে, ইহার মূলই কাম ও কামের বিকার ক্রোধ। এই কামই মোক্ষমার্গের প্রধান বৈরী, ইহা দুঃস্পূরণীয়; অত্যাগ্র এবং জ্ঞানীর চিরশত্রু। ইহারাই জ্ঞানকে আচ্ছন্ন করিয়া মোক্ষমার্গকে রুদ্ধ করিয়া রাখে। কাম ও ক্রোধ রজোগুণ হইতে উৎপন্ন, রজোগুণ যতক্ষণ প্রবল থাকিবে ততক্ষণ আমাদের চিত্ত বিষয় হইতে বিষয়াস্তরে ক্ষিপ্ত কুক্কুরের মত ঘুরিয়া বেড়াইবে। অতএব এই রজোগুণের কবল হইতে ইন্দ্রিয়গণকে সংহত করিয়া সংযত করিতে হইবে। রজোগুণকে ক্ষীণ করিতে হইলে সত্ত্বগুণকে বাড়াইবার চেষ্টা করিতে হইবে। সত্ত্বগুণ যত বাড়িবে, কাম ক্রোধের উত্তেজনা সেই পরিমাণে হ্রাস হইতে থাকিবে। বিষয়ের দ্বারা পরিপূরিত হইলেও কিছুতেই ইহার আকাঙ্ক্ষা নিবৃত্ত হয় না। ভোগেচ্ছাই সমস্ত দুঃখের হেতু, ইহা ভোগী ও ত্যাগী সকলেরই মহাশত্রু। বিশেষতঃ ত্যাগীর। কেননা কাম ত্যাগ না হইলে সন্ন্যাসী হওয়া বিড়ম্বনা। এই কাম জ্ঞান ও বিজ্ঞান নাশক—অর্থাৎ শাস্ত্রশ্রবণজনিত বিবেকজ্ঞ ও সাধনলব্ধ জ্ঞান সমস্তই কাম দ্বারা বিনষ্টপ্রায় হয়। বহুশাস্ত্রদর্শী পণ্ডিতাঙ্গ-গণ্যরও বুদ্ধি কাম দ্বারা বিমোহিত হয়। এই কামের আশ্রয়স্থান তিনটি। (১) ইন্দ্রিয়, (২) মন, (৩) বুদ্ধি। ইন্দ্রিয়

দ্বারা বিবয়ের দর্শন-শ্রবণ হইলে, তৎপরে মনের আসক্তি হয় অতএব ইন্দ্রিয়গুলি কামের যেমন প্রথম করণ, তেমনই দ্বিতীয় করণ হইল মন ; মনের সংকল্প বিকল্প দ্বারা প্রবৃত্ত কামসংকল্প বুদ্ধির দ্বারা গৃহীত হয়, অর্থাৎ কামোপভোগের প্রতি দৃঢ় আসক্তি জন্মে। অতএব এই তিনটিকে নিয়মিত করিয়া কামকে জয় করিতে হইবে। চিন্তাপ্রণিধান ও আত্মদর্শন দ্বারাই মন বুদ্ধি নিয়মিত হয় এবং নিয়মিত মন বুদ্ধিতে কামসংকল্প স্থায়ী হইতে পারে না। অর্থাৎ কামে মুগ্ধ হইবার পূর্বেই নিয়তেন্দ্রিয়েরা সতর্ক হইয়া যান। ইহার উপায় ভগবান বলিতেছেন—

“ইন্দ্রিয়ানি পরাণ্যাহরিত্বিয়েভ্যঃ পরং মনঃ।

মনসস্ত পরা বুদ্ধির্যো বুদ্ধেঃ পরতস্ত সংঃ।

এবং বুদ্ধেঃ পরং বুদ্ধা সংস্তস্ত্যান্মানমান্যনা।

জহি শত্রুং মহাবাহো কামরূপং তুরাসদম্ ॥”

ইন্দ্রিয়গণের চেষ্টা ব্যতীত দেহাদি কোন ব্যাপার সাধন করিতে পারে না, ইন্দ্রিয়গণ সূক্ষ্ম ও প্রকাশক ; এইজন্য দেহাদি হইতে ইন্দ্রিয়েরা শ্রেষ্ঠ হইল। আবার ইন্দ্রিয়গণ হইতে মন শ্রেষ্ঠ, কারণ মনই ইন্দ্রিয়গুলিকে স্ব স্ব বিষয়ে প্রবর্তিত করে। আবার মন হইতে বুদ্ধি শ্রেষ্ঠ, কারণ মন চকল এবং সংকল্পের নিশ্চয়তা বুদ্ধি হইতেই জন্মে। আত্মার সত্তা ও প্রকাশ ভিন্ন বুদ্ধিরও বিকাশ হইবার সম্ভাবনা নাই। অতএব আত্মাই সর্ব-শ্রেষ্ঠ। ঋতিও বলিতেছেন “পুরুষান্ন পরং কিঞ্চিৎ”। ক্রমা-নুসারে আত্মারই শ্রেষ্ঠতা প্রতিপাদিত হওয়ায়—মনে হইতে পারে আত্মাও ইন্দ্রিয়াদির ত্রায় বৃথিবা বিকারগ্রস্ত। কিন্তু তাহা নহে।

আত্মা নির্বিকার সাক্ষীস্বরূপ, কামাদি বিকার বিষয়েন্দ্রিয়াদি-জনিত বুদ্ধিরই হইয়া থাকে—তাই বুদ্ধির পর যে আত্মা, অথচ বুদ্ধির বিকারের দাগ যেখানে লাগিতে পারে না, সেই আত্মাকে জানিলে আর কামাদি দ্বারা মোহিত হইবার আশঙ্কা থাকে না। বিষয়তৃষ্ণা যতদিন থাকে ততদিন মন বিচলিত থাকে। বিচলিত মন ভগবদদর্শনে সচেষ্ট হইতে পারে না। তাই আগে দেহশুদ্ধি মূঞ্জলাদির দ্বারা করিতে হয়, পরে ইন্দ্রিয় ও মন শুদ্ধি। অর্থাৎ বিষয়গ্রহণশীল ইন্দ্রিয় ও মনকে ভগবৎ ভজন ও সেবা দ্বারা তদ-ভিমুখ করিতে হয়। শ্রীমদ্ভাগবতে অশ্বরীষ রাজার এইরূপ সাধন ক্রম উল্লিখিত আছে—

“স বৈ মনঃ কৃষ্ণপদারবিন্দয়ো

বর্চাসি বৈকুণ্ঠগুণানুবর্ণনে ॥

করৌ হরেমন্দিরমার্জ্জনাदिषু

ঋতিষ্ককারোহ্চ্যুতসৎকথোদয়ে ॥”

এইরূপে বুদ্ধি নির্মল ও প্রশান্ত হয়। প্রশান্ত চিত্তই ভগবানের কমলাসন। অতএব আত্মসাক্ষাৎকার হইলে, আর কোন রিপুই কিছু করিতে পারিবে না। “আমি অভয় পরমপদ লাভ করিব”— এই দৃঢ় সংকল্প লইয়া ‘আত্মনা’ প্রশান্ত-বুদ্ধি-বশীকৃত চিত্তের দ্বারা কাম ভোগেচ্ছ মনকে ভগবদ্-প্রাপ্তি বিষয়ে নিশ্চল ও দৃঢ় করিতে পারিলেই এই হৃৎকায় কাম অর্থাৎ বিষয়তৃষ্ণাকে জয় করা যায়। বিষয়েন্দ্রিয়াদির উপাসনা না করিয়া আত্মানুসন্ধানই সর্বোৎকৃষ্ট উপাসনা। শরীর হইতে বুদ্ধি পর্য্যন্ত সমস্তই বিকারগ্রস্ত অতএব ভ্রান্তি ও মোহ উৎপাদক। আত্মার বিকার নাই, এই জগৎ

আত্মোপাসনার দ্বারাই জীব মোহমুক্ত হয়। নির্মল নির্বিকার আত্মার স্বরূপ গুরু ও শাস্ত্র মুখে অবগত হইয়া “তমেব ধীরঃ বিজ্ঞায় প্রজ্ঞাং কুর্বাতি” মনে মনে নিত্য অনুধ্যান করিলেই তৎসম্বন্ধে প্রজ্ঞা উপস্থিত হয় এবং আত্মবিষয়ক প্রজ্ঞা দ্বারাই কাম জনিত প্রজ্ঞার বিলয় সাধন ঘটে। এইরূপে আত্মবিষয়ক প্রজ্ঞাতে মনকে নিশ্চল করিতে পারিলেই কামসঙ্কল আর মাথা তুলিতে পারে না—সব্বশুদ্ধি ইহারই নামান্তর।

এইরূপে চিন্তাজয়ে সামর্থ্য জন্মে। যাঁহারা অসমর্থ, যাঁহারা উচ্চ বৈরাগ্যবান পুরুষ নহেন, তাঁহারাও পুনঃ পুনঃ অভ্যাস ও বিচার দ্বারা ভক্তি ও শ্রদ্ধাযুক্ত হইয়া জ্ঞান লাভ করিবার চেষ্টা করিবেন। তাহা হইলেও একদিন না একদিন কৃতার্থ হইতে পারিবেন। মহাভারতে আছে :—

“যখন বুদ্ধি আত্মার সহিত অভিন্নরূপে অবস্থান করিয়া ঘটাদি বিষয় উদ্ভাবন করে, তখন উহাকে মন বলিয়া কীর্তন করা যায়।”

“বুদ্ধি নিতান্ত আত্মার অনুগত ও আশ্রিত, ব্যতিক্রমের বিধেয় এবং ইচ্ছার প্রয়োজক।”

“ইন্দ্রিয়গণ বিষয় সকল গ্রহণ, মন সংশয় উৎপাদন, আর বুদ্ধি বিষয়ের যথার্থ্য নির্ণয় করে। বিষয়ে ইন্দ্রিয় সংযোগ হইবামাত্র উহা মনে প্রকাশিত হইয়া থাকে।”

“বুদ্ধি শ্রবণজ্ঞান যুক্ত হইলেই শ্রোত্র, স্পর্শজ্ঞান যুক্ত হইলেই দ্বক, দর্শনজ্ঞান যুক্ত হইলেই দৃষ্টি, রসজ্ঞান যুক্ত হইলেই রসনা, এবং স্রাবণজ্ঞান যুক্ত হইলেই স্রাবণ বলিয়া কীর্তিত হয়। এইরূপ

নানাপ্রকার বুদ্ধির বিকার উপস্থিত হয়, এই সমুদয় বিকারকে ইন্দ্রিয় বলিয়া কীর্তন করা যায়।”

“বুদ্ধি দেহ আশ্রয় করিয়া কখনও প্রীতিলাভ, কখনও অনুতাপ কখনও উভয় বিহীন হইয়া অবস্থান করিতেছে। সমুদ্র যেমন বেলাভূমি অতিক্রম করিতে পারে না, তদ্রূপ বুদ্ধি, স্রুখ ছুংখাদি ভাবদ্বয়কে অতিক্রম করিতে সমর্থ হয় না। বুদ্ধি যখন উভয় ভাব হইতে বিরত, তখন মনোমধ্যে অবস্থিত, কিন্তু রজোগুণ প্রভাবে আবার কর্মের অনুসরণ করে।”

“সব্বগুণসম্পন্ন বুদ্ধি যথার্থ জ্ঞান, রজোগুণে ইন্দ্রিয়জ্ঞান, এবং তনোগুণে মোহ উৎপাদিত করিয়া থাকে।”

“তমঃ প্রভৃতি গুণত্রয় বুদ্ধিকে এবং বুদ্ধি পঞ্চ ইন্দ্রিয়, পঞ্চভূত ও মনকে বিষয়াসক্ত করে।” “সারথী যেমন বশীভূত অশ্বকে সঞ্চালন করে, সেইরূপ মন ইন্দ্রিয়গণকে স্ব স্ব বিষয়ে নিয়োগ করিতেছে।”

“জীব হৃদয়ে অবস্থান করিয়া সেই মনকে সতত নিযুক্ত করিতেছে। মন সমস্ত ইন্দ্রিয়ের এবং জীব মনের সৃষ্টি সংহারের কারণরূপে অভিহিত হয়।”

“লৌহময় কুঠার যেমন লৌহ হইতে উৎপন্ন নিগড়কে বিনষ্ট করিয়া স্বয়ং ভগ্ন হয়, তদ্রূপ ধ্যানসংস্কৃত বুদ্ধি রজোগুণ সম্বৃত স্বাভাবিক দোষ সমুদয়ের বিনাশ সাধন পূর্বক শান্তি লাভ করিয়া থাকে ॥”

যতক্ষণ বাসনার প্রবল বাত্যা বহিতে থাকে, যতক্ষণ হৃদয়ে ভোগ লালসা বর্তমান থাকে, ততক্ষণই অজ্ঞান—ততক্ষণই চিত্ত

চকল হইয়া জ্ঞানের সুনির্মল জ্যোৎস্নাকে আচ্ছাদিত করিয়া রাখে—সুতরাং ততক্ষণই ভেদজ্ঞান, পুনর্জন্ম, ততক্ষণই এই শরীর এবং এই শরীরে রোগ, শোক, দুঃখ ভোগ হইতে থাকে। রক্তোপ্ত এবং তমোগুণের প্রাবল্যেই চিত্তের বিক্ষিপ্ত সাধিত হয় এবং চিত্ত বিক্ষিপ্ত হইয়াই বিবিধ বিকারে বদ্ধ হয়—আবার যখন গুরুবাক্য, বিচার ও সাধনাভ্যাসের ফলে গুরু সঙ্কল্পের উদয় হয় তখনই তত্ত্বজ্ঞান মেঘনির্মুক্ত চন্দ্রমার স্থায় ভক্তের স্বরূপে প্রতি-ভাসিত হয়। সে চিত্তে আর বাসনার ছাপ লাগে না। অভ্যাস করিতে করিতে চিত্ত স্পন্দনরহিত হয়, ভববন্ধন ক্ষয় পায়। শ্রদ্ধা ভক্তি হইতেই প্রকৃত বিচার ও সাধনাভ্যাসে প্রযত্ন আসে। বাঁহা প্রাতি ভক্তি নাই, বাঁহাকে ভালবাসি না, তাঁহাকে পাইবার জন্ত চেষ্টা কেন আসিবে? আর সেই আমার ভক্তির পাত্র, সেই আমার নিজজন, যিনি আমার সুখ দুঃখের নিত্যসঙ্গী, জন্ম মরণের সাথী, আমার প্রাণের আরাম, হৃদয়ানন্দ ও প্রাণপ্রিয়। এই পরম দয়িত বস্তুটি কোথায় কিরূপে পাওয়া যাইবে? বিচার দ্বারা, সাধুসঙ্গ দ্বারা ও সংশাস্ত্র শ্রবণদ্বারা আগে এই নিজজনটিকে চিনিয়া লইতে হইবে। তাঁহাকে একবার চিনিতে পারিলে, আর তাঁহার জন্ত প্রাণের একান্ত আগ্রহ না জন্মিয়া থাকিতে পারে না। আপন মাতাকে মাতা বলিয়া জানিলে শিশুহৃদয় আপনিই আগ্রহাধিত হইয়া পুলকিত অন্তরে জননী অঙ্কে ঝাঁপাইয়া পড়ে। তাহা কাহারও উপদেশের অপেক্ষা করে না। কিন্তু শিশু যতক্ষণ নিদ্রিত থাকে বা ক্রীড়ায় মগ্ন থাকে, ততক্ষণ তার মাকে মনে পড়ে না। কিন্তু এ খেলা লইয়া তো আর কেহ চিরকাল

মগ্ন থাকিতে পারে না। খেলা ভাস্কিতেই হয়, কারণ খেলা চিরকাল ভাল লাগিবে কেন? হস্তপদাদি অবয়ব ক্রমশঃ অবসন্ন হয়, মন ক্লান্ত হইয়া পড়ে, তখন ঘর মনে পড়ে, মাকে মনে পড়ে। একবার এই ক্রীড়ার প্রতি অবজ্ঞা আসিলেই মার জ্ঞান প্রাণ ব্যাকুল হইয়া উঠে—শিশু মা, মা করিয়া অস্থির হয়। মা-ও সব কাজ ফেলিয়া তখন শিশুর প্রতি মনোযোগী হ'ন, এবং আপনার প্রেমামৃত স্তন্য-ধারায় শিশুর সমস্ত সন্তাপ হরণ করেন। ইহাই মাতা পুত্রের মধ্যে স্বাভাবিক ধর্ম। তনয় রোদন করিলে মা তাহাকে সাস্থনা না দিয়া থাকিতে পারেন না। পরমা-ত্মার সঙ্গে জীবের সম্বন্ধও সেইরূপ প্রেমের ও ভালবাসার সম্বন্ধ। তাঁহাকে প্রিয় বোধ না করিয়া কেহই থাকিতে পারে না। গোপীরা যথার্থ বলিয়াছিলেন “প্রেষ্ঠো ভবান্ তনুভূতাং কিল বন্ধুরাত্মা” —আপনিই সমস্ত দেহধারীদের প্রিয় বন্ধু আত্মা। সুতরাং

“কুর্বন্তি হি স্বয়ি রতিং কুশলাঃ স্ব আত্মন্

নিত্যপ্রিয়ে পতিস্মৃতাভিভিরাগ্তিদৈঃ কিম্ ॥”

হে আত্মন! শাস্ত্রনিপুণ ব্যক্তির নিত্য প্রিয় আত্মা, তোমাতেই রতি করিয়া থাকেন। দুঃখদায়ী পতিস্মৃতাধিতে কি হইবে? দেহবোধ যতক্ষণ, ততক্ষণ সুখ দুঃখ আমাদিগকে ছাড়ে না— দেহাতীত পরমাত্মাকে যেই দেখিল আর তখনই তাহার এই সংসার, এই দেহ, এই স্বজন বন্ধু সমস্তকেই উপেক্ষা আসিল। কারণ এ সমস্ত সম্বন্ধই দেহ-সম্বন্ধ হেতু। তিনিই আমাদের প্রকৃত আত্মীয় ও বন্ধু এবং আমাদের যথাসর্বস্ব; ইহা জানিলে আর তাঁহাকে ভাল না বাসিয়া কি থাকা যায়? কেবল যতক্ষণ ঠিক

এই সম্বন্ধটি বুঝিতে পারি না, ততক্ষণ তাঁহাকে ভুলিয়া সংসার খেলায় মগ্ন থাকা সম্ভব। একবার বুধবার একবার চিনিবার যা অপেক্ষা। চিনিলেই তখন “কোথা তুমি আমার জীবন সর্ব্বস্ব, কোথা তুমি আমার প্রাণের প্রাণ” বলিয়া কাঁদিতেই হইবে। তাঁহাকে না পাইলে তখন আর যে কিছু ভাল লাগিবে না, তখন অল্প সমস্ত কথা বিষের মত বোধ হইবে। প্রিয় ব্যতীত জীবন ধারণ করাও তখন ভক্তের পক্ষে অসম্ভব হয়। ভক্তপ্রাণে তখন মহাপ্রভু চৈতন্যচন্দ্রের কৃষ্ণবিয়োগব্যথার মত একটি নিদারুণ ব্যথা নিরন্তর স্ফুরিত হইতে থাকে। তখন আকুল প্রাণ দিন রাত হাহাকার করিয়া বলিতে থাকে :—

হা হা কৃষ্ণ প্রাণনাথ ব্রজেন্দ্র-নন্দন।

কাঁহা যাও কাঁহা পাঁও মুরলী-বদন ॥

সুতরাং হৃদয়ের চিরদয়িত বস্তু সেই পরমতত্ত্বকে জানিবার জন্ত শরাস্ত্র মুগের মত ব্যাকুল অন্তঃকরণে আপনার অবেশিনী দৃষ্টিতে সতত জাগ্রত রাখিতে হইবে।

“তদ্বিজ্ঞানেন পরিপশুস্তি ধীরা

আনন্দরূপমমৃতং যদ্বিভাতি ॥”

ধীর বিবেকী পুরুষেরা সেই আনন্দময় অমৃত স্বরূপকে বিজ্ঞান দ্বারা সম্যকরূপে দর্শন করেন। সেই জন্তই মোহাক্ত জীবকে শ্রুতি সচেতন করিয়া বলিতেছেন—

“উত্তিষ্ঠত জাগ্রত প্রাপ্য বরান্ নিবোধত।” হে জীব উঠ, জাগ, শ্রেষ্ঠতত্ত্ব বিদিত হইবার জন্ত সাধু মহাজনের শরণ গ্রহণ কর। শ্রেষ্ঠতত্ত্বজ্ঞ পুরুষগণের নিকট আত্মতত্ত্ব শ্রবণ করিলে

তবেই মোহনিজা ভাসিবার সম্ভাবনা। তাঁহাদের মুখ হইতে আত্মতত্ত্ব শ্রবণ করিলে স্বতঃই সে সকল বাক্যের প্রতি শ্রদ্ধা-বুদ্ধির উদয় হয়। তাঁহাদের সমুজ্জ্বল সাধু দৃষ্টান্ত, তাঁহাদের ব্রহ্মজ্ঞানদীপ্ত বদন মণ্ডলের অপূর্ব জ্যোতি চক্ষের সম্মুখে দেখিয়া—সেই পরম তত্ত্বকে জানিবার জন্ত হৃদয় ব্যাকুল হইয়া উঠে। তাঁহাদের আশ্বাস বাণীতে হৃদয় আশাবিভ হইয়া উঠে। তখন আপনা হইতে ভোগ্য বিষয় সকল যেন নীরস বলিয়া মনে হইতে থাকে, আত্মবিষয়ের অবধারণ ও তাহা মনন করিবার জন্ত চিন্তে প্রবল আগ্রহ জন্মিতে থাকে এবং তাহার ফলে বুদ্ধি নির্মল ও একাগ্র হইয়া ধ্যানাবস্থা লাভ করে, এবং সেই ধ্যানলব্ধ সূক্ষ্ম দৃষ্টি প্রভাবে—

“যস্মাৎ পরং নাপরমস্তি কিঞ্চিদ্

যস্মান্নানীয়ো ন জ্যায়োহস্তি কিঞ্চিৎ”

যাঁহা হইতে শ্রেষ্ঠ বা অশ্রেষ্ঠ আর কিছু নাই, যাঁহা হইতে ক্ষুদ্র বা মহৎ আর কিছু নাই—সেই চরমতত্ত্ব হৃদয়দেবতা পরম পুরুষকে দর্শন করিয়া কৃতার্থ হয়।

তাই শাস্ত্র বলিতেছেন অল্প বৃথা বাক্যের আলোচনা ছাড়িয়া দিয়া, অল্প বিষয় লোভ বিসর্জন দিয়া, অবহিত হইয়া সেই সত্যস্বরূপকে অবেষণ কর। তিনি আমার সব—

“তদ্বিষ্ণোঃ পরমং পদং সদা পশ্যন্তি সুরয়ঃ দিবীব চক্ষুরাততম্।

তদ্বিপ্রাসো বিপশ্যবো জাগৃবাংস সমিক্রতে বিষ্ণোঃ

পা মং পদং ॥”

বিস্ফারিত চক্ষু যেমন অনন্ত বিস্তৃত মহাশূন্যকে অবলোকন

করে, তদ্রূপ শ্রেষ্ঠ মনীষীরা সর্বব্যাপী ব্রহ্মের পরম পদ দর্শন করিয়া থাকেন।

এই পরমপদকে লাভ করিতেই হইবে, এই জীবনেই জানিয়া যাইতে হইবে—মনে এই দৃঢ় আকাঙ্ক্ষা জাগ্রত হওয়া চাই। তাহা হইলেই তাঁহাকে পাইবার পথ খুঁজিয়া পাইব।

যাঁহারা তাঁহাকে সত্যভাবে আকাঙ্ক্ষা করেন, যাঁহারা সেই পরমপদ লাভের একান্ত অভিনাবী—তাঁহারা সেই নিত্য সত্য পদার্থের জন্য অবিরাম জাগিয়া থাকিয়া তাঁহার অন্বেষণ করিবেন, এবং সেই ধীর বিবেকী পুরুষেরা ব্রহ্মের পরমপদ লাভে নিশ্চয়ই সমর্থ হইবেন।

অতএব “শ্রদ্ধাভক্তি ধ্যানযোগাদবেহি। ত্যাগেনৈকে
অমৃতকমানশুঃ ॥”

সেই পরম তত্ত্বকে শ্রদ্ধা, ভক্তি ও ধ্যানযোগ দ্বারা বিদিত হও। ত্যাগের দ্বারা, ভোগবাসনা ও বিষয় লাভের ছরাকাঙ্ক্ষা পরিত্যাগ করিয়াই সেই চিরবাহিত অমৃতত্বকে লাভ করা যায়। এইরূপে যে যত তাঁহার জন্য ব্যাকুল হইবে, যে যেরূপ তীব্র আগ্রহের সহিত তাঁহাকে অন্বেষণ করিবে—সে তাঁহার অবিরাম স্মৃতিকে মন মধ্যে জাগ্রত রাখিবার জন্য নিত্য প্রেমভক্তি, ধ্যান ও বিচার দ্বারা তাঁহাকে অবশ্যই এক দিন লাভ করিতে পারিবে—এ বিষয়ে অণুমাত্র সন্দেহের কারণ নাই।

ষষ্ঠ অধ্যায়

উপাসনা ও চিত্তশুদ্ধি

ইন্দ্রিয়গণকে সংযত করা, চিত্তকে বশীভূত করা অবশ্য খুব সহজ সাধন নহে। মনের প্রবল আগ্রহ ও চেষ্টা না থাকিলে ইহা হয় না। এরূপ সাধনে মন যে খুব উৎফুল্ল হইয়া উঠিবে এরূপ সম্ভাবনাও কম। কারণ চিত্ত স্বভাবতঃই সমগ্র দঃখের হেতু বিবয়লোলুপ এবং অত্যন্ত দৃঢ় ও চঞ্চল। ইহাকে চিত্ত বিক্ষেপ। বিষয় হইতে প্রত্যাহত করিয়া আত্মাভিমুখ করিবার চেষ্টাও ততোধিক শ্রম ও যত্ন সাধ্য। কিন্তু তবুও উপায় আছে। সেই উপায়ই হইতেছে—

“অভ্যাস”।

যদু স্তুরং যদু রাপং যদু র্গ যচ্চ হৃক্ষরং।

সর্ববস্ত তপস্যা সাধ্যং তপো হি হুরতিক্রমম্ ॥

যাহা কিছু ছস্তুর, যাহা কিছু ছপ্ৰাপ্য, যাহা কিছু ছর্গম এবং যাহা কিছু ছক্ষর—সমুদয়ই তপস্যাসাধ্য। তপস্যা বা প্রযত্ন দ্বারা, কোন কিছু অনায়ত্ব থাকিতে পারে না, কারণ তপস্যার ফল অমোঘ।

তপো বিদ্যা চ বিপ্রস্তু নিঃশ্রেয়সকরং পরম্।

তপসা কিঞ্চিৎ হস্তি বিদ্যামৃতমশ্নুতে ॥

তপস্যা এবং আত্মজ্ঞান ব্রাহ্মণের প্রধান মোক্ষসাধন।

তপস্যা দ্বারা পাপ নষ্ট হয় এবং আত্মজ্ঞান দ্বারা অমৃত লাভ করা যায়।

আমরা সাধ করিয়া যে শৃঙ্খল পায়ে জড়াইয়াছি, আজ তাহা হইতে মুক্তিলাভের ইচ্ছা করিলেই যে সহজে মুক্তিলাভ করিতে পারি—তাহা নহে। একমাত্র ভরসা সদভ্যাস। বীজে যেরূপ বৃক্ষ জন্মে, তদ্রূপ এই চিত্তে জগৎ জন্মগ্রহণ করিতেছে। সৃষ্টির যাবতীয় বস্তু, এবং মন যে সেই সকল বস্তুকে নিরন্তর মনন করিতেছে—তাহা সমস্তই চিত্তের কাৰ্য্য। সুতরাং চিত্তক্ষয়, না হইলে উপায়ান্তর নাই, সুতরাং সৰ্বপ্রথমে চিত্তের উপর জয়ী হইতে হইবে। এ সকল কথা পূর্বেও আলোচনা করিয়াছি। বিশিষ্টদেব বলিয়াছেন “এই দৃশ্যজগৎ সম্পূর্ণ মিথ্যা। অজ্ঞানগর্ভে গাঢ় সন্নিবিষ্ট চিত্তই এই মিথ্যাজগতের সত্যত্ব কল্পনা করে। যাবৎ পরম বস্তু দেখিতে পাওয়া না যায় তাবৎ জগতের অস্তিত্ব। পরম বস্তু অবলোকিত হইলেই ইহার বিনাশ হইয়া থাকে।”

এই চিত্ত যতদিন মৰ্কটের মত চঞ্চল হইয়া বিষয় হইতে বিষয়ান্তরে অবিরত ঘুরিয়া বেড়াইবে, ততদিন ইন্দ্রিয় সকলও সংযত হইবে না, অজ্ঞানাকারও বিদূরিত হইবে না, এবং যিনি পরম সত্য ও জ্ঞানস্বরূপ, এবং ঐ সুদীর্ঘ জীবন যাত্রার ধ্রুব-নক্ষত্রস্বরূপ তাঁহাকেও কিছুতেই বুঝা যাইবে না। সুতরাং সৰ্বপ্রথমে ও সৰ্বপ্রযত্নে চিত্তশুদ্ধির ব্যবস্থা করিতে হইবে। বিশিষ্ট বলিয়াছেন “মার্জনার দ্বারা মণির প্রভা যেমন প্রস্ফুটিত হয়, সংশয় ও উপাসনাদি উপায় সহায়ে চিত্ত শুদ্ধ হইলে, তাহাতে তেমনি সত্যের প্রভা সঞ্চারিত হইয়া থাকে। এই সত্যই

পরব্রহ্মের অধিষ্ঠান ও সাক্ষাৎ পরমপদ।” বাসনা ক্ষয়ই একমাত্র চিত্তশুদ্ধির কারণ। আমাদের যে ইন্দ্রিয়গুলি আছে তাহারা প্রতিনিয়ত বিষয় সকলকে (শব্দ, স্পর্শ, রূপ, রস, গন্ধ) স্পর্শ করে, এই স্পর্শ হইতে বিষয় জ্ঞান হয়। তাহা হইতে পুনঃ পুনঃ সেই বিষয় লাভে তৃষ্ণার উদয় হয়, এবং এই তৃষ্ণার জ্বালায় মানুষ দিবারাত্রি জ্বলিয়া পুড়িয়া মরে। সুতরাং যতক্ষণ বিষয় বাসনা ক্ষয় না হয় ততক্ষণ চিত্ত শুদ্ধ হয় না। এই অশুদ্ধ চিত্তই জন্ম, জরা, ব্যাধির আশ্রয়। কিন্তু এই সকলের মূলই হইল অবিজ্ঞা বা অজ্ঞান। এই অজ্ঞানে বিষয় সংস্কার বদ্ধমূল হয়। সুতরাং অবিজ্ঞা বা অজ্ঞান যদি নষ্ট হয় তবে সংস্কারও নিকর হয়, এবং সংস্কার নিকর হইলে সমস্ত দুঃখের নিলয় স্বরূপ চিত্তের বিলয় হয়। চিত্ত শুদ্ধ হইলে তাহাতে যে প্রবোধ সঞ্চার হয়, তৎপ্রভাবে অবিলম্বেই বিশুদ্ধ পরমাণু-জ্ঞানের উদয় হয়।

বিচার দ্বারা একদিকে বিষয়কে হেয় বোধ এবং সাধনাভ্যাস দ্বারা চিত্তকে স্থির করিবার প্রয়াস এই দুইটি চিত্তবিক্ষেপ নষ্ট চিত্তবিক্ষেপ নাশ করিবার প্রধান সাধনা। দৃঢ় হয় কিসে? ভাবনা ও একাগ্রতা অভ্যাস দ্বারা, এই চিত্তকে রোধ করিতে পারা যায়। চিত্তে যে বিষয়াসক্তি জন্মিয়াছে, তাহাও অভ্যাসেরই ফল। আবার সেই অভ্যাস হইতে মুক্তিলাভ করিতে হইলেও অভ্যাসেরই আশ্রয় গ্রহণ করিতে হইবে।

অভ্যাস বলিতে, যাহা তাহা অভ্যাসই চিত্তরোধের অনুকূল

নহে। বিষয়ের সহিত ইন্দ্রিয়ের সংযোগ সাধন বড় একটা অভ্যাস
 কি কি অভ্যাস করিতে কাহাকেও হয় না, তাহা প্রায় আপনা
 চিত্ত রোধের আপনাই হয়। কারণ ইন্দ্রিয় সকলের বহিমুখ
 অনুকূল? হইবার ও বিষয়াদির সহিত সংযুক্ত হইবার
 একটা স্বাভাবিক গতি বা প্রবণতা আছে।
 আবার বিষয় সকলেরও ইন্দ্রিয় নিচয়কে আকর্ষণ করিবার
 একটি বিশেষ সামর্থ্য আছে। সুতরাং দুর্গ রক্ষা করিতে
 হইলে দুর্গের সমস্ত ছিদ্র ও দুর্বল স্থানসমূহকে শত্রুর আক্রমণ
 হইতে রক্ষা করিবার জন্ত যেমন দুর্গকে অছিদ্র ও শক্তিসম্পন্ন
 করিয়া রাখিতে হয় এবং সঙ্গে সঙ্গে সেনাগুলিকেও সুশিক্ষিত
 করিয়া রাখিতে হয়, নচেৎ কিছুতেই দুর্গকে শত্রুকবল হইতে
 রক্ষা করা যায় না—তদ্রূপ বিষয়গুলির যে স্বাভাবিক আকর্ষণ
 আছে এবং ইন্দ্রিয় সকলেরও বিষয়ের প্রতি যে আন্তরিক
 লোলুপতা আছে—এই উভয়কেই বিমুখ করিয়া রাখিবার যে
 পন্থা তাহাই আমাদিগকে অবলম্বন করিতে হইবে। প্রথমটির
 জন্ত যোগাভ্যাস, উপাসনা, দ্বিতীয়টির জন্ত বিচার ও সংস্ক
 অবলম্বন করিতে হইবে। নচেৎ বহিঃশত্রু যাহারা আমাদিগকে
 বিপথে চালিত করিবার জন্ত পথের মাঝে থানা পাতিয়া বসিয়া
 আছে, তাহাদিগকে ঠেকাইয়া রাখা সহজ কথা হইবে না। যে
 শত্রুগুলির সঙ্গে আমাদের বিরোধ করিতে হইবে, তাহাদের
 বলাবল, শক্তি সামর্থ্য এবং ছিদ্রগুলির সম্বন্ধে বেশ অপ্রমত্ত
 ভাবে সন্ধান করা আবশ্যিক। পূজ্যপাদ বশিষ্ঠদেব এতৎ সম্বন্ধে
 যাহা উপদেশ করিয়াছেন তাহা এখানে বলিতেছি।

“বশিষ্ঠ কহিলেন, মন যে যে বিষয়ে ধাবমান হয়, সেই সেই
 বিষয়ের চিন্তা ত্যাগ করিলেই মনের ক্ষয় হইয়া থাকে। কল্পনাই
 মনের প্রাণ। সেই কল্পনা রোধ হইলে, মনের
 কল্পনাই মনের রোধ হইবে সন্দেহ নাই। বিদ্যাবলে বিবেক জন্মে,
 অধিষ্ঠান। বিবেকবলে বৈরাগ্য জন্মে, এবং বৈরাগ্যবলে
 চিন্তের স্বচ্ছতা সম্পন্ন হইয়া থাকে। তখন সংসার হয়ে ও মোক্ষই
 উপাদেয়, এই প্রকার বিচার প্রাপ্ত হইলে, চিন্তাবিকাশিনী
 সপ্তবিধ যোগভূমি আবির্ভূত হইয়া পরম পুরুষার্থ সাধন করে।”
 “জ্ঞানভূমি: শুভেচ্ছাখ্যা প্রথমা সমুদাহতা।
 সপ্তবিধ যোগভূমি বিচারণা দ্বিতীয়াস্তা তৃতীয়া তনুমানসা ॥
 (যোগবশিষ্ঠ।) সত্তাপত্তি চতুর্থীত্ততোহসংসক্তি নামিকা।
 পদার্থভাবনী ষষ্ঠী সপ্তমী তূর্যাগা গতিঃ ॥”

প্রথম ভূমি হইল “শুভেচ্ছা” বা শুভ বাসনা। দ্বিতীয় ভূমি
 হইল “বিচার”—তদ্বারা কি হয়ে কি উপাদেয় বুঝিয়া লওয়া।
 তৃতীয় ভূমি হইল “তনুমানসা”—মনের ক্ষীণতা অর্থাৎ সঙ্কল্প
 বিকল্প হ্রাস হইতে থাকা। চতুর্থ ভূমি হইল “সত্তাপত্তি” অর্থাৎ
 প্রলোভনের বিষয়ে বিরক্তি বশতঃ যে সময় মন ব্রহ্মতে স্থির
 হয়। পঞ্চম ভূমি “সংসক্তি” অর্থাৎ ব্রহ্মচিন্তা ব্যতীত অন্য কিছু
 চিন্তা করিতে না পারা। ষষ্ঠ ভূমি হইল “পদার্থভাবনী”—ব্রহ্মতে
 নির্বৃত্তি লাভ, (মোক্ষ শাস্তি সুখ), তখন ভিতরের ও বাহিরের
 পদার্থের চিন্তা দূর হইয়া যায়। এই সমস্ত চিন্তা দূর হইয়া গেলে
 যত্নপূর্বক যে প্রকৃত আত্মতত্ত্বের চিন্তা হয় তাহাই পদার্থ-
 ভাবনী। সপ্তম ভূমি—তুরীয় অর্থাৎ মুক্তি।

ইহার কারণ কি ?

“সংকল্প সংশয়বশাদ্গলিতে তু চিন্তে ।

সংসার মোহমিহিকা গলিতা ভবন্তি ॥

দৃষ্টাং বিভাতি শরদীব খমাগতায়ং ।

চিন্মাত্রমেকমজ্ঞমত্তমনস্ত মণ্ডঃ ॥” যোগবাশিষ্ঠ ।

জ্ঞানযোগের কথা বলিবার সময় এ বিষয় আরও বিস্তৃত
করিয়া বলিব ।

“আলোচ্য সর্বশাস্ত্রানি বিচার্ধেবং পুনঃ পুনঃ ।

ভগবৎপাদনা ।

ইদমেকং সুনিষ্পন্নং ধ্যেয়ো নারায়ণঃ সদা ॥”

সমস্ত শাস্ত্র আলোচনা ও পুনঃ পুনঃ বিচার করিয়া সাধুরা
ইহাই স্থির করিয়াছেন যে, নারায়ণকেই সর্বদা ধ্যান করিতে
হইবে । তাঁহারই পাদপদ্মে মনকে নিবিড় ভাবে লাগাইয়া রাখিতে
হইবে । যেন তাঁহাকে স্মরণ করিতে করিতে, মন নিষ্পন্দিত
হইয়া যাইতে পারে । বিষয়ের প্রতি বিষয়ীর, কামিনীর প্রতি
কামকের যেমন টান বা আকর্ষণ হইয়া থাকে, সেইরূপ আকর্ষণ
তাঁহাতে হওয়া চাই । ‘যা শ্রীতিরবিবেকানাং বিষয়েষেনপায়িনী’ ।
ঠিক ঐই রকমটি হওয়া চাই । কিন্তু এ তো হটক বলিলেই
আর হইবে না—সেই জন্তই তপস্যা বা উপাসনা করিবার
প্রয়োজনীয়তা আছে । প্রথমে দেখা যাক কেন ভগবানের প্রতি
আমাদের আকর্ষণ হয় না ? তাঁহার প্রতি আকর্ষণ আসে না
এই জন্ত যে, চিত্ত অশ্লের প্রতি আকৃষ্ট বলিয়া । সেই যে অশ্লের
প্রতি আকর্ষণ—পরের প্রতি প্রেম—ইহাতেই মনের পাতিব্রত

ধর্ম ফুল করিয়াছে । পুনশ্চ ইহাকে শোধন করিয়া লইতে
হইবে ; ছুঃখ দাবাগ্নির মধ্যে দগ্ন করিয়া, বিশুদ্ধ করিয়া লইতে

হইবে । যে শ্রীর পরপুরুষের প্রতি আকর্ষণ

সাধনার প্রথম

আছে তাহার নিজ পতির প্রতি আকর্ষণ অধিক

সোপান ।

থাকে না—সুতরাং যিনি আমার যথার্থ হৃদয়-

রাজ্যের রাজা—তাঁহার প্রতি আর আমার

স্বাভাবিক টান থাকিতে পারে না—কারণ বিষয়রূপ পতিকেই

এখন আমার মন বরণ করিয়া লইয়াছে । বিষয় হইতে বিমূখ

করিতে হইলে, বিষয়ের প্রতি যে ঐকান্তিক নিষ্ঠা, তাহা হইতে

মনকে সরাইয়া আনার চেষ্টাই হইবে সাধনার প্রথম সোপান ।

প্রথমে মূহুভাবে, তারপর খুব সজোরে তাহাকে টানিতে হইবে ।

ইহারই জন্ত একাগ্রতা অভ্যাসের প্রয়োজন । এজন্ত কি করা

কর্তব্য তাহাই এখানে একটু বিস্তৃত ভাবেই আলোচনা করিব ।

শাস্ত্রালোচনা, সাধুসঙ্গ ও বিবেক বিচারই মানুষের জ্ঞাননেত্র

উন্নীলিত করে । যতদিন জ্ঞানচক্ষু উন্নীলিত না হয়, যতদিন

বুদ্ধির জড়তা না ঘোচে, ততদিন শুভলাভেচ্ছ

উপাসনার

ব্যক্তিগণ, শুভকর্ম দ্বারা স্মৃতি সঞ্চয়ে

প্রয়োজনীয়তা ।

চেষ্টিত থাকিবেন । প্রতিদিন ভগবৎপূজাপা-

সনা, তন্নামকীর্তন, স্মরণ, বন্দন ও আত্ম-

নিবেদনাদি নিয়মনিচয় অনুসরণ করিতে করিতে চিত্তে অনুরাগের

সঞ্চার হয় ; প্রতিদিন নিয়মিতভাবে সন্ধ্যা পূজাদি মনঃসংযোগ

করিয়া করিলেই, বুদ্ধির জড়তা ক্রমশঃ হ্রাস হইয়া আসে এবং

চিত্ত নির্মল হয় । বিষয়-বাসনা বর্জিত নির্মল চিত্তেই ভগবানের

স্বরূপ উপলব্ধি হইতে পারে। বিষয় হইতে বিষয়ান্তরে ধাবিত, চকল চিন্তে, ভগবানের সচ্চিদানন্দস্বরূপ ফুটিয়া উঠিতে পারে না—সেই জন্ম স্থিরচিত্ত হইবার বিশেষ অনুকূল সাধনাদি অভ্যাস করা প্রয়োজন।

উপাসনার ফলে চিন্তে সত্ত্বগুণের আবির্ভাব হয়। সেই সত্ত্ব-গুণের উজ্জ্বল নিশ্চলালোকে অবিচার অনুজ্জ্বল যবনিকা অপসারিত হইয়া যায়—আত্মার স্বরূপ প্রকটিত হয়। যদিও ভগবান জীবমাত্রেরই অন্তরের অন্তরতম হইয়া রহিয়াছেন, স্থূলশূক্ষ্মাদিরূপে এই লোকচরাচরে ব্যাপ্ত হইয়া রহিয়াছেন, তথাপি এমনই অচিন্তনীয় মায়ার প্রভাব—যিনি আমাদের অতি নিকটে, যিনি আমাদের সকলের চেয়ে আপনার—তঁাহাকেই আমরা সর্বাপেক্ষা অধিক বিস্মৃত হইয়া আছি। শুধু তঁাহাকে বিস্মৃত হওয়া নহে পরমশক্তকে পরম মিত্র বলিয়া বুঝিয়া রাখিয়াছি। এই কপট মিত্রের কুহক জালে আমরা এতটাই বদ্ধ হইয়া পড়িয়াছি যে, যখন সেই চিরস্বহৃদ, আমাদের দিকে আহ্বান করেন, তখনও আমরা তঁাহার কথা গ্রাহ্য করি না। আমাদের এতটাই বুদ্ধিবিন্দ্রম তখন উপস্থিত হয় যে, আমরা মায়াজালে আবদ্ধ হইয়াছি কি না সে বিষয়েও সন্দেহ উপস্থিত হয়। সুতরাং তখন আমাদের প্রকৃত অবস্থা যে কি, তাহা পরীক্ষা করিয়া দেখা আবশ্যক হয়।

পরীক্ষা করিয়া দেখিতে গিয়াই কিন্তু কপট মিত্রের কপটতা আমরা বুঝিতে পারি। কিন্তু তাহাদের হাব ভাবে তখন এতই

বিবশ ও বিমুগ্ধ যে পুরোভাগে ব্যাধের বিস্তৃত বাণুরার পানে আমাদের লক্ষ্যই পড়ে না, সুতরাং তখনই তখনই তাহাদের সঙ্গ ত্যাগ করিয়া পলাইয়া আসিবার আবশ্যকতাও অনুভব করিতে পারি না। নিজের এই অবস্থাটি বুঝিয়া তাহার প্রতিকারের জন্মই উপাসনার প্রয়োজন হয়। যেমন নেশার ঘোর কাটাইতে হইলে তৎপ্রতিষেধক কোন পদার্থ সেবন করিতে হয়, নচেৎ ঘোর কাটে না, তদ্রূপ এই কাম মোহাদির চপলপ্রণয়-বিশ্রাস্ত চিত্তকে উপাসনা ব্যতীত প্রকৃতিস্থ করিয়া আনা সম্পূর্ণ অসম্ভব। এই উপাসনার প্রয়োজনীয়তা যঁাহারা স্বীকার করেন না, তাঁহাদের জন্ম দুঃখিত হওয়া ভিন্ন আর কি উপায় আছে? তাঁহাদের যুক্তি এই যে যদি ভগবান নিকটেই আছেন, তবে আমাদের বিপদই বা কেন হয় এবং তাঁহাকে উপাসনা করিয়া আহ্বান করিবারই বা কি প্রয়োজন? কেহ কেহ এরূপ তর্কও করেন যে, শাস্ত্রানুমোদিত নিয়ম, নিত্য-সাধন-প্রণালী, পূজা, জপ, হোমাদিতে সময় নষ্ট করা নিষ্প্রয়োজন। তাহা না করিয়া, দু এক মিনিট চক্ষু মুদিয়া বসিয়া থাকিলেই সাধন সম্পূর্ণ হইতে পারে, তজ্জন্ম কোন কষ্ট করিবার প্রয়োজন নাই, কোন গুরু কাড়িবারও দরকার নাই। কিন্তু যঁাহারা ভগবানকে হৃদয়ের সহিত চাহিয়াছিলেন এবং তাঁহাকে পাইয়াছিলেন, তাঁহারা বলিয়াছেন :—“কবীর হাসি খেলে যব-পিয়া মিলে তো কোন দুহাগিনী হোয়।” আমাদের শাস্ত্র বলেন :—

“গবাং সর্পি শরীরস্থং ন করোত্যঙ্গ পোষণম্।

নিঃসৃতং কৰ্মসংযুক্তং পুনস্তাসাং তর্দৌষধম্ ॥

এবং স হি শরীরস্থঃ সর্পিবেৎ পরমেশ্বরঃ ।

বিনা চোপাসনাদেব ন করোতি হিং নৃষু ॥”

“স্বত ছুকের মধ্যে থাকিয়া গাভীর দেহেই বর্তমান থাকে, তথাপি তাহাতে তাহাদের শরীর পুষ্ট হয় না ; কিন্তু ঐ ছুই যখন তাহাদের শরীর হইতে নিঃসৃত হইয়া পরে উপায়বিশেষ দ্বারা ঘূতাকারে পরিণত হয়, তখন তাহাই আবার গাভীর ঔষধরূপেও উপকার করিয়া থাকে, তদ্রূপ পরমেশ্বর সমস্ত দেহীর দেহে বিদ্যমান থাকিলেও উপাসনারূপ উপায় ব্যক্তিরেকে মনুষ্যের হিতসাধন করেন না”—ইহা হইতেই উপাসনার প্রয়োজনীয়তাকত অধিক তাহা বেশ বুঝিতে পারা যাইবে।

এই উপাসনার প্রণালী অধিকারীভেদে বিভিন্ন তাহা যথাকালে শ্রদ্ধালু শিষ্য গুরুপ্রযুক্ত অবগত হইবেন। আমরা যথাসাধ্য এখানে এবং পরবর্তী অধ্যায়গুলিতে এ বিষয় বিশেষ ভাবে আলোচনা করিব।

যিনি সাধক হইবেন, সাধনার প্রতি তাঁহার যথেষ্ট শ্রদ্ধা থাকা কর্তব্য এবং তাঁহার বিশ্বাস থাকা উচিত যে সাধনায় সফলতা লাভ হইবেই হইবে। এ বিশ্বাস যাহার না থাকে, তাঁহার সাধনায় দৃঢ়তা আসিতে পারে না ; এবং তিনি অগ্রসর হইতেও পারেন না ; পদে পদে কারণে ও অকারণে তাঁহার পদস্থলন ঘটে। অবিশ্বাসীর চিত্ত প্রত্যেক ঘটনাতেই বিচলিত হইয়া উঠে, সামান্য বিপদপাতেই সে দিশাহারা হইয়া যায়। তাহার সাধনা করিয়া শান্তিলাভ হয় না। কৃপণ সক্ষয় করিতে পারে,

কিন্তু দান করার যে সুমহৎ আশ্বপ্রসাদ—যাহা সক্ষয় অপেক্ষা বড় সাধনার লাভ বিষয় —তাহা সে উপলব্ধি করিতে পারে না। দানশীল সদাশয় পুরুষ সর্বদ্বন্দ্ব দান করিয়া রিক্তহস্তে যে লাভের মত লাভ আশ্বপ্রসাদ ভোগ করেন, সে আশ্বপ্রসাদের নহে। উহা ত্যাগ দ্বারাই লাভ। মূল্য কত তাহা কৃপণ যেমন বুঝিতে পারে

না, তদ্রূপ অজ্ঞিতেশ্বরীয় পুরুষ সাধনার জগু বিরাট ত্যাগে যে কি মহৎ লাভ, তাহা ধারণা করিতেই পারে না। কাজে কাজেই সে যখন তখন সুখ দুঃখের হিসাব করিয়া বেড়ায় এবং সাধনার সফলতাকে একটা পার্থিব বস্তু প্রাপ্তির মত মনে করিয়া আধ্যাত্মিকতাকে বৈষয়িকতায় দাঁড় করাইয়া বসে। এইজন্য বলিতেছি, যিনি সাধক হইবেন তাঁহাকে ‘তৃণাদপি সূনীচেন তরোরিব সহিষ্ণুনা’ হইয়া সাধন করিতে হইবে। সহস্র জন্মের জড়তা, অন্ধতা, অধৈর্য, অতৃপ্তি ও অশান্তির নিবিড় পঙ্ক হইতে আত্মাকে জাগাইয়া তুলিতে হইবে। কাম, ক্রোধ, লোভ, মোহের বিপুল উত্তেজনা ও নিরন্তর সংকোভের মধ্যে আত্মসম্বরণ করিতে হইবে, অত্যন্ত ধৈর্যশীল হইতে হইবে, এখনই কিছু হইল না বলিয়া হতাশে হাল ছাড়িয়া রণে ভঙ্গ দিলে চলিবে না। বালককে ঘুম পাড়াইয়া, মাতা যেমন সংসারের কাজ সারিয়া লন, তদ্রূপ অবোধ অশান্ত চিত্তবৃত্তিগুলিকে ঘুম পাড়াইয়া পরম সত্য পদার্থের অন্বেষণ করিতে হইবে। এমন ছুই এক দিন নয়, কত দিন ধরিয়া অবিচলিত ভাবে ঈশ্বরার্পিত-চিত্ত হইয়া এ পথে ধীরে ধীরে অগ্রসর হইতে হইবে। ভগবান গীতায় বলিয়াছেন, যাহারা

তৎপর, সংযতেন্দ্রিয় ও শ্রদ্ধাবান তাহারাই জ্ঞান লাভে সমর্থ হয়। ইহা কখনও লঘু বিষয় হইতে পারে না। এই সাধনার পন্থা বড়ই কষ্টকাকীর্ণ। ইচ্ছা করিলেই যে নির্বিবাদে লক্ষ্যস্থলে পৌঁছিতে পারিব—সে ভরসা নাই। কারণ জন্ম জন্মান্তরের সংস্কার পথ আগুলিয়া বসিয়া আছে। যে এই পথে চলিবে—তাহাকে কতবার উঠিতে পড়িতে হইবে তাহার সীমা সংখ্যা নাই। কোন গিরি বা পর্বতশিখরে আরোহণ করিবার সময় বড়ই ক্লেশ বোধ হয়, কিন্তু নামিয়া আসিবার সময় কোন ক্লেশ বোধ হয় না—তদ্রূপ জীবনে আমরা যেটুকু আধ্যাত্মিক উন্নতি করিয়া থাকি তাহার জঙ্কু যে বিপুল আয়াসের প্রয়োজন হয়, তাহার তুলনায় প্রবৃত্তির শ্রোতে গা ভাসান্ দেওয়া অনেক সোজা। এ পথ সহজ বলিয়াই এ পথে যাত্রীর সংখ্যা এত অগণ্য।

সত্যকে যাহারা সত্যরূপে পাইতে চায় এবং সত্যকে লাভ করাই সর্বাপেক্ষা বড় লাভ বলিয়া মনে করে, তাহার সত্যের কোন কষ্টকেই কষ্ট বলিয়া মনে করে না, অটল নিষ্ঠা দ্বারাই কোন পথকেই দুর্গম বা কোন লক্ষ্যকেই সত্যলাভ হয়। হুরধিগম্য বলিয়া মনে করে না—তাই সেই সকল সত্যনিষ্ঠ প্রেমিক ব্যক্তিগণ দিনের পর দিন, রাত্রির পর রাত্রি, মাসের পর মাস, বৎসরের পর বৎসর—বিপুল সাধনায় ব্যাপৃত থাকেন অথচ লক্ষ্যলাভ হইল না বলিয়া হতাশায় বসিয়া পড়েন না। সাধনার কোন কঠোরতাই তাঁহাদের চিত্তকে ক্লান্ত করিয়া তুলিতে পারে না। সাধন পথে চিত্তের এই অবস্থা সাধকের প্রধান সহায়। ইহা না থাকিলে অগ্রসর হওয়া সুদুষ্কর।

তাহার পর ধ্যাননিষ্ঠা। প্রতিদিন এই অশান্ত চিত্তকে শান্ত করিয়া আনিতে হইবে। ধীরে ধীরে ইহার চপলতার বেগকে হ্রাস করিয়া আনিতে হইবে। ক্রমে ক্রমে বহুদিকে, বহুবিধয়ে ছড়ানো

মনকে গুটাইয়া আত্মাতে প্রতিষ্ঠিত করিতে ধ্যাননিষ্ঠা বা হইবে। এজন্য বহুদিন, বহু সময় লাগিবে। চিত্তশাসন। বহু ধৈর্যের প্রয়োজন হইবে। বহুধা বিক্ষিপ্ত-

চিত্তকে একস্থানে ও একত্রে আনয়ন করা এক ভয়ঙ্কর ব্যাপার—অথচ তাহা না করিলেও উপায় নাই। ইন্দ্রিয় এবং ইন্দ্রিয় বিষয়ের প্রতি মন স্বভাবতঃই ধাবিত হয়, মনের চঞ্চলতার জগ্ৰহই ইন্দ্রিয়নিচয় চঞ্চল ও বিষয়লোলুপ হইয়া উঠে। মনকে থামাইলে ইন্দ্রিয়ের বিষয় গ্রহণে ক্ষান্ত হয়, আবার ইন্দ্রিয়ের বিষয় গ্রহণে ক্ষান্ত হইলে মন চাঞ্চল্য পরিহার করে। শরীরের পীড়ায় মন পীড়িত হয়, মনের পীড়ায় শরীর ক্লিষ্ট ও অবসন্ন হয়। এইরূপে মনে, প্রাণে, শরীরে, অঙ্গাঙ্গী ভাবে মিলিয়া আছে। সেই জগ্ৰহ মন প্রাণ ও শরীর এই তিনের ক্ষোভ একসঙ্গে নাশ করিবার সাধনাই হইল প্রকৃত সাধনা। ইহার জগ্ৰহ চিত্ত শাসন চাই। বিখ্যাত বাগ্মী ৩আচার্য্য কেশবচন্দ্র সেন বলিয়াছেন, উপাসনায় “একইরূপ মন থাকিবে, শরীর একাবস্থায় থাকিবে এরূপ সাধনা চাই। সমাহিত মন, সমচিত্ত, পরম সম্পত্তি, উহা উপার্জন করা সর্বপ্রথম কর্তব্য। সমচিত্ত না হইলে না উপাসনা হয়, না সংসার হয়।” সুতরাং একাগ্রতা অভ্যাস করিতে হইলে বা চিত্তকে ধ্যাননিষ্ঠ করিতে গেলেই আসন, প্রাণায়াম ও প্রত্যাহারের সোপানশ্রেণী বাহিয়া চলিতেই হইবে। এইজন্য যাজ্ঞবল্ক্য, পতঞ্জলি প্রমুখ

ঋষিগণ ইহার এত সমাদর করিয়াছেন। যথাস্থানে এ সম্বন্ধে শাস্ত্রোক্ত অভিমত উদ্ধৃত করিয়া দেখাইব। মনকে একাগ্র করিবার উপায়, ইত্যন্ততঃ প্রধাবিত চিত্তকে একটি লক্ষ্য স্থির করিয়া রাখা। অল্পে অল্পে নিরন্তর অভ্যাসের ফলে, সেই লক্ষ্যই মন বসিয়া যাইবে। তখন আর তাহার অধিক ঘুরিয়া বেড়াইবার প্রবৃত্তি থাকিবে না। সেই লক্ষ্যমুখে চলা বা লক্ষ্য স্থির করার নামই উপাসনা। অনেকে মনকে ঠিক বাঁধিতে পারেন না, এইজন্য ইহাকে বাঁধিয়া ফেলিবার উপায় প্রথমেই অন্বেষণ করিতে হইবে। আমাদের প্রাণ যাহাকে চায়, তাহার জগৎ প্রাণ সেখানে পড়িয়া থাকে। এইজন্য একটি প্রাণ বাঁধার সামগ্রী চাই, তাহা গুরু, দেবতা, আত্মা যে কোন একটিতে লাগাইতে পারিলেই কৃতার্থ হওয়া যায়। জনসাধারণের হিতের জগৎই ঋষিরা মূর্তিপূজা প্রতিষ্ঠিত করিয়াছিলেন। অনেকে ইহার প্রয়োজনীয়তা অস্বীকার করেন, কিন্তু যাঁহারা বাক্যের পণ্ডিত নহেন, পরন্তু কাজের লোক তাঁহারা ইহার প্রয়োজনীয়তা বিশেষভাবে অনুভব করিয়াছেন। আসলে মূর্তিপূজা। একটি কাঠের বা পাথরের বা ধাতুর স্থূলমূর্তি-বিশেষকে পূজা করাই উদ্দেশ্য নয়, ইহা সকলেই চিন্তা করিলে বুঝিতে পারেন। ইহাতেও সেই পরম পরাৎপর হৃদয়নাথকে দেখিবার চেষ্টাই লক্ষিত হয়। তবে সাধারণ মানুষ যা সম্মুখে বেশী দেখে, তাহার অতিরিক্ত কিছু ধ্যান করিতে তাহার অশুবিধা হয়। এমন কি নিরাকার উপাসনা করিতে গিয়াও কল্পনায় ঠাকুর আঁকিয়া লইতে হয়। আমাদের স্থূলেতে চিত্ত এত মগ্ন,—

যে তাহার অতিরিক্ত কিছু ভাবিতে গেলে চিত্ত হাঁপাইয়া উঠে।

স্থূল ইন্দ্রিয়গুলিই তো আমাদের যাবতীয় জ্ঞানের দ্বার। কিন্তু এই দ্বারগুলি হইতে যে জ্ঞান হয়, তাহা সূক্ষ্ম জ্ঞান নহে তাহা অনেকটা স্থূল ভাবাপন্ন। মনে কর, চক্ষুতে রূপ জ্ঞান হয় কিন্তু রূপ তো স্বয়ং ফুটিয়া উঠে না, কিছুকে অবলম্বন করিয়াই ফুটে, আমাদের স্থূল দৃষ্টির নিকট রূপ যাহাকে আশ্রয় করিয়া প্রকাশ পাইতেছে, সেই স্থূল আশ্রয়টিকেও রূপের সহিত এক করিয়া দেখার অভ্যাস গভীর ভাবে হৃদয়ে অঙ্কিত হইয়া আছে। সুতরাং রূপ দেখিব বলিলেই একটি আধারকে আগে লইতেই হয়। অবলম্বনশূন্য বিশিষ্ট জ্ঞান ফুটিতেই পারে না। যখন চক্ষুর ও মনের রূপ দেখিবার লালসা আছে—অথচ বাহ্যরূপে মুগ্ধ হইবার সঙ্গে সঙ্গে মন আরও বন্ধনযুক্ত হইয়া পড়ে—তাই তাহাকে শাস্ত্র বলিয়া দিলেন যদি অরূপকে ধারণা করিতে না পার, বা এরূপ অবস্থায় তাহাকে ভালবাসিতে না পার, তবে অরূপের রূপ কল্পনা করিয়া লও। সেই কল্পিত রূপেও যদি ঈশ্বরবুদ্ধি থাকে, তবে তাহাও বিমুক্তির কারণ হইবে। আর দৃষ্টি-ইচ্ছা হইতেই রূপের উৎপত্তি, এবং এ ইচ্ছা অনাদি কাল হইতেই আছে। তাই দেবতাদিগের বিশিষ্ট রূপগুলিও চিরকাল ব্যক্ত ও অব্যক্তের মাঝামাঝি থাকিয়া সাধকদিগের আনন্দ ও উৎসাহের সহায়তা করিতেছে। রূপকে একেবারে অস্বীকার করিতে পারি না বলিয়াই অরূপের মধ্যে রূপ খুঁজিয়া বেড়াই। ইহাই আমাদের চিত্তের চিরন্তন স্বভাব। প্রতিমাতে আমাদের রূপলালসা চরিতার্থ হয়, সেই জগৎই আমরা দেবতা প্রতিমা

গড়ি ও দেবমূর্তিতে আমাদের মত ইন্দ্রিয় ও অঙ্গ প্রত্যঙ্গের কল্পনা করিয়া থাকি। প্রিয়জনকে বা ভক্তির পাত্রকে স্পর্শ করিতে ও তাঁহার চরণ দুইটিতে মস্তক ঠেকাইতে ইচ্ছা করে। তাঁহার চরণরজঃ দ্বারা নিজ শরীরকে পবিত্র করিতে ইচ্ছা হয়, কখনও কখনও তাঁহার পাদপদ্মে পুষ্পাঞ্জলি দিয়া মনের ফোভ মিটাইতে ইচ্ছা হয়; কিন্তু যদি তাঁহার পা-ই না থাকে তবে মানুষের এ অন্তরের আশা মিটিবে কিরূপে? তাই তাঁহার পাদপদ্ম কল্পনা করিতে হয়, এবং তিনি যখন সর্বব্যাপী ও ভক্তবাহু-কল্পতরু, তখন ভক্তের কল্পিত মূর্তিতে তাঁহার প্রকাশ কিছুমাত্র অসম্ভবও নয়, অযৌক্তিকও নয়। সামনে মানুষের মত কিছু না দেখিলে যে তাঁহাকে কোন কথা বলিয়া সুখ হয় না! আমি কথা বলিব তিনি শুনিবেন ও উত্তর দিবেন, এ যে আমাদের প্রাণের গভীর আকাঙ্ক্ষা। তাহা মিটাইতে হইলে যে তাঁহাকে রূপ গ্রহণ করিতেই হইবে। এইজন্য সর্বদেশে ও সর্বকালে দেবতাদিগকে মানুষের মত চক্ষু কর্ণ পদাদি দ্বারা যুক্ত করিয়া দেখাইবার রীতি প্রসিদ্ধ আছে। সমাধি সাগরে একবার ডুবিয়া যাইতে না পারিলে বৃষ্টি এ রূপ-তৃষ্ণা কিছুতেই মিটে না। তাই নির্বিকল্প অবস্থা লাভের পূর্ব পর্য্যন্ত সকলেই এই অরূপের রূপকে কল্পনা করেন। অনেক উচ্চ শ্রেণীর ভক্ত জ্ঞানীও তাঁহাকে নিষ্কল, নির্মল, মন বাক্যের অগোচর জানিয়াও তাঁহার কমনীয় রূপ কল্পনা করিয়া তাঁহাতে মন প্রাণ অর্পণ করিয়া অপার আনন্দ সাগরে মগ্ন হন। প্রেমিক কবি বলিয়াছেন সমস্ত বিশ্ব ভুবন এত যে সুন্দর, সমস্ত প্রকৃতির মধ্যে এত যে রূপরশি ফুটিয়া

উঠিতেছে, আর এই সমস্ত রূপের যিনি প্রকাশক বা স্রষ্টা তাঁহার রূপ নাই, এও কখন সম্ভব হয়?

“রূপ লাগি আঁখি ঝরে গুণে মন ভোর।

প্রতি অঙ্গ লাগি কাঁদে প্রতি অঙ্গ মোর।”

তাই ভক্ত প্রেমিক প্রেমময়ের কত রূপ, কত অঙ্গসৌষ্ঠব, কত ভঙ্গিমাই কল্পনার চোখে দেখিয়া আনন্দে বিহ্বল হইয়া গিয়াছেন। বর্তমান যুগের জগৎ প্রসিদ্ধ কবিও গাহিয়াছেন “মম হৃদয় রক্ত রঞ্জনে, তব চরণ দিয়াছি রাঙিয়া”—এই যে চরণ কল্পনা, মানুষ না করিয়া থাকিতে পারে না! মাথা যে তাঁর চরণ-পদ্মে ঠেকাইতে চাই, সূতরাং চরণ কল্পনা না করিলে তাহা স্পর্শ করিব কিরূপে? এইরূপ যাঁহাকে ভালবাসি, তাঁহাকে আদর করিয়া কত কি খাওয়াইতে ইচ্ছা হয়, যদি তাঁর মুখ না থাকে তবে এ বাসনা চরিতার্থ হইবার উপায় কোথায়? ইহাকে বাল-চেষ্টা বলিতে হয় বলুন কিন্তু এ বালভাবেও কত যে নিরূপম আনন্দ আছে, তাহা ধারণা করা আমাদের পক্ষে কঠিন। অবশ্য শ্রেষ্ঠ জ্ঞানীরা এসব কল্পিত মূর্তির অপেক্ষা রাখেন না, তাঁহাদের ধ্যাননিমগ্ন চিত্ত অসীমের ধ্যানে বিভোর, তাঁহাদের কোন জাগতিক বস্তু দ্বারা তাঁহাকে পূজা করিবার প্রয়াস থাকে না, তাঁহারা দেহ, মন, প্রাণ, সব তাঁহাতে অর্পণ করিয়া পরম নিশ্চিত হইয়া যান। তাঁহারা বিশ্বমানবের মধ্যে এক অখণ্ড ভাবে উপলব্ধি করিয়া প্রতি জীবের আহার, বিহার ও তৃপ্তিতে তাঁহারই তৃপ্তি দেখিয়া পরম পুলকিত হ'ন।

তাঁহার স্থূল মূর্তি কল্পনা করিয়াও যে তাঁহার পূজা চলে এক

তাহাতে যে কোন দোষ স্পর্শে না ইহা ভারতবর্ষের প্রাচীন ঋষিরা প্রত্যক্ষ করিয়াছিলেন, তাই তাঁহারা ভক্তের হৃদয় মন্দিরের বাহিরেও সুরম্য দেউলের মধ্যে তাঁহার শ্রীমূর্তি প্রতিষ্ঠিত করিতে কোন সঙ্কেচ অনুভব করেন নাই। কারণ “যে তিনি অন্তরে সেই তিনি বাহিরে।” তাঁহার তো অন্তর বাহির নাই, আমরাই অজ্ঞান হেতু ভিতর বাহির কল্পনা করি। ভগবান ভক্তের চিরদিনের হৃদয়ের আশাগুলিকে এইরূপেই পূর্ণ করেন। এ বিশ্বরূপ তো তাঁহারই, তবে আর তাঁর রূপের অন্নতাই বা কি? যখন তাঁর পাদপদ্ম মনে মনে কল্পনা করিতেই হয়, তখন স্থূলধীদের জন্ম তাঁর স্থূলরূপ গড়িয়া তাদের চোখের তৃষ্ণা মিটাইলে ক্ষতি কি? পুত্রকে কেবল পুত্র বোধ হইলে সে স্নেহেতে মোহ আসে, কিন্তু পরমাশ্রমকে পুত্র রূপে কল্পনা করিতে গিয়া বাৎসল্য রসের অন্নতা হয় না, কিন্তু তাহাতে মোহ থাকে না। কারণ এ পুত্র যে আমার অঙ্গর অমর অবিনাশী। অথচ এই ভাবের দ্বারে মিলন বিয়োগ সব রসেরই অঙ্গশ্র ক্রীড়া চলিতে থাকে, তাহাতে মন পরমানন্দে মগ্ন হয় অথচ মোহবদ্ধ হয় না।

প্রতিদিন প্রিয় গুরুজনের চরণ বন্দন করিতে গিয়াও আমরা যে প্রভূত আনন্দ পাই তাহাও প্রকৃত সেই স্থূলমূর্তি হইতে নহে। তাঁহাদের চক্ষু, কর্ণ, অঙ্গ প্রত্যঙ্গাদির ভিতর দিয়া যিনি প্রকাশ পাইতেছেন, প্রকৃতপক্ষে আমরা তাঁহাকে দেখিয়াই সুখী হই। কিন্তু এই রূপ যাঁহার, সেই রূপবানকে তাঁহার রূপ হইতে পৃথক করিয়া ভাবিবার অভ্যাস নাই বলিয়া, স্থূল দেহের সহিত মিলিত করিয়া প্রিয়জনকে দেখিয়া থাকি। অবশ্য দেহের মধ্যে

চেতনা আছে বলিয়াই প্রকৃত আনন্দ সমৃদ্ধ ত হয়। এই খানেই বিচারের অভাবে দেহীর সহিত দেহকে গুলাইয়া ফেলি। পূর্বে বলিয়াছি আমরা স্থূল রূপ দেখায় এত অভ্যস্ত হইয়া আছি, যে মূর্তিকে ত্যাগ করিয়া অমূর্তিকে চিন্তা করিতে গিয়া হতাশ হইয়া পড়ি। মনে হয় ইহাকে আত্মনিবেদন করিলে বুঝি উনি জানিতে পারিবেন না, মনে হয় বাক্যদ্বারা কথা না কহিলে আমি শুনিতে পাইব না। এই গুলিই বুদ্ধির উপর সংস্কারের লেপ। ইহাই মূঢ়তা। যিনি আছেন বলিয়া কর্ণ শুনিতে পায়, চক্ষু দেখিতে পায়, মন মনন করিতে পারে, তিনি কেন আমার কথা শুনিতে পাইবেন না, এবং তিনি যাহা বলিবেন তাহাই বা আমি কেন না জানিতে পারিব না? যাহাই হউক সেই পরম পদার্থের ইহাও রূপ, এরূপ ধারণা অবিচল থাকিলে স্থূল মূর্তি ধ্যানের দোষ হয় না—ইহাই আমার বলিবার উদ্দেশ্য। ধ্যেয় বস্তু যাহাই হউক, চিন্তের তাহাতে ঈশ্বর বুদ্ধি থাকিলে এবং লক্ষ্যক বস্তুর প্রতি চিন্তের একতানতা ভাব বর্তমান থাকিলে কিছুই দোষের হইবে না। বরং এরূপ একটি মূর্তিবেশেবে শ্রদ্ধা স্থাপিত হইলে তাহাতে প্রেম ও আসক্তি বশতঃ ধ্যান নির্ভার উদয় হয়। তাহাতেও মন স্থির হয়। কারণ একটি বস্তুতে চিন্তের সমাধান হইলে চিন্তের অস্তিত্ব আর তখন থাকে না। এবং চিত্ত না থাকিলে চিদ্বস্তু ব্যতীত তখন আর কোন চিদ্বর্জিত স্বতন্ত্র পদার্থের অস্তিত্ব কিরূপে থাকিতে পারে? সুতরাং চিত্তই তখন নির্মল ব্রহ্মস্বরূপে বিলীন হইয়া ব্রহ্মই হইয়া যায়। সেই জন্ম মনুষ্য, মনুষ্যের

শরীরের বিশেষ বিশেষ স্থান, বক্ষ, প্রস্তর যে কোন একটি চিহ্ন লইয়া ধ্যান করিলেও দোষের হয় না। শাস্ত্রেও গুরুমূর্তি প্রভৃতিতে ধ্যান করিবার সেইজন্যই বিধান আছে। যোগ-দর্শনেও সমুচিত ভাবে ইহার প্রয়োজনীয়তা সমীক্ষিত হইয়াছে।

এই মূর্তি ধ্যানের কথা আমাদের শাস্ত্রে অনেক স্থলে বিশদ ভাবে উল্লিখিত আছে। আমাদের দেশের মূর্তিধ্যান কিরূপে গুরুরাও শিষ্যের নিকট দীক্ষার সময় এইরূপ করিতে হয়। কোন একটি মূর্তির ধ্যান, পূজা, জপের ব্যবস্থা করেন; উদ্দেশ্য—এই স্থূল ভাব হইতেই

জিজ্ঞাসু ভক্তিমান শিষ্য স্মৃষ্ণ হইতে স্মৃষ্ণতর ক্ষেত্রে বিচরণ করিতে পারিবেন। ইহা যেরূপ ভাবে করা উচিত তাহা শ্রীমদ্ভাগবতে ভগবান কপিল তাঁহার মাতা দেবহৃতিকে উপদেশ দিয়াছেন, এবং ভগবান শ্রীকৃষ্ণ মহাত্মা উদ্ধবকে যাহা বুঝাইয়াছিলেন, তাহাই পাঠকদিগকে পুনঃ পুনঃ আলোচনা করিতে অনুরোধ করি। আমি এখানে অতি সংক্ষেপে সেই সকল উপদেশের ছই একটি স্থান উদ্ধৃত করিয়া শ্রদ্ধালু পাঠকবর্গকে উপহার দিলাম। মহর্ষি কপিল বলিতেছেন—স্বীয় শক্তি অনুসারে স্বধর্ম্মাচরণ, দৈবলব্ধ বস্তুতে সন্তুষ্ট হওয়া, আত্মজ পুরুষের চরণসেবা, ধর্ম্ম অর্থ ও কাম হইতে নিবৃত্তি, মোক্ষধর্ম্মে অনুরাগ, পরিমিত পবিত্র ভোজন, নির্জন ও নিরুপদ্রব স্থানে অবস্থান, অহিংসা, সত্য, অচৌর্ধ্য, নিতান্ত আবশ্যকীয় বস্তুর অভিলাষ, ব্রহ্মচর্যা, তপস্যা, শৌচ, পরম পুরুষের পূজা, প্রাণবায়ুর বশীকরণ, মন দ্বারা ইন্দ্রিয়-গণকে বিষয় হইতে আকর্ষণ, প্রাণের সহিত মনের স্থিরীকরণ,

ভগবানের বিচিত্র লীলা কথন, এই সকল এবং অগ্ৰাণ্ড উপায় দ্বারা কুপথগামী হৃদয় মনকে অল্পে অল্পে যোগাভ্যাসে নিযুক্ত রাখিবে। পরে আসনাভ্যাস দ্বারা আসন জয় করিয়া, প্রাণ বায়ুর শোধন করিবে। যেন প্রাণ বায়ু স্থিরভাবে অবস্থিতি করে, চঞ্চল না হয়। স্বর্ণ যেমন অগ্নি সহযোগে নির্মল হয়, সেইরূপে শ্বাস জয় করিতে পারিলে শীঘ্রই মন নির্মল হইয়া থাকে। এইরূপে মন যখন উত্তমরূপে নির্মল এবং অতিশয় সুস্থির হইবে, তখন ভগবানের মূর্তি ধ্যান করিবে। প্রথমে একবার সমগ্রমূর্তিটি মনে করিয়া, তার পর তাঁর বিশেষ বিশেষ অঙ্গে চিত্তকে নিযুক্ত করিবে। প্রথমতঃ পাদপদ্ম হইতে সমগ্র জন্বা, উরু, বসন, নিতম্ব, নাভি, উদর, বক্ষঃস্থল, কণ্ঠদেশ, তদনন্তর বাহু, বাহুতে শোভিত বিবিধ ভূষণ ও অস্ত্র, পরে মুখকমল চিন্তা করিবে। তাঁহার মহাত্ম আশ্রয়ে যে তাপত্রয় নির্মূল হইতেছে, তাহা ভাবনা করিবে, এবং সক্রম দৃষ্টিপূর্ণ সুন্দর নয়ন চিন্তা করিবে। তখন কেবলমাত্র মুখ, নয়ন বা হৃদয় চিন্তা করিতে করিতে তাঁহাতে ভক্তির সহিত মন সমর্পণ করিবে, অথ কোন বস্তু দর্শন বা মনন করিবে না। এইরূপ ধ্যানে ধ্যেয়-বস্তুর প্রতি প্রেমের সঞ্চার হয়। চিত্তকে এইরূপ বিষয়শূন্য ও নিরাশ্রয় করিবার চেষ্টা হইতেই বিষয়ে বিরক্তি ঘটে, এই অবস্থায় দেহাদি বিষ্মরণ হওয়ায় ধ্যানকর্তা অথও পরমাত্মস্বরূপকে দর্শন করেন। এইরূপে ভক্তসাধক সর্বভূতে আত্মাকে, এবং আত্মাতে সমস্ত ভূত অবস্থিত বলিয়া জানিতে পারেন। ভগবান নারদ বসুদেবকে স্তনাইয়াছিলেন :—“হরি বাঁহার হৃদয়ে প্রেম

রজ্জুদ্বারা বদ্ধ থাকেন তিনিই ভাগবতপ্রধান। মঙ্গলেচ্ছূর্ণ শব্দব্রহ্মের পারগত ও পরব্রহ্মে বিলীন যে শাস্তিময় গুরু তাঁহাকে আশ্রয় করিবেন। গুরুকেই আত্মা ও সর্বদেবতা জ্ঞান করিয়া অকাপট্য ও সেবা দ্বারা তাঁহার নিকটে ভাগবত ধর্ম শিক্ষা করিবেন। প্রথমতঃ যাহা শিক্ষা করিতে হইবে, তাহা এইঃ—সকল বিষয় হইতে মনকে নিবৃত্ত করা, যথোচিতরূপে প্রাণিগণে দয়া, মিত্রতা, বিনয়, বাহু ও আভ্যন্তরিক শৌচ, নিজধর্মাচার, ক্ষমা, বৃথাবাক্য পরিহার, স্বাধায়, সরলতা, ব্রহ্মচর্যা, অহিংসা, সুখদুঃখ শীত গ্রীষ্মাদি দ্বন্দ্ব সমতা, সকল পদার্থে আত্মা ও ঈশ্বর জ্ঞান, একরূপ চরিত্রতা, গৃহাদিতে নিরভিমানতা, সর্বাবস্থাতে সন্তোষ, হরিগুণ গান ও শ্রবণ, কীর্তন ও ধ্যান, হরির উদ্দেশে সকল কর্ম করা, দান, তপস্যা, জপ, আত্মপ্রিয় গৃহ ও প্রাণ পরমেশ্বরকে সমর্পণ, ভগবন্তজগণের পূজা, পরস্পরের নিকট ভগবদ্ যশ কথন, আত্মার সুখ দুঃখ নিবৃত্তি করা এবং পরস্পরে ছুরিতাপহ হরিকে স্মরণ করিয়া ও স্মরণ করাইয়া ভক্তিসাধন করিতে হইবে।

ভগবান উক্তবকে কহিলেন, 'শ্রদ্ধাই' ভক্তি, ভক্তিতেই আমাকে পাওয়া যায়। মদ্বিষয়া ভক্তি চণ্ডালকেও পবিত্র করে। সত্য ও দয়া সংযুক্ত ধর্ম বা তপস্যাবুক্ত বিদ্যা ঈশ্বরভক্তিহীন আত্মাকে পরিশোভিত করিতে পারে না। ভক্তি ভিন্ন চিত্ত শুদ্ধ হয় না। মদীয় ভক্তিযোগে আত্মা কর্মবাসনা সকল পরিত্যাগ করিয়া মৎস্বরূপতা লাভ করে। মদীয় পুণ্যময় কথা শ্রবণ ও কীর্তন করিয়া আত্মা পবিত্র হয় এবং সূক্ষ্ম সূক্ষ্ম বস্তুসকল দর্শন

করে। যিনি বিষয় সকল চিন্তা করেন, তাঁহার আত্মা বিষয়ে নিবিষ্ট হয়, যিনি আমাকে চিন্তা করেন, তাঁহার আমাতেই নিবিষ্ট হয়। সুতরাং স্বপ্নতুল্য অসৎ চিন্তা সকল পরিত্যাগ করিয়া ভক্তিপূর্ণ মনকে আমাতেই সমর্পণ করিবে। ধীরগণ কামিনীগণের ও কামিনীসঙ্গীদিগের সঙ্গ পরিত্যাগ করিয়া নির্জন ভয়শূন্য প্রদেশে উপবেশন করতঃ নিরলস হইয়া আমাকে চিন্তা করিবেন। ধীরগণ কামিনীর সঙ্গ হেতু যেরূপ কষ্ট ভোগ করেন অথ আন কিছুতেই সেরূপ কষ্টভোগ করেন না।

মুমুকুরা কিরূপে তোমার ধ্যান করে, উক্তবের এই প্রশ্নের উত্তরে ভগবান কহিলেন “না উচ্চ, না নিম্ন আসনে, ঋজু শরীরে সুখে উপবেশন পূর্বক হস্তদ্বয় ক্রোড়ে রাখিয়া নাসিকার অগ্রভাগে দৃষ্টি নিক্ষেপ করতঃ প্রাণায়ামের দ্বারা প্রাণ বায়ুর পথ শুদ্ধ করিবে; এবং ইন্দ্রিয়গণকে নিজ নিজ বিষয় সকল হইতে আকর্ষণ করতঃ ক্রমে ক্রমে বিপর্যয় ক্রম অভ্যাস করিবে। পরে যাহার নাল উর্দ্ধে এবং মুখ অধোদিকে, অন্তঃস্থ সেই হৃৎপদ্মকে উর্দ্ধমুখ, প্রস্ফুটিত, অষ্টপত্রবিশিষ্ট এবং কর্ণিকা সহিত এইরূপ ভাবনা করিয়া কর্ণিকাতে পর পর সূর্য্য, চন্দ্র ও অগ্নিকে চিন্তা করিবে, এবং সেই অগ্নির মধ্যে আমার রূপ, মনোহর অবয়ব সম্পন্ন প্রশান্ত সুন্দর মুখ, সুদীর্ঘ মনোরম চতুর্ভূজ, সুন্দর হস্ত, কর্ণে মকর কুণ্ডল, পীতবস্ত্র পরিধান, মেঘের স্থায় শ্যামবর্ণ, বনমালা বিভূষিত, শঙ্খচক্রগদাপদ্মধারী, পদদ্বয়ে নূপুর, বক্ষে কৌস্তুভ, প্রভাশালী উজ্জ্বল কিরীট, সর্বাঙ্গসুন্দর, মনোহর এবং প্রসন্নতা হেতু মুখ ও নয়ন বিকশিত, এইরূপ সর্বদে

মনোনিবেশ পূর্বক তাহা ধ্যান করিবে। ধীরগণ মনদ্বারা স্ব স্ব বিষয় হইতে ইন্দ্রিয়গণকে আকর্ষণ করতঃ বুদ্ধির সাহায্যে মনকে সর্বতোভাবে আমাতে অভিনিবিষ্ট করিবে। সর্বব্যাপক চিন্তকে আকর্ষণ করিয়া একদেশে স্থাপন করিবে, অন্যান্য অঙ্গ চিন্তা করিবে না। কেবলমাত্র সুন্দর হাশ্ব সমন্বিত মুখই চিন্তা করিবে। চিন্তা তথায় স্থান লাভ করিলে পরে তাহাকে তথা হইতে আকর্ষণ করিয়া সর্বকারণ স্বরূপ আকাশে ধারণ করিবে। পরে তথা হইতে আকর্ষণ করিয়া কেবল ব্রহ্মস্বরূপ আমাতে নিবিষ্ট করিয়া ধ্যান ও ধ্যেয় এই ভেদ চিন্তা করিবে না। এই প্রকারে চিন্তধারণ করিলে আত্মাতে আমাকে এবং আমাকে আত্মাকে দর্শন করিবে।”

সাধন-ক্ষেত্রে নিয়মানুবর্তিতা একান্ত আবশ্যক, ইহার ব্যতিক্রমে সফলতা লাভ হওয়া নিতান্তই নিয়মানুবর্তিতা। অসম্ভব। আহারে, বিহারে, শয়নে, ভোজনে, এমন কি সাধনার সময়, স্থানের ও আসনের পর্যন্ত নিয়ম রক্ষা করিয়া চলিতে হইবে। এক কথায় মনকে খেলাল মত চলিতে দিলে চলিবে না। সারথি যেমন ছুঁষ্ট অশ্বকে সংযত করিয়া রাখে, তদ্রূপ মনকে সংযত করিয়া রাখিতে হইবে। অভিজ্ঞ ব্যক্তি মাত্রেই এ বিষয়ের প্রয়োজনীয়তা স্বীকার করিবেন। এ স্থলে বর্তমান যুগের একজন শ্রেষ্ঠ সাধক শ্রদ্ধাম্পদ ৩কেশবচন্দ্র সেন মহাশয়ের উপদেশ উদ্ধৃত করিলাম।

“সাধকের জ্ঞান যে স্থান স্থির করা হয়, যতদূর সম্ভব সেই স্থানই অবলম্বনীয়। কতকগুলি বিষয় এমন আছে

যাহার স্থলনে পবিত্রতার ব্যাঘাত হয় না, কিন্তু সাধনের ব্যাঘাত হয়। স্থান সম্বন্ধে এই জ্ঞান বলা যাইতে পারে, * * * * * যে ঘরে উপাসনা করিবে সে ঘর এবং সেই ঘরের যেস্থানে পূজা করিয়া থাক সেই স্থান ও সেই দিক স্থির রাখিয়া প্রতিদিন নির্দিষ্ট স্থানে উপাসনা করা বিধেয়। * * * * * স্থানে ধর্ম বদ্ধ নহে ইহা ঠিক কথা, কিন্তু স্থান সম্বন্ধে স্বেচ্ছাচারী হওয়া উচিত নয়। * * * * * এরূপ সাধনে মনের সংযম, মনের উপর কর্তৃত্ব সংস্থাপনরূপ সুফল ফলিবে। পরিবর্তনে আশু উপকার হইতে পারে বটে, কিন্তু যত পরিবর্তন করিবে তার সঙ্গে সঙ্গে মনের পরিবর্তন হইবে, কিন্তু স্থির রাখিলে তাহার সঙ্গে সঙ্গে মনের দৃঢ়তা হয়। আসন সম্বন্ধেও এইরূপ। * * * * * উপবেশন সম্বন্ধে শরীরের স্থিরতা আবশ্যক। সাধন আরম্ভে এ নিয়মে বিশেষ আবদ্ধ থাকা উচিত। বারংবার হস্ত চালনা, নানাপ্রকার ভাবভঙ্গী, চক্ষুঃস্মীলন, নিমীলন, দিক পরিবর্তন অনেকে সামান্য মনে করেন, কিন্তু শৈর্ষ্যসাধনে এ সকল একান্ত পরিহার্য। আত্মসংযম শরীর সংযমের সঙ্গে সম্বন্ধ। শরীর স্থির হইলে মহৎ বিষয়েও মন স্থির হয়।”

সাধনার যে প্রণালী গ্রহণ করা হইয়াছে তাহা সদা সর্বদা পরিবর্তন করা অত্যন্ত স্বেচ্ছাচারিতা। তাহা সাধনার প্রণালী সর্বথা পরিত্যজ্য। একই প্রণালী মতে একরূপ থাকা সাধনা করিয়া যাইতে হইবে। বহু দিন আবশ্যক। নিয়মিত ভাবে সাধন করিয়াও যদি কোন ফল না পাও তবে তাহা ছাড়িয়া দিতে পার, কিন্তু তাহাও খুব

বিচার পূর্বক করিবে। এ সাধনা আমার ভাল লাগিল না বলিয়া যে আমার খুসিমত ছাড়িয়া দিতে হইবে তাহা নহে। সমস্ত সাধনাই জ্ঞানলাভের অনুকূল, সুতরাং লোভাতুর চিত্তে পুনঃ পুনঃ সাধন প্রণালী পরিবর্তন করিলে চিত্তের স্বৈর্য্য ও দৃঢ়তা নষ্ট হয়, এবং কোন ফল লাভ হয় না। একরূপ চঞ্চল ব্যক্তি কখনই যোগবল লাভ করিতে পারে না।

সাধনার স্থান খুব বিবিধ (নির্জন ও চিত্তপ্রসাদকর) হওয়া উচিত। যেখানে বিক্ষেপ ঘটবার সম্ভাবনা অধিক, তাদৃশ স্থান সর্ব্বথা পরিত্যজ্য। দরিদ্র গৃহস্থ যিনি, তাঁহাকে গৃহের মধ্যেই স্থান করিয়া লইতে হইবে। তবে তাঁহার পক্ষেও এই নিয়ম থাকা আবশ্যক যে তিনি বৎসরান্তে ২।১ মাস সাধনার স্থান অন্ততঃ ১৫ দিন যেন পরিচিত গৃহ, পরিজন হইতে দূরে সরিয়া গিয়া কোন নির্জন বিশ্ব-শূণ্য স্থানে গিয়া সাধনাদি করেন। মধ্যে মধ্যে একরূপ ছুটিয়া বাহির হইয়া না পড়িলে সংসারের আওতায়, চিত্তের কোমলতা ও দৃঢ়তার যে ক্ষতি হয় তাহা আর পূরণ হইতে পায় না। এজন্য নির্জনবাস সাধকজীবনের পক্ষে একান্তই প্রয়োজনীয়। সাধনার জন্ম যে স্থানটি নির্ণয় করিবে, তাহা যেন বন্ধুর অর্থাৎ অসমতল না হয়। “চেলাজিনকুশোত্তরম্” অর্থাৎ প্রথমে কুশাসন, তারপর যুগচর্ম্ম, তত্পরি বস্ত্র পাতিয়া সাধনাভ্যাস করিবে। নিজের পূজার আসনে যাহাকে তাহাকে বসিতে দিবে না। সাধনার স্থানে বসিয়া কোন অসৎসঙ্কল্প বা বিষয় চিন্তা করিবে না। ইহাতে স্থানের পবিত্রতার হানি হয়। সমর্থ হইলে

সাধনার স্থানটি ধূপ চন্দনাদির দ্বারা সুরভিমোদিত করিয়া লইবে। অন্ততঃ সে স্থানটিতে ভূর্গন্ধ না থাকে, এবং বেশ সুপরিচ্ছন্ন হয়। কুচিন্তা-উদ্দীপক কোন চিত্র বা দৃশ্যাদি না থাকে এ বিষয়ে বিশেষ সতর্কতা অবলম্বন করা উচিত। সাধন গৃহটিতে বিশুদ্ধ বায়ু চলাচল করিতে পারে এবং সূর্যালোকের অবাধ গতির ব্যাঘাত না জন্মে এইরূপ হইলেই ভাল হয়।

সূর্যোদয়ের আড়াই দণ্ড বা একঘণ্টা অন্ততঃ আগে উঠিয়া শৌচাদি সমাপনান্তে, রাত্রিবাস ত্যাগ করিয়া, অসুবিধা না হইলে তখনই স্নান করিয়া সন্ধ্যোপাসনা সাধনার সময়। জন্ম সংযতবাক হইয়া আসনে উপবেশন করিবে। সূর্যোদয়ের পরও আড়াই দণ্ড কাল পর্য্যন্ত—প্রাণায়াম, জপাদি সাধন করিবে। যিনি অসমর্থ হইবেন তিনি অন্ততঃ সূর্যোদয়ের একদণ্ড (২৫ মিনিট) আগে আসনে বসিবেন ও সূর্যোদয়ের পরও একদণ্ড কাল জপাদি সাধনা করিবেন। মধ্যাহ্ন ও সায়ংকালেও এইরূপ। মধ্যাহ্ন কালের বিশেষত্ব এই যে সে সময় সন্ধ্যাদি সমাপনান্তে তর্পণাদি করা আবশ্যক।

যিনি যত অধিক ইহাতে সময় দিবেন এবং মনঃ সংযোগ পূর্বক শ্রদ্ধালুচিত্তে সাধনায় প্রবৃত্ত হইবেন, তিনি তত শীঘ্র সাধনসম্বৃত্ত শান্তি লাভে সমর্থ হইবেন। সাধনায় প্রবেশের অভাব, শৈথিল্য বা আলস্য সাধনসিদ্ধির সমূহ বিঘ্নকর। সাধনায় তীব্র বেগ থাকিলে তবে সাধকের সিদ্ধিলাভ সুকর হয়। প্রথমশ্রেণীর সাধক ছয় হইতে নয় ঘণ্টা পর্য্যন্ত সাধনা

করিয়াও ক্লান্ত হ'ন না। দ্বিতীয় শ্রেণীর অভ্যাসী অন্ততঃ পাঁচ ছয় ঘণ্টাকাল সাধনাভ্যাসে প্রযত্ন করিবেন। তৃতীয় শ্রেণীর অভ্যাসীর সাধনকাল অন্ততঃ তিন চারি ঘণ্টা হওয়া উচিত।

সাধক মাত্রেই অন্ততঃ দুই, আড়াই ঘণ্টাকাল সাধনায় দিবেন, নচেৎ বিশেষ কিছুই অনুভব করিতে পারিবেন না। নামে মাত্র এক আধ ঘণ্টা সাধনে কিছুই হইবার নহে। তবে একেবারে না বসার অপেক্ষা অল্পক্ষণ করিয়া বসাত্ত ভাল। তাহাতেও কিছু উপকার অবশ্যই হইবে। রাত্রির শেষ প্রহরটি (তিনঘণ্টা) সাধনার জন্য রাখিতে পারিলে অত্যন্তম হয়, অন্ততঃ সূর্যোদয়ের আগেই আসনে বসা উচিত। ওদিকেও সূর্যাস্তকাল হইতে অন্ততঃ অর্ধপ্রহর (দেড় ঘণ্টা) কাল সাধনায় দিতে পারিলে ভাল হয়। এই সময়ের কতকাংশ ধ্যান, কতকাংশ জপে, কতকাংশ অর্চনা ও অধ্যয়নাদিতে দিতে হইবে। সাধক আপন অবস্থার উন্নতির সহিত এই সকল সময় বিভাগ আপনার সুবিধামত স্থির করিয়া লইতে পারিবেন। প্রয়োজন হইলে গুরুর আদেশ গ্রহণ করিয়া তদনুযায়ী প্রযত্ন করিবেন।

চিত্তের চাকল্য উপস্থিত না হয় এজন্য যম, নিয়ম, আসন অভ্যাসে মনোযোগী হইতে হইবে। সাধন সাধনায় সংযম ও প্রত্যহ অল্প পরিমাণে হইলেও, প্রত্যহ নিয়ম বিকল্প চিন্তার করিয়া সাধন করিবে। যে সময় চিত্তকে পরিহার। নির্বিষয় করিবার চেষ্টা করিতেছে, সে সময়ে যদি শুভ চিন্তাও চিত্তে উদ্ভিত হয় তাহাও পরিত্যজ্য। সে সময় চিন্তামাত্রকেই শক্র মনে করিতে হইবে।

কোন দিন অল্পক্ষণ, কোন দিন বহুক্ষণ, কোন দিন হইলই না—এরূপ ভাবে সাধনা করা স্বেচ্ছাচার, তাহাতে কোন উপকার হয় না। বরং প্রতিদিন যথাসময়ে, যথাস্থানে দশ মিনিটকাল সাধনা করা ভাল, তথাপি মনের খেয়ালমত কোনদিন তিনঘণ্টা, কোনদিন আধঘণ্টা, কোনদিন পাঁচ মিনিট, কোনদিন কিছুই নয় এরূপ ভাবে সাধনা করা অন্তায়। ইহাতে কোন ফল হয় না। যদি অবসর না থাকে, অত্যল্প কালের জন্য ও ঠিক সময়ে বসা চাই। প্রতিদিন অথবা এক এক সপ্তাহ পরে বা পক্ষান্তর পরে পরে ৫৬ মিনিট করিয়া সাধনার কাল বৃদ্ধি করা ভাল, কিন্তু যেটুকু বাড়াইবে সেটুকু বরাবর ঠিক রাখিবে। নচেৎ উন্নতি বৃদ্ধিতে পারিবে না। চিত্তকে চিন্তাশূন্য করিবার চেষ্টা বা দৃষ্টিকে স্থির করিবার চেষ্টা প্রতিদিন নিয়মিত কাল ধরিয়া অভ্যাস করিলে অগ্রসর হওয়া যাইতেছে কিনা সহজেই বৃদ্ধিতে পারা যায়।

প্রতিদিন শাস্ত্রগ্রন্থ অধ্যয়ন করা কর্তব্য। কিন্তু শুধু শাস্ত্রাধ্যয়ন করিলে কোন ফল লাভ হয় না। শাস্ত্রাধ্যয়ন করিয়া সাধন করিতে হইবে, নচেৎ কেবল অধ্যয়ন ও শ্রবণ দ্বারা বিশেষ সুফল পাওয়া যায় না। শাস্ত্রাদি পাঠ করিয়া যাহার চিত্ত ব্রহ্মানুসন্ধানে সচেষ্টি ও ব্যাকুল না হয়, তাহার শাস্ত্রপাঠ বৃথা হয়। ভাগবতে আছে “শব্দ ব্রহ্মণি নিষ্কাতঃ ন নিষ্কারাৎ পরে যদি। শ্রমঃ তস্য শ্রমফলম্ হৃদেবুন্মিব রক্ষতঃ”। যিনি শব্দব্রহ্মে অভিজ্ঞ গর্থাৎ শাস্ত্রজ্ঞ, কিন্তু শাস্ত্রের উপদিষ্ট বিষয়ে নিষ্ঠ নহেন, তিনি অধ্যয়নাদি দ্বারা শব্দ ব্রহ্মের পারে যাইয়াও যদি ভগবদধ্যয়নভক্তিবিহীন হ'ন তবে তাহার শাস্ত্রপাঠ শ্রম

নাত্র সার হয়, যেরূপ বন্ধ্যাগাভীরক্ষকের বৃথা শ্রম হয়—
অর্থাৎ ছন্দাদিলাভে বঞ্চিত থাকে। এ সম্বন্ধেও নিয়ম রক্ষা
বাঞ্ছনীয়। কিন্তু যেটুকু পড়িবে সে সম্বন্ধে পুনঃ পুনঃ অভিনিবেশ
সহকারে চিন্তা করিবে। ভগবদ্গীতা, তাহার করুণা বা তাহার
মহিমার কথা অথবা কোন জ্ঞানের কথা
সদগ্রন্থ অধ্যয়ন,
স্তোত্রগীতাदि।
বা কোন সংযমের কথা যখন যাহা পড়িবে
তাহা বেশ চিন্তা করিয়া পড়িবে। ইহাতেও
চিন্তা স্থির হয়। যখন যাহা পড়িতেছ বা চিন্তা করিতেছ
তদব্যতীত কোন চিন্তা আসিতে দিবে না। শ্রদ্ধালুচিত্তে শাস্ত্রগ্রন্থ
অধ্যয়ন করিলে, তাহার মর্ম্মকথা আপনা আপনি উপলব্ধি হইতে
থাকিবে। শ্রদ্ধার সহিত শাস্ত্র পড়িতে পড়িতে সংশয় নিরাস
হয়, হৃদয় আনন্দে পরিপ্লুত হয়। গীতা হউক, ভাগবত হউক,
উপনিষদ হউক,—কোন একটি গ্রন্থের কোন একটি শ্লোককে
(যাহাতে চিত্তকে সরস ও সবল করে) পুনঃ পুনঃ স্মরণ
চিন্তন ও তাহার ভাবকে নিবিড়ভাবে গ্রহণ করিবার চেষ্টা
করিবে। একটি শ্লোককে আয়ত্ত করিয়া যদি সম্ভব হয় পুনশ্চ
আর একটি শ্লোক দেখিবে। রাশি রাশি গ্রন্থ বৃথা পড়িয়া লাভ
নাই। একটি গ্রন্থের একটি শ্লোক মত চলিতে পারিলেও
জীবন ধন্য ও কৃতার্থ হয়। স্তোত্রগুলি অতি যত্নে, ভক্তির
সহিত আবৃত্তি করিবে। ইহাতে মন প্রফুল্ল হয় এবং চিত্ত
ভক্তিরসে আপ্লুত হয়। পূজাদি সমাপনান্তে বা সাধনাদি শেষ
করিয়া, তবে এই সকল স্তোত্রাদি পাঠ করা উচিত। ভগবৎ
সঙ্গীতও উপাসনার পর বিশেষ ফলপ্রদ।

শাস্ত্রাদি পাঠের ফলই হইল এই যে ভাগবতী কথা শুনিতে
শাস্ত্রগ্রন্থ ও
ভগবদ্ভজনা
শুনিতে চিত্ত ভগবানের প্রতি শ্রদ্ধালু হয় ও
লুক্ক হয়। এইরূপ শ্রদ্ধালু চিত্তে ভগবদ্
ভজন করিতে, করিতে, করিতে, ভগবদ্ভক্তি
লাভে জীব কৃতার্থ হইয়া যায়। ইহাই যথার্থ পরম ধর্ম্ম।
ধর্ম্মের পৃথক পৃথক অঙ্গাদি অনুষ্ঠানের ইহাই সাক্ষাৎ ফল।

‘স বৈ পুংসাং পরো ধর্ম্মো যতো ভক্তিরধোক্ষজে ॥’

কাম্যফল বা ভোগাদি ঐশ্বর্য্য লাভের জন্তু ধর্ম্ম অনুষ্ঠেয়
নহে। ধর্ম্মানুষ্ঠান দ্বারা জীব তত্ত্বজিজ্ঞাসু হয়, এবং তত্ত্ব
জিজ্ঞাসার উদয় না হইলে ভগবদ্স্বরূপ অপরিজ্ঞাতই থাকে,
এবং পুনঃ পুনঃ জন্ম মরণের মহাক্রেশ হইতে নিষ্কৃতি লাভের
সম্ভাবনা থাকে না। চতুরাশ্রম ও বর্ণাশ্রম বিহিত সমস্ত ধর্ম্ম-
কর্ম্মের উদ্দেশ্যই হরিতোষণ, অতএব এই ভগবদ্ভজনার দ্বারা ভক্তি
ও জ্ঞানলাভ করিয়া মনুষ্যজীবন সফল করা সমস্ত বুদ্ধিমান ব্যক্তি-
রই কর্তব্য। শ্রীমদ্ভাগবত বলিতেছেন—

“তস্মাদেকেন মনসা ভগবান্ সাহতাং পতিঃ

শ্রোতব্যঃ কীর্তিতব্যশ্চ ধ্যেয়ঃ পূজ্যশ্চ নিত্যদা।

যদনুধ্যাসিনা যুক্তাঃ কর্ম্মগ্রহিণিবন্ধনম্

হিন্দন্তি কোবিদাস্তশ্চ কো ন কুর্য্যাৎ কথারতিম্ ॥

শুক্রাষোঃ শ্রদ্ধধানশ্চ বাসুদেবকথাকৃচিঃ।

স্বান্নহৎসেবয়া বিপ্রাঃ পুণ্যার্থনিষেবণাৎ ॥

শৃণ্বতাং স্বকথাং কৃষ্ণঃ পুণ্যশ্রবণকীর্তনঃ।

হৃদন্তঃস্থো হৃভদ্রাণি বিধুনোতি সুহৃৎ সতাম্ ॥

নষ্টপ্রায়েষভদ্রেষু নিত্যং ভাগবতসেবয়া ।
 ভগবত্ব্যন্তমঞ্জোকে ভক্তির্ভবতি নৈষ্ঠিকী ॥
 তদা রজস্তমোভাবাঃ কামলোভাদয়শ্চ যে ।
 চেত এতৈরনাবিক্ৰং স্থিতং সত্তে প্রসীদতি ॥
 এবং প্রসন্নমনসো ভগবন্তুক্তিযোগতঃ ।
 ভগবন্ত্ব বিজ্ঞানং মুক্তসঙ্গস্য জায়তে ॥
 ভিত্তিতে হৃদয়গ্রন্থিশ্চিহ্নস্তে সর্বসংশয়াঃ ।
 ক্ষীয়ন্তে চাস্ত কৰ্ম্মাণি দৃষ্ট এবান্বনীশ্বরে ॥
 অতো বৈ কবরো নিত্যং ভক্তিং পরময়া সুদা ।
 বাসুদেবে ভগবতি কুর্বন্ত্যান্নপ্রসাদনৌম্ ॥”

অর্থাৎ একমন হইয়া ভক্তপালক ভগবানের গুণগাথা শ্রবণ, তন্নাম কীর্তন ও তাঁহারই ধ্যান ও পূজা করা একান্ত কর্তব্য । যাঁহার ধ্যানরূপ অসি দ্বারা পণ্ডিতগণ কৰ্ম্মপাশ ছেদন করেন, সেই ভগবানের গুণ কীর্তন শুনিতে কাহার না ঔৎসুক্য জন্মিয়া থাকে ? পুণ্যতীর্থ সেবা ও মহৎব্যক্তির সেবা দ্বারা শ্রদ্ধার উদয় হয় এবং শ্রদ্ধা হইতে ভগবৎ কথায় মনের রুচি হয় । এই হরিকথা শ্রবণ ও কীর্তন দ্বারাই অমঙ্গল অর্থাৎ বিবয় বাসনা তাহাদের অন্তঃকরণ হইতে ভগবান দূর করিয়া দেন । এইরূপে নিত্য ভাগবত সেবা দ্বারা সমস্ত অমঙ্গল নষ্টপ্রায় হইলে উত্তমঞ্জোকে ভগবানে ভক্তির উদয় হয় । এইরূপে ভক্তি সহযোগে কাম ক্রোধ লোভাদি দ্বারা হৃদয় অনাবিক্ত হইয়া মন পরম প্রসন্নতা লাভ করে । এইরূপ প্রসন্ন মানস ও ভগবন্তুক্তি সহকারে ভগবন্ত্ব অর্থাৎ আত্মজ্ঞান লাভ হয় । জ্ঞানোৎপত্তির সহিত আত্মসাক্ষাৎ-

কার হয়, এইরূপে হৃদয়গ্রন্থি ছিন্ন হইয়া সর্বসংশয় বিদূরিত হয় । এই সকল কারণে পণ্ডিতগণ পরম আনন্দে বাসুদেবে নিত্য ভক্তি করিয়া থাকেন ।

শ্রীমদ্ভাগবতে মহর্ষি কপিলদেব স্বীয় মাতা দেবহৃতিকে পরমার্থ তত্ত্ব বিষয়ক এই মনোহর উপদেশগুলি প্রদান করিয়াছিলেন :—“জননি ! নিষ্কাম ধর্ম, নির্মল মন, আমার গুণকথন দ্বারা বর্দ্ধিত মদ্বিষয়ক দৃঢ় ভক্তিযোগ, তত্ত্বজ্ঞান, প্রবল বৈরাগ্য, তপস্কার সহিত অতি কঠিন আত্মসমাধি, এই সকল দ্বারা পুরুষের প্রকৃতি বার বার দৃঢ় হইতে থাকে, সুতরাং অগ্নির উৎপত্তির কারণ কাষ্ঠের গ্নায় ক্রমে বিলুপ্ত হয় । প্রকৃতি বিলুপ্ত হইলে স্বীয় পরমানন্দপ্রাপ্ত পুরুষের আর অমঙ্গল সাধনে সমর্থ হয় না । পুরুষ বহু জন্ম জন্মান্তর এইরূপ আত্মানুরক্ত হইয়া যখন ব্রহ্মলোক পর্য্যন্ত সকল স্থানেই বৈরাগ্য অরলম্বন করতঃ এবং আমার প্রতি অতিশয় ভক্তিমান হইয়া আমার প্রসাদে যথার্থ পরমার্থ তত্ত্ব জানিতে পারেন, তখন কৈবল্য নামক দেহাতিরিক্ত স্বরূপ প্রাপ্ত হওয়ায় নিরতিশয় আনন্দ প্রাপ্ত হন ।”

ইহারই নাম চিত্তশুদ্ধি—ইহাই ভগবদুপাসনার সাক্ষাৎ ফল ।

উপরোক্ত নিয়মাদি যথাযথ প্রতিপালিত হইলে আত্মসাক্ষাৎকার সুকর হয় । গীতার আছে :—

“ধ্যানেনাশ্রুনি পশুন্তি কেচিদান্মানমাশ্রুনা ।

আত্মসাক্ষাৎকার
করিবার বিধি ।

অশ্রু সাংখ্যেন যোগেন কৰ্ম্মযোগেন চাপরে ॥

অশ্রু ভেবমজানন্তঃ শ্রব্যান্যেভ্য উপাসতে ।

তেহপি চাতিতরন্ত্যেব মৃত্যুং শ্রুতিপারায়ণাঃ ॥”

কেহ কেহ ধ্যানযোগ দ্বারা দেহের মধ্যেই আত্মাকে দর্শন করেন, অপর কেহ কেহ সাংখ্যযোগ অর্থাৎ তত্ত্ববিচার দ্বারা এবং কেহবা কর্মযোগ অর্থাৎ পাতঞ্জলোক্ত সাধন প্রণালী দ্বারা এই আত্মাকে দর্শন করেন। অপর কেহ কেহ এই সকল জ্ঞান ও সাধন প্রণালী সম্যক অবগত না হইয়া গুরুমুখে শ্রবণ করিয়া মাত্র স্বপ্নাধিকার অনুরূপ সাধনাদি দ্বারা তাঁহার উপাসনা করেন। মন্দাধিকারী হইলেও এই সকল সাধকেরা মৃত্যুকে অতিক্রম করিয়া থাকেন। অর্থাৎ ভগবানকে না পাওয়া রূপ যে মহাবিনাশ তাহা হইতে তাঁহারা রক্ষা পান। একবারও যে তাঁর শরণ লইয়াছে তাঁহার আর কোন চিন্তা নাই।

সপ্তম অধ্যায়

ব্রহ্মবিদ্যা

জ্ঞানযোগ

চিন্তা শুদ্ধ হইলেই জ্ঞানের উদয় হয়। শাস্ত্র বলিয়াছেন :—

“জ্ঞানং তত্ত্ববিচারেণ নিষ্কামেনাপি কর্মণা।

জায়তে ক্ষীণতমসাং বিদ্ব্যাং নির্মলাত্মনাম্ ॥”

তত্ত্ববিচার সহ নিষ্কাম কর্ম দ্বারা তমঃ ক্ষয়প্রাপ্ত হইলে জ্ঞান আপনাই উদয় হয়। প্রহ্লাদ বলিয়াছেন :—

“স্বত্যা প্রণত্যা বিজ্ঞপ্ত্যা শমেন নিয়মেন চ।

লকোহয়ং ভগবানাত্মা দৃষ্টশ্চাধিগতঃ স্ফুটম্ ॥”

স্বতি, প্রণতি, আত্মনিবেদন, শম ও নিয়ম সাধন (শৌচ, সন্তোষ, তপস্যা, স্বাধ্যায় ও ঈশ্বর প্রণিধান) প্রভাবে ভগবানাত্মা দৃষ্ট ও লব্ধ হইয়া থাকেন। সেই পরমাত্মা বা ভগবান বলিলে কি বুঝিতে হইবে, শাস্ত্র তাহা নির্দেশ দিয়াছেন—

“বদন্তি তত্ত্ববিদস্তুং যজ্জ্ঞানমদ্বয়ং।

ব্রহ্মেতি পরমাত্মেতি ভগবানিতি শব্দ্যতে ॥”

তত্ত্বজ্ঞ ব্যক্তিগণ অদ্বয় জ্ঞানকেই তত্ত্ব বলিয়া বর্ণন করেন। সেই অদ্বয় জ্ঞানতত্ত্বকে কেহ বা ব্রহ্ম, কেহ বা পরমাত্মা ও কেহ বা ভগবান শব্দে কীৰ্ত্তন করিয়া থাকেন।

এই আত্মসাক্ষাৎকারের উপায়ের নামই ব্রহ্মবিদ্যা বা পরাবিদ্যা।

আচার্য্য শঙ্কর বলিয়াছেন “বিজ্ঞা হি কা ব্রহ্ম গতিপ্রদা য়।”—

যাহা ব্রহ্মগতি প্রদান করে তাহাই বিজ্ঞা।

ব্রহ্মবিজ্ঞা। এই ব্রহ্মবিজ্ঞা গুরুমুখে অবগত হইতে হয়।

ইহা শুধু শাস্ত্র পড়িয়া হয় না। এইজন্য

পূর্বকালে মুমুক্শু সাধকেরা আশ্রিত্ত্ব জানিবার জন্মই সমিৎপাণি হইয়া বিদ্বান ও ব্রহ্মনিষ্ঠ গুরুর নিকট গমন করিতেন। উদ্দেশ্য গুরুর নিকট আশ্রমসাক্ষাৎকারের উপায় জানিয়া লওয়া, কারণ আশ্রমসাক্ষাৎকার ব্যতীত জীবের পুনঃ পুনঃ সংসার গতি নিবৃত্ত হয় না।

আমাদের দেশের করুণাময় ঋষিগণ মানবের কল্যাণার্থ আশ্রমসাক্ষাৎকারের বহুবিধ উপায় নির্দেশ করিয়া গিয়াছেন।

তন্মধ্যে জ্ঞান, ভক্তি ও কৰ্ম এই ত্রিবিধ মার্গই

পদাত্তর।

প্রধান। উপায়গুলি ভিন্ন হইলেও ইহাদের

সকলের লক্ষ্য সেই এক—আশ্রমসাক্ষাৎকার বা সংসারবন্ধন হইতে মুক্তিলাভ। বিভিন্ন পথগুলি আশ্রমসাক্ষাৎকারের জন্ম বিহিত হইলেও অধিকারানুযায়ী ইহা অবলম্বনীয়। গুরুই এই অধিকার ঠিক করিয়া দেন, স্বেচ্ছামত গ্রহণ করিতে গেলে পদে পদে পথভ্রান্তি হওয়া সম্ভব। এই তিনটি পথ তিন প্রকার প্রকৃতির জীবের জন্ম ব্যবস্থিত হইলেও ন্যূনাধিক এই তিনটিকে একসঙ্গেই অবলম্বন করিয়া মানুষকে চলিতে হয়। একটিকে ত্যাগ করিয়া অন্য়টিকে গ্রহণ করা এক রকম অসম্ভব বলিলেও হয়। প্রভেদ এই—জ্ঞানমার্গে জ্ঞান প্রধান থাকিয়া অন্য় দুটি অপ্রধানভাবে থাকে, ভক্তিমার্গে ভক্তি মুখ্য ও অন্য় দুটি গৌণ এবং কৰ্মমার্গে

কৰ্ম প্রধানরূপে ও অন্য় দুটি গৌণরূপে অবলম্বিত হয়। সাধুসঙ্গ প্রভাবে ঝাঁহার চিন্তে বিবেক উদয় হয় নাই, সুতরাং ঝাঁহার চিন্ত সম্পূর্ণ সমল, এবং ঝাঁহার কাম্যপদার্থের কামে মুগ্ধ, তাঁহার তখন ঈশ্বরারাধনা করিয়াও এই সকল বস্তু লাভের লালসায় অত্যন্ত ব্যগ্র। এই সকল ভোগসুখাসক্ত চিন্ত ভোগসুখ ব্যতীত অন্য় কিছু যে চাহিবার আছে তাহা কল্পনাই করিতে পারে না। ইহারা সকাম, এইজন্য স্বর্গপ্রাপক তপস্যা, দান, যজ্ঞাদি ইহাদের জন্ম বিহিত হইয়াছে। কৰ্মযোগ এই সকল ব্যক্তিরাই অবলম্বন করিবে। কিন্তু ঝাঁহার ইহাতে সম্ভষ্ট ন'ন, পৃথিবীতে অসমপত্নমুগ্ধ (শত্রুশূন্য ও সমৃদ্ধিপূর্ণ) রাজ্য পাইয়াও ঝাঁহাদের চিন্ত সুখী নহে, তাঁহার স্বর্গপ্রাপক যাগযজ্ঞাদি লইয়া সম্ভষ্ট হইতে পারিলেন না। তাঁহার দেখিলেন অনন্ত তরঙ্গ বিক্ষোভিত সাগরের স্রায় মনুয়ের ভাগ্য নিয়ত অস্থির ও চঞ্চল। সুখের উজ্জ্বল দিবা দুঃখের অন্ধকার রাত্রিতে ডুবিয়া যায়। জন্ম, মৃত্যু, সুখ দুঃখের চক্রনেমী প্রতি নিয়ত বিবৃণিত হইয়া মানবকে এই জাগতিক সুখ দুঃখের অচিরস্থায়িত্ব ও দুঃখময়ত্ব অতি নিঃসমভাবে বুঝাইয়া দিতেছে। কত আশাবিত হইয়া, কত প্রিয় মনে করিয়া যাহাকে অবলম্বন করিয়া তুমি এই সংসারবৃক্ষে নীড় বাঁধিলে—মনে করিলে কত সুখেই দিন কাটাইব, এ আনন্দের দিন আর ফুরাইবে না, এ প্রেম মদিরার নেশা কিছুতেই ছুটিবে না—হায়, তোমার সেই প্রিয়বস্তু তোমার চোখের সম্মুখে কালের অমোঘ নিয়মের অধীন হইয়া তোমা হইতে বিচ্ছিন্ন হইয়া গেল। যাহা কিছুদিন আগে কল্পনা করিতেও হৃৎকম্প হইত, সেই প্রিয় বস্তু

তোমার হৃদয়তন্ত্রী ছিন্নভিন্ন করিয়া তাহার সাধের খেলা সমাপন করিয়া কোন্ অদৃশ্য দেশে চলিয়া গেল, বহু সাধ্য সাধনায় তাহাকে আর একবার চোখের দেখাও দেখিতে পাইবে না। তবে কিসের জন্ম আকুলতা? এত অক্ষব এত ক্ষণ ভঙ্গুর বস্তুলাভের জন্ম এত ব্যাকুল হইয়া লাভ কি? প্রাণের যে এত আকাঙ্ক্ষা তাহা কি কেবল অপূর্ণ থাকিবার জন্মই? প্রাণের মধ্যে এত যে আশা, এত যে ব্যাকুলতা তাহা কি কেবল নিরাশায় পরিসমাপ্তি হইবার জন্মই? আমার হৃদয়-ভরা এত স্নেহ, এত প্রেম তাহা গ্রহণ করিবার কোন অবিনশ্বর চিরস্থায়ী পদার্থ কি নাই, তবে কি শুধু বসিয়া বসিয়া কাঁদা ও মরণের প্রতীক্ষা করাই মানব জীবনের একমাত্র নিয়তি? ইহাই সমস্ত হৃদয়ের করুণ ক্রন্দন। তাই সেই করুণার্জু ঋষিরা জগতের গভীর নর্মবেদনায় ব্যথিত ও পীড়িত হইয়া ইহার উপায় অব্ধেষণে সচেষ্ট হইলেন।

“কিং কারণং ব্রহ্মকৃতঃ স্ম জাতা জীবাব কেন
ক চ সংপ্রতিষ্ঠাঃ।

অধিষ্ঠিতাঃ কেন স্মুখেতরেষু বর্ত্তামহে
ব্রহ্মবিদো ব্যবস্থাম্ ॥”

সেই কারণ কি, আমরা কোথা হইতে আসিয়াছি, কি কারণে জীবন ধারণ করিতে সক্ষম হইয়াছি, আমাদের সেই প্রতিষ্ঠা বা আশ্রয় স্থানটি কি? হে শ্রেষ্ঠকারণবিদগণ! তোমরা কি জান আমরা কোন্ কারণের বশবর্ত্তী হইয়া এই সুখ দুঃখের ব্যবস্থায় নিয়মিত রহিয়াছি?

“কেনেবিতং পততি প্রেযিতং মনঃ

কেন প্রাণঃ প্রথমঃ প্রৈতি যুক্তঃ।

কেনেবিতাং বাচমিমাং বদন্তি

চক্ষুঃ শ্রোত্রং ক উ দেবো যুনক্তি ॥” (কেন উঃ)

কাহার দ্বারা অভিপ্রেত বা প্রেরিত হইয়া এই মন বিষয়ে ধাবিত হয়, কাহার দ্বারা নিযুক্ত হইয়া মুখ্য প্রাণ গমনাগমন করে, কাহার অভিপ্রায়ে প্রেরিত হইয়া লোকে এই সকল বাক্য উচ্চারণ করে, কোন্ দেবতা চক্ষু কর্ণকে স্ব স্ব কর্মে নিযুক্ত করেন?—এই সুগভীর প্রশ্নের উত্তর ঋষিরা ধ্যাননিমগ্ন অবস্থায় প্রাপ্ত হইয়া তাহাই জগতের হিতার্থ প্রচার করিয়াছিলেন। ঋষিদের এই ধ্যানলব্ধ উপায়গুলি জ্ঞান, যোগ ও ভক্তি নামে প্রসিদ্ধ হইয়াছে। ইহাই ব্রহ্মবিদ্যা।

ভাগবতে ভগবান উদ্ধবকে বলিলেন—

আমি মনুয্যগণের মঙ্গলকামনায় জ্ঞান কর্ম ও ভক্তিয়োগের কথা বলিয়াছি। এই যোগত্রয় ভিন্ন অন্য উপায় নাই।

যোগান্ত্রয়ো ময়া প্রোক্তা নৃণাং শ্রেয়ো বিধিৎসয়া।

জ্ঞানং কর্ম চ ভক্তিঞ্চ নোপায়োহন্যোহস্তি কুত্রচিৎ ॥

নির্বিঘ্নানাং জ্ঞানযোগো ন্যাসিনামিহ কর্মসু।

তেষনির্বিঘ্নচিন্তানাং কর্মযোগস্ত কামিনাম্ ॥

ষদৃচ্ছয়া মৎকথাদৌ জাতশ্রদ্ধস্ত যঃ পুমান্।

ন নির্বিঘ্নো নাতিসক্তো ভক্তিয়োগোহস্থ সিদ্ধিদঃ ॥

তাবৎ কর্ম্মাণি কুর্বাঁত ন নির্বিঘ্নেত যাবতা।

মৎকথা শ্রবণাদৌ বা শ্রদ্ধা যাবন্ন জায়তে ॥

যাঁহারা কর্মফলে বিরক্ত একরূপ ভ্যাগী পুরুষদের জন্মই জ্ঞানমার্গ আর যাঁহারা কর্মফল ভোগস্থাদিতে আসক্ত তাঁহাদের জন্মই কর্মমার্গ। আর কোন ক্রমে ভাগ্যোদয় হেতু মদীয় কথাদিতে যাঁহাদের শ্রদ্ধা জন্মিয়াছে, যাঁহারা কর্মফলে বিরক্তও নহেন, আসক্তও নহেন, তাঁহাদিগের জন্মই ভক্তিযোগ। হে উদ্ধব! পুরুষ যতদিন কর্মফলে বিরক্ত না হইবে, অথবা মদীয় কথা শ্রবণে শ্রদ্ধাবান না হইবে, ততদিন কর্মসমূহ করা কর্তব্য। কিন্তু—

“জাতশ্রদ্ধো মৎকথাসু নির্বিবলঃ সর্বকর্মাশু।

বেদ ছুঃখাস্থকান্ কামান্ পরিত্যাগেহপ্যনীশ্বরঃ।

ততো ভজেত মাং শ্রীতঃ শ্রদ্ধালু দৃঢ়নিশ্চয়ঃ ॥”

যাঁহারা আমার কথায় শ্রদ্ধাশ্রিত এবং কাম সকল ছুঃখদায়ক জানিয়া কর্মফলে বিরক্ত কিন্তু তপাপি সম্পূর্ণ পরিত্যাগে অসমর্থ, একরূপ ব্যক্তির শ্রদ্ধালু ও দৃঢ়নিশ্চয় হইয়া শ্রীতিপূর্বক আমাকে ভজনা করিবেন।

এইরূপ ভজনাকারীর ক্রমশঃ কর্মাসক্তি কাটিয়া যায়, এবং তিনি নির্বিবল হইয়া জ্ঞান লাভের যোগ্যতা প্রাপ্ত হন। ইহাই ভক্তিসাধনার লক্ষ্য। আর যাঁহাদের কর্ম্মতে মোটেই আসক্তি নাই, ফলেও যথেষ্ট বিরক্তি, একরূপ ব্যক্তি সংযতেন্দ্রিয় হইয়া আত্মভ্যাসে মন যেরূপে অটল হয়, সেইরূপে মনকে ধারণা করিবেন।

“যদারম্ভেষু নির্বিবলো বিরক্তঃ সংযতেন্দ্রিয়ঃ।

অভ্যাসেনাত্মনো যোগী ধারয়েদচলং মনঃ ॥”

কর্মফলে স্বভাবতঃ বিরক্ত হইলেও এবং সংসারস্থখে স্পৃহাশূন্য

হইলেও প্রাণমনের ব্যাপারাদি হেতু যে চাঞ্চল্য তাহা হইতে নিষ্কৃতি লাভ সহজ নহে। দেহাদির সংস্কার বড়ই কঠিন, বুদ্ধিলেও এক মুহূর্ত্তে ইহা সমস্ত বৃথা উল্টাইয়া দেয়। “অনিচ্ছন্নপি বাশ্ফের্য বলাদিব নিয়োজিতঃ”—ইহাই মুমুক্শু হৃদয়ের ঐকান্তিক ব্যথা। কান রজোগুণ হইতে উদ্ধৃত, সন্তুগুণ যথেষ্ট বুদ্ধিপ্রাপ্ত না হইলে আর এ বাসনার অত্যাচার হইতে মুক্তি নাই, সুতরাং এই কামকে শাসন করিতে কত সুচিরকালব্যাপী সাধন করিতে হইবে তাহা কে বলিতে পারে?

যাঁহারা কপিল, গুরুদেব, জড়ভরতাদির স্থায় আজন্মজ্ঞানী যাঁহারা স্বভাবতঃই সংসারবিরক্ত, বহুজন্মসঞ্চিত তপস্যার ফলে যাঁহারা জ্ঞানে আকৃষ্ট হইয়াই জন্মগ্রহণ করিয়াছেন, যাঁহাদের অন্তঃকরণ হইতে তমোমল নিঃসংশয়ে অপনোদিত হইয়াছে, যাঁহারা আত্মাতিরিক্ত আর কিছুই অনুভব করিতে পারেন না— তাঁহাদের পক্ষে মুক্তিলাভ সহজ বটে; তাঁহারা গুরুমুখে একবার মাত্র বেদান্ত শ্রবণ করিয়া অথবা গুরু-নিরপেক্ষ হইয়াও আত্মপ্রত্যয়ের দ্বারাই আত্মসাক্ষাৎকার করিয়া কৃতার্থ হইতে পারেন, জ্ঞানযোগ তাঁহাদের জন্মই। কিন্তু যাঁহারা জ্ঞানপথে গমনেচ্ছু এমন কি জ্ঞানে আকৃষ্ট, বিষয় স্বাহ্ বোধ হয় না অথচ ব্যাপার-শূন্য হইতে পারিতেছেন না, বিক্ষিপ্ত হেতু অসঙ্গ হইতে অসমর্থ, তাঁহাদের জন্মই যোগমার্গ। সুপ্রসিদ্ধ যোগী ৩শ্রীমাচারণ লাহিড়ী মহাশয় বলিতেন ‘যাহাদের পালে হাওয়া নাই, তাহাদের নৌকাই গুণ দিয়া টানিয়া লইতে হয়।’ যোগমার্গ জ্ঞানমার্গেরই একটি সাধন মাত্র। বুঝিয়াছে অথচ বিক্ষিপ্তাদি হেতু মনকে নিশ্চল

করিতে পারিতেছে না, সুখী নহে অথচ ব্যবহারিক জগতে কৰ্ম
চেষ্টা ছাড়িতে পারিতেছে না, আত্মসাক্ষাৎকারে লোলূপ অথচ
দেহাদির ভাণ ছুটিতেছে না, ইন্দ্রিয়ভোগ্য বিষয় অভিরুচিকর
নহে অথচ তাহা ছাড়িতেও পারিতেছে না, এতাদৃশ পুরুষের
জন্মই পাতঞ্জলোক্ত যোগমার্গ বিহিত হইয়াছে। জ্ঞানলাভেচ্ছ
অধিকাংশ ব্যক্তির পক্ষে যোগপথই মুক্তি লাভের সুগম উপায়।

এমন কি ভক্তি পথাবলম্বী ও কৰ্মীদের পক্ষেও
জ্ঞানমার্গ এই যোগপথ অবলম্বনীয়। পরবর্তী অধ্যায়ে

এ সম্বন্ধে আলোচনা করিব। সর্বোচ্চ অধি-
কারীদের জন্মই জ্ঞানমার্গ, খুব কম লোকেরই এ পথের অধি-
কার হয়। একমাত্র প্রকাশাত্মা পরমাত্মাই আছেন—এই
প্রকার অবধারণের নামই সম্যক্ জ্ঞান। এই দৃশ্যমান পদার্থ
মাত্রই আত্মা, আত্মা ভিন্ন আর কিছুই নাই, এই প্রকার
নিশ্চয়ের নাম সম্যক্ জ্ঞান।

“ব্রহ্মৈবাহং সমঃ শাস্তঃ সচ্চিদানন্দলক্ষণঃ।

নাহং দেহো হৃদয়স্বপ্নো জ্ঞানমিত্যুচ্যতে তদা ॥”

বিক্ষেপাদি রহিত, সচ্চিদানন্দস্বরূপ সর্বময় ব্রহ্মই আমি,
মেদমাংসমজ্জাদিময় শরীর আমি নহি—এইরূপ বোধকেই জ্ঞান
বলিয়া থাকে। যতক্ষণ এই সংসার এবং সংসারের সমুদয়
বস্তুর পৃথক পৃথক জ্ঞান হয়, ততক্ষণ তাহা অসম্যক্ জ্ঞান। সম্যক্
জ্ঞানের দ্বারা অসম্যক্ জ্ঞানকে নিরস্ত করিতে হয়। অসম্যক্
জ্ঞান হেতু এই জগৎপ্রপঞ্চকে সত্য বলিয়া ভ্রম হয় এবং এই
দেহে আত্ম-বুদ্ধির উদয় হয়।

“দেহোহহমিতি যা বুদ্ধিরবিদ্যা সা প্রকীর্তিতা।

নাহং দেহশ্চিদাশ্চেতি বুদ্ধির্বিদ্যেতি ভগ্যতে ॥”

আমি দেহ এই যে ধারণা ইহারই নাম অবিদ্যা বা অজ্ঞান।
আমি দেহ নহি, আমি চিদাত্মা এইরূপ যে অটল ভাব তাহারই
নাম বিদ্যা বা জ্ঞান। এই জ্ঞানের অভাবই সংসার প্রবাহের
হেতু এবং এই জ্ঞানের উদয়েই সংসার নিরস্ত হয়।

“অবিদ্যা সংসৃত্যেহেতুর্বিদ্যা তস্মা নিবর্তিকা।

তস্মাদ্ যত্নঃ সদা কার্যো বিদ্যাভ্যাসে মুমুক্শুভিঃ ॥”

কঠোপনিষদে আছে—

“যদা সর্বৈ প্রভিগন্তে হৃদয়শ্চেহ গ্রন্থয়ঃ।

অথ মর্ন্ত্যোহমৃতো ভবত্যেতা বদনুশাসনম্ ॥”

এই মনুষ্যদেহেই যখন হৃদয়গত সমস্ত অবিদ্যাগ্রন্থি (শরীর,
পুত্র, কলত্র, বিস্তাদিতে যে অত্যন্ত স্নেহ) বিনষ্ট হইয়া যায়,
তখন সেই মরণশীল মনুষ্য অমৃতত্ব লাভ করে।

অজ্ঞানহেতু কামনাধারা ভ্রান্ত জীব সংসারে বদ্ধ হইয়াছে।
বৃহদারণাক ঋতি বলিয়াছেন ‘কামময় এবায়ং পুরুষ ইতি, স
যথা কামো ভবতি তৎ ক্রতুর্ভবতি তৎ কৰ্ম কুরুতে, যৎকৰ্ম
কুরুতে তদভিসম্পত্ততে।’ এই যে পুরুষ ইনি কামময়—
ইহার যেরূপ ভাবনা তদনুরূপ কৰ্ম বা চেষ্টা হয়, এবং যেরূপ
কৰ্ম করে তদনুরূপ ফল উপন্ন হয়।

এই সংসারের মূল কারণই হইল কামনা। এই কামনা ও
তাহার ফল কত যে অকিঞ্চিৎকর এবং কত যে দুঃখের হেতু
তাহা জানিলে আর কে এই দুঃখদায়ক সংসাকে অভিলাষ

করিবে? বিষয়ভোগজনিত সুখসমূহের অসারতা চিন্তা করিয়া দেখিলে ভোগসুখাদি সম্পাদনের জগৎ কে দীর্ঘ জীবন কামনা করিবে? সেইজগৎ—

“অথ ধীরা অমৃতং বিদিত্বা

ক্রবমক্রবেষিহ ন প্রার্থয়ন্তে ॥”

ধীর বিবেকী পুরুষেরা এই অনন্ত মৃত্যু প্রবাহের মধ্যে ক্রব অমৃতকে বিদিত হইয়া অদন্য ভোগ স্পৃহাকে দমন করিয়া এই সংসারের ক্ষণভঙ্গুর পদার্থের প্রতি আসক্তি প্রকাশ করিবেন না।

“তদেতদক্ষরং ব্রহ্ম স প্রাণস্তুহ বাঙ্ মনঃ।

তদেতৎ সত্যং তদমৃতং তব্বেন্ধব্যং সৌম্য বিদ্ধি ॥”

সেই সূক্ষ্ম বস্তুই অবিকারী ব্রহ্ম, তিনিই প্রাণের প্রাণ, তিনি বাক্যের শক্তি ও চেতনের চেতনা, তিনিই সত্য তিনিই অমৃত। হে সৌম্য, এই অমৃত স্বরূপ আত্মাই তোমার বেধনীয় বা লক্ষ্য বলিয়া জানিও।

তাই নচিকেতা সংসারের মধ্যে যে যোর ছুঃখ-সঙ্কট রহিয়াছে, তাহা বেশ হৃদয়ঙ্গম করিয়া আর কামোপভোগপূর্ণ সংসারকে কামনা করিতে পারিলেন না, তিনি যমরাজকে বলিলেন—

“শোভাবা মর্তস্য বদন্তকৈতৎ

সর্বেন্দ্রিয়াণাং জরয়ন্তি তেজঃ।

অপি সর্বং জীবিতমগ্নমেব,

তবৈব বাহাস্তব নৃত্যগীতে ॥

হে অন্তক! আপনার উল্লিখিত ভোগ্যবস্তুসমূহ কল্যাণপার্থ্যন্ত

থাকিবে কিনা সন্দেহ, আর এই সমস্ত অনিত্য বস্তুর ভোগদ্বারা জীবের ইন্দ্রিয় শক্তিও নষ্ট হইয়া যায়। ভোগাসক্ত চিত্তে আয়ু-ক্ষাল দেখিতে দেখিতে ফুরাইয়া যায়। ব্রহ্মার আয়ুক্ষালও তাহার পক্ষেই স্বল্পই বোধ হয়। অতএব যানবাহন ও অঙ্গুরা নৃত্য-গীতাদি আপনি রাখিয়া দিন, আমার প্রয়োজন নাই।

“ন বিস্তেন তপগীয়ো মনুষ্যঃ”

বহুবিধ পাইয়াও মনুষ্য কখন তৃপ্ত হয় না, আবার চাহিয়া বসে, অতএব—

“অভিধ্যায়ন্ বর্ণরতিপ্রমোদান্,

অতিদীর্ঘে জীবিতে কো রমেত।”

যাঁহাকে পাইলে এই সমস্ত মোহকুহেলিকা বিদূরিত হইবে, তাঁহার কোথায় অন্বেষণ করিতে হইবে?

“তং হৃদর্শং গুঢ়মনুপ্রবিষ্টং

গুহাহিতং গহ্বরেষ্ঠং পুরাণম্।

অধ্যায়যোগাধিগমেন দেবং

মহা ধীরো হর্ষশোকৌ জহাতি ॥”

সেই হৃদর্শ, গুঢ় প্রচ্ছন্ন, হৃদয়ে লুক্কায়িত বুদ্ধির অন্তরে অবস্থিত পুরাণ পুরুষকে অধ্যায়যোগ দ্বারা জানিয়া জ্ঞানী ব্যক্তির হর্ষ ও শোককে অতিক্রম করেন।

“ন চক্ষুষা গৃহতে নাপি বাচা

নাত্মৈর্দেবৈস্তপসা কৰ্ম্মণা বা।

জ্ঞানপ্রসাদেন বিশুদ্ধসত্ত্ব-

স্বতস্ত্ব তং পশ্যতে নিষ্কলং ধ্যায়মানঃ ॥” মুণ্ডক

সেই শাস্তিময় আত্মা বাহ্যচক্ষুর গ্রাহ্য নহেন, বাক্য বা অগ্ৰাণ্য ইন্দ্রিয়েরও গ্রাহ্য নহেন। অগ্ৰাণ্য কর্ম দ্বারাও তিনি লভ্য নহেন। জ্ঞানালোচনা দ্বারা যখন বুদ্ধি নির্মল হয় অর্থাৎ বিকল্পরহিত হয়, তখন সেই পবিত্র ধ্যানযুক্ত চিত্তেই তিনি দৃষ্ট হন। এই আত্মাকে জানিলেই তবে সব জানা হয়—“আত্মা বা অরে দৃষ্টব্যঃ, শ্রোতব্যো মন্তব্যো নিদিধ্যাসিতব্যো নৈত্রেয়ি, আত্মনি গম্বরে দৃষ্টে শ্রুতে মতে বিজ্ঞাতে ইদং সর্বং বিদিতম্।”—(বৃহদারণ্যক।) হে মৈত্রেয়ি! সেই আত্মা—যিনি অখিল শাস্তির একমাত্র নিলয় তাঁহাকে দর্শন করিতে হইবে, সেই আত্মতত্ত্বই পুনঃ পুনঃ শ্রবণ করিতে হইবে, এবং তদ্বিষয় চিন্তন করিতে হইবে এবং তৎপরে সেই গভীর ধ্যানে ডুবিয়া তন্ময় হইয়া যাইতে হইবে, তাহা হইলেই সেই আত্মা বিজ্ঞাত হইবেন এবং আত্মা বিদিত হইলে অগ্র যাহা কিছু শুনিবার, যাহা কিছু বুঝিবার তাহা সমস্তই আর বৃষ্টিতে বাকী থাকিবে না।

“যদা পঞ্চাবতিষ্ঠন্তে জ্ঞানানি মনসা সহ।

বুদ্ধিশ্চ ন বিচেষ্টতে তামাহঃ পরমাং গতিম্ ॥” কঠ

সেই ব্রহ্মপ্রাপ্তিরূপ পরমা গতির লক্ষণ এই যে তখন পঞ্চ-জ্ঞানেন্দ্রিয় মনের সহিত স্থিরভাব অবলম্বন করে—অর্থাৎ ইন্দ্রিয় মন বহির্জগতের ব্যাপার ত্যাগ করিয়া প্রশান্তভাব ধারণ করে, বুদ্ধি তখন স্বেচ্ছা ত্যাগ করিয়া স্থিরভাবে অবস্থিত হয়, অর্থাৎ চিত্ত বৃত্তিশূন্য হইয়া পরম শাস্ত্যভাব ধারণ করে।

“মনসৈবানুদ্রষ্টব্যং নেহ নানাস্তি কিঞ্চন।

মৃত্যোঃ স মৃত্যুমাশ্নোতি য ইহ নানৈব পশতি ॥”

মনেরই দ্বারা সেই পরমসত্য সর্বব্যাপী আত্মাকে দেখিতে হইবে। নানান্ব সেখানে নাই। জগদাদি অসংখ্য জীবরূপে যাহা দৃষ্ট হয়, তাহা অসম্যক্ দর্শন হেতু। এই নানান্ব যতদিন হইবে ততদিন মৃত্যু হইতে মৃত্যুতে গমন করিতে হয় অর্থাৎ যাওয়া আসার নিবৃত্তি হইবে না।

“লয়বিক্ষেপরহিতঃ মনঃ কৃত্বা স্থনিশ্চলম্।

যদা যাত্যমনীভাবং তদা তৎ পরমং পদম্ ॥”

মনের লয় বিক্ষেপ রহিত হইলে অর্থাৎ জড়তা ও চঞ্চলতা বিদূরিত করিয়া মনকে স্থির ও নিশ্চল করিলে মন তখন অমনী ভাব ধারণ করে, সেই অবস্থাকেই পরম পদ বলিয়া জানিবে।

“বত্র নাশ্রুৎ পশুতি নাশ্রুচ্ছৃণোতি নাশ্রুদ্ বিজানাত স ভূমা।” ছান্দোগ্য।

যে অবস্থায় আর কিছুই দেখে না, কিছুই শোনে না, কিছুই জানে না—তাহাই ভূমা বা ব্রহ্মপদ। অর্থাৎ ইন্দ্রিয় দ্বারা যাহা কিছু জানা যায়, তাহাই অমোৎপাদক। সুতরাং ইন্দ্রিয় হইতে মন প্রত্যাহৃত হইয়া যে প্রশান্ত নিশ্চল অবস্থা প্রাপ্ত হয় তাহাই পরম পদ। যতদিন দেহেন্দ্রিয় সমন্বিত ‘আমি’ ‘অমুক’ এই রূপ বোধ বা প্রত্যয় থাকে ততদিন জীবাবস্থা বা বন্ধাবস্থা।

“কুশোহতিহুঃখী বন্ধোহহং হস্তপদাদিমানহং।”

ইতি ভাবানুরূপেণ ব্যবহারেণ বধ্যতে ॥”

আমি কুশ, আমি হুঃখী, আমি বন্ধ, হস্তপদাদি সমন্বিত আমি—এই ভাবের অনুরূপ ব্যবহার দ্বারাই জীব বন্ধ হয়।

“নাহং হৃৎখী ন মে দেহো বন্ধং কৰ্ম ন মে স্থিতং ।

ইতি ভাবানুরূপেণ ব্যবহারেণ মুচ্যতে ॥”

আমি হৃৎখী নই, আমার দেহ নাই, স্মৃতরাং কৰ্ম আমাতে
কিভাবে বন্ধ থাকিতে পারে?—এই ভাবের অনুরূপ ব্যবহার
দ্বারাই মুক্তিলাভ হয় ।

“মানসে চ বিলীনে তু যৎ সুখং চান্সাসাঙ্কিকম্ ।

তদব্রহ্ম চান্নতং শুল্কং সা গতির্লৌক এব সঃ ॥

মন বিলীন হইলে যে সুখস্বরূপ আত্মা বা সাক্ষী প্রকাশিত
হন তিনিই ব্রহ্ম তিনিই অমৃতস্বরূপ, তিনি সকলের গতি ও
পরম লোক ।

“ন তত্র সূর্য্যো ভাতি ন চন্দ্রতরকং

নেমা বিদ্যাতো ভাস্তি কুতোয়মগ্নিঃ ।

তমেব ভাস্তমমুহুরাতি সৰ্ব্বঃ

তস্ম ভাসঃ সৰ্ব্বমিদং বিভাতি ॥”

সেই পরম লোকে সূর্য্যের প্রকাশ নাই, চন্দ্রেরও কিরণ নাই,
বিদ্যাত তারকারও প্রকাশ নাই, অগ্নিরও শক্তি নাই যে তাহাকে
প্রকাশ করে । তাহারই প্রভাবে এই সকল উজ্জ্বল জ্যোতিকমণ্ডল
প্রভাবিত হইয়া দীপ্তি পাইতেছে । এই স্বাবরজঙ্গমাঙ্ক জগৎ
অন্তরীক্ষ ও স্বর্গ তাহারই প্রকাশে প্রকাশিত হইতেছে ।

“নিত্যোহনিত্যানাং চেতনশ্চেতনানা-

মেকো বহুনাং যো বিদধাতি কামান্ ।

তমস্মাস্তং যেহনুপশুন্তি ধীরা-

স্তেবাং শাস্তিঃ শাস্ত্বতী নেতরেষাম্ ॥”

অনিত্য পদার্থ সমূহের মধ্যে যিনি নিত্য অবিনাশী কারণ
স্বরূপ, যিনি ব্রহ্মা হইতে কীটাপু পর্য্যাস্ত সমস্ত চেতনায়ুক্ত জীবের
চৈতন্যপ্রদ পরমাত্মা; যিনি এক অদ্বিতীয় হইয়াও বহু জীবের
কৰ্ম্মানুযায়ী ভোগ্য বিষয়সমূহ প্রদান করেন, তাহাকে যে ধীর
বিবেকী পুরুষগণ আপনাপন বুদ্ধিতে প্রকাশমানরূপে দর্শন
করেন, তাহাদিগেরই চিরশান্তি লাভ হয়, অশ্রের হয় না ।

“একো বশী সৰ্ব্বভূতান্তুরাত্মা

একং রূপং বহুধা যঃ করোতি ।

তমস্মাস্তং যেহনুপশুন্তি ধীরা-

স্তেবাং সুখং শাস্ত্বতং নেতরেষাম্ ॥”

সকলের নিয়ন্তা, এবং সৰ্ব্বভূতের অন্তরাত্মা পরমাত্মা এক
হইয়াও, তাহার অদ্বিতীয় নিজ স্বরূপকে বহু প্রকার দেব-
তিৰ্য্যগ-মনুষ্যাদি অসংখ্য জীবরূপে প্রকাশিত করিয়াছেন, সেই
বুদ্ধিতে প্রকাশিত চৈতন্যস্বরূপ পরমাত্মাকে যে বিবেকী পুরুষগণ
সাক্ষাৎ অনুভব করেন তাহাদিগেরই নিত্য সুখলাভ হয়, অশ্র
বিষয়াসক্ত অবিবেকী পুরুষের সে সুখ হয় না ।

“ততো যদুত্তরং তদব্রহ্মপমনাময়ং

য এতদ্বিহুরমৃতাস্তে ভবন্তি ।”

বিশ্ব জগতের অতীত সেই যে পরম বস্তু তিনি অরূপ ও
সৰ্ব্বপ্রকারহুঃখ ব্যাধিশূন্য, এই পরম শ্রেয় বস্তুকে যাঁহারা জানেন
তাঁহারা অমৃত লাভ করেন ।

“তদ্বিষ্ণোঃ পরমং পদং সদা পশুন্তি সুরয়ঃ,

দিবীব চক্ষুরাততম্ ॥”

“তদ্বিপ্রাসো বিপত্ত্ববো জাগৃবাংসঃ সমিক্তে,
বিষ্ণোর্যৎ পরমং পদং ॥”

উন্মূলিত চক্ষু যেমন অসীম আকাশকে দর্শন করে, তদ্রূপ জ্ঞানীরা সেই সর্বব্যাপী বিষ্ণুর পরমপদ সর্বদা নিরীক্ষণ করেন। যাঁহারা সেই চরম সত্য চিরকল্যাণ লাভের জন্য একান্ত অভিলাষী, যাঁহারা জাগ্রত ও অপ্রমত্ত হইয়া সেই শ্রেয়ঃ পদার্থের অন্বেষণে রত রহিয়াছেন, সেই জ্ঞানী, মেধাবী বীরগণই ব্রহ্মের পরম পদ লাভে সমর্থ হন।

“মনসৈবেদমাশ্রুবাং নেহ নানাস্তি কিঞ্চন।

মৃত্যোঃ স মৃত্যুং গচ্ছতি য ইহ নানেব পশ্যতি ॥”

এই ব্রহ্মচৈতন্যে কিছুমাত্রও নানাভাব বা পৃথক পৃথক ভেদ-ভাব নাই। এই একত্বজ্ঞান বিবেকবৈরাগ্যযুক্ত ধ্যানসমাহিত মন দ্বারাই প্রাপ্ত হওয়া যায়। যে এই ব্রহ্ম সত্তার অসংখ্য জীব, জগৎ ঈশ্বরাদি পৃথক পৃথক ভাব দর্শন করে সে পুনঃ পুনঃ জন্মমরণাদির বশীভূত হয়। অর্থাৎ আত্মার স্বরূপ জ্ঞান হইলে আর পৃথক বোধ থাকে না, জন্ম মৃত্যু অসংখ্য ভেদজ্ঞান বিলুপ্ত হয়। তাহারই নাম মুক্তি।

ইহা জানিলেই

“তদ্বিজ্ঞানেন পরিপশ্যন্তি ধীরা

আনন্দরূপমমৃতং যদ্বিভাতি ॥”

ধীর ব্যক্তিগণ সেই আনন্দময় অমৃতস্বরূপকে গুরুপদেশজাত ও সাধনবুদ্ধিপ্রসূত নির্মল ধ্যানৈকাগ্র-চিত্তে দর্শন করেন।

“যথা নত্বে স্তন্দমানাঃ সমুদ্রে-

হস্তং গচ্ছন্তি নামরূপে বিহায়।

তথা বিদ্বান্ নামরূপাভিমুক্তঃ

পরাৎ পরং পুরুষমুপৈতি দিব্যম্ ॥”

যেমন বেগবতী নদী সমুদ্রে আত্মবিসর্জন করিয়া আপনার পৃথক নাম-রূপকে পরিত্যাগ করে, তদ্রূপ জ্ঞানী পুরুষ নাম, রূপাদি হইতে বিমুক্ত হইয়া পরাৎপর পরম দিব্য পুরুষের মধ্যে বিলীন হন। অর্থাৎ নামরূপাদি উপাধি বর্জিত হইয়া ব্রহ্মানন্দ সাগরে মগ্ন হইয়া যান। কি উপায়ে জানিতে হইবে?

“শ্রদ্ধাভক্তিধ্যানযোগাদবেহি

ত্যাগেনৈকেনামৃতমমানশুঃ।”

সেই পরমতত্ত্বকে শ্রদ্ধা ভক্তি ও ধ্যানযোগ দ্বারা বিদিত হও। ত্যাগেরই দ্বারা সেই অমৃতত্ব লাভ হয়। প্রথমে শ্রদ্ধাপূর্বক ব্রহ্মবিষয়ক উপদেশ গুরুমুখ হইতে শ্রবণ করিয়া বিচার কর, পরে সর্বদা ব্রহ্মবিষয়ক বিচার হইতে মনন হইবে, এবং মনন হইতে ধ্যাননিষ্ঠা আসিবে। প্রগাঢ় ধ্যান হইতে এই জাগতিক বস্তুর আকর্ষণ ছিন্ন হইয়া যাইবে। এইরূপে সর্বভাবের পরিত্যাগ দ্বারা সর্বপূর্ণকে লাভ করা যায়।

সদগুরুর আশ্রয় লইতে হইবে—

“তদ্বিজ্ঞানার্থং স গুরুমেবাভিগচ্ছৎ

সমিৎপাণিঃ শ্রোত্রিয়ং ব্রহ্মনিষ্ঠম্ ॥”

যিনি ব্রহ্মসাধনায় কুশলী, এবং ব্রহ্মজ্ঞানে নিপুণ, এইরূপ গুরুর নিকট সেই ব্রহ্মতত্ত্ব বুঝিবার জন্য সমিৎপাণি হইয়া গমন করিবে।

“ন নরেণাবরেণ প্রোক্ত এষ
সুবিজ্ঞেয়ো বহুধা চিন্ত্যমানঃ ।
অনন্যপ্রোক্তে গতিরত্র নাস্তি
অনীয়ান্ হতর্ক্যমণুপ্রমাণাৎ ॥”

বিবেকহীন সাধারণ মনুষ্য কর্তৃক উপদিষ্ট হইলে এই আত্মা সন্যাকরূপে বোধগম্য হন না। কারণ আত্মা সম্বন্ধে বহু প্রকার ভিন্ন ভিন্ন মত প্রচলিত আছে, অতএব যিনি ব্রহ্মকে অভিন্নভাবে জ্ঞাত হইয়াছেন, এরূপ আচার্য্য কর্তৃক উপদিষ্ট হইলে আত্মবিষয়ে বিবিধ তর্ক বা সন্দেহের সম্ভাবনা থাকে না, অথবা শ্রোতার সংসারে আসক্তি আসে না। যে হেতু আত্মতত্ত্ব অতীব সূক্ষ্ম, ইন্দ্রিয়প্রত্যক্ষের অতীত, এবং তর্ক বা অনুমানের দ্বারা অগম্য।

এই ব্রহ্মজ্ঞান লাভের জন্ম গুরুভক্তি চাই :—

“যস্য দেবে পরা ভক্তির্যথা দেবে তথা গুরোঁ ।

তস্মৈতে কথিতা হৃথাঃ প্রকাশস্তে মহাত্মনঃ ॥”

যাঁহার গুরু ও দেবতায় পরমভক্তি আছে তাঁহার নিকটই এই ব্রহ্মতত্ত্ববিষয়ক গূঢ় রহস্য উদঘাটিত হয়। জ্ঞান, বিবেক, বৈরাগ্য ব্যতীত গতি নাই।

“উত্তিষ্ঠত জাগ্রত প্রাপ্য বরান্ নিবোধত ।

ক্ষুরস্ত ধারা নিশিতা ছুরতয়া ।

দুর্গং পথস্তৎ কবয়ো বদন্তি ॥”

হে জীবগণ! উস্থিত হও অর্থাৎ বিষয়চিন্তা পরিহার করিয়া জ্ঞানলাভে উদ্যোগী হও। জাগিয়া উঠ, আর মোহঘোরে অচেতন থাকিও না, শ্রেষ্ঠ ব্রহ্মবিদ বরিষ্ঠ আচার্য্যের নিকট গমন

করিয়া জ্ঞানলাভ কর। বিবেকিগণ বলেন এই আত্মজ্ঞানের পথ বড়ই দুর্গম, জানিও ক্ষুরধারের স্থায় তীক্ষ্ণ, অতি সতর্কতার সহিত এই পথে চলিতে হয়, সামান্য অসুবিধা, সামান্য অসাবধানতায় সমস্ত পণ্ড হইয়া যায়। এইজন্য ভক্তি ও বৈরাগ্যযুক্ত হইয়া এই অতীন্দ্রিয় মনবুদ্ধির অতীত জ্ঞানস্বরূপ আত্মাকে জানিতে হয়।

“নাবিরতো দুশ্চরিতান্নাশান্তো ন সমাহিতঃ ॥

নাশান্তমানসো বাপি প্রজ্ঞানেনৈনমাঙ্গুয়াৎ ॥”

যে ব্যক্তি অসদাচারী, শাস্ত্রনিষিদ্ধ পাপাদি হইতে নিবৃত্ত হইতে পারে নাই, সে কেবল প্রজ্ঞান দ্বারা অর্থাৎ ব্রহ্মবিষয়ক বিচার দ্বারা এই সর্বব্যাপী চৈতন্যস্বরূপ আত্মাকে লাভ করিতে পারে না। অসমাহিত অর্থাৎ অস্থিরচিত্ত ব্যক্তিও লাভ করিতে পারে না। অথবা অশান্তমানস—যাঁহার মনে সন্তোষ নাই, যে অনবরত বিষয়প্রাপ্তির আকাঙ্ক্ষায় ব্যাকুল, সেও এই আত্মস্বরূপকে বুঝিতে পারে না।

শ্রীমদ্ভাগবতেও এ সম্বন্ধে বহু আলোচনা আছে। ভগবান্ শ্রীকৃষ্ণ গীতার ত্রয়োদশ অধ্যায়ে ব্রহ্মসম্বন্ধে নিজ অভিপ্রায় ব্যক্ত করিয়াছেন। এই ব্রহ্মবস্ত তত্ত্বতঃ কি তাহাই সেখানে আলোচিত হইয়াছে। গীতায় আছে—“অনাদিমৎ পরং ব্রহ্ম ন সৎ তন্নাসছ্যতে।” জ্ঞেয় বস্তু যে কি তাহাই উপদেশ করিতেছেন—জ্ঞেয় বস্তুই ব্রহ্ম, তিনি অনাদিমৎ পরং অর্থাৎ তাঁহার আদি নাই, তিনি দেশ কালাদি পরিচ্ছেদশূন্য, নিরতিশয়, তিনি অস্তি বা নাস্তির বিষয় নহেন। কোন বস্তু আছে কি নাই, ইহা

ইন্দ্রিয়গণ ও বুদ্ধি মিলিয়া স্থির করে ; যদি তিনি কোন বস্তু হইতেন, তবে তাঁহাকে অস্তির বিষয় বলা যাইতে পারিত, কিন্তু তিনি কোন বস্তু নহেন। তাই বলিয়া তিনি শূন্য বা নাই তাহাও নহে, এইজন্ত নাস্তিরও অবিষয়। সুতরাং তিনি আছেন কি নাই, ইহা ইন্দ্রিয়দের বুঝিবার সাধ্য নাই। ইন্দ্রিয়ের সহিত বিষয়ের সংস্পর্শ হওয়াতে তদ্বিষয়ক বুদ্ধি উৎপন্ন হয়। কিন্তু তিনি অতীন্দ্রিয়, বিদিত অবিদিত বা অস্তি নাস্তি উভয় প্রকার বুদ্ধিরই অতীত। তিনি—

“অশব্দমস্পর্শমরূপমব্যয়ং

তথারসং নিত্যমগন্ধবচ যৎ।

অনাগ্ননস্তং মহতঃ পরং ক্ৰেবং

নিচায্য তন্মৃত্যুমুখাৎ প্রমুচ্যতে ॥”

তিনি শব্দশূন্য এবং শব্দেরও অগ্রাহ, তিনি রূপশূন্য ও অস্পর্শ, তিনি রস ও গন্ধশূন্য। ইন্দ্রিয়েরা যে স্বরূপকে গ্রহণ করে ও বুঝিতে পারে, তাহার মধ্যে কোনটিই তিনি ন'ন, অথচ তিনি আছেন, এত ক্ৰেব আর কিছু নহে, তিনি অনাদি, অনন্ত, সর্ববাপী হিরণ্যগর্ভ অথবা প্রকৃতি হইতেও শ্রেষ্ঠ। ইন্দ্রিয়গণ্য বিষয়ের স্থায় চকল নহেন। তিনি নিত্য একরূপ। সেই ব্রহ্মকে 'নিচায্য' নিশ্চয় করিয়া, ইহা অপেক্ষা শ্রেষ্ঠ কিছু নাই, ইহাই আমার পরম আশ্রয়, এইরূপ যিনি স্থির করিয়াছেন তিনিই সংসার হইতে মুক্তি লাভ করেন। এই আত্মা—

“অণোরণীযান্ মহতো মহীয়ান্

আত্মাস্ত জন্তোনিহিতো গুহায়াম্।

তমক্রতুঃ পশুতি বীতশোকো

ধাতুপ্রসাদান্নহিমানমান্ননঃ ॥

তিনি অতি সূক্ষ্ম পরমাণু হইতেও সূক্ষ্মতর অর্থাৎ জ্ঞানেন্দ্রিয়ের অতীত এবং আকাশাদি মহান পদার্থ হইতেও বৃহত্তর অর্থাৎ দেশ কালাদির অতীত। এই যে চিন্মাত্র আত্মা ইনি জীবের “গুহায়াম্” বুদ্ধির অভ্যন্তরে অবস্থিত, সাধারণ বুদ্ধির অগম্য। তবে তাঁহাকে দেখিতে পায় কে? যিনি অক্রতু অর্থাৎ কামনারহিত, বীতশোক—অর্থাৎ দুঃখাদি রহিত, এরূপ ব্যক্তি “ধাতু-প্রসাদাৎ”—অর্থাৎ শরীরধারক ইন্দ্রিয়াদি নিশ্চল বা প্রসন্নভাবে হইলে (স্থির হইলে), সেই নির্বিষকার বিশুদ্ধ চৈতন্য আত্মাকে সাক্ষাৎ করেন। অর্থাৎ গভীর ধ্যানে যখন চিত্ত নিষ্কম্প দীপশিখার স্থায় স্থির হইয়া যায়, সেই সুখময় সময়ে আত্মা স্বতঃ প্রকাশিত বলিয়া অনুমিত হ'ন।

“নায়মাত্মা প্রবচনেন লভো

ন মেধয়া ন বহুনা শ্রুতেন।

যমেবৈষ বৃণুতে তেন লভ্য-

স্তস্মৈষ আত্মা বিবৃণুতে তনুং স্বাম্ ॥”

এই আত্মা কেবল শাস্ত্রাধ্যয়ন দ্বারা লভ্য নহেন, বা কেবল তীক্ষ্ণ বুদ্ধি দ্বারাও হইবার নহেন, অথবা বহুবার বহু জ্ঞান কথা শ্রবণের দ্বারাও তাঁহাকে কেহ পায় না। কারণ আমাদের ভো দৌড় এই ইন্দ্রিয় মন ও বুদ্ধিগুলি লইয়া। ইহারা থাকিতে অভিমান যায় না, অভিমান না গেলে তিনি ধরা দেন না। এই আত্মা যাঁহাকে প্রসন্ন হইয়া বরণ করেন অর্থাৎ যে উপাসকের

তাহাকে লাভ করাই জীবনের একমাত্র অভীক্ষিত, আর কিছু সে চাহে না, সেই মুমুকু সাধকের হৃদয়ে একান্ত আকাঙ্ক্ষার ও ভক্তির বশবর্তী হইয়াই তিনি তাহার দ্বারা লভ্য হইলেন, এই আত্মা তখন স্বকীয় তত্ত্ব অর্থাৎ নিত্য শুদ্ধচেতন্য স্বরূপ সেই মুমুকু উপাসকের শুদ্ধ বুদ্ধিতে প্রকাশিত করেন। এইজন্ত একান্ত শরণাগতি ও ভগবৎকুপাই আত্মাসাক্ষাৎকারের উপায়।

এই আত্মার নামরূপগুণের দ্বারা স্বরূপ নির্ণয় করা যায় না, তিনি নির্বিশেষ ও স্বপ্রকাশ। কিন্তু তিনি সর্বাত্মক বিদু।

“সর্বতঃপাণিপাদং তৎ সর্বোতোহক্ষিণিরোমুখম্।

সর্বতঃশ্ৰুতিমল্লোকে সর্বমায়ুত্যা তিষ্ঠতি।

সর্বেন্দ্রিয়গুণাভাসং সর্বেন্দ্রিয়বিবর্জিতম্।

অসক্তং সর্বভূচ্চৈব নিগুণং গুণভোক্তৃ চ ॥”

তিনি সর্বব্যাপক, এক, অদ্বিতীয় অর্থাৎ যাহা কিছু সবই ব্রহ্ম। “সর্বং খন্দিদং ব্রহ্ম,” তিনি স্বরূপতঃ এক হইয়াও বহুরূপে আপনাকে প্রকাশ করিতে পারেন—ইহাই তাহার অদ্ভুত ও অচিন্ত্য শক্তি। তিনি জীবমাত্রেরই করণবর্গের শক্তিরূপে, এবং সমস্ত অচেতন পদার্থের অধিষ্ঠানরূপে থাকেন। তাহারই সত্তায় এই জড় চেতনাদি ভূতবর্গ অবস্থিতি করিতেছে। ইনি সর্বব্যাপী, মনবুদ্ধির অগোচর, শুদ্ধ চেতন্যস্বরূপ, ইনিই মুমুকুবর্গের জ্ঞেয় পরব্রহ্ম স্বরূপ। তাহার নিজের কোন ইন্দ্রিয়াদি নাই, কিন্তু তাঁর শক্তি ভিন্ন কোন ইন্দ্রিয়ই কিছু করিতে পারে না। ইন্দ্রিয় ও বুদ্ধির ক্রিয়া তাহারই শক্তিতে পরিচালিত হইতেছে। তিনি স্বয়ং নিষ্ক্রিয় হইলেও, সমস্ত কার্যেরই তিনি

মূলস্বরূপ। এইজন্তই শ্ৰুতি বলিলেন—“অপাণিপাদো জবনো এহীতা, পশুত্যচক্ষুঃ স শৃণোত্যকর্ণঃ” ইত্যাদি। তিনি আসক্তি রহিত, তথাপি তিনি সকলের পালক, তিনি নিগুণ অর্থাৎ সত্ত্বাদি গুণবর্জিত, তথাপি তিনি গুণভোক্তা অর্থাৎ তিনি না থাকিলে কোন বস্তুই উপলব্ধি হইত না, তিনি ভোক্তা, জ্ঞাতা। তাহাকে অবলম্বন করিয়া চরাচর সমস্তই বিত্তমান রহিয়াছে। শ্ৰুতি বলিতেছেন তিনি “সাক্ষী চেতা কেবলো নিগুণশ্চ”—তিনি সকলের সাক্ষী চেতন্যস্বরূপ অদ্বিতীয় ও গুণবর্জিত।

যাহা না থাকিলে কোন বস্তুই জ্ঞান আমাদের হইত না, সেই আশ্রয় বস্তুটি তাহা হইলে কি? সেই বস্তুটিই হইল সত্ত্বা বা অস্তিত্ব, ইহা বোধময়। এই সত্ত্বাকে আশ্রয় করিয়াই যাবতীয় চরাচর পদার্থের প্রকাশ হইতেছে। তাহা হইলে এই সত্ত্বাময় পদার্থটিই প্রকাশময় বা জ্ঞানময়। এই সত্ত্বা বা প্রকাশের অভাব হইলে অগ্র বস্তুর উপলব্ধিই থাকিবে না। অতএব সমস্ত বস্তুর মূলেই এই সত্ত্বাময় বা প্রকাশময় ভাবটি বিত্তমান আছে। কিন্তু এই সত্ত্বা বা জ্ঞান কোন দ্রব্য নহে, তাহা এই দৃশ্যবর্গ না থাকিলেও বর্তমান থাকে। এই দৃশ্যবর্গও সত্ত্বাদ্বারা অস্তিত্ব-সম্পন্ন হইয়াই জ্ঞানের বিষয় হইতেছে। অতএব সমস্ত বস্তুও সত্ত্বাময় বা বোধরূপ মাত্র। বোধাত্মিক কোন পদার্থের অস্তিত্ব থাকিতে পারে না। এই বোধভাব অজ্ঞান দ্বারা আচ্ছন্ন হইয়া খণ্ড খণ্ড রূপে ইন্দ্রিয়বোধগম্য হইলেই তখন তাহা অনাত্মক বিষয় বলিয়া উক্ত হয়।

আবার যখন বিবেক-বৈরাগ্যভ্যাসে এই অবিবেক নষ্ট হয়, তখন বহু-জ্ঞান লুপ্ত হয়, এবং তখনই এক অখণ্ড চৈতন্য সত্তা আপনার মহিমায় আপনি বিরাজ করিতে থাকেন। এই জ্ঞান গীতা তাঁহাকেই “জ্ঞানং জ্ঞেয়ং জ্ঞানগম্যং” বলিলেন। তিনি স্বয়ংই বোধস্বরূপ, আবার তিনিই শুদ্ধবুদ্ধি দ্বারা জ্ঞেয়রূপে উপলক্ষিত হ'ন। ভাগবতে নারদ বলিয়াছেন :—

“তস্মিন্‌স্তুদালঙ্করচেম্‌হামতে
প্রিয়শ্রবশ্চাশ্রিতা মতির্মম।
যয়াহমেতৎ সদসৎ স্বমায়য়া
পশ্যে ময়ি ব্রহ্মণি কল্পিতং পরে।”

শ্রীধরস্বামী—“প্রিয়ং শ্রবো যশ্চ তস্মিন্‌ ভগবতি লঙ্করচেম্‌ম অশ্রলিতা অপ্রতিহতা মতিরভবৎ। যয়া মত্যা পরে প্রপঞ্চাতীতে ব্রহ্মরূপে ময়ি সদসৎ স্ত্ব লং স্মস্বক্ব এতচ্ছরীরং স্বমায়য়া স্বাবিভূয়া কল্পিতং ন তু বস্ততোহস্তীতি তৎক্ষণমেব পশ্যে পশ্যামি। এবং শুদ্ধে স্বপদার্থে জ্ঞাতে দেহাদিকৃতবিক্ষেপনিবৃত্তে: তৎ কারণভূত-রজস্তমো নিবর্ত্তিকা দৃঢ়া ভক্তিজাতা।”

এই “অহং”ই প্রপঞ্চাতীত ব্রহ্মরূপে জ্ঞেয়, জ্ঞান প্রকাশেই এই শুদ্ধ চৈতন্যের প্রকাশ হয়। ভগবান বলিয়াছেন :—

“জ্ঞানেন তু তদজ্ঞানং যেষাং নাশিতমাত্মনঃ।
তেষামাদিত্যবজ্ জ্ঞানং প্রকাশয়তি তৎ পরম্ ॥”

আত্মজ্ঞান দ্বারা যাঁহাদের অজ্ঞান নাশিত হয়, আদিত্য যেমন তমোনাশ করিয়া সমুদয় বস্তু প্রকাশ করেন, সেইরূপ জ্ঞান তাঁহাদের অজ্ঞান বিনাশ করিয়া পরমাত্মাকে প্রকাশিত করে।

গীতা বলিয়াছেন এই জ্ঞানের তুল্য পবিত্র আর কিছুই নাই—
“নহি জ্ঞানেন সদৃশং পবিত্রমিহ বিদ্বতে।”

সৃষ্টি স্থিতি লয় ইহাও একমাত্র এই বোধ বা আত্মাকে আশ্রয় করিয়াই হয়। এইজন্ম তিনি “ভূততর্ভূ চ তজ্ জ্ঞেয়ং ঐসিঞ্চু প্রভবিঞ্চু চ”। সুবর্ণ না থাকিলে যেমন সুবর্ণকুণ্ডল হইতে পারিত না, সেইরূপ ব্রহ্ম না থাকিলে এ জগৎরূপ ফুটিতে পারিত না।

এই আত্মা অতি নিরভিমান পুরুষ। সেই জন্মই তিনি বলিয়াছেন—

“ন মাং কর্মাণি লিম্পান্তি ন মে কর্মাফলে স্পৃহা।”

অতএব এই সকল সৃষ্ট্যাদি কর্ম তাহাকে আবদ্ধ করিতে পারে না।

“সমোহং সর্বভূতেষু ন মে দ্বেষোহস্তি ন প্রিয়ঃ।”

তিনি সর্বভূতে সমদৃষ্টিসম্পন্ন, তাঁহার দ্বেষ বা প্রিয় কেহ নাই। তবে—

“যে ভজন্তি তু মাং ভক্ত্যা ময়ি তে তেষু চাপ্যাহম্ ॥”

যে তাঁহাকে প্রীতিপূর্বক ভজনা করে, সে তাঁহাকেই জীবনের ধ্রুব লক্ষ্য করিয়া তাঁহাতেই সদা সর্বদা মগ্ন হইয়া আছে, এই হেতু তিনিও তাহাতে আছেন। সূর্য্য সকলকে সমান ভাবে কিরণ দেন; যে আপনার গৃহের দ্বার ও গবাক্ষ খুলিয়া রাখে, মনে হয় তাহাকে যেন তিনি তাঁর কর-কিরণ দ্বারা আলিঙ্গন করিতেছেন। যে মূঢ়তা বশতঃ আপনার দ্বার মুক্ত করিয়া রাখে না, সে তাঁহার স্বতঃপ্রবাহিত করণাকিরণ হইতে চিরবঞ্চিত থাকে। এই মাত্র প্রভেদ। তিনি আবার অধিযজ্ঞ স্বরূপ, অর্থাৎ তাঁহার অধিষ্ঠাতৃ

হেতু জীবের কর্মানুরূপ ফল ভোগাদি হইয়া থাকে—“অধিষজ্জো-
হহমেবাত্র দেহে দেহভূতাং বর।” তিনি

“গতির্ভর্তা প্রভুঃ সাক্ষী নিবাসঃ শরণং সূহৃৎ।

প্রভবঃ প্রলয়ঃ স্থানং নিধানং বীজমব্যয়ম্ ॥”

তিনি সকলের গতি অর্থাৎ কর্মফল, তিনি সকলের ভর্তা বা
পালনকর্তা, তিনি প্রভু নিয়ন্তা, এবং তিনি আমার সকল কর্মের
সাক্ষী জ্রষ্টা, তাঁহার চক্ষু এড়াইবার জো নাই। তিনি আমার
নিবাস আশ্রয় স্থান, আমার শরণ রক্ষক এবং সূহৃৎ। তিনি
আমার শ্রষ্টা, সংহর্তা এবং তিনি আমার স্থিতি স্থান এবং তিনিই
আমার অবিনাশী অব্যয় বীজ।

তাঁহার নিকট যে ব্যক্তি যে যে ভাবনা লইয়া উপস্থিত হয়,
তিনি কল্পতরুর মত তাঁহার সেই সেই অভীষ্ট পূর্ণ করেন। তিনি
অন্নহীনের নিকট মা অন্নপূর্ণা, মোহাদি রিপুত্রাসিত জীবের নিকট
তিনি সাক্ষাৎ দৈত্যদর্পবিনাশিনী ভক্তাভয়-দায়িনী মা কালিকা,
তিনি রোগাতুর আর্তের রোগাপহারক বাবা তারকনাথ, তিনি
শ্রষ্টারূপে ব্রহ্মা, পালকরূপে বিষ্ণু, সংহর্তারূপে মহেশ্বর। তিনিই
মোহবিভ্রান্ত পাশবন্ধ অসংখ্য জীবশ্রেণী, আবার তিনিই ভববন্ধন-
খণ্ডনকারী পরমশিবরূপী জগদগুরু। তিনিই একমাত্র পরমানন্দ,
রসনিলয়, তিনিই প্রেমিক ভক্তের মনোবিনোদকারী, মদন-
মনোহারী, ভুবনমোহন শ্রীকৃষ্ণ। তিনিই অন্তর্ধ্যামিরূপে সকলের
হৃদয়ে অধিষ্ঠিত—

“তমিহমহমজং শরীরভাজাং

হৃদি হৃদি ধিষ্ঠিতমাত্মকল্পিতানাং।”

তিনিই স্বয়ং জন্মরহিত রহিয়াও, শরীরধারীদিগের প্রত্যেক
হৃদয়ে অহংরূপে বা অন্তর্ধ্যামিরূপে অবস্থিতি করিতেছেন। তিনিই
বোধরূপে চরাচর জগতের অস্তিত্বের মূলে বিদ্যমান। প্রত্যেক
বস্তুর যে জ্ঞান হইতেছে সেই বোধরূপের বোদ্ধা, জ্রষ্টা, বা
চেতয়িতা, তিনিই আত্মা।

তাঁহার সত্ত্বাময় অস্তিত্বের কোন সময়ে হানি ঘটে না।
আমাদের এমন কোন জ্ঞান হইতে পারে না যাহা দ্বারা এই
সত্ত্বা বা জ্ঞান প্রকাশিত না হয়। এই সত্ত্বাকে ছাড়িয়া দিলে কোন
বিশিষ্ট বস্তুই আমাদের জ্ঞানের বিষয় হয় না। এই সত্ত্বা বা
জ্ঞান একই পদার্থ। ইহা স্বয়ংপ্রকাশ, ইহার প্রকাশের জন্ত
কারণান্তরের অপেক্ষা নাই। আমরা যাহা কিছু দর্শন করি, শ্রবণ
করি, আশ্বাদন করি বা স্পর্শ করি, এ সমস্তই আমাদের জ্ঞানের
বিষয় না হইলে উহাদের অস্তিত্বই আমরা টের পাইতাম না।
সুতরাং পদার্থ সমূহের মধ্যে সাধারণ বা সামান্য পদার্থ হইল
জ্ঞান। এই সত্ত্বাসামান্য জ্ঞান পদার্থ হইতে জ্ঞানের বিষয়গুলিও
একেবারে অভিন্ন। তবে মনে হইতে পারে, ঘটও জ্ঞানের
বিষয়, পটও জ্ঞানের বিষয়, তবে ঘট ও পটের পৃথক অস্তিত্ব
বা বোধ হয় কেন? এই পৃথক জ্ঞানের কারণই হইল মায়া।
এই মায়া যে কিছু একটা অনাসৃষ্টি বস্তু তাহা নহে, ইহা
তাঁহারই স্বকীয় শক্তি। ইহার দ্বারাই জগৎ পুনঃ পুনঃ
নির্মিত ও বিধ্বস্ত হয়। ভগবান্ বলিতেছেন—

“প্রকৃতিং স্বামবষ্টভ্য বিশ্বজামি পুনঃ পুনঃ।

ভূতগ্রামমিমং কৃৎস্নমবশং প্রকৃতের্বশাৎ ॥”

অসঙ্গ নির্বিকার আত্মা কিরূপে বিশ্ব সৃজন করেন তাহাই বলিতেছেন—আমার স্বকীয় শক্তিকে বশীভূত করিয়া, প্রলয়ে লীন প্রাণীবর্গকে পুনঃ পুনঃ সৃজন করি।

তঁার এই অলৌকিকী মায়া অত্যন্ত হস্তুরা, তাই জীবের পুনঃ পুনঃ জন্ম মরণের এবং এই সংসার গতির শেষ হয় না। তবে উপায়? ভগবান্ বলিয়াছেন—

“দৈবী হেবা গুণময়ী মম মায়া ছরত্যয়া।

মামেব যে প্রপত্তস্তে মায়ামেতাং তরন্তি তে ॥”

সবাদি গুণবিকারময়ী মায়া স্ফুস্তুরা হইলেও, যে মায়াবীর শরণাগত হয়, যে তাঁহাকে ভজনা করে, সে এই সর্বভূতচিন্ত-বিমোহিনী মায়া উত্তীর্ণ হইতে পারে। অর্থাৎ তাহারই সংসারবন্ধ নাশ হয়। সংসারবন্ধন নাশ হইলে সে দেখে কি? সে নানা হু দেখে না। নানা ভাব নানা জীব লইয়াই জগৎ, যে তাঁহাকে দেখে সে আর এই জগৎকে দেখে না। সে তাঁহাকে কিরূপ দেখে? এক অখণ্ড সৎ পদার্থরূপে তাঁহাকে দেখে। আমাদের এই যে যে নানা হু বোধ, এই যে পৃথক্ জ্ঞান, ইহা তাঁহার মায়াক্রম প্রভাবেই উদ্ভিত হয়। যেমন গুস্তিতে রক্ততরঙ্গ হইলেও গুস্তি গুস্তিই থাকে, তদ্রূপ মায়া প্রভাবে ব্রহ্মে জগদ্ভ্রম হইলেও তাহা ব্রহ্মরূপেই নিরন্তর বর্তমান আছে, জগৎরূপে পরিণত হয় নাই। এই জগৎরূপ বা নানা হু দেখিবার কারণই মায়াক্রম। নচেৎ যাহা কিছু দৃষ্ট শ্রুত বা স্পৃষ্ট হউক, তাহা পরম সত্ত্বাময় ব্রহ্মপদার্থ হইতে অতিরিক্ত নহে। মায়ার প্রভাবে এইরূপ নানা হু দর্শন হয়। মায়ার দুইটি শক্তি, একটি আবরণ ও দ্বিতীয়টি বিক্ষিপ।

আবরণ শক্তির দ্বারা ব্রহ্মের স্বরূপ আচ্ছাদিত হইলে সে সম্বন্ধে আমাদের কোন বোধের উদয় হয় না। কিন্তু সঙ্গে সঙ্গে বিক্ষিপ শক্তি দ্বারা ব্রহ্মে সংসার হু বা বহু হু আরোপিত হয়। তাহার ফলে সেই এক অখণ্ড আত্মা অসংখ্যরূপে দৃষ্ট হয়। কিন্তু আমাদের এই যে বহু হুের জ্ঞান ইহা কোন কোন অবস্থাকে আশ্রয় করিয়া উদয় হইতেছে? জাগরণ ও স্বপ্নাবস্থাতেই এই বহু হুের স্কুরণ হয়। কিন্তু সুবৃষ্টির গাঢ় তমসচ্ছন্ন অবস্থায় আত্মসত্তার সমস্ত প্রকাশ যেন বিলুপ্ত হয়। মনে রাখিতে হইবে এই যে জাগ্রত, স্বপ্ন, সুবৃষ্টি, ইহার আত্মার অবস্থাত্রয়, কিন্তু ইহার আত্মা নহে। ইহারাই মায়ার বিক্ষিপ ও আবরণশক্তি।

কিন্তু এই মায়া ব্রহ্মকে সম্পূর্ণ আচ্ছাদিত করিতে পারে না। যেমন মেঘাবৃত সূর্যালোক তীক্ষ্ণভাবে প্রকাশিত হইতে পারে না, তদ্রূপ মায়াক্রম আত্মারও প্রকাশ স্পষ্ট হয় না। অখণ্ড বস্তুর উপর স্থানে স্থানে আচ্ছাদন পড়িলে তাহা যেমন বহুরূপ ও খণ্ডীকৃতভাবে দেখা যায়, সেইরূপ আত্মাতে মায়ার আবরণ থাকায়, তাহা অসংখ্য খণ্ড খণ্ড রূপে প্রকাশিত হওয়ায় নানা হুের বোধ হয়। সেই জন্মই এত ধাঁধা লাগে। অগণ্য পাত্ৰস্থ জলে সূর্যের অগণ্য প্রতিবিম্ব পড়ে, কিন্তু সূর্য্য সেই এক। তদ্রূপ এই মায়ার আবরণে দেহাদি ঘট। ঘটস্থিত জলে সূর্যের প্রকাশের ঞ্চায় দেহস্থিত বুদ্ধিতে আত্মার প্রতিবিম্ব পড়িয়া সেই এককে বহুরূপে দেখায়। পৃথক্ পৃথক্ ঘটস্থিত আকাশকে পৃথক্ মনে করিলেও আকাশ যেমন ভিন্ন হয় না, তদ্রূপ বুদ্ধিতে প্রতিবিম্বিত আত্ম-চৈতন্য পৃথক্ মনে হইলেও প্রকৃত পৃথক্ নহে।

“ঘটে ভিন্নে ঘটাকাশ আকাশে লীয়তে যথা ।

দেহাভাবে তথা যোগী স্বরূপে পরমাশ্রমি ॥”

যখন যোগীর দেহভাবনা বিদূরিত হয়, তখন তিনি পরমাশ্র-
মরূপে তাঁহার সহিত অভিন্নভাবে অবস্থিত হন ।

কিন্তু এই খণ্ড খণ্ড ভাবে প্রকাশ কালেও সত্ত্বাময় ভাবের
লোপ হয় না, নচেৎ প্রকাশই পাইতে পারিত না । সুষুপ্তির
মোহময়ী অবস্থাতেও এই অসংখ্য খণ্ডজ্ঞান আচ্ছন্ন হইলেও
সত্ত্বায় সাক্ষিস্বভাবের তখনও অভাব হয় না । জাগরণের বিলাস-
বেগ ও অসংখ্য চপলতার লোপ হইলেও সুষুপ্তির বিক্ষেপরহিত
যে শান্তভাব তাহার জ্ঞাতরূপেও সেই আশ্রিতেন্দ্র জাগ্রত ।
সুষুপ্তির সূথময় অবস্থায় যদি জ্ঞাতা কেহ না থাকিত, তবে
জাগ্রদাবস্থায় তাহার স্মৃতি থাকিতে পারিত না । কারণ অল্পভূত
বিষয়েরই স্মৃতি থাকে । যেমন ঐন্দ্রজালিকের ইন্দ্রজাল রচিত
কত অদ্ভুত অদ্ভুত দৃশ্য দর্শনকারীর চিত্তকে মুগ্ধ করিয়া রাখে,
সকলে সেই সকল বস্তুকে সত্যবৎ দেখে, কিন্তু সত্য বলিয়া কেহ
বিশ্বাস করে না, তদ্রূপ বহুভাবে বিকশিত এই জগৎ প্রপঞ্চ,
সেই পরম ঐন্দ্রজালিকের ইন্দ্রজালবিস্তার মাত্র, কিন্তু স্বরূপতঃ
তাহা মিথ্যা । এই জগদাদি প্রপঞ্চ মায়ারচনারূপে অসত্য
হইলেও তাহা যে জ্ঞানরূপে প্রকাশ পায়, সেই জ্ঞান অসত্য
নহে । জ্ঞান কখনই অসত্য হয় না, যাহা কিছুই জ্ঞান হউক,
জ্ঞানরূপে তাহা নিত্য সত্য । যেমন ঘটও জ্ঞানের বিষয়, পটও
জ্ঞানের বিষয়, এই দুইটির মধ্যে তাহাদের যে জ্ঞান তাহা সামান্ত
পদার্থ, তাহা সত্য, কিন্তু ঘট ও পট মিথ্যা ; তদ্রূপ জগতের

প্রতি বস্তুকে বস্তুরূপে যে বোধ তাহা সত্য, কিন্তু বস্তু সত্য নহে ।
যেমন স্বপ্নদ্রষ্টা সত্য, স্বপ্নও সত্য, কিন্তু স্বপ্নের বিষয় অসত্য ।

নামরূপাদিময় বস্তু মায়ারচিত, তাহা আশ্রয় উপাধিমাত্র ।
মায়ার প্রভাবেই তাহা বস্তুরূপে দৃষ্ট হয় এবং অপৃথক্ হইয়াও
আত্মা হইতে পৃথকরূপে দৃষ্ট হয় । সেই নামরূপময় উপাধি
মিথ্যা ।

“অস্তি ভাতি প্রিয়ং রূপং নাম চেতর্থপঞ্চকং ।

আত্মত্রয়ং ব্রহ্মরূপং জগদ্রূপং ততো দ্বয়ং ।”

জগতের প্রত্যেক দৃশ্যের মধ্যে এই পাঁচটি ভাব বিद्यমান ।
তন্মধ্যে অস্তি, ভাতি ও প্রিয়ভাব ব্রহ্মের জ্ঞাপক ; এবং নাম
ও রূপ, যদ্বারা এই চরাচর দৃশ্য জ্ঞাপিত হয়, তাহা মায়ার খেলা ।
সকল বস্তুরই নামরূপ ছাড়িয়া দিলে, তাহার যে অস্তি ভাতি ও
আনন্দদায়ক বর্তমান থাকে তাহা ব্রহ্মরূপ । তাই জ্ঞানীরা
বলেন,

“আবিচ্ছকং শরীরাদি দৃশ্যং বৃদ্ধুদবৎ ক্ষরম্ ।

এতদ্বিলক্ষণং বিদ্যাদহং ব্রহ্মেতি নির্মলম্ ॥”

জলে যেমন বৃদ্ধুদ জল হইতে স্বতন্ত্র নয়, এবং তাহার অস্তিত্ব
এতই ক্ষণস্থায়ী যে তাহার থাকা ও যাওয়া একই কথা, সেইরূপ
এই শরীরাদি দৃশ্য ক্ষয়ভাবাপন্ন হওয়ায়, তাহা নাই এইরূপই
মনে করিয়া লওয়া উচিত । গীতাতেও ভগবান তাই বলিলেন—

“নাসতো বিদ্বতে ভাবো নাভাবো বিদ্বতে সতঃ ।”

অসত্তের অস্তিত্ব নাই, সত্তের অবিদ্যমানতা নাই । সুতরাং
এই মায়ারচিত দৃশ্যপট অত্যন্ত অসত্য । কিন্তু এই দৃশ্যবর্গ

অমত্য হইলেও যাহাকে আশ্রয় করিয়া এই অনন্ত দৃশ্য-
তরঙ্গ সমুখিত বা প্রকাশিত হইতেছে—তাহা নিত্য সত্য
অপরিণামী বস্তু। এই সত্য বস্তুটিই আত্মা। ব্রহ্ম, জ্ঞান, আত্মা
এগুলি একেরই বিভিন্ন নাম। সমস্ত ঘটনার সাক্ষীরূপে এই
জ্ঞান চিরবিद्यমান। শৈশবে শৈশবের ঘটনাগুলিকে আত্মার
সহিত একীভূত ভাবে দেখিয়া আসিয়াছি, যৌবনে যুবাব ভাব
ও চিন্তাগুলিকে নিজের অস্তিত্বের সহিত অচ্ছেদ্য জড়িতবৎ
দেখিয়া আসিয়াছি; আবার এই প্রৌঢ়াবস্থা আসিয়াছে, ইহাকেও
এখন আমার চৈতন্যের বিশেষ বিকাশের সহিত অভেদ ভাবে
মিলিত রূপেই দেখিতেছি। আজ আর সেই শৈশবের বা
যৌবনের অবস্থাগুলি নাই, তাহারা কোন্ অতীতগর্ভে বিলীন
হইয়া গিয়াছে; কিন্তু যাহাকে অবলম্বন করিয়া এই অবস্থাগুলি
বিद्यমান ছিল সেই আশ্রয়, সেই সত্তা, সেই আমি এখনও
বর্তমান, এখনও সেই শত শত অতীত ঘটনার ও তাহাদের স্মৃতির
সাক্ষীরূপে ‘অহং’ বিद्यমান। তখন সেই অবস্থাগুলির সঙ্গে
আপনাকে অবিভাজ্যরূপে যেন মিলিত দেখিয়াছিল, এখন সেই
অবস্থাগুলি শুষ্ক পত্রের গ্রায় তাহা হইতে খসিয়া পড়িয়াছে।
আবার এখন এই প্রৌঢ়াবস্থা সেই “আমি”কে আলিঙ্গন করিয়া
এক হইয়া আছে, তাহাও আবার কোন দিন ঝটিকাতাড়িত পত্রের
গ্রায় কোথায় অদৃশ্য হইয়া যাইবে। এই কতশত বিবিধ
অবস্থার পরিবর্তন হইয়া যাইতেছে, কিন্তু সেই অবস্থাগুলির
জ্ঞাতা বা সাক্ষী যে “আমি” তাহার কোন পরিবর্তন হয় নাই।
কত অবস্থার পরিবর্তন, কত বিপর্দায়, কত কত অবস্থাকে ভুলিয়া

পর্যন্ত গিয়াছি, কিন্তু সেই সকল অতীত শত অবস্থার এবং
এখনকার বর্তমান অবস্থার সাক্ষী বা জ্ঞাতা সেই এক অখণ্ড
জ্ঞানস্বরূপ আত্মা বা আমি রহিয়াছি। এই আত্মার কখনও
অভাব বোধ হইল না; কেননা, আমি নাই, এ বোধ কখনও
কাহারও হয় না। আমি বা দেহীর যেমন জাগ্রৎ, স্বপ্ন, সুষুপ্তি
অবস্থা হয়, তেমনই দেহের বাল্য যৌবন জরা হয়। জন্ম-মৃত্যুও
এইরূপ এক একটি দেহেরই অবস্থা মাত্র। সুতরাং আত্মতত্ত্ব
ব্যক্তি ইহাতে মুক্ত হ’ন না। ভগবান বলিয়াছেন—

“দেহিনোহস্মিন্ যথা দেহে কৌমারং যৌবনং জরা।

ভথা দেহান্তরপ্রাপ্তির্ধীরস্তত্র ন মুহুতি ॥”

এই দেহাভিমানী জীবের বাল্য যৌবন বার্দ্ধক্য প্রভৃতি
তিনটি অবস্থা দৃষ্টিগোচর হয়, উহা স্থূল দেহেরই অবস্থাত্রয়, দেহ-
নিবন্ধন ইহা ঘটিয়া থাকে। কিন্তু কৌমার কাল অতিক্রম হইলে
বা যৌবন অতিক্রম করিয়া বার্দ্ধক্যে সমুপস্থিত হইলে—আমিই
ছিলান, এবং আমিই আছি এই প্রত্যয়ের ব্যাভিচার দৃষ্ট হয় না।

স্থূল দেহের একটি অবস্থার পরিবর্তনের সঙ্গে সঙ্গে অল্প অবস্থা
উৎপন্ন হয়, তাহার সহিত “আত্মার” বা “আমির” কোন সম্বন্ধ
নাই। সেইরূপ দেহনাশেও যে দেহান্তর প্রাপ্তি হয়, তাহাও লিঙ্গ-
দেহ নিবন্ধন। আত্মার তাহাতে নাশ হয় না। বাল্যের সংস্কার
যেমন যৌবনে থাকে, যৌবনের সংস্কার বার্দ্ধক্যে থাকে, তদ্রূপ
দেহান্তরের সংস্কার দেহেতে থাকে। বাল্য গিয়া যৌবন আসিলে
যেমন আমরা বিহ্বল হই না, তেমনই আত্মার স্থূল উপাধি
দেহ নষ্ট হইলে জ্ঞানীগণ অভিভূত হ’ন না। আচাৰ্য্য শঙ্কর

বলিয়াছেন, ঘটদির উৎপত্তি-বিনাশে যেরূপ আকাশের উৎপত্তি বিনাশ হয় না, কারণ আকাশ নিত্য বর্তমান, সেইরূপ দেহের উৎপত্তি-বিনাশ হইলেও, আত্মা-স্বরূপ আমরা বর্তমান থাকিব।

এই আত্মা শরীর নহে, ইন্দ্রিয় বা মনও নহে। দেহ, ইন্দ্রিয় ও মনের অসংখ্য পরিণাম লাভ হইতেছে, কিন্তু আত্মা সেই সকল বিভিন্ন পরিণামের জ্ঞাতা, এই এক চিরনির্বিষ্কার পুরাণপুরুষ :—

“নিত্যঃ সর্বগতঃ স্থাণুরচলোহয়ং সনাতনঃ।”

ইনি নিত্য শুদ্ধ অপাপবিদ্ধ! দেহেইন্দ্রিয়ের জড়তা ইঁহাকে স্পর্শ বা কলুষিত করিতে পারে না :—

“অহমাকাশবৎ সর্ববহিরন্তর্গতোহচ্যুতঃ।

সদা সর্বসমঃ শুদ্ধো নিঃসঙ্গো নির্মলোহচলঃ ॥

শুদ্ধং বুদ্ধং তদ্বসিদ্ধং পরং প্রত্যগখণ্ডিতম্।

স্বপ্রকাশং পরাকাশং ব্রহ্মৈবাৎ ন সংশয়ঃ ॥

নিগুণো নিষ্ক্রিয়ো নিত্যো নির্বিষকলো নিরঞ্জনঃ।

নির্বিষ্কারো নিরাকারো নিত্যমুক্তোহস্মি নির্মলঃ ॥”

তাই বিবেকী পুরুষ এই অহং বা আমি-কে অন্বেষণ করিতে গিয়া দেখিলেন—এই মন বুদ্ধি অহঙ্কার, এই শরীর এবং তাহার বিভিন্ন আচারগুলি কিছুই আমি নহি। আমাকে অসৎ-এ ঘেরিয়া আছে, আমাকে অজ্ঞানে আচ্ছন্ন করিয়া আছে, জন্ম মৃত্যু জরা শোকে আমাকে বিহ্বল করিয়া আছে। এই অনন্ত পরিবর্তনশীল সংসারচক্র যে কেন্দ্রকে অবলম্বন করিয়া নিত্য বিঘূর্ণিত হইতেছে, সেই নিত্যসত্য চির অবিনাশী আশ্রয় কেন্দ্রই একমাত্র সদ্বস্ত, এবং ‘আমি’ ভাহাই। তবে কেন

আমি মিথ্যা বস্তুকে আঁকড়িয়া পড়িয়া বিভীষিকা দেখিতেছি? এই অবস্থা সম্যক্ বুঝিবামাত্রই সে জীবন পরিহার করিয়া ভূমার মধ্যে প্রবেশ করে এবং তখন এই দেহাভিমান, দৃশ্যজগৎ সমস্তই স্বপ্নের স্তায় অদৃশ্য হইয়া যায়। তখন সেই সম্যক্ জাগরণের ক্ষেত্রে জীব স্থিতি লাভ করিয়া আনন্দে উন্মত্ত হইয়া মুক্ত-কণ্ঠ বিহগের স্তায় ঘোষণা করে :—

“মনোবুদ্ধ্যাহঙ্কারচিত্তানি নাহং

ন চ শ্রোত্রজিহ্বে ন চ শ্রাণনেত্রে।

ন চ ব্যোম ভূমিন তেজো ন বায়ু-

শ্চিদানন্দরূপঃ শিবোহহং শিবোহহম্ ॥

অপাণিপাদোহহমবাগচক্ষু-

রপ্রাণ এবাস্ম্যমনা হুবুদ্ধিঃ।

ব্যোমেব পূর্ণোহস্মি বিনির্মলোহস্মি

সদৈকরূপোহস্মি চিদেব কেবলঃ।

ন মেহস্তি দেহেইন্দ্রিয়বুদ্ধিযোগো

ন পুণ্যলেশোহপি ন পাপলেশঃ।

ক্ষুধাপিপাসাদি ষড়্ স্মিদূরঃ

সদা বিমুক্তোহস্মি চিদেব কেবলঃ।

বাচঃ সাক্ষী প্রাণবৃত্তেষ্ট সাক্ষী

বুদ্ধেঃ সাক্ষী বুদ্ধিবৃত্তেষ্ট সাক্ষী

চক্ষুঃ শ্রোত্রাদীন্দ্রিয়াণাঞ্চ সাক্ষী

সাক্ষী নিত্য প্রত্যগেবাহমস্মি ॥

দেহাত্মহাৎ ন মে জন্মজরাকার্ষ্যলয়াদয়ঃ।

শব্দাদিবিষয়ে: সঙ্গোনিরিন্দ্রয়তয়া ন চ ॥

অমনস্তান্ন মে দুঃখরাগদেবভয়াদয়ঃ ।

অপ্রাণোহমনাঃ শুভ্র ইত্যাদি শ্রুতিশাসনাৎ ॥

অহো চিন্মাত্রমেবাহিমিত্রজালসমং জগৎ ।

ততো মম কথং কুত্র হেয়োপাদেয়কল্পনা ॥”

“যো বৈ সর্ব্বাশ্রকো দেবো নিষ্কলো গগনোপমঃ ।

স্বভাবনির্মলঃ শুভ্রঃ স এবাহং ন সংশয়ঃ ॥”

“আত্মৈব কেবলং সর্ব্বং ভেদাভেদো ন বিদুতে ।

অস্তি নাস্তি কথং ক্রয়াদ্ বিস্ময়ঃ প্রতিভাতি মে ॥”

“মায়াপ্রপঞ্চরচনা ন চ মে বিকারো

কৌটিল্যদস্তরচনা ন চ মে বিকারঃ ।

সত্যানুভেতি রচনা ন চ মে বিকারো

জ্ঞানামৃতং সনরসং গগনোপমোহং ॥”

“দিব্যো হৃমূর্ত্তঃ পুরুষঃ সবাছাভ্যস্তরো হৃঙ্গঃ ।

অপ্রাণো হমনাঃ শুভ্রো হৃক্ষরাৎ পরতঃ পরঃ ॥”

“যস্ম সন্নিধিমাভ্রৈণ দেহেন্দ্রিয়মনোধিয়ঃ ।

বিষয়েষু স্বকীয়েষু বর্ত্তন্তে প্রেরিতা ইব ॥”

আত্মার এই প্রকাশময় বা সত্ত্বাময় ভাব ছাড়া আর কোন স্বরূপে তাঁহাকে বুঝিবার উপায় নাই ।

“নৈব বাচা ন মনসা প্রাপ্তুং শক্যো ন চক্ষুশ্বা ।

অস্তীতি ব্রুবতোহস্মত্র কথং তদ্ব্যপলভাতে ॥”

বাক্য দ্বারা, মন দ্বারা বা চক্ষু প্রভৃতি ইন্দ্রিয় দ্বারা এই পর-
মাত্মা প্রাপ্তির যোগ্য নহেন । অতএব এই আত্মা “অস্তি”

অর্থাৎ আছেন, এইরূপ দৃঢ়নিশ্চয়ের সহিত বলিতে সমর্থ আত্মজ্ঞ
আচার্য্য ব্যতীত অন্য কোথায় সেই আত্মস্বরূপকে কিরূপে লাভ
করা যাইতে পারে ?

“অস্তীত্যেবোপলক্ষ্যবাস্তুত্বভাবেন চোভয়োঃ ।

অস্তিত্যেবোপলক্ষ্য তত্ত্বভাবঃ প্রসীদতি ॥”

অতএব প্রকৃতই আত্মা আছেন এইরূপ সুদৃঢ়নিশ্চয়ের সহিত
তাঁহাকে উপলক্ষি করা কর্তব্য । আত্মা আছেন এইরূপ উপলক্ষি-
কারীর বুদ্ধিতে আত্মার প্রকৃত নিত্য চৈতন্যস্বরূপ সুষ্পষ্টরূপে
প্রকাশিত হয় ।

“যদা সর্ব্বৈ প্রমুচ্যন্তে কামা যেহস্ম হৃদিস্থিতাঃ ।

অথ মর্ত্তোহমৃতোভবত্যত্র ব্রহ্ম সমশ্রুতে ॥”

যে সমস্ত কামনা মুমুক্শুর হৃদয় অধিকার করিয়া অবস্থিত,
তাহারা বিনষ্ট হইলেই মনুশ্য এই দেহেই জন্মমৃত্যুর অতীত
হইয়া ব্রহ্মস্বরূপতা প্রাপ্ত হইয়েন ।

এই সত্ত্বাময় বা প্রকাশময় জ্ঞান বস্তুটিই আমাদের ‘আমি’ ।
যাহা জ্ঞানস্বরূপ তাহাই ‘অহং’, তাহাই সত্ত্বা এবং তাহাই প্রকাশ-
স্বরূপ । যেমন জ্ঞান না থাকিলে কোন বস্তুরই প্রকাশ অনুভব
হইত না, তেমনই ‘অহং’কে বাদ দিলে কোনও জ্ঞানের উদয়
হইতে পারে না । এই জ্ঞানই পৃথক পৃথক বস্তুরূপে প্রকাশিত ।
‘অহং’ ও তদ্রূপ জ্ঞানের সহিত অভিন্নরূপে বিরাজিত । এই দৃশ্য
বস্তুও জ্ঞান বা ‘অহং’ হইতে পৃথক নয় । পূর্বেই বলা
হইয়াছে এই দৃশ্যপ্রপঞ্চের অধিষ্ঠান জ্ঞান । যেমন একটি
প্রস্তরের অতীত ও অনাগত রূপে সহস্র সহস্র দৃশ্য রচিত হইতে

পারে তদ্রূপ এই এক জ্ঞানকে আশ্রয় করিয়া ভূত ভবিষ্যতের সমস্ত বস্তুই বর্তমান আছে। এমন বস্তু নাই বাহা জ্ঞানের বিষয় নহে; যাহা জ্ঞানের বিষয় নহে সেরূপ বস্তু খুঁজিয়া পাওয়া অসম্ভব। অতএব সমস্ত বস্তুরই আশ্রয় জ্ঞান এবং সেই জ্ঞান হইতে তাহারা একেবারে অভিন্ন। যখন জ্ঞান পূর্বোক্ত অজ্ঞান দ্বারা আবৃত থাকে, তখন সেই এক অখণ্ড সত্তা অসংখ্য খণ্ডখণ্ডীকৃত রূপে দৃষ্ট হয়, কিন্তু বাস্তবিক তাহা অসংখ্য নহে, তাহা পূর্বেরই বলিয়া আসিয়াছি। এই খণ্ডীকৃত অসংখ্য জ্ঞানের বিলয় হইয়া যখন এক অখণ্ড জ্ঞানের প্রত্যয় হয়, তখনই তাহাকে স্বরূপ-বোধ কহে।

যদি কেহ মনে করে, নায়া যখন আত্মারই স্বকীয়ভাব, তখন ইহা আত্মাকে কখনও ছাড়িয়া থাকে না, অতএব নায়াকল্পিত অনাত্মভাব তো সঙ্গের সঙ্গী, তাহা হইতে মুক্তিলাভ কিরূপে সম্ভব হইতে পারে? মুক্তিলাভ অসম্ভব নহে। আত্মা প্রকাশরূপ কি না, তাই ইহাকে অজ্ঞান আবৃত করিলেও, প্রকাশশীল আত্মাই আত্মার আবরণকে ও সঙ্গ সঙ্গ আপনাকেও প্রকাশ করে। সূর্য্যকে প্রকাশ করিতে যেমন অন্ধ প্রকাশকের প্রয়োজন নাই, সেইরূপ আত্মাই আত্মার প্রকাশক। এই প্রকাশময় আত্মাই একমাত্র সদ্বস্তু এবং ইহাই নিখিল জগৎ প্রপঞ্চের অধিষ্ঠান। এই জ্ঞানের স্বরূপ বুদ্ধিতে পারিলেই, এই জ্ঞানের আবরণ অবিচার হস্ত হইতে মুক্তিলাভ করা যায়। যেমন রজ্জুর স্বরূপ জ্ঞাত হইলে, রজ্জু স্থিত অজ্ঞান নষ্ট হইয়া যায়, সেইরূপ অজ্ঞান লুপ্ত হইবার সঙ্গে সঙ্গেই আত্মার আবরণকারী অজ্ঞান আত্মাতেই

বিলীন হইয়া যায়, এবং অজ্ঞানকল্পিত জন্ম-মৃত্যু-জরা-ব্যাধিময় সংসারের সম্পূর্ণ বিলয়প্রাপ্তি ঘটে। যদিও এই ব্রহ্মতে তুমি-আমি অসংখ্য দৃশ্যপদার্থ সকলই ব্রহ্মসমুদ্রে বুদ্ধদের মত ফুটিয়া আছি মাত্র। কিন্তু বুদ্ধদেও যেমন সেই সমুদ্র-অতিরিক্ত কোন বস্তুবিশেষ নহে, এইরূপ চিন্তা করিতে করিতেই সমস্ত দৃশ্য ব্রহ্মময় হইয়া যায়।

যেমন সুবর্ণকুণ্ডলের সুবর্ণকে দেখিলে কুণ্ডলকে দেখা যায় না, তদ্রূপ ব্রহ্মকে দেখিলে আর এই জগৎরূপকে দেখা যায় না, এবং জগৎকে দেখিলে ব্রহ্মকে দেখা যায় না। কুণ্ডল যেমন স্বর্ণের উপাধি মাত্র, পৃথক কোন বস্তু নহে, তদ্রূপ জগৎ উপাধি মাত্র, ব্রহ্মাতিরিক্ত কোন বস্তু নহে। সেইজন্য ব্রহ্মাভ্যাস করিতে হইবে :—

“সর্ব্বাত্মকোহং সর্ব্বোহং সর্ব্বাতীতোহমহমদ্বয়ঃ।

কেবলাখণ্ডবোধোহং আনন্দোহং নিরন্তরম্ ॥”

সেই জন্ম অজস্র ব্রহ্মচিন্তা করিতে হয়। অজস্র ব্রহ্মচিন্তা দ্বারা জগৎ-জ্ঞান নষ্ট হইলে আত্মাই স্বয়ং প্রকাশ পাইতে থাকে। ঔষধের দ্বারা যেমন রোগ নষ্ট হয়, তেমনই ব্রহ্মের স্বরূপ চিন্তা দ্বারা অজ্ঞান-রোগ নষ্ট হইয়া যায়—

“এবং নিরন্তরং কৃত্বা ব্রহ্মৈবাস্মীতি ভাবনাম্।

হরত্যবিদ্যাবিক্ষেপান্ রোগানিব রসায়নম্ ॥”

জাগ্রদাবস্থায় যেমন স্বপ্নদৃষ্ট পদার্থের লোপ হয়, এবং তাহাদের লোপ হেতু মন ক্রিষ্ট হয় না, তদ্রূপ সমাধি সাধনে

প্রবুদ্ধ ব্যক্তির আর জগৎভ্রম থাকে না, এবং জগৎ নাই বলিয়া তাঁহার কোন শোকও হইতে পারে না।

এইরূপ আত্মদর্শন হইতেই জীবের ভববন্ধন কাটিয়া যায়।
ছান্দোগ্যোগ্যোপনিষদ্ বলিয়াছেন :—

“স বা এষ এবং পশুশ্বেবং মদ্বান এবং বিজানন্

আত্মরতিরাস্ত্রক্রীড় আত্মমিথুন আত্মানন্দো ভবতি।”

এই আত্মা দ্বারাই জগৎ ব্যাপ্ত। শ্রুতি বলিয়াছেন—

“ঈশাবাস্তমিদং সর্বং যৎকিঞ্চ জগত্যাং জগৎ।”

সুতরাং সর্বেশ্বরমনোবুদ্ধি দ্বারা যাহা কিছু অনুভূত হইতেছে তাহা ব্রহ্মই। তিনি সত্যস্বরূপ, জ্ঞানস্বরূপ, অনন্তস্বরূপ, এবং আনন্দস্বরূপ—“সত্যং জ্ঞানমনন্তং ব্রহ্ম” “আনন্দরূপমমৃতং যদ্বিভাতি”। ইহাই ব্রহ্মের স্বরূপ লক্ষণ। তাহাতে কোন প্রকার মিথ্যা নাই, কোন প্রকার জড়ত্ব নাই, কোন পরিচ্ছেদ নাই, কোন ছুঃখ নাই।

এখন প্রশ্ন আসিল, যখন ব্রহ্ম ব্যতীত কোন বস্তু নাই এবং যিনি ভূমানন্দ-স্বরূপ, তবে এ জগতে নিরানন্দ কেন, এ রোগ, শোক, মৃত্যু কেন? সচ্চিদানন্দ-স্বরূপ নিবিষ্কার ব্রহ্মে, এ বিকার লক্ষিত হয় কেন? ইহাই তাঁহার অঘটনঘটনপটীয়সী মায়াশক্তির প্রভাব। যাহা নাই তাহারই অস্তিত্ব দেখানো, ইহাই তো মহা ইন্দ্রজাল; এই ব্রহ্মই যখন স্বকীয় মায়াশক্তিকে আশ্রয় করিয়া এই ইন্দ্রজালকে বিস্তার করিয়া জগৎ প্রপঞ্চ কল্পনা করেন, তখনই তিনি রসিকশেখর নটচূড়ামণি বলিয়া ভক্তের নিকট অভিহিত হ'ন। এ খেলা যে তাঁ'র কেন, তাহা

কেহই বলিতে পারে না। যেখানে পৌঁছিয়া এ রহস্য জানা যায়, সেখানে পৌঁছিলে আর কেহ কিরিয়া আসে না; যদি বা আসে, সেখানকার কথা যথাযথ প্রকাশ করিয়া বলিতে পারে না, তাহা মুকের রসাস্বাদনের স্তায় মনুষ্যবুদ্ধির অগম্য হইয়া এক অদ্ভূত রহস্যরূপে চিরবর্তমান আছে। তাই জ্ঞানীরা বলিলেন, জগৎ কোথায়? জগৎ কেন দেখিতেছ? হোনার দিগ্ভ্রম হইয়াছে, রজ্জুতে সর্পভ্রম হইয়াছে, তুমি যে স্বয়ং তাই। যাহাকে অসংযম করিয়া কিরিতেছ, সে যে তুমিই—“তত্ত্বমসি”, তুমি এবং এ জগৎ যে ব্রহ্মনয়। স্বর্ণে কুণ্ডল রচিত হইয়াছে, তাই কুণ্ডল বলিয়া কোন পৃথক পদার্থ নাই, উহা স্বর্ণই। তদ্রূপ ব্রহ্মতে জগৎ কল্পিত মাত্র, উহা ভাল করিয়া জ্ঞানচক্ষু মেলিয়া দেখ, উহা ব্রহ্ম ছাড়া আর কিছুই নহে। তবে যে এই দৃশ্য জগৎ আর এই শরীরটা স্পষ্ট দেখিতে পাইতেছি ইহাকে ‘নাই’ বলি কি প্রকারে? জ্ঞানীরা বলিলেন, দেখ ভাবনা দ্বারা সব হয়। শূন্যে অট্টালিকা দেখা যায়, আকাশে হস্তী, অশ্ব, বৃক্ষ, পর্বতের চিত্র দেখা যায়, কিন্তু আসলে তাহারা কি সত্য বস্তু না তোমার কল্পনা? অবশ্যই স্বীকার করিবে, উহা তোমার কল্পনা। সেইরূপ এই জগৎকে কল্পনায় দেখিতেছ। তুমি বৃক্ষের শাখায় নিজের হাতে নিজে জড়াইয়া হাহাকার করিয়া কাঁদিতেছ এবং ভাবিতেছ যে, বৃক্ষ তোমাকে আটকাইয়া রাখিয়াছে। ভাবিয়া দেখ, বৃক্ষ তোমাকে কি প্রকারে আটকাইয়া রাখিবে? তুমি আপনিই বৃক্ষশাখায় আপনার হাত জড়াইয়া ভ্রমবশতঃ কাঁদিতেছ যেন সত্যই বৃক্ষ তোমাকে আটকাইয়া রাখিয়াছে।

কেবল তোমার বুদ্ধির দোষে এই অসত্যকে সত্য বলিয়া ভ্রম হইতেছে। তুমি একবার নিজেকে নিজে ভাবিয়া দেখ, তাহা হইলে দেখিবে তুমি যে আত্মা, তুমি যে চৈতন্য, তোমাকে কি এই দৃশ্যজ্ঞাদি আবদ্ধ করিতে পারে? ইহাই দেহভ্রম। জগৎভ্রম ছুটিবে কিরূপে? তাই জ্ঞানীরা চক্ষুতে আব্দুল দিয়া দেখাইয়া দিলেন—

“নাহং মাংসং ন চাস্থিনী দেহাদৃশ্যঃ পরোহহম্।

ইতিনিশ্চয়বানন্তঃ ক্ষীণাবিভ্রো বিমুচ্যতে ॥

কল্পিতৈবমবিদ্যোয়মনাস্ত্রাশ্চাভাবনাৎ।

পুরুষেণাপ্রবুদ্ধেন ন প্রবুদ্ধেন রাঘব ॥”

হে রাঘব, অপ্রবুদ্ধ পুরুষ দ্বারাই অনাস্ত্র-বিষয়ে আস্ত্র-ভাবনা দ্বারা এই অবিভাকৃত জগৎ কল্পিত হইয়াছে। জ্ঞানীদের এরূপ কল্পনা নাই, সূতরাং তাঁহাদের নিকট এ জগতের অস্তিত্বও নাই। অতএব ইহাই সর্বদা ভাবিতে থাক যে আমি মাংস, অস্থি বা দেহ নহি, আমি ইহার অতিরিক্ত। এইরূপ নিশ্চয়বানদের অবিভ্রা ক্ষীণ হইয়া আসে। অবিভ্রা ক্ষীণ হইয়া আসে বটে, কিন্তু মায়াকল্পিত জগৎ-লীলা যেমন চলিতেছিল, তেমনই চলিতে থাকে; কেবল ইহা যে সত্য নহে, ইহা যে মায়া, এই বুদ্ধি দৃঢ় হইয়া যায়।

ব্রহ্মদৃষ্টিসম্পন্ন পুরুষ কেমন ভাবে এই জগৎ ব্যাপারাদি দর্শন করিবেন, জ্ঞানগুরু বশিষ্ঠ রামচন্দ্রকে তাহা উপদেশ দিলেন—

“বহিঃ কৃত্রিমসংরম্ভো হৃদি সংরম্ভবর্জিতঃ।

কর্তা বহিরকর্তাস্তুলোকে বিহর রাঘব ॥

ত্যক্ত্বাহংকৃত্তিরশস্তমতিরাকাশশোভনঃ।

অগৃহীতকলঙ্কান্নো লোকে বিহর রাঘব ॥”

অদ্বৈত বেদান্ত মতে, ব্রহ্মে নানাঙ্ক কল্পিত হইতে পারে না। কারণ, ভেদ ও অভেদ এ দুটি পরস্পর অত্যন্ত বিরুদ্ধ। ভেদ তিন প্রকার, যথা স্বগত, স্বজাতীয় ও বিজাতীয়। ব্রহ্মের সহিত বৃক্ষশাখায় স্বগত ভেদ আছে, এবং একজাতীয় দুইটি ব্রহ্মের মধ্যে স্বজাতীয় ভেদ আছে এবং ভিন্নজাতীয় দুইটি ব্রহ্মের মধ্যে বিজাতীয় ভেদ আছে। ব্রহ্মের মধ্যে সেরূপ কোন ভেদ বর্তমান নাই। সূতরাং জগৎ ও জীব যে অন্ততঃ বৃক্ষ-শাখার মতই কিছু হইবে তাহাও বলিবার উপায় নাই। ব্রহ্মের মধ্যে স্বগত, স্বজাতীয় বা বিজাতীয় কোন ভেদই নাই, সেই জন্তই তিনি “একমেবাদ্বিতীয়ম্।” এই ব্রহ্মতত্ত্ব বুঝিবার জন্ত কত মত, কত সম্প্রদায়, কত না পুস্তক রচিত হইয়াছে, কিন্তু সেই অখণ্ড তত্ত্বকে কোন একটি মতবিশেষের মধ্যে আনিতে গিয়া, তাঁহাকে সঙ্কুচিত করা হইয়াছে, অখণ্ডিত রাখিতে কেহ পারে নাই। যাহাই হউক, লোকে আপন মতের দ্বারা তাঁহার স্বরূপ যাহাই নিরূপণ করিতে চেষ্টা করুক না, তিনি সেই চির নির্বিকার, অখণ্ড সৎ রূপেই নিত্যকাল বর্তমান আছেন; অচিন্ত্য মায়াশক্তি প্রভাবে তিনি প্রপঞ্চাকারে পরিণতবৎ দৃষ্ট হ'ন নাহ, কিন্তু স্বরূপতঃ তিনি প্রপঞ্চাতীত। তত্ত্ববিদেরা তাঁহাকে অদ্বয় জ্ঞানতত্ত্ব রূপে দেখেন, কেহ বা তাঁহাকে পরমাশ্রা ও কেহ বা তাঁহাকে ভগবান বলিয়া থাকেন।

নাম-রূপ দ্বারাই ব্রহ্ম জড় ও মলিন বলিয়া প্রতিভাত হন,

নাম-রূপকে তুলিতে পারিলেই ব্রহ্মের স্বচ্ছ নিশ্চল স্বরূপকে অবগত হওয়া যাইতে পারে। নাম-রূপ তো আর কোন সত্তা বস্তু নয়, সত্তাকে অবলম্বন করিয়াই নাম-রূপের প্রকাশ হয়। যখন ব্রহ্ম ব্যতীত আর কোন সত্তা নাই তখন সেই ব্রহ্মাশ্রিত নাম-রূপও ব্রহ্মাত্মক বলিয়াই বিবেচনা করিতে হইবে। এইরূপে জগৎ, জীব ও ব্রহ্মকে এক করিয়া জানার নামই ব্রহ্ম-জ্ঞান। ভাগবত বলিয়াছেন—“ইদম্ভূবিশ্বং ভগবান্‌বিতরঃ।” শ্রীধরস্বামী ইহার টীকায় লিখিয়াছেন :—“ইদং বিশ্বং ভগবান্‌ ইতর ইব যঃ স জীবোহপি ভগবান্‌। চেতনাচেতনপ্রপঞ্চস্তদ্ব্য-তিরেক্ষণ নাস্তি—স এবৈকস্তত্ত্বমিত্যর্থঃ।” এই জ্ঞান, বিচার ও ধ্যান দ্বারা প্রতিষ্ঠিত করিতে হয়। অজস্র ব্রহ্মচিন্তনের দ্বারা, জগৎ ও জীবের জড়ভাব বিগলিত হইয়া যায়, তখন শুদ্ধ চৈতন্য নিশ্চল ব্রহ্মভাবটিই প্রকাশ পাইতে থাকে, তখন সমস্তই ব্রহ্মের সচ্চিদানন্দ স্বরূপে প্রতিষ্ঠিত হয়। নানাভাব থাকিতে ব্রহ্মভাব আসে না, এই জগৎ সমস্ত ভাবকে ডুবাইয়া দিতে পারিলেই নিশ্চল ব্রহ্মভাব সমুৎপন্ন হয়। বিবেকচূড়ামণিতে আছে—

“অকৃৎস্না দৃশ্যবিলয়মজ্ঞান্বা তত্ত্বনাশুনঃ।

বাহ্যশব্দৈঃ কুতো মুক্তিরুক্তিমাত্রকলৈনুর্গাম্ ॥”

অর্থাৎ নামরূপময় জড়াদিবর্গ যতক্ষণ ইন্দ্রিয় প্রত্যয়ের বিষয়ীভূত থাকে, ততদিন বাক্য দ্বারা যতই জ্ঞানালোচনা করি না কেন, তাহা মিথ্যাভ্রমর ছাড়া আর কিছু নহে। অনেকে মনে করিবেন, তবে জড়ত্বলাভই কি ব্রহ্মজ্ঞানের শেষ ? ইহার

জগৎ এত সাধ্যসাধনার কষ্ট সহ্য করিয়া লাভ কি ? একটু আফিং, গাঁজা, বা মরফিয়া সেবন করিলেই তো এই অচৈতন্য ভাব আসিতে পারে। যখন শব্দ, স্পর্শ, রূপ, রস, গন্ধ কিছুই রহিল না, তবে রহিল কি ? কেবল শূন্য ? এই শূন্য লাভের জগৎই কি এত প্রয়াস ? না, তাহা নহে। সমাধি জড়তামাত্র নহে, উহা জড়াতীত শুদ্ধ চৈতন্য স্বরূপ। উহা স্বয়ং কোন ভাব নহে বটে, কিন্তু উহা অনন্ত ভাবের পূর্ণ উৎস। সে সময় এই নাম রূপময় জগতের জ্ঞান থাকে না বটে কিন্তু যে জ্ঞানের দ্বারা এই নামরূপময় জগতের জ্ঞান হয়, সেই জ্ঞানই স্বয়ং বর্তমান থাকে। কেবল তাহা বিশেষণ-রহিত, শুদ্ধ নিশ্চল জ্ঞান। পুনঃ পুনঃ তত্ত্ববিচার দ্বারা বৈরাগ্যোদয় হয়, এবং সেই বৈরাগ্য হইতে নিশ্চল শারদ জ্যোৎস্নার মত জ্ঞানের নিশ্চল কৌমুদীর বিকাশ হয়। তত্ত্ববিচার ও সম্যক্ বৈরাগ্যই ব্রহ্মজ্ঞানের হেতু। তত্ত্ব-বিচার দ্বারা জ্ঞানের উদয় হয় বটে, কিন্তু সেই জ্ঞানের পরি-স্থিতি নির্ভর করে, সম্যক্ বৈরাগ্য ও সাধনের উপর। শম, দম, তিতিক্ষা, উপব্রতি, এই সাধনচতুষ্টয়ের দ্বারা ধারণা সম্যক্ দৃঢ় হয়। নচেৎ ছিদ্রযুক্ত পাত্রে যেমন জল থাকিতে পারে না, তদ্রূপ সাধনচতুষ্টয়সম্পন্ন না হইলে জ্ঞানের ধারণা দৃঢ়ভূমি লাভ করিতে পারে না। পুনঃ পুনঃ বিষয় আসিয়া বিক্ষিপ্ত জন্মাইতে থাকে। একবার যাহা ধারণা হইল, তাহা পুনঃ পুনঃ বিচারের দ্বারা ধারণা করিতে হইবে, একবার যে স্থিতিলাভ হইল সাধনার দ্বারা সেই স্থিতিকে সম্যক্ আয়ত্ত করিয়া লইতে হইবে, নচেৎ এ অত্যন্ত শূন্যতত্ত্ব ধারণ করা কঠিন।

“অতীব সূক্ষ্মং পরমাত্মতত্ত্বং
ন স্থূলদৃষ্ট্যা প্রতিপত্তু মর্হতি ।
সমাধিনাত্যন্ত সূক্ষ্মং বৃত্ত্যা
জ্ঞাতব্যমার্ধৈরতিশুদ্ধবুদ্ধিভিঃ ॥”

ভাগবতে আছে :—

“সত্ত্বং বিশুদ্ধং বসুদেব শব্দিতং
যদীয়তে তত্র পুমানপার্বতঃ ।
সত্বে চ তস্মিন্ ভগবান্ বাসুদেবো
হৃদোক্কজ্ঞো মে মনসা বিধীয়তে ॥”

মহাদেব পার্শ্বতীকে বলিয়াছিলেন যে, বিশুদ্ধ সত্ত্বই বসুদেব, এবং সেই বিশুদ্ধ সত্ত্বই পরম পুরুষ বাসুদেব প্রকাশিত হন। এইজন্ত আমি মন দ্বারা ইন্দ্রিয়াতীত ভগবান বাসুদেবের সর্বদা ধ্যান করিয়া থাকি। অতএব সেই অদ্বয়জ্ঞানতত্ত্বই বাসুদেব।

সেই পরম জ্ঞানস্বরূপ যিনি ইন্দ্রিয়াতীত হইয়াও জ্ঞান, জ্ঞেয়, জ্ঞাতারূপে ইন্দ্রিয়জ্ঞানগম্য হইয়াছেন সেই জ্ঞানস্বরূপ পরমব্রহ্মকে নমস্কার।

অষ্টম অধ্যায়

ব্রহ্মবিজ্ঞা

যোগাভ্যাস

“নাস্তি যোগসমং বলং”—যোগবলের তুল্য আর বল নাই। এই বল কিসের জন্ত প্রয়োজন এবং তাহা কোথায় প্রয়োগ করিতে হইবে তাহাই দেখিতে হইবে। সূচিকিৎসক যেমন রোগীর রোগনির্ণয় করিয়া তাহার নিবারণের জন্ত ঔষধ প্রয়োগ করেন, এবং রোগ নিবারিত হইলে যে সকল স্বাস্থ্যলক্ষণ রোগমুক্ত শরীরে প্রকটিত হয়, তাহা সম্যক্ বুঝাইয়া দেন, তদ্রূপ ভবব্যাধির চিকিৎসক প্রাচীন ঋষিরা রোগের লক্ষণ ও স্বাস্থ্যের লক্ষণ এবং রোগ নিবারণের উপযোগী ঔষধের ব্যবস্থা করিয়া ভবরোগকাতর জীবের ত্রাণের উপায় করিয়া গিয়াছেন।

পূর্বে বলা হইয়াছে, অসম্যক্ জ্ঞান ও ভ্রান্তদৃষ্টি বশতঃই জীবের বন্ধনদশা প্রাপ্তি হইয়াছে এবং অজ্ঞান হেতু পুনঃ পুনঃ সংসারে যাতায়াত, জন্ম মরণ প্রভৃতি ক্লেশ ও তাপ ভোগ— ইহাই দুঃখময় সংসারের চিরন্তন ইতিহাস, ইহাই ভবরোগ। আমরা সকলেই রোগাক্রান্ত জীব। ভ্রান্তদৃষ্টি ও অসম্যক্ জ্ঞানই এই রোগের হেতু, সুতরাং সম্যক্ জ্ঞান ও অভ্রান্তদৃষ্টিই এই ভবরোগের মহা মর্হৌষধ। ত্রাস্তি, আসক্তি, ক্লেশ, বিক্ষিপ্ত-চিন্ততা, অর্ধৈর্ধ্য, এইগুলি রোগের লক্ষণ। তাই পরম কারুণিক

ভিব্ধকপ্রবর মহর্ষি পতঞ্জলি বলিলেন—“বিবেকখ্যাতিরবিপ্লবাহানোপায়ঃ।” অবিপ্লবাহ বিবেকখ্যাতিই হানের উপায়, অর্থাৎ সেই বিশুদ্ধ জ্ঞান যখন মিথ্যা জ্ঞানের দ্বারা অবিপ্লাবিত হয়, অর্থাৎ ভগ্ন না হয়,—যে পরমজ্ঞান ও বিবেক-বৈরাগ্যের আর চ্যুতি হইবার সম্ভাবনা থাকে না—যাহার বলে মিথ্যা জ্ঞান দন্ধবীজবৎ হইয়া যায়—তাহাই প্রকৃত মুক্তির উপায়। ইহা কিরূপে লাভ করিতে হইবে? “যোগাঙ্গানুষ্ঠানাদশুদ্ধিক্ষয়ে জ্ঞানদীপ্তিরাবিবেকখ্যাতেঃ।”—বিবেকখ্যাতিই হানোপায় বলিয়া সিদ্ধ হইল, কিন্তু সাধন ব্যতীত তো সিদ্ধি হয় না, তাই বলিতেছেন যোগাঙ্গানুষ্ঠান হইতে অশুদ্ধিক্ষয় হইলে বিবেকখ্যাতি পর্য্যন্ত জ্ঞানদীপ্তি হইতে থাকে। কৰ্ম ও সংস্কার অজ্ঞানমূলক। যেমন সাধন-সমূহের অনুষ্ঠান করা যায় সেইরূপ অশুদ্ধি ক্ষীণত্ব প্রাপ্ত হয় অর্থাৎ তাহা ক্ষীণ হইয়া থাকে, এবং অশুদ্ধির ক্ষীণতার সহিত জ্ঞানদীপ্তি বৃদ্ধি পাইতে থাকে। চিন্তে যে অবিশ্রান্ত বৃত্তির উদয় হইতেছে ইহাই অজ্ঞান সংসারসমুদ্রের ছুরতিক্রম্য ভয়াবহ বিক্ষোভিত বীচিম্বালা। ইহার যেন আর পার নাই। এই আসিতেছে, এই আসিতেছে, নিবৃত্ত হইবার নামটি নাই। দেহে মিথ্যাভিমানকে ঘেরিয়া ঘেরিয়া মোহের আবর্ত সৃষ্ট হইতেছে—যে তাহাতে পড়িতেছে, সে-ই তলাইয়া যাইতেছে। ইহাই চিন্তের অসমাহিতাবস্থা। সমাহিতাবস্থা দ্বারাই চিন্তের নির্মলতা ও প্রশান্তভাবে উদয় হয়, তখনই দিব্যজ্ঞানের আবির্ভাব হয়, যাহা মন্দাকিনীর পৃথকার গায় জগৎকে পবিত্র ও নির্মল করে। এই সম্যক দৃষ্টি দ্বারা সংসারের অবিশুদ্ধ ও

ক্লেশদায়ক অবস্থা পরিজ্ঞাত হইলে, তাহা হইতে যে চিন্তের বিরতি, তাহাই বৈরাগ্য।

এই বৈরাগ্যোদয়ে আর সংসারের কাম্য বস্তুর প্রতি লোলুপতা থাকে না, সুতরাং চিন্তে বিবিধ বৃত্তিরও সমুদ্ভব সম্ভব হইতে পারে না। এই জন্মই মহর্ষি বলিলেন—“যোগশ্চিবৃত্তিনিরোধঃ”, চিবৃত্তির নিরোধের নাম যোগ। এই নিরোধের কি ফল তাহা ভগবান্ ভাষ্কার বলিতেছেন—“যন্তেকাগ্রে চেতসি সমুদ্ভুতমর্থং প্রগোতয়তি ক্ষিপোতি চ ক্লেশান্, কৰ্মবন্ধনানি প্লথয়তি, নিরোধাতিমুখং করোতি।”—অর্থাৎ যে সমাধি একাগ্র-ভূমিক চিন্তে সমুদ্ভুত হইয়া সৎস্বরূপ অর্থকে খ্যাপিত করে, অবিচ্ছাদি ক্লেশ সকলকে ক্ষীণ করে, কৰ্মবন্ধনসমূহকে শিথিল করিয়া দেয় এবং নিরোধাবস্থাকে লইয়া আসে—তাহাই প্রকৃত যোগ। যোগাঙ্গগুলি কি কি?

“যমনিয়মাসনপ্রাণায়ামপ্রত্যাহার-
ধারণাধ্যানসমাধয়োহষ্টাবঙ্গানি ॥”

যম, নিয়ম, আসন, প্রাণায়াম, প্রত্যাহার, ধারণা, ধ্যান ও সমাধি, এই আটটি যোগাঙ্গ। এই সকল যমনিয়মাদির সম্যক আচরণে অদ্ভুত শক্তি সকল লাভ হয়, তাহার বিশেষ বিবরণ এখানে বর্ণনা করা আমার উদ্দেশ্য নহে। দুই একটি বিষয় সংক্ষেপে উল্লেখ করিব। যোগের দ্বিতীয়াঙ্গ নিয়মসমূহের মধ্যে ঈশ্বরপ্রণিধান অন্যতম। ইহার দ্বারা সুখে সমাধি সিদ্ধ হয়। “সমাধিসিদ্ধিরীশ্বরপ্রণিধানাৎ।” সৰ্ব্ভাব ঈশ্বরে সমর্পিত হইলে সমাধি সিদ্ধি হয়। ঈশ্বরপ্রণিধান সাক্ষাৎভাবে সমাধির

সহায় হয়। অশ্রু বিষয়ে চিত্ত ধারণা ও ধ্যান দ্বারা নিরুদ্ধ হইতে পারে, কিন্তু ভক্তিপূর্বক শ্রদ্ধালুচিত্তে ভগবৎরূপ বা গুণ ধারণা করিতে করিতে চিত্তের আনন্দ ও আগ্রহ এতদূর বর্ধিত হয় যে শীঘ্রই তাদৃশ ভক্তের ঈশ্বরভিমুখ বৃত্তি প্রবাহের একতানতা হয় এবং তাঁহার অচিরকাল মধ্যেই সমাধি সিদ্ধ হয়। জগদগুরু ভগবানে ভক্তিয়ুক্ত হইলে তিনিও যোগীর প্রতি অনুগ্রহ করেন, তাঁহার অভিধান হইতেও যোগীর সমাধি এবং তৎফল বৈরাগ্য লাভ হয়। ভগবান গীতাতেও তাই বলিয়াছেন—

“চেতসা সর্বকর্মাণি ময়ি সংশ্রুত্ব মৎপরঃ।

বুদ্ধিযোগমুপাশ্রিত্য মচ্ছিত্ত্বঃ সততং ভব ॥

মচ্ছিত্ত্বঃ সর্বকর্মাণি মৎপ্রসাদাৎ তরিস্যসি।”

যোগাঙ্গগুলির মধ্যে “প্রাণায়াম” একটি অগ্রতম অঙ্গ হইলেও, ইহাই যোগীদের প্রধান সাধনা। যোগশাস্ত্রে আছে “চলে বাতে চলচ্ছিত্ত্বং নিশ্চলে নিশ্চলং ভবেৎ”, যতক্ষণ প্রাণবায়ু চঞ্চল থাকিবে ততক্ষণ মনবুদ্ধিকে স্থির করা কঠিন। প্রাণ স্থির হইলে ইহারাও স্থির হয়। চিত্ত প্রসন্ন বা নির্মল হইলে তাহা একাগ্র হইয়া স্থিতিপদ লাভ করে। কিন্তু মন কেন প্রসন্ন হয় না, কেন সে স্থির হইতে পারে না, কেন সে বহুবিধ চিন্তার বশবর্তী হইয়া অনন্ত দুঃখের ভাগী হয়? তাহার কারণ দেহাস্ত-বর্তী সহস্র সহস্র বাসনাবেগময়ী নাড়ী ঐ সকল চিত্তস্থিত সংস্কার গুলিকে কম্পিত করে এবং উহাদের অবিচ্ছিন্ন কম্পনে বাসনা-বেগ প্রবাহিত হইতে থাকে। ইহারা প্রত্যেকেই যেন এক

একটি বাসনার সাস্থেতিক কেন্দ্র। কোন প্রকারে একটু সঙ্কেত পাইলেই, তাহার নিরন্তর গতি হইতে থাকে, এবং নাড়ীমুখী গতি হইতে বাসনা হিল্লোলিত হইতে থাকে। তাই বাসনারও বিরাম নাই, বুদ্ধিরও অবসর নাই। নাড়ীসমূহ যে বাসনাময়, এবং তাহারা এক একটি বাসনার প্রবাহিকা। তাই চৌরাশি লক্ষ নাড়ী চৌরাশি লক্ষ বাসনার আধার এবং ইহা হইতেই চৌরাশি লক্ষ যোনি পরিভ্রমণ হইতেছে। এই সকল নাড়ী-প্রবাহের প্রধান উৎস প্রাণশক্তি। এই প্রাণগতিকে যদি বিশুদ্ধ করিতে পারা যায়, তবে লক্ষ লক্ষ নাড়ীপ্রবাহও শুদ্ধ হইয়া যাইবে। ইহারই নাম প্রাণ শোধন বা প্রাণায়াম। মনু বলিয়াছেন—“প্রাণায়ামৈদহেদোষান্” প্রাণায়াম দ্বারা শরীরস্থ ধাতুর মল অপগত হইয়া যায়—

“দহন্তে ষ্মায়মানানাং ধাতুনাং হি যথা মলাঃ

তথেন্দ্রিয়ানাং দহন্তে দোষাঃ প্রাণশ্চ নিগ্রহাৎ।”

অগ্নিদ্বারা উত্তপ্ত হইলে ধাতুর মল সকল যেমন দূরীভূত হয়, তদ্রূপ প্রাণায়াম দ্বারা প্রাণবায়ুর নিগ্রহ করিলে ইন্দ্রিয়গণের সমুদয় দোষ দূর হইয়া যায়।

মহর্ষি পতঞ্জলিও তাই যোগদর্শনে বলিলেন—

“প্রচ্ছর্দনবিধারণাভ্যাং বা প্রাণশ্চ”

প্রাণের প্রচ্ছর্দন ও বিধারণের দ্বারাও চিত্ত স্থিতি লাভ করে।

এই প্রাণরোধের কি ফল তাহা মহর্ষি বলিলেন :—

“ততঃ ক্রীয়তে প্রকাশাবরণম্।” সাধনপাদ, ৫২

প্রাণায়াম-অভ্যাসকারী যোগীর বিবেকজ্ঞানের আবরণভূত কর্ম ক্ষয়প্রাপ্ত হয়। ভাষ্যকার ব্যাসদেব বলিলেন “তদস্তু প্রকাশাবরণং কর্ম সংসারনিবন্ধনং প্রাণায়ামাভ্যাসাৎ দুর্বলং ভবতি, প্রতিক্ষণং ক্ষীয়তে। তথা চোক্তং তপো ন পরং প্রাণায়ামাৎ, ততো বিশুদ্ধিমলানাং, দীপ্তিশ্চ জ্ঞানস্বেতি।” মহামোহময় ইন্দ্রজাল আমাদের প্রকাশশীল সবুকে আবৃত করিয়া আমাদের অকার্যে নিযুক্ত করে; সংসারের হেতুই এই প্রকাশাবরণ, ইহা প্রাণায়ামাভ্যাসে দুর্বল হয়, আর প্রতি-ক্ষণ ক্ষয় প্রাপ্ত হয়। এই জগুই ক্ষতিতে উক্ত হইয়াছে— ‘প্রাণায়াম হইতে শ্রেষ্ঠ তপস্যা আর নাই, তাহা হইতে মল সকলের বিশুদ্ধি এবং জ্ঞানের দীপ্তি হয়।’ এইরূপেই যোগী রাগদ্বेष হইতে মুক্তি লাভ করিয়া প্রসাদ অর্থাৎ শান্তি লাভ করেন, এবং প্রসাদ লাভ করিলে যোগীর সর্বদুঃখ নাশ হয়, আর প্রসন্নচিত্তের বুদ্ধি আশু প্রতিষ্ঠিত হয়।—

“প্রসাদে সর্বদুঃখানাং হানিরস্রোপজায়তে।

প্রসন্নচেতসো হ্যাপ্তঃ বুদ্ধিঃ পর্যাবতিষ্ঠতে ॥” গীতা

“প্রসন্নচেতসঃ স্বস্থান্তঃকরণস্য হি যস্মাদাস্ত শীঘ্রং বুদ্ধিঃ পর্যাব-
তিষ্ঠতে আকাশমিব পরিসমস্তাৎ অবতিষ্ঠতে আত্মস্বরূপেণৈব
নিশ্চলীভবতি।”—শঙ্কর।

প্রসন্নচিত্তের বুদ্ধি আকাশের স্থায় চতুর্দিকে অবস্থান করে
ও আত্মস্বরূপে নিশ্চল হয়।

চিত্ত নির্মল হইলে সকল বস্তুরই প্রকৃত প্রতিবিম্ব তাহাতে
পতিত হয়। যাহা সত্য, যাহা মিথ্যা, যাহা হিতকারী,

যাহা অপকারী, চিত্ত তখন এ সমস্তই উত্তমরূপে বুঝিতে পারে।
মলিনচিত্ত ব্যক্তি অনেক দুঃখকর বিষয়কে সুখের সামগ্রী
বোধে গ্রহণ করিয়া অনেক দুঃখ ভোগ করিয়া থাকে। নির্মল-
চিত্ত ব্যক্তির এরূপ ভ্রান্তি হওয়ার সম্ভাবনা নাই। এজন্য
কোন প্রকার দুঃখ তাঁহাকে আশ্রয় করে না। নির্মলচেতার
ব্রহ্মবোধিনী বুদ্ধি মায়িক পদার্থমাত্রেরই অনভিরুচিবশতঃ আত্মাতে
স্থিতি করিতে থাকে। যোগাভ্যাসের দ্বারা প্রাণ নিরুদ্ধ হইলে
এই স্থিতিপদকে লাভ করা যায়। “নিষ্কলং তং বিজানীয়া-
চ্ছাসো যত্র লয়ং গতঃ।” এই শ্বাস যেখানে লয় হয় তাহাই
নিষ্কল অবস্থা। বিষ্ণুপুরাণে আছে :—

“প্রাণায়ামেন পর্বনৈঃ প্রত্যাহারেন চেন্দ্রিয়েঃ।

বশীকৃতৈস্ততঃ কুর্যাৎ স্থিরং চেতঃ শুভাশ্রয়ে ॥”

প্রাণায়াম দ্বারা পর্বনকে ও প্রত্যাহার দ্বারা ইন্দ্রিয় সকলকে
বশীভূত করিয়া অনন্তর শুভাশ্রয় ভগবানে চিত্তের একাগ্রতা
সম্পাদন করিবে। এই প্রাণায়াম অভ্যাস দ্বারা কুস্তক অর্থাৎ শ্বাস
স্থির হয়। গীতাতে যজ্ঞসমূহের মধ্যে ইহাকে অগ্রতম যজ্ঞ বলিয়া
ভগবান ব্যাখ্যা করিয়াছেন। পূজ্যপাদ শ্রীধর স্বামী গীতার
টীকায় বলিয়াছেন—“কুস্তকে হি সর্বৈ প্রাণা একীভবন্তি, তত্রৈব
লীয়মানেশ্চিন্দ্রিয়েষু হোমং ভাবয়ন্তীত্যর্থঃ।”

অর্থাৎ কুস্তকের সময় সমস্ত প্রাণ এক হইয়া যায়—অর্থাৎ
তাহাদের বিবিধ গতি একমুখী হয়—তাহারই মানে প্রাণ স্থির
হওয়া। প্রাণ স্থির হইলে ইন্দ্রিয়েরাও স্থির হইতে বাধ্য। সুতরাং

প্রাণায়াম দ্বারা কুস্তকায়িত্তে ইন্দ্ৰিয়সমূহের যে হোম হইল, তাহাও এক অপূর্ব যজ্ঞ। যোগশাস্ত্রে আছে—

যথা যথা সদাভ্যাসান্মনসঃ স্থিরতা ভবেৎ ।

বায়ু বাকায়দৃষ্টীনাং স্থিরতা চ তথা তথা ॥

“কিরূপে মনের শান্তি লাভ হয়”—শ্রীরামচন্দ্রের এই প্রশ্নের উত্তরে মহর্ষি বশিষ্ঠ বলিতেছেন—“দ্বিবিধ উপায়ে মনের শান্তি সম্পন্ন হয়। প্রথম জ্ঞান, দ্বিতীয় যোগ। তন্মধ্যে তত্ত্বদর্শনকে জ্ঞান ও প্রাণাদি বৃত্তিরোধকে যোগ বলে।”

বশিষ্ঠ কহিলেন—“যে বায়ু দেহান্তর্কর্ষিতী সহস্র নাড়ীতে সঞ্চারিত হয়, তাহার নাম প্রাণ, এই প্রাণ ক্রিয়া ভেদে অপানাদি পঞ্চভাগে বিভক্ত এবং ইহা স্পন্দিত হইলে, যোগ সাধনের উপায়। অন্তরে যে কল্পনোন্মুখী সস্থিত সমুদ্ভূত হয়, তাহার নাম চিত্ত। * * স্মরণং প্রাণস্পন্দ রোধ করিলেই চিত্তের শান্তি হয় এবং চিত্ত শান্ত হইলে জগতের লয় হইয়া থাকে।”

আরও কহিলেন “শাস্ত্র, সংস্কৃত ও বৈরাগ্যরূপ যোগদ্বারা সংসারে অনিচ্ছা জন্মিলে, মন একমাত্র ব্রহ্মধ্যানে ব্যাপ্ত হয়, ঐরূপ ধ্যানযোগের গাঢ়তা অভ্যাস হইলে, প্রাণ আর স্পন্দিত হইতে পারে না। ** প্রাণায়াম অভ্যাস হইলে, যে ঘনতর ধ্যানযোগ উৎপন্ন হয়, তৎপ্রভাবেও প্রাণ আর স্পন্দিত হইতে পারে না। ওঙ্কারোচ্চারণ সমুখিত শব্দদ্বারা সস্থিত স্মৃপ্ত হইলেও প্রাণ আর স্পন্দিত হইতে পারে না।

প্রাণায়ামাদি
যোগাভ্যাসের ফল।
প্রাণরুদ্ধ করা যায়
কিনা ?

অভ্যাস সহায়ে প্রাণকে তালু হইতে ছাদশাঙ্গুল উর্দ্ধে ব্রহ্মরন্ধ্রে ধ্যানয়ন করিয়া সস্থিত রোধ করিলে প্রাণ আর স্পন্দিত হয় না। যিনি কুস্তকাদি অভ্যাস করেন, বাহ্যবিষয় কখনও তাঁহার মনকে আকর্ষণ করিতে পারে না। কুস্তকাদি সহায়ে মনকে বাহ্যবিষয় হইতে প্রত্যাহৃত করিতে সমর্থ হইলে স্বল্প সময়ের মধ্যেই পরম-গদ প্রাপ্ত হওয়া যায়।”

অস্ত্রাশ্র শাস্ত্র ও পুরাণাদির মন্তব্য :—

মণি পুরাণে :—“আকেশাখাদনখাগ্রাচ্চ তপস্তপ্যন্থ স্মদারুণং ।

আত্মানং শোধয়েদ্ যস্ত প্রাণায়ামৈঃ পুনঃ পুনঃ ॥

সর্বদোষহরঃ প্রোক্তঃ প্রাণায়ামোদ্বিজন্মনাং ।

ততস্তত্ত্বাধিকোনাস্তি তপঃ পরম সাধনং ॥”

মহর্ষি বোধায়ন :—“এতদাচ্ছ তপঃশ্রেষ্ঠমেতদ্ব্যস্ত লক্ষণং ।

সর্বদেবোপকারার্থমেতদেব বিশিযতে ॥”

এই প্রাণায়ামই আদি এবং সর্বশ্রেষ্ঠ তপস্যা ও ধর্ম, দেবতা-গণও প্রাণায়াম দ্বারাই উপকার প্রাপ্ত হইয়াছেন।

মহর্ষি অত্রি :—“কর্ম্মনা মনসা বাচা যদহা কুরুতে স্বয়ং ।

আসীনঃ পশ্চিমাং সন্ধ্যাং প্রাণায়ামৈস্ত শুধ্যতি ॥”

বৃহদ্বিষ্ণু :—“প্রাণায়ামাণ্ দ্বিজঃ কুর্যাৎ সর্বপাপাপনুত্তয়ে ।

দহন্তে সর্বপাপানি প্রাণায়ামৈর্দ্বিজস্ততু ॥”

যোগী বাজ্রবল্লী :—“যদহা কুরুতে পাপং কর্ম্মনা মনসা গিরা ।

ত্রৈকাল্যসন্ধ্যাকরণাৎ প্রাণায়ামৈর্ব্যাপোহতি ॥”

ভগবদগীতা :—“অপানে জুহ্বতি প্রাণং প্রাণেহপানং তথাপরে ।

প্রাণাপান গতীরুকা প্রাণায়ামপরায়ণাঃ ।

অপরে নিয়তাহারা প্রাণান প্রাণেশু জুহ্বতি ॥”

ভগবান স্বয়ং বলিয়াছেন যে নির্মমতা ও যোগাভ্যাস ভিন্ন কেহই আমাকে পরাজয় করিতে সমর্থ হয় না।

(মহাভারত, অশ্বমেধ)

রজঃ ও তমোগুণ নাশক কৰ্মের অনুষ্ঠানই যোগ।

“যোগবলই মুক্তি লাভের অধিতীয় উপায়। যোগ-ধর্ম ব্রহ্ম স্বরূপ ও সমুদয় ধর্মাপেক্ষা শ্রেষ্ঠ, এই ধর্ম দ্বারাই মোক্ষ লাভ হইয়া থাকে।” পণ্ডিতেরা ভ্রব্যাদি ত্যাগের নিমিত্ত যজ্ঞাদি কার্য, ভোগ ত্যাগের নিমিত্ত ব্রত; সুখ ত্যাগের নিমিত্ত তপস্যা ও সমুদয় ত্যাগের নিমিত্ত যোগসাধন করিতে উপদেশ দিয়া থাকেন। সর্বত্যাগই ত্যাগের পরাকাষ্ঠা। মহাত্মারা দুঃখ নিবারণের নিমিত্ত সর্বত্যাগের পথস্বরূপ যোগ বিষয় নির্দিষ্ট করিয়া গিয়াছেন।”

মহাভারত, শান্তিপর্ব।

মহানির্বাণ তত্ত্ব আছে :—

“যতো বিশ্বং সমুদ্ভুতং যেন জাতঞ্চ তিষ্ঠতি।

যস্মিন সর্বানি লীয়ন্তে জ্ঞেয়ং তদব্রহ্মলক্ষণৈঃ

সমাধিযোগৈস্তদেতৎ সর্বত্র সমদৃষ্টিভিঃ।”

মাকড়শার জালের স্থায় এই প্রাণধারা সর্বত্র ব্যাপ্ত। নাড়ী-প্রবাহের মধ্যে এই প্রাণ প্রতিনিয়ত স্পন্দিত হইতেছে, এবং সহস্র বাসনা তাহা হইতে সমুৎপিত হইতেছে। যতদিন এই প্রাণ প্রবাহ নির্মল না হয় ততদিন বাসনাসুদ্ধি হইতে পারে না। প্রাণায়ামের দ্বারা এই প্রাণ প্রবাহ নির্মল ও স্থির হইলে জীব নিষ্পাপ হইয়া পরমানন্দ সন্তোষ করে। প্রাণ সময়ে এই

নাড়ীপ্রবাহ যাহার যত নির্মল থাকে, তাহার তদনুযায়ী উচ্চগতি লাভ হয়। এই নাড়ীসমূহের সহিত লোক লোকান্তরের সম্বন্ধ ও যোগ আছে; যিনি যত বেশী প্রাণকে স্থির করিতে সমর্থ হইয়াছেন, হৃদয়স্থ ব্রহ্মনাড়ী তাহার সেই পরিমাণে পরিষ্কৃত হয়। মৃত্যুকালে এই ব্রহ্মনাড়ীর মুখ খুলিয়া গেলেই ব্রহ্মলোকে গতি হয়। কঠোপনিষৎ বলিতেছেন

“শতকৈকা চ হৃদয়স্থ নাড়্য-

স্তাসাং মূর্দ্ধানমভিনিঃসৃতৈকা।

তয়োর্দ্ধমায়ন্নমৃতত্বমেতি

বিষঙ্গুত্যা উৎক্রমণে ভবন্তি ॥”

হৃদয় হইতে উদ্ভূত একশত এক নাড়ী আছে, তাহাদিগের একটি অর্থাৎ সূক্ষ্ম নাড়ী মূর্দ্ধাদেশে অর্থাৎ ব্রহ্মরন্ধুর অভিমুখে নির্গত হইয়াছে। মৃত্যুকালে মনুষ্য তদ্বারা উর্দ্ধে অর্থাৎ ব্রহ্মলোকে গমন করিয়া অমরত্ব লাভ করে অর্থাৎ জন্মমৃত্যুর অতীত অবস্থা প্রাপ্ত হয়। নানাবিধ গতিদায়িনী অস্ত্র একশত নাড়ী আছে, দেহত্যাগ কালে সেই সকল পথ দ্বারা দেহ হইতে বহির্গত হইলে বিভিন্ন লোকে গমন পূর্বক সুখ দুঃখাদি ভোগ করে এবং জন্ম-মৃত্যুর অধীন হইয়া থাকে।

বঙ্গের সুপ্রসিদ্ধ ধর্মব্যাখ্যাতা, বক্তা ও সনাতন ধর্মপ্রচারক বর্তমান যুগের পরমহংস শ্রীকৃষ্ণানন্দ স্বামী মহোদয় তাহার প্রসিদ্ধ সাধক-গীতার্থ সন্দীপনীর অবতরণিকায় লিখিয়াছেন—
দ্বিগের মন্তব্য। “অবিজ্ঞা বিনষ্ট হইলেই সাধকের ভ্রম, সংশয় ও জন্মান্তর প্রাপ্তির হেতু সঞ্চিত কর্মরাশি অপগত ও আত্ম-

সাক্ষাৎকার সিদ্ধ হইবে। কিন্তু প্রারম্ভিক বাসনা সহজে ক্ষয় হয় না, এজন্য আত্মসংযম অর্থাৎ ধারণা, ধ্যান ও সমাধির নিজস্ব প্রয়োজন এবং যম, নিয়ম, আসন, প্রাণায়াম, ও প্রত্যাহার এই পাঁচটিই এতৎ মহাসংযম সাধনের প্রধান অঙ্গ”।

বর্তমান যুগের প্রসিদ্ধ যোগাচার্য্য ৩শামাচরণ লাহিড়ী মহাশয় বৈশেষিক দর্শনের প্রথমযুগের ব্যাপ্যাকালে বলিয়াছেন— “ক্রিয়া (প্রাণায়ামাদি যোগাঙ্গানুষ্ঠান) দ্বারা চিত্ত সংযত হয়, চিত্ত ও মন এক হ’লে বুদ্ধি স্থির হয়, বুদ্ধি স্থির হ’লে মন পরাবুদ্ধিতে যায়, তখন সুখেতে ব্রহ্মকে সর্বপ্রকারে স্পর্শ করায় অভ্যুদয় হয়। অর্থাৎ যাহা জীবনের চিরন্তন লক্ষ্য সেই পরম সুখের প্রাপ্তি দ্বারা পরমৈশ্বর্য্য লাভ হয়, এবং যাহা পাইলে এই সংসারের যাবতীয় ঐশ্বর্য্যকে তুচ্ছ বোধ হয়”।

প্রসিদ্ধ আচার্য্য ৩বিজয়কৃষ্ণ গোস্বামী মহাশয় বলিয়াছেন “শ্বাস প্রশ্বাসে নাম করিতে পারিলে অহঙ্কারাদি সমস্ত নাশ হইয়া যায়। এমন কোন কল কৌশল নাই যে হাতে হাতে মুক্তি পাইবে। শ্বাসে প্রশ্বাসে নাম করাই সাধন, তাহাতে কামাদি সমস্ত রিপূর বিনাশ হইবে। প্রেম, ভক্তি, পবিত্রতা আসিবে। শ্বাস-প্রশ্বাসে জপদ্বারা বর্তমান পাপরাশি চলিয়া গেলেই তাঁহার দর্শন লাভ হয়।”

যোগাঙ্গের প্রত্যাহার সম্বন্ধে কিছু বলিয়াই আমার বক্তব্য শেষ করিব।

‘স্ববিষয়াসম্প্রয়োগে চিত্তস্ত স্বরূপানুকার ইবেন্দ্রিয়াণাং প্রত্যাহারঃ।’ যোগদর্শন, সাধনপাদ।

স্ব স্ব বিষয়ে অসংযুক্ত হইলে ইন্দ্রিয়গণেরও চিত্তস্বরূপানুকারের ত্রায় অর্থাৎ চিত্তনিরোধে চিত্তের সঙ্গে ইন্দ্রিয়ও নিরুদ্ধ হইয়া যাওয়াই প্রত্যাহার। পূজ্যপাদ ভাস্করকার ইহার একটি সুন্দর দৃষ্টান্ত দিয়াছেন “যথা মধুকররাজং মক্ষিকা উৎপতন্তমনুৎপত্তি, নিবিশমানমনুনিবিশন্তে, তথেন্দ্রিয়াণি চিত্তনিরোধে নিরুদ্ধানি ইত্যেব প্রত্যাহারঃ”—অর্থাৎ যেমন উড্ডীয়মান মধুকররাজের পশ্চাতে অগ্নাত মক্ষিকারা উড্ডীন হয়, এবং সেই মক্ষিকা যথায় বসে, অগ্নাত মক্ষিকারাও তথায় বসে, সেইরূপ ইন্দ্রিয়গণ চিত্ত নিরোধে নিরুদ্ধ হয়। ইহাই প্রত্যাহার।

এই প্রত্যাহারের প্রয়োজনীয়তা সাধকের পক্ষে অভ্যস্ত বেশী। ইন্দ্রিয়েরা স্ব স্ব বিষয় গ্রহণশীল। তাহারা যতক্ষণ বিষয় গ্রহণে নিযুক্ত থাকিবে, ততক্ষণ চিত্ত নিরুদ্ধ করা অসাধ্য। এইজন্য বিচার দ্বারা বিষয় গ্রহণ যে হয় ও প্রকৃত আনন্দের প্রতিবন্ধক তাহা স্থির করা কর্তব্য। পরে কোনও একটি লক্ষ্যে চিত্তকে বাঁধিবার প্রযত্ন করিতে হয়, অথবা ইন্দ্রিয়বিষয় হইতে দূরে থাকিতে হয় বা তাহাকে কোনও আধ্যাত্মিক দেশে নিরুদ্ধ করিতে হয় অথবা ভগবানের কোন একটা বিশেষ রূপ বা ভাবে মগ্ন থাকিবার অভ্যাস করিতে হয়।

সর্বদা বিষয় চিন্তা করিলে বা বহু বিষয়ে চিত্তকে ব্যাপৃত রাখিলে প্রত্যাহার হয় না। প্রত্যাহার করিতে না পারিলে ইন্দ্রিয়ের বশতা অবশ্যস্বাভাবী। মহামুনি জৈগীষব্য বলিয়াছেন একাগ্রচিত্ত হইলে যে ইন্দ্রিয়গণের বিষয়গ্রহণে অপ্রবৃত্তি হয় তাহাই ইন্দ্রিয়জয়। বিচার দ্বারা হয় উপাদেয় স্থিরীকৃত করিতে

পারিলে দৃষ্টাদৃষ্ট সকল প্রকার বিষয় গ্রহণেই চিন্তের অনাস্থা জন্মে। এইরূপে ইন্দ্রিয়ভোগ্য বিষয়ে বৈরাগ্য উৎপন্ন হইলেই চিত্ত এক অবিনাশী চিরসত্য পদার্থে পূর্ণ স্থিতি লাভ করে। সেই জন্ম মহর্ষি পতঞ্জলি যোগদর্শনে দেখাইয়াছেন—

“স তু দীর্ঘকাল নৈরন্তর্যাসংকার সেবিতো দৃঢ়ভূমিঃ।”

অর্থাৎ দীর্ঘকাল ধরিয়া নিরন্তর তপস্যা, ব্রহ্মচর্যা ও তত্ত্বজ্ঞান শ্রদ্ধাসহকারে সম্পাদিত হইলে অভ্যাস দৃঢ়ভূমি হয়, অর্থাৎ ব্যুত্থান সংস্কারের দ্বারা ঐরূপ দৃঢ়ভূমি অভ্যাস শীঘ্র অভিবৃত্ত হয় না। এইজন্যই পুনঃ পুনঃ চিত্তকে বিষয় হইতে আকর্ষণ করিয়া তাহাকে লক্ষ্যাভিমুখে পরিচালিত করিতে হইবে। এইরূপ চেষ্টার ফলেই প্রত্যাহার সহজ হইয়া আইসে। মনকে ইচ্ছামত আকাশবৎ স্বচ্ছ করিতে পারিলে তবে প্রত্যাহার পূর্ণতা লাভ করে।

যোগাভ্যাসীকে যম নিয়ম সাধন করিতেই হইবে, নচেৎ

যোগফল লাভ একেবারেই অসম্ভব। ইন্দ্রিয়-
বম, নিয়ম।

গুলি দুই প্রকারের, অন্তর ও বহিঃ। বিচার ও বৈরাগ্যাভ্যাস দ্বারা অন্তরেন্দ্রিয় (মন, বুদ্ধিকে) সংযত করিতে হইবে। ভক্তিও ইহার প্রধান সহায়। মনন হইতে ধ্যান হয়। ধ্যাননিষ্ঠা দ্বারা মন বুদ্ধি সংযত হয়। কিন্তু বিষয় চিন্তা থাকিলে ধ্যান যে জমিতেই দিবে না, এইজন্যই বিচারের আশ্রয় সর্বদা লইতে হইবে। বহিরিন্দ্রিয়গুলি দুই শ্রেণীর, কণ (শব্দ) ত্বক (স্পর্শ) চক্ষু (রূপ) জিহ্বা (রস) এবং নাসিকা (গন্ধ) ইহারা জ্ঞানেন্দ্রিয় এবং বাক্, পানি, পাদ, পায়ু ও উপস্থ—ইহারা কর্মেন্দ্রিয়। কর্মেন্দ্রিয়গুলিকে অপেক্ষাকৃত সহজেই শাস্ত করা

যায়। কিন্তু মন বুদ্ধি শাস্ত না হইলে, ইহারা প্রকৃত প্রশান্ত ভাব ধারণ করিতে পারে না। এইজন্য অন্তরেন্দ্রিয়কেই প্রথম সংযত করিবার চেষ্টাই প্রধান সাধনা।

যোগনিষ্ঠের “নাত্যশ্নতস্ত যোগোহস্তি ন চৈকান্তমনশ্চতঃ।

আচরণ, ও আহার ন চাতিশ্বপ্নশীলস্য জাগ্রতো নৈব চার্জুন ॥

ও নিদ্রার সংযম যুক্তাহারবিহারস্য যুক্তচেষ্টস্য কর্মস্য ॥

(গীতা ।) যুক্তশ্বপ্নাববোধস্য যোগো ভবতি দুঃখহা ॥”

যিনি অধিক ভোজী বা নিতান্ত অনাহারী এবং যিনি অতি নিদ্রাশীল বা অতি অনিদ্রাভ্যাসী, হে অর্জুন, তাঁহার যোগসমাধি লাভ হয় না। আহার নিদ্রা, জাগরণ প্রভৃতি বিষয়ে যিনি নিয়ত, অর্থাৎ যথেষ্টাচারী নহেন, সেই ব্যক্তিরই যোগ দুঃখনিবারণক্ষম হয়, অর্থাৎ সমাধিসিদ্ধির দ্বারা ব্রহ্ম বিচার বিকাশ হয়।

“স নিশ্চয়েন যোক্তব্যো যোগোহনির্ব্বিঘ্নচেতসা।”

সেই যোগ অধ্যবসায়ের সহিত (অর্থাৎ হইবেই হইবে, হৃদয়ে এই দৃঢ় নিশ্চয় থাকা চাই) হৃদয়কে অবসাদশূন্য করিয়া (অর্থাৎ যোগে সিদ্ধি হইবে কি না হইবে এই সন্দেহ হইলে প্রযত্নের শিথিলতা আসিতে পারে) অভ্যাস করা কর্তব্য।

সঙ্কল্পপ্রভবান্ কামাংস্ত্যক্ত্বা সর্ব্বানশেষতঃ।

মনসৈবেন্দ্রিয়গ্রামং বিনিয়ম্য সমস্ততঃ ॥

শনৈঃ শনৈরূপরমেধু দ্ব্যা ধৃতিগৃহীতয়া।

আত্মসংস্থং মনঃ কৃৎস্বা ন কিঞ্চিদপি চিন্তুয়েৎ ॥

সংকল্প হইতে উৎপন্ন যে সমস্ত যোগের প্রতিকূল কামনা তাহা নিঃশেষে ত্যাগ করিতে হইবে (সংকল্প আসিলেই কামনা জাগিয়া

উঠিবে, বিক্ষিপ্ত চিন্তে যোগ লাভ অসম্ভব, অতএব সংকল্প করিব না এইরূপ স্থির নিশ্চয় করিয়া) চতুর্দিকে ধাবমান ইন্দ্রিয়গুলিকে সংযত করিয়া (বিষয়ে দোষ দর্শন না করিলে বিষয়-লোলুপ চিত্ত বিষয়ের দিকে ধাবিত হইবেই, সুতরাং সতর্কতার সহিত ইতস্ততঃ বিক্ষিপ্ত মনকে গুটাইয়া লইয়া আত্মস্থ করিতে হইবে) এবং ধৈর্যসম্পন্ন বুদ্ধিধারা (পূর্বাভ্যাস ও সংস্কারবশতঃ মন যদি অধৈর্য হইয়া পড়ে, আমার দ্বারা হইবে না বলিয়া হাল ছাড়িয়া না দিয়া) ধীরে ধীরে তাহাকে নিরুদ্ধ অর্থাৎ আত্মস্থ করিবার চেষ্টা করিতে হইবে। এবং মনকে আত্মসংস্থ অর্থাৎ আত্মাতে নিশ্চয় করিয়া উপরতি অবলম্বন করিবে, আর অন্য কিছু চিন্তা করিবে না। যেমন মনুষ্য জাগ্রদাবস্থায় বিষয়সমূহ দর্শন করে তন্দ্রা আসিলে, বিষয় সমূহকে অস্পষ্ট দর্শন করে, এবং স্বপ্নাবস্থায় অত্যন্ত অসংলগ্ন ও ক্ষীণভাবে মনে মনে বিষয়ের অনুশীলন করে কিন্তু দেখে না, আবার সুসুপ্তাবস্থায় বিষয়সমূহকে কিছুই স্মরণ করে না, তদ্রূপ সাধককে প্রথম নিজ মনকে বিষয় হইতে প্রত্যাহত করিয়া আত্মস্থ করিতে গেলেই নিজালু ব্যক্তির বিষয়দর্শনের স্থায় দৃশ্যাদি তাঁহার মনে অস্পষ্ট ভাবে খেলিতে থাকিবে, পরে বিষয়-দর্শন হইবে না, এক একবার অসংলগ্নভাবে বিষয় আসিয়া পড়িবে, পরে মনকে আরও গভীর ভাবে মগ্ন করিবার চেষ্টা করিতে করিতে মন সম্যক্ বিরতি লাভ করিবে, তখন আমি চিন্তা করিতেছি, এ বোধও থাকিবে না। ইহাই মনের নিবৃত্তি। মনের নিবৃত্তি হইলেই পরমা শান্তি আসিয়া যোগীকে আশ্রয় করে, এবং সেই শান্ত সমাহিত অবস্থায় ব্রহ্মজ্ঞান সম্যক্ বিকাশ

পাইতে থাকে। ইহাই আত্মসাক্ষাৎকার। জ্ঞান, জ্ঞেয়, জ্ঞাতা, তখন তিন এক হইয়া যায়, সুতরাং অভিমান অহঙ্কারের লেশ মাত্র থাকে না। তাঁহাদের দ্বারা ভাল মন্দ যে কোন কষ্টই কৃত হউক—তদ্বারা তাঁহাদের বন্ধন হয় না। যোগীস্বর শুকদেব মহারাজ পরীক্ষিতের প্রশ্নের উত্তরে তাই বলিলেন—

“কুশলাচারিতে নৈশাম্ হি স্বার্থঃ ন বিত্ততে।

বিপর্যায়ণ বানর্থো নিরহঙ্কারিণাং প্রভো ॥”

কুশল কস্মানুষ্ঠানেও তাঁহাদের স্বার্থ নাই, বিপর্যায় করিলেও কোন অনর্থ নাই। কারণ তাঁহারা নিরহঙ্কার। অহঙ্কারবশতঃই সদস্য কর্মের ফলভোগী হইতে হয়।

“প্রশান্তাত্মা বিগতভীত্বাচারিব্রতে স্থিতঃ।

মনঃ সংযম্য মচ্চিন্তো যুক্ত আসীত মৎপরঃ ॥”

যোগচর্চা। “বিবিক্তসেবী লঘুশী যতবাক্যমানসঃ।

ধ্যানযোগপরো নিত্যং বৈরাগ্যং সমুপাশ্রিতঃ ॥”

“যোগী যুক্তীত সততমাখ্যানং রহসি স্থিতঃ।

একাকী যতচিত্তাত্মা নিরাশীরপরিগ্রহঃ ॥”

অন্তঃকরণকে ধৈর্যের দ্বারা প্রশান্ত করিয়া ভয়শূন্য হইয়া অর্থাৎ যোগ করিলে পাছে মরিয়া যাই, বা সাংসারিক সুখভোগ বিসর্জন দিতে হয়, কিম্বা সাধন করিয়া যদি কোন ফল না হয়, তবে এদিক ওদিক ছুইদিক যাইবে—এই ভয়কে বর্জন করিতে হইবে, নচেৎ দৃঢ়তা আসিবে না। ব্রহ্মচারীব্রতে স্থিত হইয়া, অর্থাৎ গুরুশ্রীষা ও গুরুধারণে সচেষ্ট হইয়া সাধন করিতে হইবে। গুরুধারণ করিতে না পারিলে যোগাভ্যাস

করিয়া কোন সফল পাওয়া যায় না, বরং হিতে বিপরীত হয়। যিনি এ বিষয়ে সাবধানী তিনি শীঘ্রই যোগফল লাভে সমর্থ হন। এইরূপে বিষয় হইতে মনকে প্রত্যাহৃত করিয়া মচ্ছিত্ত, মৎপর ও সমাহিত হইয়া যোগী অবস্থান করিবেন। মনে বিষয়-বাঞ্ছা বেশী হইলে যোগ হয় না, এইজন্য ভগবানকে প্রিয় বোধ হওয়া চাই, তাঁহাকে প্রিয় বোধ করিতে পারিলে মচ্ছিত্ত হওয়া শক্ত নয় এবং মৎপর হইয়া অর্থাৎ পরমেশ্বরের উপর নির্ভর করিয়া থাকিতে হয়, নিজের গায়ের জোরে করিব বলিয়া হোঁৎ-কামী করিলে কিছু হইবে না। ভক্তিবিগলিত চিত্তে তাঁহার চরণাশ্রয় করিয়া, তাঁহারই উপর যোগী একান্ত নির্ভর করিয়া অবস্থান করিবেন।

কিরূপে প্রথমাভ্যাসীকে মন সমাহিত করিতে হইবে তাহারই উপায় বলিতেছেন। পরিপক্ক যোগী সহস্র কোলাহলের মধ্যেও আপনার চিত্তকে তাঁহার সূচারু চরণে যোগযুক্ত করিয়া রাখিতে পারেন। তিনি যে অভয় পরমানন্দ অবস্থা লাভ করিয়াছেন তাহাতে আর জনকোলাহলে কি করিবে? তিনি সমস্ত নরনারীর মধ্যে তাঁহার অপরূপ রূপরাশি দর্শন করিয়া মুগ্ধ ও বিহ্বল হইয়া যান। মনে করিবামাত্রই মনকে বহির্বিষয় হইতে অন্তর্মুখ করিয়া লইতে তাঁহাদের একটুও বিলম্ব হয় না। কিন্তু বাঁহারা অপরিপক্ক, বাঁহারা মাত্র সাধন আরম্ভ করিয়াছেন, তাঁহারা সঙ্গশূন্য হইয়া একাকী একান্ত স্থানে নিরন্তর বাস করিবেন। চিত্ত ও দেহকে সংযত করিয়া, নিরাশী অর্থাৎ আকাঙ্ক্ষাশূন্য হইয়া এবং পরিগ্রহশূন্য হইয়া, মনকে সমাহিত করিবেন। লোকসঙ্গ চিত্ত-

সমাধানের অন্তরায়, লোভাতুর চিত্তে বিষয়ের আকাঙ্ক্ষা থাকিলেও মনকে সমাহিত করা কঠিন। দেহের চাকল্যাণ্ড স্থির অবস্থা প্রাপ্তির ঘোর অন্তরায়। উসখুস করা, এদিক ওদিক চাওয়া, বা একস্থানে একভাবে বসিয়া থাকিতে না পারা—এ সমস্ত যোগসিদ্ধির অন্তরায়। এইজন্য আসন, মুদ্রা ও স্থির-দৃষ্টি অভ্যাস যোগীরা প্রারম্ভমুখে অভ্যাস করিয়া থাকেন। পাতঞ্জল দর্শনে আছে—

দুঃখ দৌর্গমশাস্ত্রমেজয়ত্ব শ্বাসপ্রশ্বাসো বিক্ষেপসহভুবঃ।

দুঃখ, (আধ্যাত্মিক, আধিতৌতিক ও আধিদৈবিক)

দৌর্গমশাস্ত্র,—ইচ্ছার বিরুদ্ধ কিছু হইলে মনের যে ক্ষোভ, অঙ্গ-মেজয়ত্ব—অঙ্গ সকল যে নড়ে বা অস্থির হয়, এবং শ্বাস-প্রশ্বাস—ইহারা বিক্ষেপের সহভূ অর্থাৎ বিক্ষিপ্ত চিত্তেই ইহারা আসে, সমাহিত চিত্তে আসে না। সুতরাং চিত্তকে সমাহিত করিতে হইলে এই সকল অন্তরায়গুলিকেও নষ্ট করিতে হইবে। বিচার দ্বারা দুঃখ দৌর্গমশাস্ত্র, প্রাণায়াম দ্বারা শ্বাসপ্রশ্বাস এবং আসন অভ্যাস দ্বারা শরীরের বিকলতা ও অস্থিরতাকে জয় করিতে হইবে।

“স্থিরস্বখমাসনম্” যোগদর্শন, সাধনপাদ।

নিশ্চল ও সুখে বসিতে পারাই আসন। গাত্র অবয়ব এদিক ওদিক হেলিবে না, অথচ বসিতে কোন কষ্ট না হয়, পা টন টন না করে, এজন্য অসমতল স্থানে বা বক্রভাবে বা কুজ হইয়া বসিতে নাই। মেরুদণ্ডকে সরল রাখিয়া “ত্রিকল্পতং সমং স্থাপ্য শরীরং”—বক্ষ, গ্রীবা ও শির এই তিনকে উন্নত রাখিয়া পদ্মাসন,

স্বস্তিকাসন বা সিদ্ধাসন করিয়া বসিতে হইবে। কিন্তু দেখিতে হইবে আসন করিতে গিয়া সহজাবস্থা হইতে আরও অধিক ক্রেশ উৎপন্ন না হয়। গীতাতেও ভগবান বলিয়াছেন—

শুচৌ দেশে প্রতিষ্ঠাপ্য স্থিরমাসনমান্বনঃ।

নাত্যচ্ছিতং নাতিনীচং চেলাজিনকুশোত্তরম্ ॥

তত্রৈকাগ্রং মনঃ কৃৎস্না যতচিত্তেন্দ্রিয়ক্রিয়ঃ।

উপবিশ্বাসনে যুগ্মাদ্ যোগমাঅবিগুহ্বয়ে ॥

সমং কায়শিরোগ্রীবং ধারয়ন্নচলং স্থিরঃ।

সংপ্ৰেক্ষ্য নাসিকাগ্রং স্বং দিশশ্চানবলোকয়ন্ ॥

পবিত্র স্থানে নিজ আসন নিশ্চল রাখিতে হয়। এই আসন যেন অতি উচ্চ বা অতি নিম্ন না হয়। প্রথমে কুশাসন, তত্পরি মৃগাজিন, তত্পরি বস্ত্র আচ্ছাদন করিয়া আসন প্রস্তুত করিতে হইবে। সেই আসনে উপবিষ্ট হইয়া মনকে বিক্ষিপ্ত-রহিত করিয়া চিত্ত এবং ইন্দ্রিয়ের ক্রিয়া সংযত করিয়া যোগাভ্যাস করিবে।

সমং কায়শিরোগ্রীবং—দেহের মধ্যভাগ, শির এবং গ্রীবা অর্থাৎ মূলাধার হইতে মস্তক পর্য্যন্ত সমং—মেরুদণ্ডকে সরল বা অবক্র ভাবে স্থির রাখিয়া স্বীয় নাসিকাগ্রে দৃষ্টি রাখিয়া অর্থাৎ চাক্ষুশী বৃত্তিকে অগ্ন্যাগ্ন দিক হইতে আকর্ষণ করিয়া ব্রহ্মাকার-কারিত ভাবনা সহ নির্মল আকাশে স্থাপন করিয়া ইতস্ততঃ না দেখিয়া মনের উপশান্তির জন্ত—যোগাভ্যাস করিবে।

যুগ্মেবং সদান্বানং যোগী নিয়তমানসঃ।

যোগাভ্যাসের ফল

শান্তিং নির্ব্যাণপরমাং মৎসংস্থামধিগচ্ছতি ॥

উক্ত প্রকারে সর্বদা আত্মানং যুগ্মন—অর্থাৎ মন নিরোধ করিয়া, সংযত মানস হইয়া, মৎসংস্থং অর্থাৎ মৎস্বরূপে অবস্থিতিরূপ যে নির্ব্যাণ মোক্ষ বা পরম শান্তি তাহা যোগী লাভ করেন। চিত্তের বহির্গমন বৃত্তি প্রবাহ অভ্যাসবশতঃ রুদ্ধ হইয়া আত্মাতে সমাহিত হয়, তখন আর বাহিরের বিষয়ে বিচরণ করিবার প্রবৃত্তিই মনের থাকে না। এইরূপে মন যখন বৃত্তিশূন্য অবস্থা প্রাপ্ত হয় অর্থাৎ মন যখন থাকে না তাহাই পরম নিরুত্তি বা পরমোপশান্তির অবস্থা। এই অবস্থায় অবিজ্ঞা একেবারে তিরোহিত হইয়া যায়, সুতরাং যাবতীয় দুঃখ ক্রেশের পরি-সমাপ্তি হয়। ব্রহ্মানন্দমগ্ন চিত্ত আর অনাত্মবস্তুরাপ্তির অভিলাষই করে না। ইহাই প্রকৃত নিরুদ্ধ অবস্থা। এমন কি দেববাহিত ঐশ্বর্য্যও যোগীর স্বরূপ-নিমগ্ন অটল চিত্তকে প্রলুব্ধ করিতে পারে না। যে তাঁহাকে পাইয়াছে সে আর জাগতিক বস্তু চাহিবে কেন? তবে যাহারা সেরূপ অত্যাৎকৃষ্ট অবস্থা লাভ করিতে পারেন নাই, সেই সকল বিষয়াকৃষ্ট চিত্তই মধ্যপথে বিভূতি লাভ করিয়া বিমুগ্ধ ও বঞ্চিত হন। সেই জন্ত জোর করিয়া বলিতে হইবে—আমি অগ্নি কিছু চাই না, হে প্রভু, শুধু তোমাকে চাই।

ভগবান প্রত্যক্ষ যদা বিনিয়তং চিত্তমাঅগ্নেবাবতিষ্ঠতে।

ই'ন কখন? নিঃস্পৃহঃ সর্বকামেভ্যো যুক্ত ইত্যুচ্যতে তদা ॥

যখন চিত্ত বিশেষরূপে নিরুদ্ধ হইয়া কেবল আত্মাতেই অবস্থান করিবে, এবং সর্বপ্রকার কাম্যবস্তুর লাভে স্পৃহাশূন্য হইবে, কোন প্রকার ঐশ্বর্য্য লাভের ক্লীণশাও মনে জাগিবে না,

তখনই বৃষ্টিতে হইবে যোগী যোগপ্রাপ্ত হইয়াছেন। এই যুক্তাবস্থারই নাম আত্মসাক্ষাৎকার।

যথা দীপো নিবাতস্থো নেপতে সোপমা শ্বতা।
 যোগিনো যতচিন্তস্ত যুঞ্জতো যোগমাঅনঃ ॥
 যত্রোপরমতে চিত্তং নিরুদ্ধং যোগসেবয়া।
 যত্র চৈবান্নান্নানং পশুন্নান্নানি তুষ্যতি ॥
 সুখমাত্মান্তিকং যন্তদ্বুদ্ধিগ্রাহমতীন্দ্রিয়ম্।
 বেত্তি যত্র ন চৈবায়ং স্থিতশ্চলতি তত্ততঃ ॥
 যং লক্ষ্যং চাপরং লাভং মন্যতে নাশিকং ততঃ।
 যস্মিন্ স্থিতো ন হুঃখেন গুরুণাপি বিচাল্যতে ॥
 তং বিজ্ঞাদ্ হুঃখসংযোগবিয়োগং যোগসংজিতম্ ॥

বায়ুশূণ্ড দেশে দীপ যেরূপ বিচলিত হয় না, সেইরূপ যোগানুষ্ঠানশীল নিরুদ্ধচিত্ত যোগীর অন্তঃকরণবৃত্তিসমূহ বিষয়াদি সম্পর্কশূণ্ড হওয়ায় যখন অচঞ্চলভাবে আত্মাতে অবস্থিতি করে; যে অবস্থাবিশেষে “যোগসেবয়া” যোগাভ্যাস দ্বারা চিত্ত নিরুদ্ধ হইয়া উপশম প্রাপ্ত হয়; এবং যে অবস্থা বিশেষে ‘আত্মনা’ শুদ্ধান্তঃকরণ দ্বারা ‘আত্মানং’ আত্মাকে সাক্ষাৎ করিয়া ‘আত্মনি এব তুষ্যতি’ আত্মাতেই পরম তৃপ্তি লাভ করে, তাহারই নাম সমাধি। এই অবস্থায় দেহদৃষ্টি না থাকায় বিষয়হেতু তৃপ্তি বলিয়া কিছু থাকে না, এইরূপে রজঃ ও তমোগুণের তিরোভাব বশতঃ চিত্তের শুদ্ধ নির্মল অবস্থা প্রকাশিত হয় এবং ঐরূপ শুদ্ধচিত্তে পরমাত্মার প্রকাশ অনুভব হয়—তাহাই পরম সুখরূপ ব্রহ্মানন্দ বা সাক্ষাৎ জ্ঞানমূর্ত্তি, ইহা সর্বপ্রকার বিষয়-সুখাদির

অভীত অবস্থা। এই অবস্থা বিশেষে একপ্রকার আত্যন্তিক শুদ্ধবুদ্ধিগ্রাহ সুখের অনুভব হয়; ইহা প্রকাশ করা যায় না, কারণ ইন্দ্রিয় মন সেখানে কিছুই থাকে না। তবে মনে হইতে পারে, বিষয়ের সহিত ইন্দ্রিয়ের যোগ না থাকিলে সে সুখ অনুভব করিব কি প্রকারে? তাহারই উত্তরে বলিতেছেন ‘অতীন্দ্রিয়গ্’, ইন্দ্রিয়েরা যেভাবে যেরূপ সুখের আশ্বাদন করে, ইহা সেরূপ নহে। ইহা কেবলমাত্র বুদ্ধিগ্রাহ, সে বুদ্ধিও আবার আত্মাকারী, সুতরাং বিষয়াদির ছায়া পর্য্যন্ত তাহাতে পড়িতে পারে না, অতএব যাহাতে অবস্থিত হইলে আর আত্মস্বরূপ হইতে বিচলিত হইতে হয় না, যাহা নিরবচ্ছিন্ন স্থির অথচ নিরাবলম্ব, তাহাই সমাধি। মনে হইতে পারে বুদ্ধির এই আত্মাকারীকারিত ভাবে যে সুখের কথা বলা হইল, তাহা কতকটা ফাঁকি। বাস্তবিক তাহা নহে, কারণ এই আত্মস্বরূপকে প্রাপ্ত হইলে অন্য কোন লাভকে লাভ বলিয়াই মনে হয় না। যদি আত্মানন্দ ভাবটা কেবল রসহীন শূণ্ডমাত্র হইত, তাহা হইলে ইহার বদলে যোগীরা অল্প সুখকে সুখ বলিয়া মানেন না কেন? ইহাতে বুঝা যায়—ইন্দ্রিয়গ্রাহ না হইলেও, ঐ অবস্থাই—নিরতিশয় সুখরূপ, কারণ তাহাতে অবস্থিত হইলে আর শীতোষ্ণাদি গুরুতর দুঃখে অভিভূত হইতে হয় না। যে অবস্থায় দুঃখের লেশমাত্র স্পর্শ হয় না, তাহাই ‘যোগসংজিত’ যোগশব্দ বাচ্য জানিবে। সাধারণতঃ লোকের যে সুখ সম্বন্ধে ধারণা আছে সে সুখের লেশমাত্র ইহাতে নাই, অথচ কোন প্রকার দুঃখও এ অবস্থা ভেদ করিয়া যোগীকে ক্লিষ্ট করিতে পারে না। সুখের জন্মও স্পৃহা নাই, দুঃখের জন্মও ব্যাকুলতা নাই—ইহাই

প্রকৃত যোগ বা সমাধি। কোন কিছুর অভাব হইলে ছুঃখ এবং তাহার পূরণ হইতে বৈষয়িক সুখছুঃখাদির উৎপত্তি হয়। ইহাতে যোগও নাই, বিয়োগও নাই, বামে দক্ষিণে হেলা নাই—মধ্যবস্থায় স্থির। ইহার নাম দ্বন্দ্বাতীত অবস্থা। ইহা কি প্রকারে আয়ত্ত করিতে হইবে ?

প্রশান্তমনসং হেতুং যোগিনং সুখমুক্তমং ।

উপৈতি শান্তরজসং ব্রহ্মভূতমকল্মষম ॥

রজোগুণ হেতু মন চঞ্চল হইলে তাকে পুনঃ পুনঃ প্রত্যাহার দ্বারা আত্মবশীভূত করিতে করিতে রজোবৃত্তি শান্ত হইয়া আসে, তখন প্রশান্তচিত্ত, নিস্পাপ, ব্রহ্মত্বপ্রাপ্ত যোগীকে উত্তম সুখ আশ্রয় করে।

যুঞ্জস্বং সদা আনং যোগী বিগতকল্মষঃ ।

সুখেন ব্রহ্মসংস্পর্শমত্যন্তং সুখমশ্নুতে ॥

মনবুদ্ধি হেতু সুখছুঃখাদি-সম্পর্ক-শূন্য আত্মাতে সুখছুঃখাদির প্রতিবন্ধ পড়ে। কিন্তু সেই মনবুদ্ধিই যখন আত্মাকারাকারিত হইয়া যায়—সে সময় আর জাগতিক সুখছুঃখের তরঙ্গাভিঘাতে মনবুদ্ধি উদ্বেলিত হয় না, এইরূপে আত্মবশীকৃত যোগী বিগত-পাপ হইয়া 'ব্রহ্মসংস্পর্শ' রূপ অবিদ্যানিবর্তক যে সর্বোত্তম সুখ—তাহাই তখন ভোগ করেন। যোগীর তখন জীবনমুক্তি হয়।

সর্বভূতস্বমাত্মানং সর্বভূতানি চাত্মনি ।

ঈক্ষতে যোগযুক্তাত্মা সর্বত্র সমদর্শনঃ ॥

যোগাভ্যাসের চরম ফল কি তাহা বলিতেছেন। যোগাভ্যাসের দ্বারা সমাহিত-অন্তঃকরণ যোগী সর্বত্র সমদর্শী হন। কারণ

আত্মা কি তাহা তিনি জানিয়াছেন। এবং সেই আত্মাকে তিনি যখন “অখণ্ডমণ্ডলাকারং ব্যাপ্তং যেন যোগীর চরম চরাচরম্”—বলিয়া প্রত্যক্ষ দর্শন করেন, তখন সাক্ষাৎকার—সর্ব আর কিরূপে অসমবুদ্ধি হইতে পারেন? তখন ভূতে আত্মদর্শন। লৌকিক জ্ঞাতি, কুটুম্ব, স্বজন বন্ধু, এমন কি নিজের দেহটারও পৃথক অস্তিত্ব অনুভব হয় না, সুতরাং তিনি কাহারও প্রতি দ্বেষবুদ্ধি বা প্রিয়বুদ্ধি রাখিতে পারেন না। তিনি তবে কি দেখেন? ব্রহ্মাদি স্থাবরাস্তু সর্ব-ভূতে অবস্থিত নিজ আত্মাকে দেখেন, এবং নিজ আত্মাতে সর্ব-ভূত অভিন্নভাবে রহিয়াছে দেখিতে পান। দেহাদি অবস্থা অবিদ্যাকৃত, সেই অবিদ্যাই যখন থাকে না, তখন দেহভাগও থাকে না, দেহভাগ না থাকিলে দেহভাব লক্ষিত হইতেই পারে না। সুতরাং সর্বত্র ব্রহ্মদৃষ্টি হেতু সূত্রজালে বস্ত্র এবং বস্ত্রে সূত্র দর্শনের স্থায় আত্মাতেই প্রপঞ্চ এবং প্রপঞ্চাদিও আত্মাতিরিক্ত কিছু নহে এইরূপ সম্যক্ দর্শন দ্বারা তাঁহার বৈষম্যবুদ্ধি এককালে তিরোহিত হইয়া যায়।

যো মাং পশ্যতি সর্বত্র সর্বঞ্চ ময়ি পশ্যতি ।

তস্মাহং ন প্রণশ্যামি স চ মে ন প্রণশ্যতি ॥

যে যোগীপুরুষ সর্বত্র, জাগতিক সকল পদার্থে আমাকে দেখিতে পান, এবং আমাতেই সমস্ত ভূতজাতকে দেখেন, তাঁহার নিকট আমি অদৃশ্য থাকি না, একাত্মতাহেতু তিনি আমার পরোক্ষ বা অদৃশ্য হ'ন না।

সমাধি মোটামুটি দুই প্রকার। সম্প্রজ্ঞাত ও অসম্প্রজ্ঞাত।

সমাধি-সাধন
 ধ্যান গভীর হইলেই সমাধি আসন্ন হয়। ধ্যান
 করিতে করিতে যখন ধ্যেয় বস্তুমাত্র জ্ঞাত
 হয়, এবং অস্ত্র সব ভুলিয়া যাওয়া যায়, তাহাই
 সম্প্রজ্ঞাত সমাধি। আর অসম্প্রজ্ঞাত সমাধি এই—

মনসো বৃত্তিশূন্য ব্রহ্মকারতয়া স্থিতিঃ।

যাসম্প্রজ্ঞাতনামাসৌ সমাধিরভিবীৰ্যতে ॥

মন বৃত্তিশূন্য হইয়া যখন ব্রহ্মাকারে অবস্থিত হয়, যে অবস্থায়
 জ্ঞান, জ্ঞেয়, ও জ্ঞাতার পার্থক্য লক্ষিত হয় না, তাহাই অসম্প্র-
 জ্ঞাত সমাধি।

যেমন ধ্যানাবস্থা হইতে সম্প্রজ্ঞাতে আনা যায়, তদ্রূপ
 সম্প্রজ্ঞাত সমাধি হইতে অসম্প্রজ্ঞাত সমাধিতে উপনীত হওয়া
 যায়। যদিও সমাধিসাধন অত্যন্ত কঠিন, কিন্তু প্রত্যহ নিয়মিত
 চেষ্টা করিলে যে ইহা আয়ত্ত করা যায় সে বিষয়ে সন্দেহ নাই।
 সাধারণতঃ চিন্তে ক্ষণে ক্ষণে অসংখ্য বৃত্তির উদয় হয়। একটি
 চিন্তা আর একটি হইতে ভিন্ন। এইরূপ ক্ষণে ক্ষণে বিভিন্ন
 বৃত্তির নিরন্তর উদয়ের নামই বিক্ষিপ্তাবস্থা। ইহা সমাধির
 অত্যন্ত প্রতিকূলভাব। এই বিক্ষেপভাবকে সাধন বিশেষের
 দ্বারা স্থির করিতে হইবে। অভ্যাস দ্বারা এই ভয়ঙ্কর চিন্তা-
 বিক্ষেপ প্রশমিত হয়। এই অভ্যাসের সহিত চিন্তা যদি বৈরাগ্য-
 যুক্ত থাকে, তবে সোণায় সোহাগা হয়। কারণ বিষয়ানুরাগ-
 বশতঃই চিন্তা অধিক বিক্ষিপ্ত হয়। বিষয় হেয় এই ধারণা
 দৃঢ়ীভূত হইলে মনের অনেক কল্পনা কমিয়া যায়, সুতরাং সেই
 পরিমাণে চিন্তাও স্থির থাকে। যে বিষয়ে মনের অনুরাগ বেশী,

সেই চিন্তাই মন বেশী করে। যদি এইরূপে কোন সাধু, গুরু
 অথবা ইষ্টমূর্তি প্রিয় বোধ হইয়া থাকে, তবে তাহাও পুনঃপুনঃ
 চিন্তা করা স্বাভাবিক। এই চিন্তার একতানতা হইতেই ধ্যানা-
 বস্থা পূর্ণতা লাভ করে। ধ্যানাবস্থায় একই বৃত্তি বহুক্ষণ
 স্থায়ী হয়। যাহারা নিত্য অভ্যাস করেন তাহারা জানেন, যে
 চিন্তে ক্ষণে ক্ষণে কত অসংখ্য বৃত্তির উদয় হইয়া থাকে, সেই
 চিন্তেই আবার অভ্যাসবলে একই বৃত্তি বহুক্ষণ স্থায়ী হয়। প্রথম
 প্রথম ভিন্ন ভিন্ন কত বৃত্তির পর বৃত্তির উদয় হয়, তাহার পর তাহা
 হ্রাস হইয়া একই প্রকারের ক্ষণস্থায়ী বৃত্তির উদয় হইতে থাকে,
 তখনই বৃষ্টিতে হইবে ধ্যান ঠিক হইতেছে। তারপর একই বৃত্তি
 অধিকক্ষণ স্থায়ী হইয়া থাকে। এই অবস্থায় নিদ্রালুর চক্ষের মত
 চক্ষু জড়াইয়া আসে, ভারী হইয়া যায়। মন কথা কহিতে চায় না,
 ইন্দ্রিয়েরা এলোমেলো ভাবে বিষয় গ্রহণ করে, কখনও করে না
 ঠিক নিদ্রা আসিবার পূর্বে যেমন হয়। তারপর ধ্যানাবস্থা আরও
 গভীর হইলে, বাহ্যবিষয় শরীরাদিও বিস্মৃত হয়, কেবল ধ্যেয়
 বিষয় স্পষ্ট জাগরুক থাকে—তাহারই নাম সমাধি। এই
 সমাধি অবস্থা হইতেই যাহা জানিবার তাহার চরম জ্ঞান হইয়া
 থাকে। সেই সময় অনেক অলৌকিক বিষয় প্রত্যক্ষ হইতে থাকে।
 কিন্তু সে সব নানাভাব, পৃথক্ জ্ঞানের সূক্ষ্ম সোপানপরম্পরা
 অতিক্রম করিয়া নির্বিবকল্প চরম অবস্থায় উপনীত হওয়া যায়।
 উহাই প্রকৃত আত্মসাক্ষাৎকার। সূক্ষ্ম বিষয় বৃষ্টিতে হইলেই
 যেমন আমরা মনকে স্থির করিয়া লই অর্থাৎ বাহ্যবিষয় হইতে
 ইন্দ্রিয়গুলিকে প্রত্যাহত করি, নচেৎ সূক্ষ্ম জ্ঞান হয় না, কোন

ভাল বিষয় বুঝা যায় না, সেইরূপ আত্মজ্ঞান চরম সূক্ষ্মজ্ঞান; মনে স্থূল বাহ্যবিষয়াদির একটুও প্রভাব থাকিতে সে পরম জ্ঞানের উদয় হয় না। সেইজন্য বিশেষ সতর্ক হইয়া বাহ্য বিষয় হইতে মনকে ফিরাইয়া আত্মস্থ করিতে হয়। এইরূপ পৌরুষ প্রযত্ন দ্বারা সমাধি সিদ্ধ হইলে “বিবেকখ্যাতি” বা “ঋতন্তুরা প্রজ্ঞার” উদয় হয়,—যে প্রজ্ঞা আর কখনও নষ্ট হয় না। ইহাই কৈবল্য মুক্তি।

এবা ব্রাহ্মী স্থিতিঃ পার্থ নৈনাং প্রাপ্য বিমুহতি।

স্থিত্বাহস্মামন্তকালেহপি ব্রহ্মনির্বাণমুচ্ছতি ॥

হে পার্থ, ইহাই ব্রাহ্মী স্থিতি, ইহাকে যিনি লাভ করেন, তিনি আর সংসারে মোহপ্রাপ্ত হন না। মৃত্যুকালেও যদি এই জ্ঞানে অবস্থিতি করিতে পারা যায়, তাহা হইলেও ব্রহ্মনির্বাণ প্রাপ্তি হয়।

সমাধিস্থ বা স্থিতপ্রজ্ঞের লক্ষণ ভগবান্ গীতায় বলিয়াছেন—

প্রজ্ঞহাতি যদা কামান্ সর্বান্ পার্থ মনোগতান্।

আত্মশ্চেবাত্মনা তুষ্টঃ স্থিতপ্রজ্ঞস্তদোচ্যতে ॥

যঃ সর্বত্রানভিস্নেহস্তত্তৎ প্রাপ্য শুভাশুভম্।

নাভিনন্দতি ন দ্বেষ্টি তস্য প্রজ্ঞা প্রতিষ্ঠিতা ॥

যিনি মনোগত কামনাসমূহকে ত্যাগ করিয়াছেন এবং আপনাতে আপনি তুষ্ট, অর্থাৎ তাঁহার তৃপ্তির জন্ম বাহিরের কোন বস্তুর প্রয়োজন হয় না, পরমানন্দ স্বরূপ আত্মাতে যিনি ডুবিয়া গিয়াছেন, তিনিই সিদ্ধ, বুদ্ধ ও মুক্ত—এই লক্ষণাবিত পুরুষকেই স্থিতপ্রজ্ঞ বলা যায়। ইচ্ছা, দ্বেষ, সুখ, দুঃখাদি অনাত্মধর্ম; মন

যতক্ষণ থাকে ইহারা ততক্ষণ থাকিবেই, কিন্তু সমাধির সময়ে মনোনিবৃত্তি হওয়ায় অনাত্মধর্ম সকল তিরোহিত হইয়া যায়। তখন সমুজ্জ্বল জ্ঞানসূর্য্য স্বকীয় প্রভায় উদ্ভাসিত হইতে থাকে, সাধক তখন কোনরূপ অজ্ঞান বা অভাব আবরণ না থাকায় নির্মূল ব্রহ্মানন্দ-অমৃতরস লাভে বিভোর হইয়া আত্মারাম ও আত্মক্ৰীড়া হইয়া যান। এখন কথা হইতেছে সমাধিস্থ পুরুষের ঐ সকল লক্ষণ প্রকাশ পায় বটে, কিন্তু অষ্টপ্রহর তো আর সমাধি থাকে না। যখন যোগী সমাধি হইতে ব্যুথিত হন তখন তো তাঁর মন ফিরিয়া আসে, সে মন তখন সংসারাদিতে আসক্তি প্রকাশ করে কিনা তাহারই উত্তরে ভগবান বলিতেছেন— যোগী পুনঃ পুনঃ সমাধিলগ্ন হইয়া একরূপ আত্মহার্য্য অবস্থা লাভ করেন যে তিনি ব্যুথিত অবস্থাতেও পুত্রমিত্রাদি সর্বত্র অনভিস্নেহ অর্থাৎ স্নেহযুক্ত হ'ন না। আত্মাতে তাঁহার এত প্রীতি যে অনাত্মপদার্থ স্ত্রীপুত্রাদিতে বা এই দেহের সুখহংসে তাঁহার হৃষ্ট বা ছুঃখিত হইবার সম্ভাবনা নাই। তিনি প্রিয় বা অপ্ৰিয় বস্তু পাইয়া অভিনন্দন বা নিন্দা করেন না, 'তস্য প্রজ্ঞা প্রতিষ্ঠিতা'—এরূপ ব্যক্তিরই প্রজ্ঞা প্রতিষ্ঠিত, অর্থাৎ জ্ঞানে অচল-প্রতিষ্ঠ হইয়াছেন।

এই স্থিতপ্রজ্ঞ পুরুষ অনায়াসে প্রত্যাহার করিতে সমর্থ, তাই ভগবান বলিতেছেন—

যদা সংহরতে চায়ং কৃশ্মোহঙ্গানীব সর্ব্বশঃ।

ইন্দ্রিয়ানীন্দ্রিয়ার্থেভ্যস্তস্য প্রজ্ঞা প্রতিষ্ঠিতা ॥

কুর্ষ্ম যেমন আশঙ্কার কারণ উপস্থিত হইবামাত্রই নিজ শিরঃ-

পদাদি অঙ্গের সংকেচ করিয়া লয়, সেইরূপ ইচ্ছামাত্রই যে যোগী ইন্দ্রিয়বিষয় হইতে ইন্দ্রিয়গণকে অনায়াসে সহজে সংহরণ করিতে পারেন, তাঁহার প্রজ্ঞা প্রতিষ্ঠিত। সে প্রজ্ঞা আর কিছুতে নড়িবার নহে। পূজ্যপাদ মহর্ষি বশিষ্ঠদেব বলিয়াছেন “যিনি যোগমার্গ অবলম্বনপূর্ব্বক রাগদ্বেষের পরিহার, লোষ্ট্রকাঞ্চনে সমদৃষ্টি ও সংসারবাসনার বিসর্জন করেন তিনিই ভক্ত। তিনি দান, ভোজন বা হননাদি যে কোন কার্যের অনুষ্ঠান করুন বা নাই করুন, তজ্জন্ম সুখদুঃখাদিতে তাঁহার সমান জ্ঞান হইয়া থাকে। তিনি ইষ্টানিষ্ট ত্যাগ করিয়া কর্তব্য বোধে একমাত্র উপস্থিত বিষয়ের অনুষ্ঠান করেন, তিনি কোন কালে কোন রূপে অভিভূত হ'ন না।”

নবম অধ্যায়

অভ্যাস বা পৌরুষ প্রযত্নের ফল

পূর্ব্বে যে সমস্ত জ্ঞান যোগাদির সাধনা বলিয়া আসিয়াছি তাহা সমস্তই অভ্যাসের দ্বারা আয়ত্ত করিতে পারা যায়। বাসনাকে বিদূরিত করা বা কল্পনাকে সঙ্কুচিত করা, সমস্তই অভ্যাসের দ্বারা হইতে পারে। এই পুরুষাকার। অভ্যাসকে আয়ত্ত করা খুব শক্ত নয়। চেষ্টা করিলেই সিদ্ধির সম্ভাবনা। মানুষ যে বাসনাকে বিদূরিত করিতে পারে না—তাহার কারণও অভ্যাস। আমাদের বাসনার শ্রোত যে প্রতিনিয়ত অশুভ পথে ধাবমান হইতেছে, ইহা কি অশুভ অভ্যাসের ফল নহে? আবার যদি তাহাকে শুভ পথে ফিরাইবার চেষ্টা করি, তবে কেনই বা অকৃতকার্য হইব? অশুভকে শুভের দিকে ফিরাইবার নামই তো পুরুষার্থ। কুবাসনার ও কুচিন্তার মননে যেমন চিত্ত কুকার্যে আসক্ত হইয়া থাকে তেমনি শুভবাসনা বৃদ্ধি করিতে পারিলেই মঙ্গলের পথে স্বতঃই চিত্তের গতি হইবে। যাহা অভ্যাস করিবে, তাহাই আয়ত্ত করিতে পারিবে। পৌরুষ ও প্রযত্নে কোন অভীষ্টই সিদ্ধ হইতে বাকি থাকে না। পৌরুষ সহায়ে চিত্তশুদ্ধি ও তাহা হইতে তত্ত্বজ্ঞান এবং বৈরাগ্যোদয় হইলেই সমস্ত অমঙ্গল নিবৃত্ত হয়। এই চিত্তশুদ্ধি লাভ করিবার জন্মই

শাস্ত্রবাক্য, গুরুবাক্য এবং সাধুবাক্য শ্রবণ করিতে হইবে। ইতোপূর্বে ইহা বহুবার বলিয়াছি—পুনরায় বলিতেছি যে আপনার খেয়াল মত চলিলে হইবে না। অনেকে নিজে চিন্তা করিয়া যাহা বুঝিতে পারেন না, তাহাই তাঁহাদের প্রযুক্ত বলিয়া ধারণা জন্মে; কিন্তু এই জগদ্ব্যাপার, আশ্রয় ও ব্রহ্মজ্ঞান নিবিড় রহস্যময়, তাহা বুঝিতে হইলে আমাদের এই ক্ষুদ্র অপূর্ণ মস্তিষ্কটির উপর নির্ভর করিলেই চলিবে না। আপনার চপল বুদ্ধিকে একটু সংযত করিয়া, সদগুরুপ্রমুখাৎ অপ্রাস্ত্র ঋষি বাক্যগুলি শুনিতো পারিলে ও তাঁহাদের উপদেশ মত চলিতে পারিলে—তবে যথার্থ তত্ত্বজ্ঞানে অধিকার জন্মিবে। নচেৎ যতই তর্ক করি বা আক্ষালন করি, সমস্তই ব্যর্থ বাগাড়ম্বরে পর্যাবসিত হইবে। অম কোন কালেই মিটিবে না, বরং নন্দহ আরও বাড়িয়া যাইবে। তাই বলিতেছি স্বেচ্ছাচারী হইলে চলিবে না। স্বেচ্ছাচার মত চেষ্টা করিলেও, তাহাকে পুরুষার্থ বলে না। ভগবান গীতায় বলিয়াছেন “যঃ শাস্ত্রবিধিমুৎসৃজ্য বর্জ্যেতে কাম-চারতঃ। ন স সিদ্ধিমবাপ্নোতি ন সুখং ন পরাং গতিম্ ॥” শাস্ত্র-বিধি না মানিয়া যে যথেষ্ট আচরণ করে সে তত্ত্বজ্ঞান প্রাপ্ত হয় না, সুখও পায় না, মোক্ষও প্রাপ্ত হয় না। শাস্ত্র ও সদগুরু বাক্য মানিয়া চলিতে পারিলে এ জগতে অসাধ্যসাধন কিছুই নাই। আজকাল লোকে যথেষ্টাচারের বশবর্তী হইয়া কুতোজন ও কামোপভোগ-পরায়ণ হইয়া প্রতিদিন বাসনার দাস, প্রীজিত ও নির্বীৰ্য্য হইতেছে—তাঁহাদের কোথা হইতে উৎসাহ, উত্তম থাকিবে? শাস্ত্রবিধি মানিয়া চলিবার সে সামর্থ্য, সে প্রসঙ্গচর্যের

ফল কই? তাঁহারা উচ্ছৃঙ্খলতার বশবর্তী হইয়া কাৰ্য্য করিতে গিয়া শাস্ত্রের অভিপ্রায়কে ব্যর্থ করেন এবং কোন সুফলই লাভ করিতে পারেন না। ইহা অবশ্যই শাস্ত্রের দোষ নহে, ইহা আমাদেরই কুর্শ্বের ফল। ইহার প্রতিকারও শাস্ত্রবিধি মানিয়াই করিতে হইবে।

অনেকে বলেন আজকাল আর সে সব সাধন, অনুষ্ঠান করিতে পারাও যায় না আর অত অনুষ্ঠান নিয়মাদি করিতে ভাল-ও লাগে না। উহাতে কোন বিশেষ আনন্দ অভ্যাসের শক্তি পাওয়া যায় না, অনর্থক একটা অভ্যাসের চিত্ত প্রসাদন। বোঝা বহিয়া লাভ কি? বাস্তবিকই যে কাৰ্য্যে কোন আনন্দ পাওয়া যায় না, বা যাহাতে কোন রসবোধ না হয়, সে কাৰ্য্য অভ্যাস করিতে গেলে মন স্বভাবতঃই বিদ্রোহী হইয়া উঠে, কিন্তু অভ্যাসেরও আবার এমনি প্রভাব, যে অভ্যাস করিতে করিতে অভ্যাস্ত বিষয়টিতে ক্রমশঃ আপনা আপনি রসবোধ হইতে থাকে। এই রসবোধ যদি না হইত কোন লোকই তাহা হইলে আপনার প্রবৃত্তির বিষয়কে কখনই আয়ত্ত করিতে পারিত না।

অভ্যাস্ত বিষয় অভ্যাসের গুণে ভাল লাগিবেই লাগিবে এবং তাহা হাজার নীরস বা কঠোর হইলেও, অভ্যাস তাহাকে সহজ ও মরস করিয়া তুলিবেই তুলিবে। ছাত্রদের মধ্যে দেখা গিয়াছে স্বাভাবিক কাহারও কোন বিষয়ে ক্রটি থাকে এবং কোন বিষয় আদৌ পড়িতে ইচ্ছা করে না। কিন্তু দেখা গিয়াছে প্রযত্ন ও অভ্যাসের ফলে অত্যন্ত অপ্রিয় বিষয়ই আবার অত্যন্ত

প্রিয় হইয়া দাঁড়াইয়াছে। সেইরূপ যে প্রবৃত্তিটি বহুবার করা হইয়াছে, সেই প্রবৃত্তিটি পুনঃ পুনঃ অভ্যাসে আধ্যাত্মিক বলবৃদ্ধি হয়। চরিতার্থ করিবার একটি স্বাভাবিক প্রবল ইচ্ছা জন্মিয়া থাকে, তা' সংপ্রবৃত্তিই হউক আর দুঃপ্রবৃত্তিই হউক। সুতরাং শুভকর্ম করিবার অভ্যাস করিলে শুভকর্ম করিতে প্রবৃত্তি জন্মিবে। আত্মসংযমের অভ্যাস করিলে আত্মসংযমের দিকেই চিত্ত উন্মুখ হইয়া থাকিবে। শুধু তাহাই নয়, সংযম অভ্যাস ঠিক ব্যায়ামের মত। ব্যায়ামে যেমন শারীরিক বলবৃদ্ধি করে, সদভ্যাসেও তেমনি আধ্যাত্মিক বলবৃদ্ধি করিয়া থাকে।

কোন একটি বিষয় যখন আমরা দৃঢ়ভাবে অভ্যাস করিতে থাকি, তখনই তাহাকে পুরুষকার বলে। মন অবিরত বিষয় ভাবনার দ্বারা নিয়তই বিক্ষিপ্ত হইতেছে, অভ্যাসই ইহা হইতে কিছুতেই তাহাকে প্রতিনিবৃত্ত করা পুরুষকার। যায় না, সুতরাং এই দুর্দর্শ চিত্তকে বহির্বিষয় হইতে সবলে আকর্ষণ করিয়া অন্তঃসুখে লইয়া যাইবার অভ্যাস সাধন করিতেই হইবে, ইহাই আসল পুরুষকার। এই মনো-বৃত্তি অসংযত ও বহির্বিচরণশীল থাকিতে কিছুতেই শান্তি বা সুখলাভের উপায় নাই। ছুট্ট অথ যেমন বিপথে চালিত হইয়া আরোহীকে গর্ভমধ্যে পাতিত করে, তদ্রূপ এই অসংযত মন ও ইন্দ্রিয়গুলি বিবিধ উৎপথে প্রবৃত্ত হইয়া মানবকে মোহকূপে পাতিত করিয়া ছুঃখক্লেশের কঠিন নিগড়ে আবদ্ধ করে। বুদ্ধির যতক্ষণ এইপ্রকার মালিন্য থাকে, ততক্ষণ তাহার জগদ্দ্রমের

নিরাস হয় না এবং মিথ্যাভিনিবেশের বশবর্তী হইয়া আপনার অহঙ্কারে আপনি বিনষ্ট হয়। জন্মজন্মান্তর হইতে মানবের এই মোহ ছুটিতেছে না, সে দেহ হইতে দেহান্তরে যাইতেছে এবং সঙ্গে সঙ্গে এই সকল বাসনাকে সঙ্গে লইয়া যাইতেছে, সুতরাং পুনঃ পুনঃ জন্মান্তর পরিগ্রহ এবং বিবিধ ছুঃখক্লেশের কিছুতেই নিবৃত্তি হইতেছে না। এই দেহাভিমানই সর্বাপেক্ষা কঠিন বন্ধন। আত্মজ্ঞানের অভাবে এই দেহাভিমান ঘুচিতেছে না। আমাদের সমগ্র আর্ধ্যশাস্ত্রের উপদেশ—এই দেহাত্মবুদ্ধির বিনাশ সাধন কর, নচেৎ মুক্তি নাই। মন চঞ্চল হইয়াই বাসনার বশ হয় এবং তাহার বিচিত্র কল্পনা হইতেই বিষয়ের প্রতি দৃঢ় অভিনিবেশ ও তাহা হইতে এই সংস্কার বশতঃ দেহাত্মবুদ্ধি প্রবল হয়, আবার এই দেহাত্মবুদ্ধি ধ্বংস না হইলে মনকে স্থির করা যায় না। সমাধি-অভ্যাস ব্যতীত কিছুতেই এই 'দেহাত্মবুদ্ধি' বা স্থূল দেহে আমিত্ত্ব জ্ঞানের বিনাশ সম্ভব হইবে না। 'ইহা হেয় এবং ইহা উপাদেয়' ভাবিয়া মন যে অনুরাগ ও বিরাগ প্রকাশ করে, ইহাই আমাদের বন্ধন-রজ্জু। মনই পুরুষকার দ্বারা বৈরাগ্যভূষণে মণ্ডিত হইয়া আবার এই মোহ বন্ধন ছিন্ন করিতে পারে। আমার মন যদি আমাকে সাহায্য না করে, তবে কেহই আমাকে উদ্ধার করিতে পারে না। তাই বশিষ্ঠদেব বলিতেছেন, "রাম! কুঠার দ্বারা পাদপকে যেমন ছেদন করা যায়, তদ্রূপ মনের সহায়েই মনকে ছেদন করিতে হয়। যাহারা এইরূপে মন দ্বারা মনকে ছেদন করে, তাহারাই পরমপাবন পদ লাভ করিয়া নির্বাপ সুখ ভোগ করিয়া থাকে।"

গীতাতেও ভগবান্ ক্রীকৃষ্ণ ইহাই ইঙ্গিত করিয়াছেন :—

বন্ধুরাঙ্ঘ্রানস্তস্ম যেনাঙ্ঘ্রৈবাঙ্ঘ্রনা জিতঃ ।

অনাঙ্ঘ্রনস্ত শক্রেষু বর্জ্যেভ্যৈশ্চ শক্রবৎ ॥

যিনি বিবেকযুক্ত আত্মা দ্বারা দেহেন্দ্রিয়ের সমষ্টিরূপ আত্মাকে বশ করিয়াছেন সেই জিতেন্দ্রিয় ব্যক্তির আত্মাই বন্ধু । আর অজিতেন্দ্রিয় ব্যক্তির আত্মা শত্রুর স্থায় অপকারে প্রবৃত্ত হয় । সংসার-ভোগ-সুখ প্রভৃতি অসৎ পদার্থের জন্ম আমরা যে পরিমাণে ব্যাকুল ও চেষ্টিত হইয়া থাকি, যদি সংশয় আলোচনা ও ইন্দ্রিয়সংযম পূর্বক এই মনকে রুদ্ধ করিতে চেষ্টা করিতাম এবং মনোনিবৃত্তি হইলে কি অপরিমীম শান্তিলাভ হয় তাহা উপলব্ধি করিয়া দেখিতাম, তাহা হইলে পরমার্থ চিন্তারই অল্পসরণ করিতাম, কুকুরের মত মাংসখণ্ডের আশায় হাড় চিবাইয়া আপনাকে আপনি ক্ষতবিক্ষত করিতাম না ।

সংসারের আমরা অত্যন্ত আসক্ত, সংসারের সমস্ত খুঁটিনাটিতেই

যোগাভাসে
সমদৃষ্টি সাধন ।

আমাদের মন আবদ্ধ, সংসারের অতীত কোন পদার্থের প্রতি আমাদের দৃষ্টি নাই । সুতরাং এই দেহ বা এই দেহের ভোগ, কাহারও হস্ত হইতে কিছুতেই নিকৃতি পাইতেছি না । 'সত্যমেব জয়তে নানৃতং'—সত্যই জয়যুক্ত হয়, মিথ্যার জয় হয় না ।' পার্থিবতা-সর্বস্ব আমরা এই যে পদে পদে সত্যকে অবমাননা করিয়া মিথ্যাকে আলিঙ্গন করিতেছি, সাধুবাক্য গ্রহণ করিতেছি না, সত্বপদেশ গ্রাহ্য করিতেছি না, তাহার কারণ আর কিছুই নয়—
বালক যেমন মিথ্যাবাক্যে প্রবঞ্চিত হয় আমরা তেমনি আশার

প্রলোভনে প্রবঞ্চিত হইয়াছি । হায়, এই মায়াবিনী আশাকে পরিহার করিয়া কবে আমরা 'সুখদা নিরাশাকে' সর্বতোভাবে বরণ করিতে পারিব ? কবে আমাদের এইরূপ সংসারভ্রমরূপ অজ্ঞানতিমির সম্যক্ বিদূরিত হইবে ? এই ভ্রম নিরাস করিবার উপায় কি তাহা জগৎগুরু বশিষ্ঠদেব কৃপাপূর্বক উপদেশ করিয়াছেন :—

“বিচারবলেই এই মিথ্যাজ্ঞান দূর হইয়া যায় । পর্বতে আরোহণাদি করা যেরূপ ছুঃসাধ্য তদ্রূপ বহুকাল হইতে মনুগ্রহদয়ে বন্ধমূল এই মিথ্যাজ্ঞান বিনষ্ট করা ছুঃসাধ্য । অভ্যাসযোগ
শু যুক্তি...সাহায্যে এই জগদ্ভ্রম দূর হইতে
অভ্যাসে ভ্রম-পারে ।...সমাধি সহায়ে বৃত্তি সকলের ক্ষয়
অপনোদন । হইলে, দাহশূন্য অগ্নির স্থায়, নির্বাপপ্রাপ্ত

মনকে বিলীন করিয়া যে নামরহিত সৎ বিরাজ করেন তাহাই পরমাত্মার রূপ ।...সকল বস্তুর লয় হইলেও যাহা জাগ্রৎ স্বপ্ন ও সুষুপ্তি এই তিনের অতীত তুরীয়রূপে অবশিষ্ট থাকে, তাহাই পরমাত্মার রূপ ।...তাহার জন্ম নাই, জরা নাই ও আদি নাই ; তিনি সত্য, নিত্য নির্মল, শিবস্বরূপ ও শূন্যস্বরূপ এবং তিনি সকল কারণের কারণ । রূপ রস গন্ধ ও স্পর্শাদি যাহা কিছু তুমি জানিতেছ, তৎসমস্তই তিনি, এবং যাহা দ্বারা ঐ সকল জানিতেছ তাহাও তিনি । দ্রষ্টা দর্শন ও দৃশ্য এই তিনের মধ্যে প্রকাশরূপে বিরাজমান যে দর্শন, তিনিই চৈতন্য স্বরূপ ব্রহ্ম । তাহাকে জানিলেই আত্মজ্ঞান লাভ হয় ।...যে যোগীপুরুষ বেচারীমুদ্রা সহায়ে ভ্রমধ্যে অন্ধোন্মীলিত দৃষ্টি সন্নিবেশপূর্বক

সেই অক্ষুট তারকা দ্বারা এই জগৎ দর্শন করেন, তিনি পরমাত্মাকেই দর্শন করেন।...ব্রহ্মজ্ঞান অভ্যাস না করিলে তুমি কখনও এই শরীরে ব্রহ্মস্বরূপ প্রাপ্ত হইবে অভ্যাস দ্বারা সিদ্ধি, না। তোমার দেহে ইন্দ্রিয়গণ অধিষ্ঠান ব্রহ্মজ্ঞান-লাভ করিতেছে। এইজন্য তুমি ব্রহ্মদর্শনে বঞ্চিত হইবে। এই দেহ (অর্থাৎ দেহে আসক্তি) ত্যাগ করিয়া, চিদাকাশরূপ আশ্রয় করিলে, ব্রহ্মলাভ করিবে তাহাতে সন্দেহ নাই।

“...অভ্যাস ব্যতিরেকে কাহারও কোন বিষয় সম্পন্ন হয় না।

যে কার্য্য কর, তাহাতেই অভ্যাসের প্রয়োজন। ব্রহ্মাভ্যাস।
অভ্যাস ব্যতীত কেহ কখনও কোন কার্য্য সম্পন্ন করিতে পারে না। পণ্ডিতেরা বলিয়া থাকেন, সর্ব্বদা ব্রহ্মচিন্তন, ব্রহ্মবিষয়ের কথোপকথন, প্রকৃষ্ট বিধানে ব্রহ্মবোধ ও ব্রহ্মের প্রতি একনিষ্ঠতাই ব্রহ্মাভ্যাস।...কারুণ্য দ্বারা আত্মাভিমান জয় করিবে, মৌন দ্বারা বাচালতা জয় করিবে, উদ্বোধন দ্বারা তন্দ্রা জয় করিবে, বেদে বিশ্বাস দ্বারা সন্দেহ জয় করিবে ছয় রিপূর বশীকরণ দ্বারা আশঙ্কা জয় করিবে; যোগ প্রভাবে ক্ষুধা জয় করিবে, নিত্যানিত্য বিচার দ্বারা স্নেহ জয় করিবে, স্পৃহা পরিহার দ্বারা অর্থ, ক্ষমা দ্বারা ক্রোধ, সঙ্কল্পত্যাগ দ্বারা বাসনা...আত্মচিন্তা দ্বারা শ্বাস-প্রশ্বাস, ধৈর্য্য দ্বারা কাম, তত্ত্বজ্ঞান দ্বারা ভ্রম প্রমাদ ও বিষয়তৃষ্ণা জয় করিবে...। কাম, ক্রোধ, লোভ, ভয় ও স্বপ্ন এই পাঁচটি ব্রহ্ম পথের বিবম কটক। আর দান, ধ্যান, অধ্যয়ন, সত্য, লজ্জা, সরলতা, ক্ষমা, চিন্তাশুদ্ধি, আহারশুদ্ধি, ও ইন্দ্রিয়শুদ্ধি এই দশটি

ব্রহ্মসিদ্ধির সাক্ষাৎ উপায়, যোগসাধনের একমাত্র পন্থা। ভোগবাসনাই অবিद्या, পুরুষকার-সহকৃত উদ্বোধন সহায়ে সঙ্কল্প ত্যাগ করিলেই অবিদ্যার ক্ষয় হয়।”

বদ্ধ জীব বাসনার দাস, তাই সে আশার আশ্বাসে সংসারের

মধ্যে ঘুরিয়া মরে, সত্য বস্তুকে পায় না।

অভ্যাস দ্বারা সত্য বস্তুকে দেখিয়াও বুদ্ধিতে পারে না।

বাসনা জয়। ইহারই নাম বুদ্ধির জড়তা। ইহা পূর্ব্ব পূর্ব্ব

কু-অভ্যাসের বশেই ঘটয়া থাকে। বুদ্ধির

এই জড়তা ঘুচাইবার অভ্যাসেরই নাম শ্রমত্ব বা পুরুষকার।

অনেক বিষয় আমাদের অজ্ঞাতে অতি সহজে অভ্যস্ত হইয়া যায়, কিন্তু সে অভ্যাস শেষে ত্যাগ করা প্রাণান্তকর হইয়া পড়ে।

মত্তপান বা অহিফেন-সেবন বা কোন প্রকার অভ্যাসের প্রভাব নেশায় অভ্যস্ত হওয়া কঠিন নয়, কিন্তু ছাড়ার অভ্যাসই কষ্টকর। কোন কাজ প্রথমে বড় শক্ত মনে হয়, হয়ত তাহা পারিব না বলিয়া ভয় হয়, কিন্তু আবার তাহা কিছুদিন অভ্যাস করিতে করিতেই কখন তাহা অভ্যাস-গত হইয়া যায়, তাহা বুদ্ধিতেও পারা যায় না। মন স্থির করাই কঠিন, ধ্যান করা আরও কঠিন, কিন্তু চেষ্টা করিতে করিতে তাহাও আয়ত্ত হইয়া যায়। লোকে যখন বন্দুক বা তীর ছোড়া অভ্যাস করে, তখন প্রথম প্রথম লক্ষ্য স্থিরই করিতে পারে না, কিন্তু ক্রমিক অভ্যাসে লক্ষ্যভেদ অনায়াসসাধ্য হয়। দেখা গিয়াছে, যে, যে কার্য্য করিবার অভ্যাস করে বা যে চিন্তা করিতে সে বিশেষ অভ্যস্ত হয়, তাহা তাহার

চিন্তে এত কঠিন ভাবে সংস্কার অঙ্কিত করে, যে তাহার কার্য একবার হইয়াই শেষ হয় না, তাহা পৌনঃপুনিক ভাবে চিন্তে আসিতে আরম্ভ করে এবং প্রতিবারেই চিন্তের মধ্যে সেই সংস্কারকে গভীরতর ও দৃঢ়তর করিয়া যায়। সেই জন্তই কোন একটা কাজ বা চিন্তা একবার করার পর তাহা পুনঃ পুনঃ করিবার জন্ত প্রবৃত্তি জন্মে। এবং এই জন্তই বোধ হয় এই সংসার এবং ইহার মায়ার সংস্কার আমাদের চিন্তকে এতটা জড়াইয়া ধরে যে, ইচ্ছা না থাকিলেও আমরা অবশ হইয়া সংসারচিন্তা করিতে বাধ্য হই। অভ্যাস যত পুরাতন বা দীর্ঘকালের হইবে, ততই তাহা মুছিয়া ফেলা সুকঠিন হইবে। এই সংস্কারের এত অধিক শক্তি যে, মনের অনিচ্ছা সবেও জোর করিয়া তাহা মনকে অধিকার করিয়া বসে; সেই জন্ত যে চোর, যে মিথ্যাবাদী, বা যে ঘাতক নিজ নিজ কুকার্যে অভ্যস্ত হয়, পরে তাহারা স্বীয় দোষ বৃদ্ধিতে পারিলেও তাহা আর সংশোধন করিতে পারে না, কারণ পূর্ব অভ্যাসের সংস্কার তাহাদের উপর এতই বল প্রকাশ করে।* তাই ভগবান্ শ্রীকৃষ্ণ বলিয়াছেন :—

* এই জন্ত দেখিতে পাই পণ্ডিত ব্যক্তিও তাহার সংস্কারবিরুদ্ধ কন্ম বা চিন্তাকে তেমন করিয়া বৃদ্ধিতে পারেন না। সংস্কারকে অতিক্রম করা বড় ক্ষমতার কাজ। এই 'চিন্ত' থাকিতে সংস্কারশূন্য অবস্থা লাভ করাও এক প্রকার অসম্ভব। বাহারা বলেন 'এসব সংস্কার ছাড়িয়া দেওয়া উচিত' 'সে সব সংস্কার কুসংস্কার'—তাহারাও প্রকৃতপক্ষে সংস্কারের বশবর্তী হইয়াই এরূপ বলিয়া থাকেন। যিনি যোগযুক্ত নহেন, তাহার

“আসুরীং যোনিমাপন্ন মূঢ়া জন্মনি জন্মনি।

নামপ্রাপ্যৈব কৌন্তেয় ততো যান্ত্যধমাং গতিম্ ॥”

ভাল কন্ম ও সচ্চিন্তার সংস্কারও ঠিক ঐ রকম। দয়া যত করিতে থাকিবে দয়া করিবার প্রবৃত্তি ততই বাড়িয়া যাইবে। ঐরূপে সমস্ত সদগুণও নিয়ত অভ্যাসে প্রবল হইয়া উঠে।

চিন্ত যে কিরূপে সংস্কারশূন্য হইতে পারে তাহা আমি বুঝিয়া উঠিতে পারি না। কেবলমাত্র হঠকারিতা করিলেই বা কোন সংস্কারকে 'কু' বলিয়া বৃদ্ধিতে পারিলেই, তাহা নষ্ট হয় না। অসংস্কারকে অনেকেরই ঘৃণা করেন, নিন্দা করেন, তাহার জন্ত বড় বড় বক্তৃতা করেন, কিন্তু কার্যক্ষেত্রে কয়জন অসংস্কারী না করিয়া থাকিতে পারেন? বাহারা একত্র না থাওয়া স্পৃহা-অস্পৃহা ও জাতিভেদ প্রভৃতি মানাকেই কুসংস্কার বলিতে চাহেন, তাহাদের কথা কে অশ্রদ্ধা করিতে চাহি না, কিন্তু বাহা সংস্কারগত হইয়া গিয়াছে, তাহাকে উঠাইয়া দেওয়াই সহজ কথা কি? আমার বিশ্বাস, উঠাইবার জন্ত সাধ্য সাধন করিলেও উঠানো শক্ত, কারণ বহু-কালের সংস্কারকে তর্জনী হেলাইয়া উঠাইয়া দেওয়া যায় না, কখনও কেহ এরূপ পারিয়াছেন বা পারিবেন বলিয়া আমি বিশ্বাস করিতে পারি না। এ সকল ভেদাভেদ ভাব ভাল কি মন্দ সে কথা এখানে হইতেছে না, ইহার স্বপক্ষে বুদ্ধির অভাব নাই। সুতরাং তাহা লইয়া বিতণ্ডা করা বুঝা। আমার কথা এই যে, বিশুদ্ধ জ্ঞান বাস্তবিত সংস্কারশূন্য যখন কেহই হইতে পারেন না, তখন সেই জ্ঞানকে লাভ না করা পর্যন্ত উহা লইয়া কলহ করা নিপ্রয়োজন। আপনার মতকে সকলেই বিশুদ্ধ বলে, এবং অপরের মতকে কুসংস্কার বসে। যে যেরূপ সমাজের মধ্যে লাগিত, তাহার তদনুকূল সংস্কার গঠিত হয়, এবং সে স্বপক্ষের অনুকূল বুদ্ধিকেই যুক্তিবুদ্ধ বলে। দুইটি বিরুদ্ধ সংস্কার-সম্পন্ন সমাজের দুইটি

এই যে মন অনবরত বিবিধ চিন্তায় মগ্ন, স্থির করিবার কত যত্ন করিলেও স্থির হইতে চাহে না, তাহার কারণও ঐ। পুনঃ পুনঃ অনাবশ্যক বিষয় চিন্তা করিতে করিতে সেই সকল নিষ্ফল চিন্তা মনকে এত অধিকার করে যে, মন অবসর পাইয়াছে কি আবার সেই চিন্তায় মগ্ন হইয়াছে। মন ঠিক বানরের আয় উদ্দেশ্যহীন ছুটাছুটিতে বিভ্রত হইয়া রহিয়াছে। অথচ যদি ভাল করিয়া চিন্তা করিয়া দেখা যায় তবে বুঝা যায় যে, এই সকল চিন্তা ইহলোক, না পরলোক কোন লোকেই সফল উৎপাদন বালককে পরীক্ষা করিয়া দেখিলেই বুঝিতে পারা যায়। তাহার না বুঝিয়াও স্ব স্ব সমাজের মতকেই পোষণ করিতে চেষ্টা করিবে এবং স্বীয় সংস্কারবিরুদ্ধ মত যদি ভালও হয়, তবুও তাহা গ্রহণ করিতে তাহাদের চিত্ত বাঁকিয়া দাঁড়াইবে। ইহাতে দোষ কাহারও নাই, সংস্কারই এ সকলের কারণ। কোন পণ্ডিতের মত এই যে, বালকদিগকে গোড়া হইতে কোন একটা সংস্কারের পক্ষপাতী হইবার সুবিধা দেওয়া অন্তায়। অন্তায় সন্দেহ নাই। কিন্তু উপায় কি? হিন্দুসমাজের সংস্কার হইতে সরাইয়া তাহাকে ব্রাহ্ম সমাজে রাখুন, ব্রাহ্মসমাজের রং তাহার মনে ফুটিয়া উঠিবে। ব্রাহ্মসমাজ হইতে উঠাইয়া খ্রীষ্টিয়ান সমাজে রাখুন, খ্রীষ্টিয়ান সংস্কারে তাহার হৃদয় পূর্ণ হইয়া উঠিবে। সর্বসংস্কারের বহির্ভূত করিয়া রাখা তো কাহাকেও চলে না। কোন না কোন সমাজের আঁচ তাহাকে লাগিবেই, আর নয়ত সে মানুষ না হইয়া অস্ত্র কিছু হইবে। সুতরাং এসব বুঝা তর্ক ছাড়িয়া যাহাতে মানুষ হওয়া যায় তাহার চেষ্টা করাই বুদ্ধিমানের কার্য। যদি আমরা মানুষ হইতে পারি তবে যে সমাজেই থাকি না কেন আমরা সকলেই সেই এক লক্ষ্যস্থলেই পৌঁছিতে পারিব।

করে না। অথচ তাহা সংস্কাররূপে মনে থাকিয়া যায় এবং পৌনঃপুনিক ভাবে মনে উদয় হইতে থাকে। সঙ্কল্প-বিকল্পাত্মক মনের সহস্র চিন্তা যদি মনোযোগ সহকারে লক্ষ্য করা যায় তবে আপনার কাছে আপনাকে লজ্জিত হইতে হয়, এবং তাহার সঙ্কল্প-বিকল্পের অসারতা দেখিয়া হাস্ত সংবরণ করা কঠিন হয়। সময়ে সময়ে দুঃখ ও অন্ততাপ হয়, আমরা যে আপনাদিগকে বিজ্ঞ-বলিয়া পরিচয় দেই, আর কি না শিশুর মত সঙ্কল্পবিকল্পের অলীক মত্ত চেষ্টায় সর্বদা জর্জরিত হইতেছি! কোন প্রয়োজন নাই অথচ মনে কত চিন্তারই তরঙ্গ ছুটিতেছে। এই এক চিন্তা আসিল, আবার আর একটি চিন্তা দ্রুত চলিয়া আসিতেছে, ওই যে অপর তৃতীয় চিন্তা সুদূর হইতে উঁকিঝুকি দিতেছে—নিত্য প্রবাহিত সাগরতরঙ্গের আয় চিন্তার বিরাম নাই, বিজ্রাম নাই! ইহার কবল হইতে যদি নিষ্কৃতি না পাই, তবে অস্ত্রকে উন্নত মনে করা বাতুলতা। প্রকৃতপক্ষে যাহার মন বাসনা-তরঙ্গে মুহূর্তে মুহূর্তে উৎক্ষিপ্ত হইতেছে, ক্ষণাধর্মাত্র এক স্থানে থাকিতে পারিতেছে না, তাহা অপেক্ষা উন্নত এবং প্রকৃত দুঃখভাগী আর কে আছে?

এই সকল চঞ্চলাত্মাদের ছরবস্থার কথা ভগবান্ শ্রীকৃষ্ণ অর্জুনকে বুঝাইতে চেষ্টা করিয়াছেন :—

“চিন্তামপরিমেয়াক্ষ প্রলয়ান্ত্যমুপাশ্রিতাঃ।

কামোপভোগপরমা এতাবদিত্তি নিশ্চিতাঃ ॥

আশাপাশশতৈতর্ক্বদ্বাঃ কামক্রোধপরায়ণাঃ।

ঈহন্তে কামভোগার্থমন্ত্যায়নার্থসঞ্চয়ান্ ॥

ইদমগ্ণ ময়া লক্‌মিদং প্রাপশ্চে মনোরথম্ ।
 ইদমস্তীদমপি মে ভবিষ্যতি পুনর্ধনম্ ॥
 অসৌ ময়া হতঃ শক্রহ্নিনিস্চে চাপরানপি ।
 ঈশ্বরোহহমহং ভোগী সিদ্ধোহহং বলবান্ সুখী ॥
 আচ্যোহভিজ্ঞনবানস্মি কোহ্‌ছোহস্তি সদৃশো ময়া ।
 যক্ষো দাস্ত্যানি মোদিব্য ইত্যজ্ঞানবিমোহিতাঃ ॥
 অনেকচিত্তবিস্রান্তা মোহজালসমাবৃত্তাঃ ।
 প্রসক্তাঃ কামভোগেষু পতন্তি নরকেহুর্চৌ ॥”

এই সকল কামভোগপরায়ণ ব্যক্তিদের কামভোগই পরম পুরুষার্থ বলিয়া ধারণা, তাই তাহারা কত শত দুর্কর্মের দ্বারা অর্থ সঞ্চয় করিতেছে, আবার সেই অর্থের অহঙ্কারে স্ফীত হইয়া অপরকে আপনা হইতে ক্ষুদ্র বলিয়া মনে করিতেছে। এই সকল মোহ-মদিরায় উন্নত জনগণ চিন্তের বিক্ষেপবশতঃ যে আপনার হাতে আপনি নরক প্রস্তুত করে তাহা বুঝিতেও পারে না। তাহারা ধনমদে মত্ত হইয়া যে “অসত্যমপ্রতিষ্ঠন্তে জগদাহরনীশ্বরম্” বলিয়া চীৎকার করিবে তাহাতে আর আশ্চর্য্য কি? তাহারা জগৎটাকে বেদপুরাণাদি-প্রমাণমূলক বলিতে চাহে না, বেদাদির প্রামাণ্য স্বীকার করে না। তাহারা বলে “ত্রয়ো বেদশ্চ কর্তারঃ ভগুধূর্ত-নিশাচরাঃ।” সূতরাং ধর্মাধর্মরূপ প্রতিষ্ঠা বা ব্যবস্থা এ জগতে নাই। যাহার যাহা খুসী সে তাহাই করুক। কারণ জগৎ অনীশ্বর—ঈশ্বর-রহিত। সূতরাং দণ্ড দিবে কে? বিক্ষেপ তেতু মন স্থির না হওয়ায় আশ্চর্য্য ঘুচে না, এবং সত্য অবধারণ করিতে পারে না। সূতরাং এই চঞ্চল চিত্তই আমাদের মায়াকাঁস, তদ্বিবয়ে

সন্দেহ নাই। ইহার গ্রাস হইতে নিস্তার লাভ করা নিতান্তই কঠিন, কিন্তু ইহার কবল হইতে আপনাকে বাঁচাইতে না পারিলে আর কোন উপায়ও নাই। হায়! আপনাকে আপনি হত্যা করিবার জন্ম রজ্জুর প্রয়োজন হয় না, এই বাসনাই আমাদের বন্ধনরজ্জু এবং এই সুদৃঢ় রজ্জুই আমাদের বিনাশের পক্ষে যথেষ্ট। যিনি সুচিন্তার অভ্যাস দ্বারা এই কুচিন্তা হইতে ত্রাণ পাইতে ইচ্ছা করেন, তাঁহাকে খুব দৃঢ় অভ্যাসশীল হইতে হয়, নচেৎ পূর্বাভ্যাস চিন্তকে অবশ করিয়া তাহার উপর আধিপত্য করিতে থাকে। সেই জন্ম পুনঃপুনঃ বলিয়াছি, আবার বলিতেছি, একদিকে সাধনা-ভ্যাস এবং সঙ্গে সঙ্গে বিচার, অশুদ্ধিকে সাধুসঙ্গের একান্ত প্রয়োজন।

সাধুসঙ্গের প্রভাবে বিবেকের উদয় হয় এবং বিচারোৎপন্ন বিবেক দ্বারা একটা বিপরীত সংস্কারের ভিত্তিস্থাপনের সূচনা হইতে থাকে। অনেককে অভিযোগ করিতে সাধুসঙ্গের প্রভাবে গুনিয়াছি, যে তাহারা শত চেষ্টা করিয়াও বিবেকের অভ্যুদয়। কুচিন্তা ও কদর্য্য অভ্যাসের হস্ত হইতে আপনাকে কিছুতেই বাঁচাইতে পারিতেছেন না। সে সময় হতাশা আসিবার কথা বটে, কিন্তু নিরুৎসাহ না হইয় তিনি যদি নিরন্তর চেষ্টাকে জাগ্রত রাখেন এবং সঙ্গে সঙ্গে কৌশল অবলম্বন করেন, তাহা হইলে নিশ্চয়ই শ্রেয় লাভের সম্ভাবনা কৌশলটি ‘বিপরীত ভাবনা,’ অর্থাৎ যে মন বিপরীত ভাবনায় বিয়রচিত্তায় নিতান্ত অভ্যস্ত এবং বিকারগ্রস্ত চিত্তভুক্তি। তাহাকে “চিত্তা ছাড়, কু অভ্যাস ছাড়, সৎপথে

চল,” একথা বলা নিরর্থক। হাজার উপদেশ দিলেও সে তাহা পারিবে না। সুতরাং ‘চিন্তা’ হইতে তাহাকে একেবারে বিরত করা চলিবে না। চিন্তা করিতে তাহাকে দিতেই হইবে, তবে প্রতিনিয়ত যে চিন্তায় সে অভ্যস্ত সে চিন্তা নহে। কারণ তাহা হইলে সংস্কার আরও প্রবল হইবে। এটা প্রথমতঃ একটু শক্ত মনে হয়, কিন্তু পরে সহজ বোধ হয়। যে খুব আমোদ ভালবাসে এবং তজ্জন্ম নানা অবৈধ আমোদ উপভোগ করিতে করিতে চরিত্রহীন হইয়া পড়ে, তাহাকে আমোদজনক অথচ বৈধ এবং চরিত্রের উন্নতিকর কোন কার্যে নিযুক্ত করিতে হইবে। যে কাজ ভালবাসে এবং অনবরত আপনার বিষয়ের কাজ লইয়া ব্যস্ত, তাহাকে যদি অপরের প্রয়োজনীয় কর্মে নিযুক্ত করা যায়, বা ভগবৎ সম্বন্ধীয় কোন কর্মে নিযুক্ত করা যায়, তবে তাহার পূর্ব অভ্যাস আপনার চিরন্তন স্বার্থ গণ্ডীর বিপরীত মুখে ধাবিত হয়। নদীর প্রচণ্ড বেগ হ্রাস করিতে হইলে স্রোতের মুখে বাঁধ বাঁধিলে যেমন কিছু ফল হয় না, তাহার পাশে পাশে অগ্ৰদিক দিয়া খাল কাটিয়া জল বাহির করিয়া দিতে হয়, তদ্রূপ মনের মধ্যে যে শ্রেণীর চিন্তা বা কার্য করিবার প্রবৃত্তি প্রবল থাকে, তাহার বিপরীত চিন্তা ও কার্যে তাহাকে অল্প অল্প অভ্যস্ত করাইতে হয়। তাহা হইলে পূর্ববেগ হ্রাস হইয়া যাইবার সম্ভাবনা। অর্থচিন্তা যাহার প্রবল সে তাহা হইতে অব্যাহতি পায়, যদি সে লোকের দুঃখ-দারিদ্র্য আলোচনা করে ও তাহা মোচন করিবার চেষ্টা করে। লোকের আধিব্যাধির কথা পুনঃ পুনঃ আলোচনা করিলেও তিনি কিছু

ফল লাভ করিতে পারেন। যাহার কামচিন্তা প্রবল সে যদি সদগ্রন্থ অধ্যয়ন করে ও সদালোচনা করে, এবং আপনার শরীর ও মনকে সর্বদা লোকহিতকর কর্মাদিতে নিযুক্ত করে—যাহাতে কামাদি মনোমধ্যে আশ্রয় পাইবাব অবসর না পায়; এবং ভোগের দ্বারা কষ্টকর রোগাদির উৎপত্তি, ভোগশুখের অনিত্যতা ও পরিণামবিরসতা এবং শরীরের ক্ষণভঙ্গুরতার কথা মনে মনে আলোচনা করে, তবে কামের বেগ অনেক পরিমাণ কমিয়া আসে। যাহার লোভ আছে সে যদি দান করিতে চেষ্টা করে; যে প্রবঞ্চক সে যদি ‘সত্য কথা বলিব’ বলিয়া প্রতিজ্ঞা করে; যে কোপন-স্বভাব সে যদি ক্ষমাশীল ও সহনশীল হইবার অভ্যাস করে; যে অহঙ্কারী সে যদি তদপেক্ষা উচ্চতর অবস্থা ও গুণ-সম্পন্ন ব্যক্তির চরিত্র আলোচনা করে; যে অত্যন্ত মোহগ্রস্ত এবং স্ত্রীপুত্র সংসারের প্রতি অত্যন্ত আসক্ত, সে যদি মৃত ব্যক্তিদের কথা ভাবে, শাশান এবং স্তব্ধ জনশূন্য ভগ্ন অট্টালিকাসমূহ দেখিয়া আসে, তবে স্বতঃই তাহার এই পার্থিব ধনজন ও প্রিয়-পরিজনের প্রতি অনুরাগ হ্রাস প্রাপ্ত হয়। বিশেষতঃ যদি সকলেই মনে করে এবং প্রতিদিন অন্তরের সহিত ভগবানের নিকট এই প্রার্থনা করে যে “আমার দ্বারা যেন কাহারও অনিষ্ট না হয়! লোককে একেই কত দুঃখ কত যন্ত্রণা ভোগ করিতে হয়, আমি যেন আর তাহাদের যন্ত্রণা বৃদ্ধি না করি! রোগ, মৃত্যু, অভাব, অনশনের প্রচণ্ড তাড়নে সকলেই মুহূমান, আমি যেন তাহাদিগের প্রতি আর উপদ্রব না করি! পরের দুঃখ দূর করিবার জন্ত, অপরের অশ্রু মুছাইবার জন্ত যেন আমার হৃদয়-

দ্বার বন্ধ করিয়া না রাখি, পরন্তু প্রয়োজন হইলে স্বার্থ বিসর্জন করিতে পারি, এজন্ত, হে ভগবন, আমাকে বল দাও।”—তাহা হইলে জগতের অনেক দুঃখভার লঘু হইয়া যায়, লোক পাপের আকর্ষণ হইতে বহু পরিমাণে রক্ষা পায় সন্দেহ নাই। কারণ যাহা ভাবা যায় চিন্তা ধীরে ধীরে তাহার সংস্কার গ্রহণ না করিয়া থাকিতে পারে না।

দশম অধ্যায়

সংযম অভ্যাস

সদভ্যাসের ও অসদভ্যাসের অসীম প্রভাব পূর্বে আলোচনা করিয়াছি। অসদভ্যাসের বশে লোকে কত অসংযমই বর্তমান যে, নব নব অভাবে প্রেীড়িত হইতেছে—নগসারে অশান্তি ও ইচ্ছা করিয়া কত কষ্টই সহ করিতেছে—অভাবের কারণ। তাহার সীমা নাই। চেষ্টা করিলে অতি সহজেই এই সকল দুঃখ হইতে লোকে মুক্তি পাইতে পারে। কিন্তু আমরা এতই নির্বোধ যে, অভাবের পীড়নে জুলিয়া পুড়িয়া মরিব, সেও স্বীকার, তবু অনায়াসে যাহাকে ত্যাগ করা যায়, তাহাকে ত্যাগ করিয়া যন্ত্রণার লাঘব করিব না।

ইংরাজি শিক্ষার প্রভাবে আজকাল ধনী, মধ্যবিত্ত ও দরিদ্র গৃহস্থেরা সকলেই প্রায় একরকম চালে সংসারযাত্রা নির্বাহ করিতে চাহে। ধনীদের অর্থ আছে, তাঁহারা সখের ও 'ফ্যাসানের' অনুরোধে অর্থব্যয় করিলে ততটা দোষের হয় না; কিন্তু যাহাদের পরিমিত বা স্বল্প আয়, তাহারাও যদি সেইরূপ নকল করিতে চায়, তবে তাহাদের কষ্ট হওয়া ও অভাবে উৎপীড়িত হওয়া অনিবার্য। কিন্তু এই সামান্য কথাটা কেহই একটু ধীরভাবে ভাবিয়া দেখেন না। ভারতবর্ষের চিরন্তন আদর্শে গৃহস্থালী চালাইতে অনভ্যস্ত হওয়ায়, আমাদের এত দারিদ্র্য ও এত অভাব। যাহারা নিজের ও

স্ট্রীপুত্রকণ্ঠার ছুটি বেলা উদর পূর্ণ করিতে ও পরিষেয় বসন ও ঔষধ-পথ্য যোগাইতে এতদূর ব্যতিব্যস্ত হইয়া পড়ে, তাহার আর অপরের দুঃখ কিরূপে মোচন করিবে? অথচ পূর্বকালে আমাদের পিতামহরা যে ভাবে সংসার চালাইতেন ও জীবন যাপন করিতেন, তাহা অনুসরণ করিয়া চলিলে, প্রকৃত পক্ষে কোন ক্ষতিও হয় না, অথচ অল্প আয়ের মধ্যে এক প্রকার সুখ-স্বচ্ছন্দে সংসারযাত্রা নির্বাহ করিতে পারে। আমাদের নিজেদের অভাব অধিক বলিয়াই, অবশ্য ভরণীয়বর্গ, অতিথি-অভ্যাগত, দীন-দরিদ্রের শুশ্রূষার জন্ত অর্থের অকুলান হয়। কি অশন-বসনে, কি সাজসরঞ্জামে বড় লোকদের মত বা সাহেবীয়ানা ভাবে থাকিবার আকুল চেষ্টাই আমাদের শাস্তির সংসারকে অশান্তিতে ভরিয়া দিয়াছে। এই অবস্থার প্রতিকূল চাল এবং ভোগবিলাসের জন্ত অত্যধিক লোলুপতাই আমাদের দিন দিন অন্তঃসারশূন্য করিয়া দিতেছে। ইহার কি কোন প্রতিকার নাই? এত অভ্যাসের দাস ও বিষয়ের সেবক হইয়া পড়িয়াছি যে, এই সকল অভাবকে পূরণ করিতে না পারিলে আপনাকে কত দুর্ভাগ্য বলিয়া মনে করি। কিন্তু এ সমস্ত অভাবই নিজের কল্পনা, শুধু শূন্যের উপর প্রতিষ্ঠিত। নাই ভাবিলেই যে আপন চুকিয়া যায়, তাহা না করিয়া হয়! হয়! করিয়া বেড়ানো প্রকৃতই অনুতাপের বিষয় নহে কি? পূর্ববর্তী আর্ধ্যসভ্যতার আদর্শ হইতে বিচলিত হওয়াতেই, আমাদের কষ্ট হইয়াছে। এখন এইরূপ অভাববোধ করা অভ্যাস বা সংস্কারগত হইয়া গিয়াছে। আমাদের পূর্বপুরুষেরা পূর্বে এ সব অভাবকে

অভাবই মনে করিতেন না। সুতরাং এইসকল নিজকৃত অভ্যাস, যাহা একটু চেষ্টা করিলেই মুছিয়া ফেলিতে পারা যায়, তাহা না করিয়া ঐ সকলকে প্রশ্রয় দিয়া অবিরত দুঃখভোগ করা কি নিতান্তই পাপ ভোগ করা নয়? যদি বল, এখন এই সকল সুখাদিতে অভ্যস্ত হইয়া পড়িয়াছি, এখন আর তাহা-দিগকে ছাড়িতে পারিব কেন? বুদ্ধিতেছি যে অভ্যাস ভবিষ্যতে আমার দুঃখের কারণ হইবে, জানিয়া শুনিয়াও আমি তাহার বিরুদ্ধে দণ্ডায়মান হইব না? একপ কাপুরুষের মত দুর্বলতা দেখাইলে চলিবে কেন? অবশ্যই কোন প্রতিকারের জন্ত উঠিয়া পড়িয়া লাগিতে হইবে। আমার দৃঢ়বিশ্বাস, অভ্যাসের বশে যাহা সংস্কারগত হইয়া গিয়াছে, বিপরীত অভ্যাস দ্বারা তদ্রূপ আর একটি সংস্কারকে প্রতিদ্বন্দ্বীরূপে খাড়া করিয়া তুলিতে পারা যায়। ভারতবর্ষের সত্য আদর্শই হইল সংযম। ভারতবর্ষের আদর্শ ত্যাগের দিক দিয়া পূর্ণতালাভ করিয়াছে, ভোগের দিক দিয়া নহে। তাহার অশনে বসনে, ভোগে বিলাসে, গৃহে বাহিরে, আচার ব্যবহারে, কথায় বার্তায়, আলাপে আমোদে সর্বত্রই সংযম রক্ষিত, কোন খানেই তাহা মাত্রা ছাপাইয়া উঠিতে পারিত না। ভারতবর্ষের ইহাই বিশেষত্ব। এখন কিন্তু এই সংযমের অভ্যস্ত অভাব হইয়াছে। তাই আমাদের এত দুঃখ, এত কষ্ট। এদিকে না তাকাইয়া দেশোন্নতির জন্ত মাথা কুটিয়া মরিলেও, এবং শত শত হিন্দু বিশ্ববিদ্যালয়, ধর্মকেন্দ্র বা সভা সংস্থাপন করিলেও বর্তমানকালে এ দেশের যাহা যথার্থ অভাব, তাহা কোন প্রকারেই ঘুচিবে না। সেইজন্য যাহারা

যথার্থ দেশহিতৈষী ও দেশবাসীর মঙ্গলকামী, তাঁহাদিগের নিকট আমার বিনীত প্রার্থনা তাঁহারা যেন সংযমের দিক দিয়া শিক্ষা বিধানের ব্যবস্থা করেন।

প্রথম হইতে শিক্ষা পাইলেই শিশুদিগের সংযমভ্যাস সংস্কার-গত হইয়া দাঁড়াইবে। আমি দেখিতেছি সংযম শিক্ষার অভাবেই আমরা ভিখারীর মত অর্থের জন্ত আত্মবিক্রয় করিতেছি, মিথ্যার আশ্রয় গ্রহণ করিতেছি, এমন কি চৌর্য্যবৃত্তি অবলম্বন করিতেছি, এবং অকারণে অভ্যস্ত অভাবগুলিকে পূরণ করিবার জন্ত অর্থশ্রমের আশ্রয় গ্রহণ করিতেছি। ইহাতে এই জাতিকে কতটা যে দুর্বল করিয়া ফেলিতেছে, তাহা দূরদর্শী ব্যক্তিমাত্রেই অনায়াসে বুঝিতে পারেন।

যাহারা অভ্যাসের দ্বারা আপনাদের অভাবকে সঙ্কুচিত করিতে পারে না, বা প্রমত্ত ইন্দ্রিয়নিচয়ের হুঁকার বিষয়লালসাকে সংযত করিতে পারে না, তাহাদের ভাগ্যে আরও কত দুঃখ আছে তাহা কেবল বিধাতাই বলিতে পারেন। সংযমের বলেই ব্রাহ্মণ ব্রাহ্মণ, ক্ষত্রিয় ক্ষত্রিয় ছিলেন। আজ সংযমেরই অভাবে ভারতের সেই সব শ্রেষ্ঠ জাতির পরের দাসত্ববৃত্তিতে মনোযোগ দিয়াছেন। সেইজন্ত উচ্চ জাতিদের মধ্যে শূদ্রের লক্ষণসমূহ (মিথ্যাচার, কপটতা প্রভৃতি) প্রভূত পরিমাণে দৃষ্ট হইতেছে। “অর্থে প্রয়োজন নাই, তেঁতুলপাতার ঝোলেই বেশ চলে”—এ কথা এখনকার ব্রাহ্মণ পণ্ডিতেরা সাহস করিয়া বলিতে পারেন না। কারণ তাঁহারাও ভোগ ও আরামের দাসত্ব করিতে শিখিয়াছেন।

সংসারে কষ্ট ও অভাব বিমোচনের জন্ত এবং সুনীতি ও

সদাচার প্রবর্তিত করিবার জন্ত কতকগুলি বাহ্য ও আভ্যন্তরিক সংযম অভ্যাস করিবার চেষ্টা করা নিতান্তই প্রয়োজন হইয়া দাঁড়াইয়াছে।

এ বিষয়ে পূর্বাধ্যায়ে অনেক কথা বলিয়াছি। মনীষিগণ অভিজ্ঞতা দ্বারা বুঝিয়াছিলেন, যেমন সকল কস্মেই নিয়ম মানিয়া চলা আবশ্যিক, সেইরূপ উপাসনাতেও বরং উপাসনায় সংযম। কিছু বেশী নিয়ম মানিয়া চলা আবশ্যিক। নচেৎ প্রযত্নের শিথিলতা আসে। একবার শিথিলপ্রযত্ন হইলে আবার পূর্বাবস্থায় ফিরিয়া যাইতে হইলে বিশেষ বেগ পাইতে হয়। মন বড়ই দুর্নিগ্রহ, ইহাকে লইয়া যাহারা সদা-সর্বদা নাড়াচড়া করেন, ইহার বিক্ষেপ শক্তি যে কিরূপ প্রবল, তাহা তাঁহাদের অজ্ঞাত নহে। সুতরাং প্রথমশিক্ষার্থীর পক্ষে অসংযত-ভাবে উপাসনা করা কখনই নিরাপদ বলিতে পারা যায় না। ইহার আর এক বিপদ চালক লইয়া। আজকাল সকলেই গুরু, শিষ্য হইয়া শাসিত হইব এ ইচ্ছা সকলেরই কম। প্রায় সকল আধ্যাত্মিক উপদেষ্টাই এক একটি দোকান সাজাইয়া বসিয়া আছেন। সকলেই ক্রেতা-সংগ্রহের জন্ত ব্যাকুল। লোকেও যেখানে সেখানে যার তার কাছে উপদেশ লইতে ব্যগ্র, তাহারাও শস্তা ও সুবিধা খুঁজিয়া বেড়াইতেছে। এরূপ অবস্থায় যাহা হওয়া সম্ভব তাহাই হইতেছে। গুরুরা ধর্মশিক্ষা দিতে গিয়া অনেক সময়ে অর্থশ্রমের প্রত্যাশা দিতেছেন। সর্বত্র বিধি মানিয়া চলিবার চেষ্টা করাই পৌরুষের লক্ষণ। তাহা না করায় সকলে হীনবীর্ঘ্য হইয়া লোকচক্ষে হেয় হইয়া যাইতেছেন। কারণ শাস্ত্রাচার

লঙ্ঘন করিয়া যাহা করা যায় তাহা বিধিহীন কার্য, এবং তাহা পণ্ডশ্রম বলিয়া গণ্য।

অসংযতভাবে কথা কহিবার প্রবৃত্তি আমাদের বড়ই প্রবল।

সাধনপথে এমন বিঘ্নও আর কিছু নাই।

বাক্য ও চিন্তায় অধিক বাক্য বলিতে গিয়া অনেক সময়ে জ্ঞাতে বা অজ্ঞাতে আমরা মিথ্যা ব্যবহার করিয়া থাকি।

পুনঃ পুনঃ এইরূপ করিয়া ইহা একটি ছুরপনেনয় অভ্যাসে পরিণত হয়, এবং চিন্তকে অত্যধিক দুর্বল করিয়া ফেলে। চিন্তাতেও আমরা বড় অসংযত। আমাদের জানা উচিত অনবরত মনের খেয়াল মত মনকে চিন্তা করিতে দিলে উহাকে দুর্বল করিয়া ফেলা হয়। সুতরাং চিন্তার সংযম অভ্যাস করিতে না পারিলে, আমাদের দুর্গতির সীমা থাকিবে না। কুচিন্তায় মানুষকে যত জীর্ণ করে এমন আর কিছুতে নয়। কুচিন্তা যাহার প্রবল, কুকার্য করা তাহার পক্ষে স্বাভাবিক। সুতরাং যত অসম্ভব অনাবশ্যক আপত্তিজনক চিন্তা মনের মধ্যে ঘুরিতে দিবে, চিত্ত ততই বিক্ষিপ্ত হইবে। স্মরণ রাখা উচিত যে চিত্তসংযমই চিত্তশুদ্ধি। এই প্রসঙ্গে আর একটি কথা আমরা সহৃদয় পাঠক-বর্গকে স্মরণ করাইয়া দিতে চাই। কার্যটি শক্ত নয়, একটু মনোযোগ দিয়া করিলে তাঁহারা দেশের প্রভূত মঙ্গল সাধন করিতে পারিবেন। প্রত্যেক শিক্ষিত লোক যদি প্রতিদিন অর্ধ ঘণ্টা লোকশিক্ষার্থ ব্যয় করেন, তাহা হইলে অল্প কয়েক বৎসর মধ্যে সমগ্র দেশে নিরক্ষর লোক আর খুঁজিয়া পাওয়া যায় না। যতদিন প্রত্যেক নরনারীই বিভ্যালোচনায় বক্ষিত থাকিবেন,

ততদিন দেশের প্রকৃত দৈশ্য নষ্ট হইবে কিনা সন্দেহ। প্রত্যেক বিদ্বান যুবক যদি সঙ্কল্প করেন যে, তিনি অন্ততঃ একটি নিরক্ষর ব্যক্তিকেও লিখিতে পড়িতে সাহায্য করিবেন তাহা হইলে দেশের প্রভূত মঙ্গল সাধন হইবে। ইহাতে অর্থব্যয় নাই অথচ অতি সহজে লোকশিক্ষার প্রচার হইতে পারে।

বিষয়ভোগ ও ইন্দ্রিয়-চরিতার্থতা এ উভয়েতেই আজকাল আমরা খুব অসংযত। সুতরাং আমরা যে, সকল দিক দিয়া অকর্মণ্য ও দুর্বল হইয়া পড়িতেছি এ বিষয়ে ইন্দ্রিয় ও বিষয়-ভোগ অসংযম। বিস্মিত হইবার কারণ নাই। প্রাচীন আর্ষ্য সভ্যতার গতি ভোগের দিকে নহে, ত্যাগ ও সংযমের দিকে। ইন্দ্রিয়ের দাস হইয়াই আজ আমরা ভোগের জগ্ন কুকুরের মত দ্বারে দ্বারে ছুটিয়া বেড়াইতেছি। ইন্দ্রিয়ের সংযমেই পুরুষার্থ প্রকাশিত হয়, ইন্দ্রিয়ভোগে লোকে কাপুরুষ হইয়া যায়। বিষয় ও ইন্দ্রিয় ভোগ করিতে করিতে এমন তীব্র ও ঘৃণ্য অভ্যাস হইয়া দাঁড়ায় যে, যখন স্বভাবতঃই সেই সকল হইতে মনের বিরাম লওয়ার সময় উপস্থিত হয়, তখনও আমরা নিলজ্জের মত তাহাকে ছাড়িয়া থাকিতে পারি না।

সামাজিক ব্যবহারেও আজকাল আমাদের আর কিছুমাত্র সংযম নাই। সকলেই অত্যন্ত অমিতব্যয়ী। বিবাহ, উপনয়ন, অনুপ্রাশন, শ্রাদ্ধাদিতে আমরা অত্যধিক ব্যয় লোকব্যবহার, করিয়া থাকি। অবশ্য কয়েকটাতে বাধ্য হইয়া আহার ও বেশ-আমাদিগকে ব্যয় করিতে হয়, কিন্তু যেখানে ভূষায় সংযম। সংযত হইলেও চলে, সেখানেও আমরা অসংযম

প্রকাশ করিয়া থাকি। ইহাতে দুর্দশার একশেষ হয়। মধ্য-বিন্ত গৃহস্থেরা ধনীদিগকে অনুকরণ করিতে গিয়াই এই দুর্দশাকে ডাকিয়া আনেন।

সকল বিষয়ে সাধ্যমত ব্যয় করিলে অপমান কি? অনেক সময়ে বাধ্য হইয়া ব্যয় করিতে হয় বটে, কিন্তু যাহাতে দুঃখ ও কষ্ট হয়, সেরূপ কার্যকে প্রশ্রয় দিলে দুর্দশাই প্রকাশ পায়। আমাদের এমনই দুর্দশা হইয়াছে যে, এই সকল বিষয়ে আমরা অপমান বোধ করি, অথচ অপর একটি প্রতিবেশী—হয়তো নিকট আত্মীয়—অভাবে কষ্টে জর্জরিত, তাঁহাকে সাহায্য করিবার সময়, আমরা লজ্জাজনক কার্পণ্যের আশ্রয় লইতে অণুমাত্র কুণ্ঠিত হই না। এ কি দুর্দশা! এ কি কুশিক্ষা!

ভারপর আহারের অসংযমের কথা। ভাবিয়া দেখিলে দেখা যায় যে ইউরোপীয় ও মুসলমানদিগের অনুকরণ করিতে গিয়া আমরা আহার সম্বন্ধে এত অযথা ও অস্বাভাবিক অসংযম প্রকাশ করি যে, তাহাতে আমাদের লজ্জা অনুভব করা উচিত। শুধুই কি তাই, ইহাতে ব্যয় এত অধিক হয় যে দরিদ্র ও মধ্যবিন্ত গৃহস্থেরা আয়ে কুলাইয়া উঠিতে পারেন না। অথচ একদিকে এইরূপ ভোগবাহুল্য, অন্যদিকে মুষ্টিমেয় অল্পের জন্ত কতলোক হাহাকার করিয়া বেড়াইতেছে। কৰ্ম্মভীরু অলস লোকদিগের কথা ছাড়িয়া দিলেও এমন অনেক লোক আমাদের দেশে রহিয়াছে যাহারা যথার্থই অসমর্থ ও দয়ার পাত্র। অর্দ্ধাশন ও অনশনে ইহাদিগকে অর্ধেক দিন কাটাইতে হয়। আমাদের বিলাসকে খর্ব্ব না করিয়া ইহাদের প্রতি উদাসীন ভাব অবলম্বন করা কি প্রকৃতই অধর্ম্ম

নহে? পেট ভরিয়া ভাত ডাল খাইয়া হজম করিতে পারিলেই বেশ বলবান হওয়া যায়, ইহার জন্ত গুরুপাক দ্রব্য না হইলেও ক্ষতি নাই। কিছুকাল আগেও আমাদের দেশে এই ভাত ডাল খাইয়াই লোকে অনেক বীরত্বের কার্য করিয়া গিয়াছে; আর অধুনা অল্পের ব্যঞ্জন উপকরণে, মৎস্য-মাংসের কালিয়া-কোণ্ডায়, মিষ্টান্নের প্রাচুর্য্যে যতই আমাদের ভোজনপাত্র ঘনাচ্ছাদিত হইয়া পড়িতেছে, ততই আমাদের প্লীহা-যকৃত স্ফীত ও উদরাময় বর্দ্ধিত আকারে প্রকাশ পাইতেছে। সন্তুগুণ-প্রধান, ব্রাহ্মণ-প্রধান ভারতবর্ষে এ সব অনাচার অত্যাচার সহিবে কেন? এ সব দানবীয় আহার কি এ দেশে সহ্য হয়, না এরূপ ভোজনে কোন মঙ্গল হয়? বিষয়ভোগে বৈরাগ্যই এ দেশের আদর্শ। ভোগে কেবল 'কৰ্ম্মভোগ'ই ভোগ করিতে হয়, আর কোন লাভ হয় না। ৫৬টি তরকারী না হইলে আমাদের খাওয়া হয় না, জিহ্বার প্রতি এই অসংযত অনুরাগ দেখাইতে গিয়া আমরা শরীরের প্রতি কত যে অত্যাচার করি, এবং অনর্থক ব্যয় বাহুল্যে সমস্ত সংসারটাকে কত যে অভাবের পেষণে নিষ্পিষ্ট করি, তাহা বলিয়া শেষ করা যায় না। আহার পবিত্র ও পুষ্টিকর হওয়া উচিত। সে দিকে কিন্তু আমাদের দৃষ্টি নাই, তাই দেশের প্রধান খাণ্ড যুত দুঃখ আর অবিমিশ্র পাইবার উপায় নাই। ইহাতে স্বাস্থ্য নষ্ট হইতেছে, মন জড় হইয়া যাইতেছে, বুদ্ধির মলিনতা ঘটিতেছে, দেশের লোকের আয়ুঃক্ষয় ও ধনক্ষয় হইতেছে; কিন্তু সেদিকে কাহারও দৃষ্টি নাই, অথচ দেশের প্রতি মমতার কথা তো সকলের মুখেই শুনিতে পাই!

প্রত্যেক সদৃ গৃহস্থকেই এইটি স্মরণ রাখিয়া আহারের ব্যয় সংক্ষেপ করিতে হইবে যে, অন্ততঃ একটি অভুক্ত নিরন্ন ব্যক্তিকে তিনি আহার করাইবেন। এইরূপে প্রত্যেক গৃহস্থ যদি একজনের এক বেলার আহারই সংস্থান করিয়া দেন, তাহা হইলেও দেশের অনেক উপকার করা যাইতে পারে।

ভূষণ-পরিচ্ছদেও আমরা ঠিক এইরূপ অসংযত, বয়ং কিছু বেশী। পুরুষদের সাজ-সরঞ্জাম এবং স্ত্রীলোকদের বসন-ভূষণের জন্ত এত ব্যয়বাহুল্য হইয়া পড়িয়াছে যে, লোকে আর সংপ্রযুক্তি লইয়া টিকিতে পারে না। অথচ এসব ব্যয়মাত্র। বসন-ভূষণে লোকের শোভা যথার্থ বাড়ে কিনা এ বিষয়ে আমার মন্দেহ আছে। না হয় স্বীকার করিলাম, বসন-ভূষণে শোভা বৃদ্ধি করে, কিন্তু সে শোভায় কাজ কি বাপু, যদি শরীরের শোভা বৃদ্ধি করিতে গিয়া মনোবৃত্তিকে আরও ঢের অশোভন করিয়া তুলিতে হয়? ইহাতে লাভ না ক্ষতি হইল একটু ধীর ভাবে বিবেচনা করিয়া দেখিলেই হয়।

জগতে দুঃখ-ক্লেশের সীমা নাই, কত দুঃখী কত আতুর অসহায় অবস্থায় পড়িয়া আছে, তাহার সংখ্যা নাই। পৃথিবীর এই দুঃখ ক্লেশের ভারকে যদি একটুও লঘু করিতে পারি, একটি অনাথ পীড়িত এবং পতিতকেও আশ্রয় দিতে পারি, বা স্বল্প পরিমাণেও তাহাদের দুঃখমোচন করিতে পারি, তবেই এ জীবনধারণ সার্থক। যিনি সর্বভূতস্থ তাঁহাকে এইরূপে সেবা না করিলে অস্ত্র কিছুতেই তাঁহার পরিতোষ সাধন করা যাইতে পারে না। প্রত্যেক জীবে ভগবান আছেন জানিয়া জীবমাত্রের প্রতি করুণাপরবশ

হওয়াই যথার্থ মনুষ্যত্ব, এবং এইরূপ পুরুষার্থ সাধনই প্রকৃতপক্ষে আধ্যাত্মিক উন্নতির পরিচায়ক। ইহাই যথার্থ ভগবানের নিকট আত্মনিবেদন। এই হিতানুষ্ঠানে চেষ্টা করিলে সকলেই কিছু না কিছু করিতে পারেন। যেখানে যে কেহ থাকুন না কেন, তিনি সেখানেই কোন না কোন লোকহিতকর কৰ্ম ইচ্ছা করিলেই করিতে পারেন। অশিক্ষিতকে শিক্ষাদান, ক্ষুধাতুর দরিদ্রকে অন্নদান, অসহায়কে সাহায্য দান, ভীতকে অভয়দান, দুঃচারিত্রকে উপদেশ দান, অধ্যাত্মিককে ধর্মপথে আনয়ন ইত্যাদি লোকহিতকর কার্যের এই ছরবস্থাগ্রস্ত দেশে তো অভাব নাই। নিজের সাধ্য ও সুবিধা মত যে কোন একটি কার্য প্রথমে অবলম্বন করিয়া পুরুষার্থ প্রয়োগ করিতে পারেন।

সমস্ত অধ্যায়ের সংক্ষিপ্তসার

যাহা ইহলোকে ও পরলোকে শুভদায়ক এরূপ কতকগুলি নীতিগর্ভ উপদেশ নিম্নে লিপিবদ্ধ করিলাম।

১। কৰ্মই উন্নতির সোপান, কৰ্মই মুক্তির নিদান। কৰ্ম না করিলে কখনই কৰ্মবন্ধন হইতে মুক্তিলাভ করা যায় না। “কুরু কৰ্মৈব তস্মাৎ স্বং”। কৰ্ম বলিতে অবশ্য শুভকৰ্মকেই বুঝিতে হইবে।

২। জগতে পরীক্ষা অনেক, কখনও উত্তীর্ণ হইবে কখনও হইবে না। তজ্জন্ত নিরাশ হইও না। পড়িয়া গিয়াছ উখিত হও, আবার পড়িলে আবার উঠিয়া দাঁড়াও। যে উঠিতে চাহে তাহাকে মধ্যে মধ্যে পড়িতেও হয়। যে কখনও চলিবে না, তাহার পতনের আশঙ্কা কম বটে, কিন্তু জানিও যে এক পা-ও অগ্রসর হইতে পারে, সে-ও সেই নিশ্চেষ্ট অলস অপেক্ষা শ্রেষ্ঠ।

৩। আমরা প্রায় সকলেই জন্মিয়া শুকদেব হই নাই। সুতরাং প্রলোভনবহুল সংসারের মধ্যে আনাদের পদস্থলন বিন্দুমাত্র অপ্ৰাকৃত বা অস্বাভাবিক নহে, সুতরাং পড়িয়া গিয়াছ বলিয়া লজ্জায় ভয়ে তাহা গোপন করিতে চেষ্টা করিও না। যাহাকে বিশ্বাস করিতে পার এমন কোন অন্তরঙ্গ বন্ধুর কাছে আত্মদোষ প্রকাশ করিও। ইহাতে অন্তঃকরণের ভার লঘু হইয়া আসে।

৪। নিৰ্জ্জনে আত্মাধ্যান করিবে। সৰ্ব্বদা আত্মপরীক্ষায়

তৎপর থাকিবে। মনের প্রতি লক্ষ্য রাখিলেই মন অসৎপথ হইতে বিরত হইবে।

৫। সহজে মনকে বিশ্বাস করিও না, ইহার চাঞ্চল্য ও বিক্ষিপ্ত যতদিন বিদূরিত না হয়, ততদিন কখনও মনে করিও না ইহা শাস্ত হইয়াছে।

৬। যদি নিরোগী ও বলশালী হইতে চাও তবে জিতেদ্রিয় ও মিতাচারী হইতে শিক্ষা কর।

৭। বৃথা তর্ক করিও না, বিশেষ না জানিয়া কোন কথা বলিও না।

৮। দুষ্ক্রিয়া পরিত্যক্ত হইলে ভগবৎপদে রতি জন্মে।

৯। ভগবানকে চাহিলেই পাওয়া যায়। যেমন অত্যন্ত ক্ষুধাতুর অন্নকে আকাঙ্ক্ষা করে বা অত্যন্ত পিপাসাতুর ব্যক্তি জলকে আকাঙ্ক্ষা করে, ভগবানকে যে চাহিবে তাহার আকাঙ্ক্ষার মধ্যেও সেইরূপ তীব্রতা থাকা প্রয়োজন।

১০। ভগবানে বিশ্বাস নাই বলিয়াই লোকে মৃত্যুকে ভয় করে। যাহার ভগবানে বিশ্বাস আছে, তাহার মৃত্যুভয় নাই।

১১। পরার্থে জীবন উৎসর্গ কর না কর জীবন যাইবেই, ইহাকে কেহ আটকাইয়া রাখিতে পারিবে না। সেই জীবনই ধন্থ যাহা পরহিতার্থে পরিত্যক্ত হয়। এইরূপ ত্যাগই পুরুষার্থ।

১২। সাংসারিক সুখ, ভোগ বা আরাম চাহিও না। কখনও তে পাইবেই না, কেবল পদেপদে বঞ্চিত হইয়া মনঃক্লেশ পাইবে।

১৩। সৰ্ব্বদা বিচারপরায়ণ হইবে। সুখই আসুক আর

দুঃখই আসুক তাহা যে চিরস্থায়ী নহে, এটা বেশ স্থিরভাবে ভাবিয়া দেখিও। সুখ বা দুঃখ কাহাকেও অবিচারপূর্বক গ্রহণ করিবে না। কিছুতেই মোহিত হইও না।

১৪। শরীরনাশ প্রকৃতপক্ষে মৃত্যু নহে, পাপ বাসনাই ঐখ্যার্থ মৃত্যু। এই পাপ বাসনাতেই মানুষ প্রতিনিয়ত জর্জরিত হইয়া নিরন্তর দুঃখ ভোগ করিতেছে। মৃত্যু ইহা অপেক্ষা আদৌ কষ্টকর নহে।

১৫। ঐহ্যাকে বলা হইয়াছে “আদিত্যবর্ণং তমসঃ পরন্তাৎ” তাঁহাকে ইহ জীবনেই জানিয়া যাইতে হইবে। বাসনার পর-পারের নামই “তমঃ পার” ইহা মহর্ষি বশিষ্ঠের উক্তি। সর্বপ্রথমে বাসনার বন্ধন হইতে আপনাকে মুক্ত কর, তখন দেখিবে একটি ‘দিব্যধাম’ তোমার নিকট প্রকাশিত হইয়াছে, যেখানে চন্দ্রসুখের আলোক নাই, কোন অন্ধকারও নাই; অথচ সর্বত্রই নিখিল শুভ্রজ্যোতি বিচ্ছুরিত হইতেছে—যেখানে প্রবেশ করিলে আর প্রতিনিবৃত্ত হইতে হয় না। ইহাই বৈকুণ্ঠপতির পরমধাম।

১৬। যে বাসনাকে সংযত করিতে পারে সে-ই অন্ধকারের পরপারে গমন করিতে সক্ষম হয়।

১৭। ভোগত্যাগ বা বিষয়ে বৈরাগ্য এসব জোর করিয়া হয় না। বিচার ও সাধনার সাহায্যে মন শান্ত হইলেই বিষয়ে আসক্তি আপনা আপনিই হ্রাস হইয়া যায়। সাধনসম্পন্ন ও বিচারবান না হইয়া যে মিথ্যা মোহের বশীভূত হইয়া সংসার হইতে পলাইয়া যায়, সে কোথাও আশ্রয়কে খুঁজিয়া পায় না। এই অসংস্কৃত মন লইয়া বনেই যাও বা ঘরেই থাক একই কথা,

সর্বত্রই দুঃখের মূর্তি দেখিয়া শিহরিয়া উঠিবে। মনকে শান্ত, সমাহিত কর, পরে যথা ইচ্ছা বিচরণ করিও। আগে মনকে ব্যাধি নির্মুক্ত কর, পরে ঘর বন সবই সুধামাখা মনে হইবে।

১৮। বাজে কাজে বা অনর্থক চিন্তায় সময় বেশী নষ্ট করিও না। কারণ মানবের পরমায়ু কতই বা? যাহারা অসৎকর্মে প্রবৃত্ত এবং অসদালোচনায় মত্ত, তাদৃশ মত্ত ব্যক্তির সঙ্গ সর্বদা ত্যাগ করিতে যত্নবান হইবে। পরের কার্য সমালোচনা করিবার আগে নিজের কার্যের সমালোচনা করিও। যেখানে ভাল কথা হয় ভাল চর্চা হয় সেইখানে যাতায়াত করিবে। পরো-পকারী সাধুব্যক্তির সংস্রবে থাকিবার চেষ্টা করিবে। ঐহ্যার ঐশ্বরীয় বিষয় আলোচনা করিতে ভালবাসেন তাঁহাদের সঙ্গ করিও, অনেক বল সংগ্রহ করিতে পারিবে। নিন্দুক, নাস্তিক, ঐশ্বরদ্বৈবীর সঙ্গ কখনও করিবে না।

১৯। উপাসনার দ্বারা মন নিগৃহীত হইলে ভগবৎপ্রেম প্রতিষ্ঠিত হয়। অতএব সর্বপ্রথমে উপাসনার আশ্রয় লইয়া এই দুর্নিবার শত্রু মনকে জয় করিতে চেষ্টা করিবে।

২০। দিনের মধ্যে অন্ততঃ কয়েক দণ্ডও নির্জনে ধ্যান করিবে। যদি সুবিধা হয় মাসান্তে অন্ততঃ একটি দিনও নির্জনে গিয়া একান্ত চিন্তে সাধনা করিবে। বৎসরান্তে একমাস হটুক, এক পক্ষ হটুক, এক সপ্তাহ হটুক কোনও তীর্থস্থানে বা পুণ্যস্থানে গিয়া বাস করিবে। তথায় ওই কয়েকটা দিন কেবল সাধুসঙ্গে সদালোচনায় ও ভগদুপাসনায় কাটাইবার চেষ্টা করিবে।

২১। শাস্ত্রবিধিকে অমান্য করিও না, শাস্ত্রাচারকে ঘেঁষ করিও না। ঋষিবাক্য ভ্রান্ত মনে করিও না, ধর্মশাস্ত্র সম্বন্ধে যুক্তি খুঁজিতে চাহিও না, গুরু বাক্যে অশ্রদ্ধা করিও না। এই সকলকে সদাচার বলে—ইহা দ্বারাই পরমপদ লাভ হয়।

২২। ব্যাধিসঙ্কুল দেহ, অসংস্কৃত মন ও অমার্জিত বুদ্ধি লইয়া ঋষিদিগের সমাধিলব্ধ জ্ঞানকে ঠিক বুদ্ধিতে পারা যায় না। যদি তাঁহাদিগকে বুদ্ধিতে চাও, তবে ব্রহ্মচর্যে প্রতিষ্ঠিত হও, সংযম অভ্যাস কর, ও উপশ্চর্যায় নিযুক্ত হও। উপাসনা ও সংযম ব্যতীত, তুমি যত বড়ই পণ্ডিত হও না, তাঁহাদের একটি কথাও বুদ্ধিতে পারিবে আশা করিও না।

একাদশ অধ্যায়

মনুষ্য জীবনে অভ্যাসের প্রভাব এবং তাহার দৃষ্টান্ত

উপদেশ ও উপসংহার

অভ্যাসের দ্বারা ক্রমশঃই চরিত্রের দৃঢ়তা সম্পাদিত হয় এবং চিন্তে বল সঞ্চার হয়। অভ্যাস অনেক সময় ঠিক গ্রন্থির মত কার্য করে, তাহা ভেদ করা কঠিন। সদভ্যাসে ঐরূপ চরিত্রের মধ্যে যে গ্রন্থি প্রস্তুত হয়, তাহাকে ভেদ করিয়া প্রবৃত্তির উত্তেজনা বল প্রকাশ করিতে পারে না। কোন একটি সংকার্য বা সংচিন্তা অভ্যাস করিতে করিতে পূর্বকৃত অসংকার্য বা অসচিন্তার শক্তি হ্রাস হইয়া আসিবেই আসিবে। এই অভ্যাস অনেক দুঃচরিত্র লোকের জীবনে যুগান্তর উপস্থিত করিয়াছে। ইহারই বলে রত্নাকর বায়ীকি হইয়াছিলেন; নরপিশাচ জগাই মাধাই ভক্ত-শ্রেষ্ঠে পরিণত হইয়াছিলেন। সাধুর কৃপায় এবং তাহার সংস্পর্শে পরিবর্তন সংঘটিত হয় সত্য, কিন্তু সেই অবস্থাকে ধারণ করিবার জন্য অভ্যাসযোগ আবশ্যিক। নিজের পুরুষকার ব্যতীত কেবল মাত্র অপরের কৃপায় কিছুই হয় না। ইংরাজিতে একটি প্রবাদ বাক্য আছে 'Habit is the second nature.' অভ্যাসের দ্বারা এই চিন্তকে তোমার যেরূপ ইচ্ছা ঠিক সেইরূপে পরিণত করিতে পার। মহাসাধু হওয়া বা অন্ত্যস্ত কুৎসিত চরিত্রের লোক হওয়া সবই তোমার আয়ত্তের মধ্যে, সবই তোমার অভ্যাস-সাপেক্ষ। অভ্যাসের বলে এই চঞ্চল চিন্তকে নির্বীত প্রদীপ

শিখার মত অঞ্চল করিয়া সমাধিমগ্ন করিতে পার, আবার সংসারসাগরে আকর্ষণ নিমজ্জিত করিয়া হাবু-ডুবু খাওয়াইতেও পার। ভগবান্ গীতায় স্পষ্টই বলিয়াছেন :—

“অভ্যাসযোগযুক্তেন চেতসা নান্শগামিনা।

পরমং পুরুষং দিব্যাং যাতি পার্থানুচিন্তয়ন্ ॥”

‘হে পার্থ, অভ্যাসরূপ উপায় দ্বারা চিন্তকে অনশ্চগামী করিয়া এবং সেই চিত্ত দ্বারা দিব্য পরমপুরুষকে চিন্তা করিতে করিতে তাঁহাকেই প্রাপ্ত হওয়া যায়।’

এই স্মরণের অভ্যাস যিনি মৃত্যুকাল পর্য্যন্ত দৃঢ় রাখিতে পারেন, তাঁহারই পরমগতি লাভ হয়। মৃত্যুর সময় যেরূপ চিন্তার উদয় হইবে, তদনুযায়ী গতি হইবে বটে, কিন্তু মৃত্যুকালে সেই চিন্তাই অবশভাবে উদ্ভিত হয়—যাহা আমার চিরকালকার অভ্যাস। ফাঁকি

দিয়া কেহ যে মৃত্যুর সময়টিতে মাত্র ভগবৎ স্মরণ করিয়া উদ্ধার পাইবেন, সে ভরসা যেন কেহ না করেন। যেটি সকলের অপেক্ষা অধিক অভ্যাস, সেই চিন্তাই মৃত্যুকালে চিন্তের মধ্যে পুনঃপুনঃ উপস্থিত হয়, এবং জন্মান্তর পরিগ্রহও ঠিক তদনুযায়ী হয়। সেই জন্মই ভগবান্ বলিয়াছেন “তস্মাৎ সর্বেষু কালেষু মামনুস্মর যুধ্য চ”—‘অতএব আমাদের সর্বদা স্মরণ কর’—কিন্তু ‘যুধ্য চ’ কেন? না চেষ্টা কর—প্রবৃত্তি ও পূর্ব অভ্যাস তো খুব বাধা দিবার চেষ্টা করিবেই, অতএব তাহার সহিত যুদ্ধের আয়োজন কর, যেন প্রবৃত্তির উদ্দাম স্রোতে তুমি ভাসিয়া না যাও।

যাঁহারা প্রথম অভ্যাস আরম্ভ করিয়াছেন, অভ্যাসের বলে যতদিন চরিত্র বেশ দৃঢ়, বলিষ্ঠ ও একনিষ্ঠ না হয়, ততদিন অভ্যাসের বেগ কিছুতেই হ্রাস করিবেন না। স্বল্পমপ্যস্ত ধর্মশ্চ অনেক সময় এই সংযম বা সাধন অভ্যাস দ্রায়তে মহত্তো ভয়াৎ।

করিতে করিতে আর তাহা মিষ্ট বোধ হইবে না, প্রাণ তিক্ত বোধ হইবে,—তথাপি অভ্যাস ছাড়িবেন না। পূজাপাদ শ্রীযুক্ত বিজয়কৃষ্ণ গোস্বামী মহাশয় তাঁহার জনৈক শিষ্যকে বলিয়াছিলেন, “দেখ, প্রতিদিন নিয়মিত রূপে অল্প সময়ের জন্ম সাধন করা কর্তব্য। ভাল না লাগিলেও ঔষধ গেলার মত করিলে, ক্রমে রুচি জন্মিবে। নামে অক্লিষ্ট হইলে তাহার ঔষধ নামই। যখন পিত্তরোগে মুখ তিক্ত হয়, তখন মিছরিও তিক্ত লাগে। কিন্তু ঐ রোগের ঔষধ মিছরি। খাইতে খাইতে মিছরি মিষ্ট লাগিতে থাকে। মন স্থির কি সহজে হয়? মন স্থির হইলেই সব হইয়া গেল। প্রথম প্রথম মন অত্যন্ত অস্থিরই থাকে—নাম করিতে পর্য্যন্ত বিরক্তি বোধ হয়, কিন্তু ঐ সময় ‘ঔষধ গেলার’ মত নাম করিতে হয়। ক্রমে জোর করিয়া করিতে করিতে যদি উহা একবার অভ্যাস হয়, তবে আর গোল নাই। অভ্যাস না হওয়া পর্য্যন্ত ছাড়িতে নাই, জোর করিয়া করিবে।”

পূজনীয় যোগিশ্রেষ্ঠ মহাত্মা শ্যামাচরণ লাহিড়ী মহাশয় বলিয়াছেন, “অনাবশ্যক কথা বলাই লোকদের অভ্যাস; তার চেয়ে যদি সেই সময়টা স্মরণে মন লাগাইয়া রাখে, মামনুস্মর যুধ্য চ। তবে অনেক লাভ হয়। মন চঞ্চল হয় কেন?”

না অনবরত বিষয় চিন্তায়। যদি চিন্তাকে সংযত করিয়া অনবরত স্মরণ অভ্যাস করিতে পার তবে চিত্ত অনশ্রুগামী ও স্থির হইবেই হইবে। অভ্যাস কর, তোমরাও দেবতার বাঙ্কিত অবস্থা লাভ করিবে।”

অভ্যাসের এমনি অচিন্তনীয় প্রভাব যে এক ব্যক্তি রোগে জীর্ণ, জ্ঞানহীন হইয়া পড়িয়া আছেন কিন্তু কোন নির্দিষ্ট সময়ে কোন নির্দিষ্ট কার্য্য করিতে তিনি আজন্ম অভ্যস্ত ; সেই কার্য্য করিবার সময় উপস্থিত হইলেই তিনি অজ্ঞানাবস্থাতেও অভ্যস্ত কার্য্যটি করিতে প্রবৃত্ত হইবেন। এই অভ্যাস সম্বন্ধে একদিন বোলপুর ব্রহ্মচর্যাশ্রমে শ্রদ্ধাস্পদ শ্রীযুক্ত রবীন্দ্রনাথ ঠাকুর মহাশয়ের সহিত আমার আলাপ হয়। পূর্বে তাঁহার কোন একটি সাধন বা জপাদি অভ্যাসের প্রতি বিশেষ শ্রদ্ধা ছিল না। “ক্রমে মত পরিবর্তন হইয়াছে” এই বলিয়া রবীন্দ্রবাবু একটি গল্প করেন, যতদূর স্মরণ আছে লিখিলাম। তিনি বলিলেন যে, তাঁহার পিতৃদেব পূজনীয় ৩মহর্ষি দেবেন্দ্রনাথ ঠাকুর মহাশয় তাঁহাকে গায়ত্রী মন্ত্র জপ ও ধ্যান করিতে পুনঃপুনঃ আদেশ করিতেন। রবীন্দ্রবাবু ভাবিতেন “শুধু শুধু কতকগুলো কথা উচ্চারণ ও তাহার প্রত্যহ অভ্যাস করিয়া লাভ কি, বরং তাহার অর্থ উপলব্ধি করা সঙ্গত হইতে পারে”, সুতরাং এ বিষয়ে তিনি প্রথমতঃ বিশেষ মনোযোগ দেন নাই। তিনি বলেন এখন তিনি ইহার উপকারিতা বুঝিতে পারিয়াছেন। এই প্রসঙ্গে তিনি তাঁহার পিতৃদেবের অভ্যাসের কথা উল্লেখ করিয়া বলেন যে, তিনি তাঁহার সুদীর্ঘ জীবনের প্রায় সমস্ত ভাগেই শেষ রাত্রে

জাগরিত হইয়া গায়ত্রী জপ ও ধ্যান করিতেন। মৃত্যুর কিছুকাল আগেই তিনি মধ্যে মধ্যে পীড়াগ্রস্ত হইতে লাগিলেন। একবার তাঁর খুব অসুখ, কথাবার্তা বলা বন্ধ করিয়াছেন, নড়িতে চড়িতেও তাঁহার তখন কষ্ট হয়। তাঁহার শুক্রবার জন্ম নিকটেই তাঁহার রাতিকালে অপেক্ষা করিতেছেন। একদিন রাত্রির শেষভাগে তিনি কেমন আছেন দেখিবার জন্ম তাঁহার গেলেন। গিয়া দেখিলেন সেই দীর্ঘকায় উন্নত পুরুষ ধ্যানযোগে নিমগ্ন! বাহু শরীরে তত চেতনা নাই, কিন্তু তাঁহার চিত্ত ঠিক ঐ সময়ে জাগ্রত হইয়া ধ্যান ধারণা করিতে অভ্যস্ত ছিল বলিয়া পূর্বাভ্যাস বল-পূর্বক অবশ অচেতন শরীরকে সাধনে বসাইতে সমর্থ হইয়াছিল। জীর্ণ, অসুস্থ, বলহীন শরীর তাঁহার চিরকালের অভ্যস্ত সাধনে বাধা জন্মাইতে পারে নাই। অভ্যাসের এমনি শক্তি।

পরমহংস শ্রীরামকৃষ্ণ এত সাধন-অভ্যাসে অনুরক্ত ছিলেন যে, তিনি জীবনের অনেক রাত্রি একাকী নির্জনে সাধনাভ্যাসে কাটাইয়া দিতেন। শুনিয়াছি বিভিন্ন বিভিন্ন অভ্যাসের কলে সাধন পন্থার অনেকগুলিই তিনি অভ্যাস সাধনায় সিদ্ধি করিয়াছিলেন। যাহাই হউক তিনি সাধনাভ্যাসে যে দৃঢ় প্রযত্ন করিয়াছিলেন তাহা নিশ্চিত। তাহারই ফলে আজ তিনি সমগ্র জগতের পূজা লাভ করিয়াছেন।

৩পরিব্রাজক শ্রীশ্রীকৃষ্ণানন্দ স্বামী—পূর্বাশ্রমে রেলওয়ে অফিসে সামান্য একজন কেরানীর কার্য্যে নিযুক্ত ছিলেন। কলেজের পাঠ শেষ করিয়া অধিক বিদ্যা উপার্জন করিবার সুবিধা তাঁহার ঘটে নাই সত্য, কিন্তু আপনার চেষ্টা, প্রযত্ন ও অভ্যাসের

ফলে তিনি সর্ব্বশাস্ত্রে পারদর্শী হইয়া উঠিয়াছিলেন। দেশবাসী-দিগের স্বধর্মে অনাস্থা ও অবিশ্বাস দেখিয়া অভ্যাসে দৈবশক্তি তাঁহার হৃদয় কাঁদিয়া উঠিত। দেশের লোকের নাভ। যাহাতে স্বদেশ ও স্বধর্মের প্রতি অনুরাগ বৃদ্ধি পায়, এইজন্ম ব্রাহ্মধর্মের প্রবল বিরুদ্ধ প্রতিযোগিতার মধ্যেও তিনি বাঙ্গালা ও অন্যান্য প্রদেশের অনেক নগরে ও গ্রামে হরিসভা ও সুনীতি-সঞ্চারিণীসভা প্রতিষ্ঠা করিতে সমর্থ হইয়াছিলেন। শুধু তাহাই নহে, দেশের চিন্তাস্রোত ও যুবকদিগের উন্ন্যাসগামিতার স্রোতকে বিভিন্নমুখে ফিরাইয়া দিতে সমর্থ হইয়াছিলেন। এ তাঁহার অসামান্য প্রতিভার ফল। তিনি প্রথম প্রথম ধর্ম সন্থকে কিছু কিছু বলিতে ও বুঝাইতে চেষ্টা করিতেন, এজন্য তাঁহাকে লেখা এবং বলা ছুই-ই অভ্যাস করিতে হইয়াছিল। আফিসে হাড়ভাঙ্গা পরিশ্রম করিয়া আসার পর আবার ছুরুহ শাস্ত্রাদি আলোচনা, বক্তৃতা করা, প্রবন্ধ লেখা, এ যে কতটা অভ্যাস ও পৌরুষের ফল তাহা সহজে অনুমেয়। অবিশ্রান্ত চেষ্টার ফলে বক্তৃতা করা তাঁহার এক্ষণে অভ্যাস হইয়া গেল যে লোকে তাঁহার বাগ্মিতাকে এখনও দৈবশক্তির প্রভাব বলিয়া মনে করে। তাঁহার অবিশ্রান্ত অমৃতবর্ষিণী ভাবময়ী উদ্দীপনাপূর্ণ ভাষা যে স্বকর্ণে না শুনিয়াছে, তাহাকে বুঝানো কঠিন যে তিনি ভাষায় কি অসাধারণ শক্তি লাভ করিয়াছিলেন। বেহার প্রদেশেই তাঁহাকে এই কার্য প্রথম আরম্ভ করিতে হইয়াছিল, সুতরাং হিন্দী ভাষাতে লিখিবার ও বলিবার অভ্যাসকেও বিশেষভাবে আয়ত্ত করিতে হইয়াছিল। বাঙ্গালা দেশের ও বাঙ্গালীর দুর্ভাগ্য

যে তাঁহার ভাবমদিরাপূর্ণ অপূর্ব্ব ভক্তিরসযুক্ত বাঙ্গালা ও হিন্দ ব্যাখ্যানগুলি তাঁহার অকালমৃত্যুতে তাঁহার সহিতই বিলয় প্রাপ্ত হইয়াছে। যাহা আছে তাহা বৎসামান্য অংশ মাত্র, তাহা পাঠ করিয়াও লোকে বিশুদ্ধ প্রেমভক্তি বসে আশ্রিত হয়। তাঁহার প্রেমবিগলিত ভক্তি-অশ্রু স্মরণ করিলে আজও জীবন অপূর্ব্ব ভক্তিরসে ভরিয়া উঠে। নিতান্ত দুর্ভাগ্যের কথা এই দেশের তমসচ্ছন্ন ধর্ম্মাকাশকে যিনি চন্দ্রের মত সূক্ষ্মল রশ্মি-জালে আলোকিত করিয়াছিলেন; যিনি দেশের কল্যাণার্থেই সমস্ত ভোগ সুখ ও বিলাস বাসনায় জলাঞ্জলি দিয়া ভারতবর্ষের একপ্রান্ত হইতে আর একপ্রান্ত পর্য্যন্ত আর্ষ্যধর্মের বিজয়-বৈজয়ন্তী উদ্ভাটন করিয়াছিলেন; যিনি দৈহিক রোগ-যন্ত্রণায় কাতর হইয়াও ধর্ম্মপিপাসু ভক্তিমান সজ্জন পুরুষদিগের অন্ত-রাত্নাকে ভক্তিপীযুষধারায় সুশীতল করিবার সকাতির আহ্বানকে কখনও উপেক্ষা করেন নাই—সেই সাধুপুরুষকে তাঁহারই কৃতপ্ন দেশবাসীরা অকারণে কি লাঞ্ছনাই না করিয়াছে—কিন্তু তিনি মহর্ষি যৌগুর মত ক্রুশবিন্দু হইয়াও স্বদেশবাসীর কল্যাণ কামনা করিতে কখনও বিমুখ হইয়া থাকেন নাই। রোগজীর্ণ শরীর লইয়াও তিনি ধর্ম্মপিপাসু স্বদেশবাসীর আহ্বানকে উপেক্ষা করিতে পারেন নাই। কাতর ও দুর্বল শরীরে এইরূপ অতিশয় পরিশ্রম করিয়া জীর্ণ শরীর আরও জীর্ণতর ও ভগ্ন হইয়া গেল। আজ প্রায় ৫০ বৎসর হইল তিনি দিব্যধামে চলিয়া গিয়াছেন, কিন্তু তাঁহার অভাবে ধর্ম্মজগতের কি ক্ষতি হইয়াছে, তাহা ভাবিলে আজও নয়ন অশ্রুপ্লুত হইয়া উঠে।

কাশীর দণ্ডীস্বামীদিগের আচার্য্য পণ্ডিতাগ্রগণ্য ৩৮শ্রী
 বিগ্ণানন্দ সরস্বতী অনেক বয়স পর্য্যন্ত কিছুই লেখা পড়া শিক্ষা
 করেন নাই। গায়ে অসাধারণ শক্তি ছিল, অত্যন্তে প্রতিভার
 বিকাশ। কেবল গোয়ার্জুনি করিয়াই বেড়াইতেন।
 যখন সন্ন্যাস গ্রহণ করেন তখনও প্রায় তিনি
 নিরক্ষর। তার পর বিদ্যাধ্যয়নে এমন অসাধারণ অভ্যাস ও
 উত্তম প্রয়োগ করিলেন যে অল্প সময়ের মধ্যেই সর্বশাস্ত্রে
 তাঁহার অসাধারণ পাণ্ডিত্য লাভ হইল। যিনি কিছুকাল আগে
 পড়িতে পর্য্যন্ত জানিতেন না, তিনিই ৩৪ বৎসরের মধ্যে ৫৬
 ঘণ্টা অনবরত সংস্কৃত ভাষায় শাস্ত্রীয় আলাপে বিবুধমণ্ডলীকে
 বিমুগ্ধ করিয়া দিতেন। শুনিয়াছি তাঁহার অসাধারণ তর্কশক্তির
 নিকট আর্ধ্যসমাজ প্রতিষ্ঠাতা স্ত্রীশ্ৰীমুক্তি শ্রদ্ধাস্পদ স্বামী
 দয়ানন্দ সরস্বতীকেও পরাভব মানিতে হইয়াছিল। প্রতিরাত্রে
 ৩৪ ক্রোশ দূরবর্তী স্থানে গিয়া আচার্য্যের নিকট শাস্ত্রাধ্যয়ন
 এবং তথা হইতে রাত্রিশেষে ফিরিয়া আসা—এইরূপ ৪৫ বৎসর
 কাল ধরিয়া—অসামান্য প্রযত্ন করিয়াছিলেন বলিয়া একদিন
 ভারতের সমগ্র পণ্ডিতবর্গ তাঁহার প্রতিভার নিকট মস্তক অবনত
 করিয়াছিলেন। ইহা কম পৌরুষের কথা নহে। বিগ্ণানন্দ
 স্বামীর অন্ততম শিষ্য ৩৮শ্রী গণ্ডীরানন্দ সরস্বতীর নিকট আমরা
 এই কথা শুনিয়াছিলাম। শ্রদ্ধাস্পদ গণ্ডীরানন্দজীও তাঁহার
 সহিষ্ণুতা ও ত্যাগ দেখিয়া তাঁহাকে পৌরুষের প্রতিমূর্ত্তি বলিয়া
 মনে করিতেন। দণ্ডী স্বামীদিগের মধ্যে তৎকালে তাঁহার শ্রায়
 সাহসী দৃঢ়কায় বলিষ্ঠ ও তেজস্বী পুরুষ খুবই বিরল দেখা যাইত।

অসাধারণ অধ্যবসায়ী পুরুষ মহাত্মা ৩বিজয়কৃষ্ণ গোস্বামী
 তাঁহার শিষ্যদিগকে ও জিজ্ঞাসু ভক্তদিগের নিকট কতবার এই
 অভ্যাসের শক্তির কথা প্রকাশ করিয়াছেন। তাঁহার নিজ
 জীবনেও এই অভ্যাস কি প্রভাব বিস্তার করিয়াছিল, বহুদিনের
 অভ্যাস পরিত্যাগ করিতে তাহাকে কত কষ্ট
 অভ্যাসের ফলে পাইতে হইয়াছে—তাহা তিনি কতবার নিজ
 মুখে স্বীকার করিয়াছেন। এই মহাত্মার অপূর্ব
 ভগবদ্ভক্তি ও সুদৃঢ় বিশ্বাস কত উন্মার্গগামী নাস্তিককে ধর্মপথে
 ফিরাইয়া আনিয়াছে তাহা মনে হইলে হৃদয় কৃতজ্ঞতায় পূর্ণ
 হইয়া উঠে।

কাশীর সুবিখ্যাত পরমহংস ৩ভাস্করানন্দ স্বামীকে একজন
 লোক জিজ্ঞাসা করেন “আপনি এই প্রচণ্ড শীতে কি প্রকারে
 অনাবৃত গাত্রে থাকিতে সমর্থ হইয়াছেন?
 অভ্যাসের ফলে আমরা এতগুলি শীতবস্ত্র গাত্রে জড়াইয়াও
 সহনশীলতা। হিহি করিয়া মরিতেছি।” উত্তরে তিনি বলেন
 “ইহা কিছুই আশ্চর্য্য নয়, তোমরাও পার এবং কোন কোন
 অংশে দেখিতেছি, তোমরাও বেশ সহ্য করিতেছ।” বিস্মিত হইয়া
 প্রশ্নকারী জিজ্ঞাসা করিলেন, “কই আমরা কোন্খানে সহ্য
 করিতেছি? আমরা তো মোটেই সহ্য করিতে পারি না?” স্বামীজী
 বলিলেন “দেখ শরীরের সব স্থান তো তোমরা গাত্রাবরণে
 ঢাকিয়া রাখ নাই, মুখ তো খোলা রহিয়াছে, হাতের আঙ্গুল-
 গুলি খোলা রহিয়াছে, উহারা তো শীতের প্রকোপ সহ্য করিতে
 অভ্যস্ত হইয়াছে। তোমরা না হয় না জানিয়া কোন একটা অঙ্গে

শীত সহাইবার অভ্যাস করিয়াছ, আমি চেষ্টা ও অভ্যাস দ্বারা সর্ব্বাঙ্গে শীত সহ্য করিতে অভ্যাস করিয়াছি। ইহাতে বিস্মিত হইবার কারণ নাই, সমস্তই অভ্যাসের ফল।”

কেহ কেহ তর্ক করেন আজকাল আর সাধনা করিয়া কেহ সিদ্ধিলাভ করিতে পারে না। যোগাভ্যাস প্রভৃতি কঠোর সাধনা আজকালকার দিনে আর হইবার নয়। পূর্বকালে মুনি-ঋষিদের এ সব সাধ্য ছিল, বর্তমান যুগের ক্ষীণপ্রাণ মানবের পক্ষে যোগাদি অভ্যাস বৃথা বিড়ম্বনা মাত্র। কিন্তু তাঁহারা বোধ হয়

অভ্যাসের কলে সিদ্ধিলাভ ও জ্ঞানলাভ। অবগত ন'ম যে এই ঘোর কলিকালেও কেহ কেহ অভ্যাস ও প্রযত্নের ফলে জ্ঞান ও যোগের চরমশিখরে অধিরোহণ করিয়াছেন। কাশীর সুপ্রসিদ্ধ রাজযোগী ৩৩শ্রীমাচরণ লাহিড়ী

মহাশয় গৃহস্থই ছিলেন। অধিক লেখাপড়াও যে শিখিয়াছিলেন তাহাও নহে। কিন্তু দেশবিখ্যাত বহুশ্রুত পণ্ডিতেরাও তাঁহার শাস্ত্রজ্ঞানের পরিচয় পাইয়া বিস্ময়াভিত্ত হইতেন। না পড়িয়াও তাঁহার সর্ব্বশাস্ত্রে অধিকার ছিল। দর্শনশাস্ত্রের জটিল তত্ত্বগুলি অতি সহজে লোকের হৃদয়ঙ্গম করাইয়া দিতে পারিতেন। শুধু তাহাই নহে, সমস্ত অনৈক্যের মধ্যে একটা অবিরোধী ঐক্যের তিনি সন্ধান পাইয়াছিলেন। সমগ্র শাস্ত্রের স্বরূপ ও আধ্যাত্মিক ভাবগুলির সুন্দর বিশ্লেষণ তাঁহার গভীর আধ্যাত্মিক জ্ঞানের পরিচয় প্রদান করিত। সুপ্রসিদ্ধ চিকিৎসকেরাও তাঁহার শরীর সম্বন্ধীয় ও ভেবজ সম্বন্ধীয় জ্ঞান দেখিয়া মুগ্ধ হইয়া যাইতেন। যে তাঁহাকে দেখিয়াছে সেই জানে যে বুদ্ধাবস্থাতেও তাঁহার

শরীর নেত্র মুখ কি সুন্দর প্রতিভামণ্ডিত ও জ্যোতিঃপূর্ণ ছিল। সংসারের বিবিধ বিচিত্র ঘটনার মধ্যেও তাঁহার প্রশান্ত আনন্দ-ভাব, চিন্তের স্থৈর্য্য, সুখ দুঃখে সমভাব, বাহিরের ঘাত প্রতি-ঘাতে ঔদাসীণ্য, পলুকহীন দৃষ্টি ও জ্ঞানের ঔজ্জ্বল্য কি বালক কি বৃদ্ধ, কি পণ্ডিত কি মূর্খ, কি সন্ন্যাসী কি গৃহী, যে কেহ তাঁহার নিকটে আসিত তাহাকেই মন্ত্রমুগ্ধ করিয়া রাখিত। সেই স্বল্পভাষী গভীর জ্ঞানী পুরুষ আপনাতেই আপনি মগ্ন থাকিতেন। নির-বচ্ছিন্ন ধ্যানসমাহিত চিত্ত সংসারের সুখ দুঃখ ভাব অভাবে কিছুতেই বিচলিত হইত না। রাজর্ষি জনকের মত সংসারে থাকিয়াই সংসারের অপর পারে উত্তীর্ণ হইয়াছিলেন। বাহিরে বা লোকসমাজে সে সময়ে তাঁহার তেমন কোন প্রতিষ্ঠা না থাকিলেও তিনি যে-ধনে ধনী ছিলেন তাহার কাছে পার্থিব শ্রেষ্ঠতম পদও নগণ্য মাত্র ছিল। পার্থিব সম্পত্তি বা সম্মান প্রতিষ্ঠা তাঁহার সেই উচ্চাসনকে স্পর্শ করিয়া কখনই কলঙ্কিত করিতে পারে নাই।

যোগাভ্যাসের বলে এমন অসাধারণ যোগৈশ্বর্য্য তিনি লাভ করিয়াছিলেন, যে তাহার নিকট রাজমুকুটও অতি তুচ্ছ বলিয়া বিবেচিত হইত। তাঁহার কৃপা লাভের আশায় কত পণ্ডিত জ্ঞানী, কত ব্রহ্মচারী দণ্ডী, কত গৃহী ত্যাগী, কত ধনী দরিদ্র, প্রতিদিন দলে দলে তাঁহার কাছে আসিয়া উপস্থিত হইত, কিন্তু সকলেই তাঁহার নিকট যথাযোগ্য সম্মান ও শ্রদ্ধা লাভ করিয়া চলিয়া যাইত, কেহ বলিতে পারে না যে তিনি কখন কাহাকেও অশ্রদ্ধা বা অবহেলা করিয়াছেন। তাঁহার সমস্ত শক্তি

সমস্ত প্রতিভা এমন একটি বিনয়ের দ্বারা আচ্ছাদিত থাকিত যে বিশেষ অনুসন্ধিৎসু ব্যক্তি ব্যতীত কেহই তাহা ধরিতে পারিত না। তাঁহার পরিজন ও অনুরাগীবর্গেরাও সকলে তাঁহার এই মহিমা সম্যক উপলব্ধি করিতে পারিয়াছিলেন কিনা জানি না। কারণ তাঁহার কোন বাহ্যিক আড়ম্বর, লোক-দেখানো চাল-চলন বা কোন কপট বেশভূষা ছিল না। কোন প্রকার বাহ্যিক আড়ম্বর বা মিথ্যাচার তিনি একেবারেই পছন্দ করিতেন না। অত্যন্ত প্রয়োজন বোধ না করিলে কাহারও কোন কার্যে কখন প্রতিবাদ করিতেন না। বেশী কথা কহিতেই পারিতেন না; কথা কহিবেন কি “মুনিঃ সংলীনমানসঃ”—যে রাজ্যে তাঁর মন বিচরণ করিত, সে রাজ্যের কথা বাক্য দ্বারাই বুঝাইবার নয়। সে অবস্থা নিজে অনুভবানন্দরূপ। লোকে যখন গুণামি করিত, মিথ্যা সাজ-গোজে লোককে ভুলাইবার চেষ্টা করিত, তখন তাঁহাদের বালকোচিত ভাব দেখিয়া কখনও কখনও একটু হাসিতেন এবং বলিতেন ইহারা এমন মূর্খ যে ভগবানকেও ঠকাইতে চায়। কেহ তাঁহার নিন্দা করিলেও কখনও প্রতিবাদ করিতেন না, কেহ সূখ্যাতি করিলেও অনুমোদন করিতেন না। যদি কখনও ক্ষোভ প্রকাশ করিতেন তাহা কেবল এইজন্য যে অবোধ লোকগুলি তাহাদের অমূল্য সময় বৃথা নষ্ট করিতেছে, সময়ের মূল্য কত এবং এই সময়ের মধ্যে প্রযত্ন করিলে মানুষ কত লাভবান হইতে পারে, তাহা না বুঝিয়া দুর্ভাগ্য নয়নারী বৃথাগলে পরচর্চায় অমূল্য সময় নষ্ট করে। তিনি বলিতেন, যে সময়টা হাতের মধ্যে আছে, তাহা যদি সত্বেবহার করা যায়, তবে ইহলোকেই লোকে মুক্তির আশ্বাদ

লাভ করিতে পারে। লোকের সেই দিকে চিন্তাকর্ষণ করিবার দৃশ্য কতবার কত লোকের কাছে করযোড়ে তিনি কাতরতা প্রকাশ করিয়াছেন। যেন এই সকল মোহমুগ্ধ লোকের দুর্দশা দেখিয়া, তাঁহার করুণপ্রাণ ব্যথিত হইয়া উঠিত। এমন নিরভিমান পুরুষ ছিলেন যে, একদা তাঁহার জনৈক শিষ্য তাঁহাকে একদিন বলিল “মহাশয় অমুক ব্যক্তি আপনার বড় নিন্দা করে, শুনিলে বড় কষ্ট হয়”—মহাপুরুষ তখন উত্তর করিলেন “আপনিও সেই কথায় সায় দিতে পারিতেন, এক কথায় সব ফুরাইয়া যাইত, বাক্য বৃথা বাড়াইয়া লাভ কি? কে কা'কে কি বলিতেছে, ও সব কথায় মন না দিয়া প্রাণপণ যত্নে সাধনা করিয়া চলুন, ইহাতেই জীবন কৃতার্থ হইবে।” তাঁহার শ্রায় শ্রেষ্ঠ সাধকগণ স্বভাবতঃই অভিমান, যশ বা লক্ষ্মী কিছুতেই আসক্ত হ'ন না, সর্বস্ব বিনষ্ট হইলেও ইহাদের কোন ক্ষোভ নাই, কারণ সাধন প্রভাবে মহাসাগরের তরঙ্গরাশির শ্রায় সংসার বাসনা তাঁহারা অতিক্রম করিবার উপযুক্ত শক্তি লাভ করিয়াছিলেন। আজ কতদিন হইল (১৮৯৫ খৃঃ শারদীয়া মহাপূজার মহাষ্টমীর দিন) তাঁহার দেবদেহের অবসান হইয়াছে, কিন্তু এখনও তাঁহার চিন্তের প্রশান্ত আনন্দময়ভাব শ্রুখে ছুখে একরূপ স্থির ও গভীর ভাব তাঁহার অনুরাগীবর্গের স্মৃতিকে আনন্দরসে অভিসিক্ত করিয়া রাখিয়াছে! এখনও তাঁহার স্মৃতিপূজা অনেক স্থানে নিত্য হইতেছে। পুরী, মন্দার, কাশী, হরিদ্বার, রাঁচি, বিষ্ণুপুর, দেওঘর প্রভৃতি স্থানে তাঁহার সমাধি ও স্মৃতিমন্দির প্রতিষ্ঠিত হইয়াছে।

পূর্ব পূর্ব যুগের ব্যাস বশিষ্ঠ, বায়্মিকি, কপিল, মনু প্রভৃতি শ্রেষ্ঠ মুনিঋষিগণ সকলেই পুরুষকারের পক্ষপাতী ছিলেন। অপেক্ষাকৃত আধুনিকদিগের মধ্যেও বৃহদেব ভারতবর্ষের জাতীয় শঙ্করাচার্য্য প্রভৃতি অসামান্য ধীসম্পন্ন লোক ও বর্তমান যুগের প্রতিষ্ঠা লোকোত্তর পুরুষগণ পুরুষকারকেই সর্বশ্রেষ্ঠ মনীষীরা গ্রহণ করিতে বলিয়াছেন। অত্যন্ত আধুনিক পুরুষকারের পক্ষপাতী। রাজা রামমোহন রায়, যিনি বর্তমান যুগের স্বস্তিবাচন করিয়াছেন, তাঁহার সমস্ত কার্য্যাদি পর্যালোচনা করিলে তাঁহাকে পুরুষকারের প্রতিমূর্ত্তি বলিয়া মনে হয়। মহর্ষি দেবেন্দ্রনাথ ঠাকুর, প্রাতঃস্মরণীয় বিদ্যাসাগর মহাশয়, ঋষিকল্প ভূদেবচন্দ্র মুখোপাধ্যায়, অমর বঙ্কিমচন্দ্র, বিবেকানন্দ, রবীন্দ্রনাথ প্রভৃতি শ্রেষ্ঠ মনীষীরাও এই পুরুষকার প্রভাবেই খ্যাতিলাভ করিয়া গিয়াছেন। আরও অনেক লোকের নাম করিতে পারা যায়, যথা কৃষ্ণদাস পাল, ডাক্তার মহেন্দ্রলাল সরকার প্রভৃতি—ইঁহারা সামান্য অবস্থা হইতে পুরুষকার প্রভাবেই সমাজে শীর্ষ স্থান অধিকার করিতে সমর্থ হইয়াছিলেন। ইঁহাদের মধ্যে সকলের কথা লিখিতে গেলে স্থান কুলাইবে না—এখানে পূজ্য-পাদ ভূদেবচন্দ্র সম্বন্ধেই দুই এক কথা বলিতে ইচ্ছা করি। ভূদেব বাবু আনুষ্ঠানিক ব্রাহ্মণ পণ্ডিতের ঘরের ছেলে। তাঁহার পিতামাতা উভয়েই নিষ্ঠাবান হিন্দু ছিলেন। এই দরিদ্র অথচ খাঁটি ব্রাহ্মণ পণ্ডিতের ছেলে যখন সম্যক ইংরাজি বিদ্যায় পারদর্শী হইয়া শিক্ষাবিভাগে উচ্চপদে প্রতিষ্ঠিত ছিলেন, তখনও ব্রাহ্মণের রীতিনীতির একান্ত পক্ষপাতী ছিলেন। আজকাল

প্রায়ই দেখি যিনি একটু মোটা নাহিনার চাকর, তিনি আহায়ে, পরিচ্ছদে তো সাহেব সাজেনই, তাহার উপর হিন্দুর আচার, বিচার, বর্ষ মানিয়া চলা তত আবশ্যক বলিয়া মনে করেন না; কিন্তু এই দেশবিশ্রুত পুরুষটি কাৰ্য্যক্ষেত্রে সাহেবদের সঙ্গে স্রবোধে মিশিয়াও পূর্বতন প্রাচীন পন্থাকে অনুসরণ করিতে কখনও লজ্জাবোধ করেন নাই। অথচ ইঁহার সমসাময়িক, সহপাঠীবৃন্দেরা অনেকেই উচ্ছৃঙ্খল হইয়াছিলেন। ইঁহার একমাত্র কারণ স্বদেশের প্রাচীন রীতিনীতি, শাস্ত্র ও ঋষিদিগের প্রতি জ্ঞাতশ্রদ্ধা ছিলেন বলিয়া এবং বাল্যকালের অভ্যাস ও সংস্কার এতই তাঁহার প্রবল ছিল যে ইঁহা হইতে উচ্চবিজ্ঞান, পাশ্চাত্য দর্শন, এবং উচ্চপদ কিছুতেই তাঁহাকে ভ্রষ্ট করিতে পারে নাই।

পরম ভাগবৎ ব্রাহ্মসম্পদ পণ্ডিত ৩গৌরীপদ চক্রবর্ত্তী একজন আদর্শ বিনয়ী স্বধর্ম্মনিষ্ঠ ভক্তমান ৩গৌরীপদ চক্রবর্ত্তী। পুরুষ ছিলেন। তিনি কি বালক, কি বৃদ্ধ, কি স্ত্রীলোক এমন কি ভৃত্যদিগের নিকটেও কখনও অবিণয় বা ঐক্যতা প্রদর্শন করিয়াছেন কিনা সন্দেহ; তাঁহার স্বভাবটি এমন মধুর ছিল, যিনি কখনও তাঁহার সঙ্গ করিয়াছেন তিনিই মোহিত হইয়াছেন এবং তাঁহাকে বিনয় গুণের আধার বলিয়া স্বীকার করিয়াছেন। ইনি একজন পেশন-প্রাপ্ত পদস্থ পুলিশ কর্মচারী। আমি দেখিয়াছি একজন সামান্য কনেষ্টবলের সহিতও তিনি কখনও অসম্মানের সহিত কথা কহিতেন না। অতি সামান্য লোক হইলেও তিনি তাহার প্রতি ভদ্রোচিত ব্যবহার করিতে

কখনও কুণ্ঠিত হইয়াছেন বলিয়া মনে হয় না। শুনিয়াছি নবীন বয়সেও তিনি কখনও কাহারও সহিত অভদ্র ব্যবহার করেন নাই। বাস্তবিকই বাল্যকাল হইতে যদি এই শীলতা তাঁহার হৃদয়ত না হইত, তবে পুলিশ বিভাগের আওতার মধ্যে চরিত্রের মাধুর্য্য ও কোমলতা এবং পুরুষোচিত দৃঢ়তা যুগপৎ স্থির রাখা তাঁহার পক্ষে কঠিন হইত। পুলিশ বিভাগে তাঁহার মত উদার ভক্তিমান উচ্চ ধর্ম্মনীতিজ্ঞ পুরুষের সংখ্যা বৃদ্ধিপ্রাপ্ত হইলে বঙ্গদেশের সৌভাগ্যের কথা ছিল। এই গ্রন্থের প্রথম প্রচারের সময় এই পরম ভাগবৎ ঋষিকল্প পুরুষ জীবিত ছিলেন। কয়েক বৎসর হইল তিনি ভক্তিলভ্য দিব্যধামে চলিয়া গিয়াছেন। এমন প্রেমনিষ্ঠ ভক্তিবিলিতচিত্ত জীবন অল্পই দেখিয়াছি। অথচ কি সুদৃঢ় পৌরুষ তাঁহার মধ্যে বর্তমান ছিল! যুগপৎ এই দুইটি গুণের মিলনে তাঁহার জীবন এক অপূর্ব্ব শোভা ধারণ করিয়াছিল। তাঁহার সুদীর্ঘ জীবনের কার্য্যাবলী সমালোচনা করিলে মনে বড় আশার সঞ্চার হয়। সংসারী হইয়াও দৃঢ় ভক্তি বিশ্বাস ও জ্ঞানে তাঁহার চিত্ত সুমেরুর মত অটল।

ঋষিকল্প পূজ্যপাদ বিজ্ঞেন্দ্রনাথ ঠাকুর মহাশয়ের পবিত্র জীবনটিও একটি সদভ্যাসের উজ্জ্বল উদাহরণস্থল। তাঁহার সমস্ত জীবনটি তত্ত্বালোচনা ও গভীর দর্শন-শাস্ত্রের জটিল তত্ত্বগুলির মীমাংসায় ব্যাপ্ত, কাজে কাজেই সংসারের বিবিধ ভোগবাসনা, ছলনা চাতুরী ও হুশ্চিন্তা তাঁহার জ্ঞানপ্রাচীরের সুদৃঢ় বেটন অতিক্রম করিয়া কোন দিনই তাঁহার চিত্তকে অভিভূত করিতে

পারে নাই। সংসারের কোন জঞ্জাল যে সেই চিত্ত মধ্যে থাকিতে পারে তাহা তাঁহাকে দেখিলে কিছুতেই মনে হয় না। প্রাচীন বয়সেও তাঁহার চরিত্র শিশুর মত সরল এবং জ্ঞানোন্মত্তসিত দীপ্তি ও একটি মাধুর্য্য তাঁহার সমস্ত মুখমণ্ডলে দেদীপ্যমান ছিল। জ্ঞানোলোচনায় দীর্ঘজীবনের অধিকাংশ সময়ই ব্যয়িত হইয়াছে বলিয়াই সংসারের অল্প বিষয়গুলি দৃঢ়ভাবে তাঁহার অভ্যস্ত হইতে পারে নাই—সুতরাং তাঁহার চরিত্রে বিষয়ের কোন দাগ পড়িতে পারে নাই। এই মহান চরিত্রবান পুরুষের নিকট হইতে আমাদের এইটি বিশেষ শিক্ষার বিষয় যে জীবনের প্রথমাবধি চিত্তগতিকে যে দিকে ফিরাইয়া রাখিবার অভ্যাস করা যাইবে, জীবনের উত্তর কাল পর্য্যন্ত সেই অভ্যাস-শক্তিই তাহার জীবনকে তদভিমুখী করিয়া রাখিতে বাধ্য করিবে এবং ক্রমে অভ্যাস স্বভাবে পরিণত হইবে। এতদ্বিন্ন ঐশ্বর্য্যের মধ্যে লালিত হইয়াও মানুষ সদভ্যাসের বলে যে কতদূর সৎ ও সুন্দর হইতে পারে তাহাও এই মহাত্মার জীবনে পূর্ণ পরিষ্কৃত। তাঁহার সঙ্গে বাক্যালাপ করিলে, দুই দণ্ড তাঁহার কাছে বসিয়া থাকিলে, তাঁহার সরল প্রশ্নের সত্য কথাগুলি শুনিলে এবং সেই দেশবিশিষ্ট প্রাণভরা শিশুর মত সরল হাসি শুনিলে মনে হইত যেন অতীত যুগের তপোবনে কোন ঋষির কাছেই বসিয়া আছি।

শ্রীমৎস্বামী শিবনারায়ণ :—এই মহাত্মার জীবনও জীবনী প্রসঙ্গে উল্লিখিত হওয়া আবশ্যিক মনে করি। পরমহংস মহারাজ নির্ব্বিরোধী সন্ন্যাসী হইয়াও, লোকের মঙ্গলের জন্য

আজীবন চেষ্টা ও যত্ন করিতে ক্রটি করেন নাই। জীবনটিকে তিনি যে সুমহতী সাধনা দ্বারা দৃঢ় ও উজ্জ্বল করিয়াছিলেন এবং জীবনের মহান লক্ষ্য যাহা তিনি সাধনলব্ধ অন্তর্দৃষ্টি প্রভাবে উপলব্ধি করিতে পারিয়াছিলেন, তাহা তিনি উচ্চকণ্ঠে সকলের নিকট ঘোষণা করিয়া গিয়াছেন। তাঁহার বাণী ও বিশ্বাসের মধ্যে যে একটি প্রচণ্ড বল ছিল তাহা কেহ অল্প তপস্যার দ্বারা লাভ করিতে পারে না। যাহা তিনি পাইয়াছিলেন জীবনের শেষদিন পর্য্যন্ত কোন ঘটনা তাহা হইতে তাঁহাকে স্বলিত করে নাই—ইহা সাধারণ অভ্যাসের ফল নহে। তাঁহার সাধনা সম্বন্ধে 'জ্যোতি' রচয়িত্রী শ্রদ্ধাম্পদা শ্রীমতী হেমলতা দেবী আমাকে যাহা লিখিয়া পাঠাইয়াছিলেন, আমি এস্থলে তাহা সম্পূর্ণ উদ্ধৃত করিয়া দিলাম :—

“৩পরমহংস শিবনারায়ণ স্বামী পশ্চিম দেশে ব্রাহ্মণকুলে জন্ম গ্রহণ করেন। ইহা ছাড়া তাঁহার উৎপত্তি সম্বন্ধে আর কোন বিবরণ জানা যায় নাই। তিনি বাল্যকালে আপন পিতা কর্তৃক ওঙ্কারমন্ত্র উচ্চারণ পূর্বক সবিতার তেজ ধ্যান করিতে উপদিষ্ট হইয়াছিলেন, এবং অন্তর্যামীর প্রেরণায় অর্থাৎ স্বাভাবিক অনুরাগের দ্বারা একান্ত যত্নে প্রবৃত্ত হইয়া আর্ধ্যজাতির তপস্যা-লব্ধ সত্যের সারজ্ঞানে উপনীত হইয়া পরমানন্দের অধিকারী হইয়াছিলেন।

এই প্রকাশমান তেজোমণ্ডলে পরমপুরুষের ধ্যান ধারণায়, তাঁহার অন্তরে সমুদয় বিশ্ব এক অখণ্ডযোগে প্রতীয়মান হইয়াছিল ; এবং সেই পরমপুরুষের প্রেরণায় তিনি এই মহা-

সত্যকে সম্পূর্ণভাবে আবরণ মুক্ত করিয়া, বিশুদ্ধ মূর্তিতে, বিশ্বের সম্মুখে উদ্ঘাটিত করিয়া দিয়া গিয়াছেন। তিনি দেখাইয়াছেন যে হিন্দুজাতির মূলধর্ম সমগ্র মনুষ্যজাতিকে আলিঙ্গন করিবার, সমগ্র বিশ্বের সহিত একান্ত ভাবে মিলিত হইবার অধিকার রাখে ; এবং সমগ্র জগতের সারসত্য এই তপস্যালব্ধ আনন্দের মধ্যেই নিহিত রহিয়াছে।

স্বামিজী অগ্নিকার্য্য করিতে আদেশ করিয়াছেন এবং ব্রাহ্মণ হইতে চণ্ডাল পর্য্যন্ত স্ত্রী পুরুষ মনুষ্য মাত্রেয় ইহাতে সমভাবে অধিকার আছে ইহা বারম্বার মুক্তকণ্ঠে ঘোষণা করিয়াছেন— ইহাতে সকল মনুষ্যের সমভাবের উদয় হয় ও অগ্নিকার্য্যের দ্বারা অন্তঃকরণ প্রানিশূন্য হইয়া বিশুদ্ধতা লাভ করে। যিনি প্রকাশ অপ্রকাশ অর্থাৎ আলোক অন্ধকারকে লইয়া প্রত্যক্ষ বিরাজমান, তাঁহাকে প্রকাশ অপ্রকাশ বা আলোক অন্ধকারের যোগে প্রত্যক্ষ করিলে অন্তর ও বাহির পরম শান্তিতে ভাসমান হয় ইহাই তাঁহার শেষ কথা।

যে কেহ পরমাত্মার দর্শন মানসে শ্রীতিপূর্বক এই সাধনায় প্রবৃত্ত হইবেন তিনি আশা তৃষ্ণা লোভ লালসা ইত্যাদি সমুদয় বন্ধন হইতে মুক্তিলাভ করিয়া শান্তিস্বরূপ পরমানন্দের অধিকারী হইবেন ইহা তিনি একান্ত দৃঢ়তার সহিত ভূয়োভূয়ঃ উল্লেখ করিয়াছেন।

পরমহংস শিবনারায়ণ স্বামী অতি অল্পকাল পূর্বেই শরীর ধারণ করিয়া পৃথিবীতে বর্তমান ছিলেন। বর্তমান কালের বহু লোকেই তাঁহাকে দেখিয়াছেন, কিন্তু খুব অল্পলোকেই আত্মার

প্রতি তাঁহার অন্তরের অসামান্য প্রেম উপলব্ধি করিতে পারিয়াছিলেন। যাঁহারা একবার তাহা অনুভব করিয়াছেন তাঁহাদের আর তাহা ভুলিবার কোন উপায় নাই।”

৩হরিপ্রসন্ন মুখোপাধ্যায়—ভাগলপুর টা, এন, জুবিলী কলেজের ভূতপূর্ব অধ্যক্ষ পণ্ডিতবর ৩হরিপ্রসন্ন মুখোপাধ্যায় মহাশয়ের মত এমন নিরহঙ্কার সত্যনিষ্ঠ ব্যক্তি খুব অল্পই দেখিতে পাওয়া যায়। তাঁহাকে দেখিলে তাঁহার সহিত কথা কহিলে তিনি যে একজন বিচক্ষণ পণ্ডিত ইহা বুঝাও যাইত না। প্রভূত পাণ্ডিত্য বিনয়ের আধরণে লুকাইয়া রাখিয়া তিনি এই সংসারের সুখদুঃখের বোঝা যথার্থ ভক্তের মত নীরবে বহন করিয়া গিয়াছেন;—ইহার কিছুই আকস্মিক ঘটনা নহে। সমস্তই সুদৃঢ় অনুশীলনের ফল।

৩যতীন্দ্রনাথ বিশ্বাস :—আমার আত্মপ্রতিম বহু স্বর্গীয় যতীন্দ্রনাথ বিশ্বাস বাল্যকালে ও কৈশোর অবস্থায় অত্যন্ত চঞ্চল ছিলেন। ছুটামি, মারামারি, ঝগড়া না করিয়া তিনি কিছুতেই থাকিতে পারিতেন না। এমন দিন ছিল না যে তজ্জগৎ তিনি বিছালয়ে দণ্ডিত না হইতেন। আমার দেখিয়া বড় কষ্টবোধ হইত, কারণ যতীন্দ্রনাথ ছুট হইলেও বড় বুদ্ধিমান মেধাবী বালক ছিলেন। পড়াশুনাতেও তিনি তাঁহার ক্লাসের সর্বশ্রেষ্ঠ বালক ছিলেন। কিন্তু এই প্রকার কুকার্য্যনিরত থাকিলেও অধিক দিন হয়তো তাঁহার প্রতিভা সমুজ্জ্বল থাকিত কিনা সন্দেহ। কিন্তু ভগবানের ইচ্ছায় তাহার মতির পরিবর্তন ঘটিল, তিনি আপনার সঙ্কটাপন্ন অবস্থার কথা শীঘ্রই বুঝিতে পারিলেন। সঙ্গে সঙ্গে

তিনি এত দৃঢ় অভ্যাস সাধন করিতে লাগিলেন যে এক বৎসরের মধ্যেই লোকে তাঁহার অচিন্তিত পরিবর্তন লক্ষ্য করিয়া বিস্মিত হইতে লাগিল। তাঁহার সাধনা যথার্থ প্রশংসার্হ। এখন হইতে তিনি প্রবৃত্তির সঙ্গে প্রবল সংগ্রামে প্রবৃত্ত হইলেন। এই সময় কত রাত্রি তাঁহার অনিদ্রায় কাটিয়াছে। প্রাণান্ত কষ্ট হইতেছে, প্রলোভনের বস্ত্র নিকটে, তথাপি প্রবৃত্তির করে আত্মসমর্পণ করিতে একান্ত অনিচ্ছুক। দৈব দুর্ভিক্ষপাকে পূর্বাভ্যাসের প্রবলবেগে যে যেদিন পরাজিত হইতেন, সেদিন তাঁহার অশ্রুধারায় বক্ষঃস্থল অভিসিক্ত হইত, মুখে তাহার কেহ হাসি দেখিত না। যে কিছুকাল আগে অত্যন্ত ছরস্ক, অসহিষ্ণু ও বাচাল ছিল, সেই যতীন্দ্রনাথ অভ্যাসের প্রভাবে অচিরেই অচঞ্চল, সহিষ্ণু, মৌনী ও গম্ভীর হইয়া পড়িলেন। তাঁহার সতীর্থ ও বন্ধুবান্ধবেরা অবাক হইয়া গেলেন। সে চপলতা, সে ঔদ্ধত্য কোথায় চলিয়া গিয়াছে—আজ তাহার চরণপদ্ম অভিমুখে তাঁহার সমস্ত চিত্ত জুলুস্তিত হইয়া প্রণত হইবার জগ্ন ব্যাকুল হইয়াছে, কোন অপার্থিব লোভনীয় বস্তুর জগ্ন তাঁহার চিত্ত আজ সমগ্র জগতের পানে উদাসীন হইয়া পড়িয়াছে। কতদিন হইতে গোপনে গোপনে যে আপনাকে প্রস্তুত করিতেছিলেন, লোকে তাহা বুঝিবার অবকাশ পর্য্যন্ত পায় নাই। কষ্ট সহিবার অভ্যাস এত অধিক হইয়াছিল যে মেসে দীর্ঘকাল ধরিয়া পাচক ও চাকর নাই, তিনি জল আনা হইতে ঘর পরিষ্কার করা পর্য্যন্ত সমস্ত কাজই স্বহস্তে করিতেন, অথচ তজ্জগৎ কেহ কোন দিন তাঁর মুখ অপ্রসন্ন দেখে নাই। আজ কতদিন যতীন্দ্রনাথ এই মরধাম পরিত্যাগ

করিয়া গিয়াছেন. কিন্তু তাঁহার সুমধুর স্মৃতি, সদভ্যায়ে উজ্জলীকৃত দৃঢ় চরিত্র আজিও আমরা বিস্মৃত হইতে পারি নাই।
আমার সহোদরকল্প বন্ধু স্বর্গীয় প্রফুল্লনাথ মজুমদার জীবনে যে দিন বৃষ্টিতে পারিলেন যে ব্রহ্মচর্য্যবিহীন হইয়াই আমাদের এত দুর্দশা হইয়াছে সেই দিন হইতে তিনি আপনাকে নিয়মিত করিতে কৃতসঙ্কল্প হইয়াছিলেন। কয়েকটি প্রবন্ধক বন্ধুর বেশে তাঁহাকে বিপথগামী করিবার চেষ্টা করিয়াছিল, কিন্তু তাঁহাকে তাহারা বিশেষ বিপন্ন করিতে পারে নাই। সেইদিন হইতে তাঁর মনে ধারণা জন্মিল শুধু আপনাকে রক্ষা করিলে চলিবে না, সহপাঠী বন্ধুবান্ধবদের মতি গতি, পরিবর্তিত করিতে না পারিলে বর্তমান অধঃপতনের খরশ্রোত হইতে এই স্বজাতিকে উদ্ধার করা অসম্ভব। তাই তিনি ইহাকেই জীবনের ব্রত বলিয়া গ্রহণ করিয়াছিলেন। যুবকদিগকে দেখিলেই তিনি তাঁহাদের নৈতিক ও আধ্যাত্মিক উন্নতির জগ্নু তাহাদিগকে একান্ত আগ্রহের সহিত ব্রহ্মচর্য্যের উপদেশ দিতেন। শুধু উপদেশ দিয়াই ক্ষান্ত থাকিতেন না, যাহাতে তাহারা উপদেশ কার্য্যে পরিণত করে তজ্জগ্নু বিশেষ সতর্ক দৃষ্টি রাখিতেন। অবশ্য তাঁহার পবিত্র ও উন্নত চরিত্রই অনেক পরিমাণে যুবকদিগকে আকৃষ্ট করিত। তিনি শুধু বাক্যবীর ছিলেন না। কার্য্যে জীবনে চিন্তায় তাঁহার এমন মিল ছিল যে লোকে তাঁহার উপদেশ উপেক্ষা করিতে পারিত না। স্বয়ং প্রত্যহ শেষ রাত্রে জাগ্রত হইয়া শৌচাদি সমাপনান্তে স্নান আঙ্গিক শেষ করিয়া, অধ্যয়নে

৮ প্রফুল্লনাথ
মজুমদার।

নিযুক্ত হইতেন; আবার মধ্যাহ্নে স্নান সন্ধ্যা এবং সায়ংকালে স্নান সন্ধ্যা করিতেন। তাঁহার শরীর খুব বলিষ্ঠ ছিল। হৃদয় এত করুণায় পূর্ণ ছিল যে একজন অস্পৃশ্য নীচ জাতিও বিপদ-গ্রস্ত হইলে প্রফুল্লনাথ তাহাকে সাহায্য করিতে কখনও ঘৃণা বোধ করিতেন না। যেখানে দুষ্কর্মকারীরা আপনাদের দুষ্কর্মের ভারে প্রসীড়িত, সেইখানেই প্রফুল্লনাথ তাহাদিগকে সহুপদেশ দ্বারা শাস্ত করিতেছেন; যেখানে দারিদ্র্য, সেইখানেই প্রফুল্লনাথ আপনার কপর্দকটি পর্য্যন্ত ব্যয় করিতেছেন; যেখানে কেহ অনাথ বা অনাথা আশ্রয়াভাবে ক্লিষ্ট হইতেছে, প্রফুল্লনাথের সক্রমণ দৃষ্টিপাত তাহার উপর পড়িবেই। একদিকে বলিষ্ঠ শরীর, উচ্চ অন্তঃকরণ ও জ্ঞানের ঐজ্জল্য, অগ্ন্যদিকে কঠোর পরিশ্রমী কর্মী, একদিকে প্রেমপূর্ণ হৃদয়—অগ্ন্যদিকে কঠোর কর্তব্যনিষ্ঠ, তাঁহার চরিত্র ও জীবনকে কি মধুময়ই করিয়াছিল। প্রফুল্লনাথ কত উচ্ছ্বল উজ্জত নবীন যুবকদিগকে মহাবিনাশ হইতে রক্ষা করিয়াছেন, তাহা স্মরণ করিলে হৃদয় কৃতজ্ঞতায় পরিপূর্ণ হইয়া উঠে। তিনি নিজের চেষ্টায় আপনার জীবনপুষ্পটিকে দেব-পূজার উপযুক্ত করিয়া যথার্থ দেবতা হইয়া গিয়াছেন—তাঁহাকে দেখিলে পুরুষকারের যেন জীবন্ত প্রতিমূর্ত্তি বলিয়া মনে হইত। তিনি ব্রাহ্মণোচিত নিয়ম নিষ্ঠাকত কঠোর ভাবে আচরণ করিতেন, অধ্যয়ন ও লোকহিতকর কত কার্য্য করিতেন কিন্তু কোনদিন তজ্জগ্নু শরীর পীড়িত বা অসুস্থ হইত না। অভ্যাসবলে এই সকল কঠোরতা তাঁহার প্রকৃতিগত হইয়া গিয়াছিল। এখন তিনি কোন অদৃশ্য সুরপুরে শান্তিস্থ অমুভব করিতেছেন, কিন্তু

আজিও তাঁহার বন্ধু-বান্ধব ও সহবাত্রীরা তাঁহার পবিত্র স্মৃতি বক্ষে বহন করিয়া প্রতিদিন প্রেমাশ্রু ও ভক্তি-অর্ঘ্য দ্বারা তাঁহার বরণীয় চরিত্রকে পূজা করিয়া কৃতার্থ হইতেছেন।

৩পরমহংস স্বামী দয়ালদাসজীর (শ্রীকৃষ্ণানন্দ স্বামীর গুরু) একজন শিষ্য ছিলেন, তাঁহাকে সকলেই যোগীজী মহারাজ বলিয়া ডাকিত। তিনি খুব বৃদ্ধ, কিছুকাল আগেও ভোজনে অসাধারণ সংযম। তিনি আহার ত্যাগ করিয়াও সবল ও সুস্থ ছিলেন। ১০১৫ দিন অন্তর সামান্য একটু ভোজন করিতেন মাত্র। একবার হরিদ্বার কুম্ভ মেলায় গিয়া তাঁহাকে দেখিলাম, তিনি একমাস অনাহারে রহিয়াছেন, অথচ শরীর তজ্জন্ম কিছুমাত্র বলহীন হয় নাই। আহার বিষয়ে এতটা সংযম খুব সুদৃঢ় অভ্যাসের ফল।

আমার বাল্যবন্ধু ৩শেরীন্দ্রমোহন গুপ্তের মাতা, যাঁহাকে আমি জননী বলিয়াই জানি—যাঁর স্নেহ, দয়া, তপস্যা ও ব্রহ্মচর্য্য হিন্দু রমণী মাত্রেয়ই অল্পকরণীয়—তিনি আশ্চর্য্য রকম সহগুণ অভ্যাস করিয়াছিলেন। পাহাড়ে তীর্থদর্শনে গিয়া গাড়ি উল্টাইয়া একটি পদ ভগ্ন হইয়া গিয়াছিল, সর্ব্বাঙ্গে দারুণ আঘাত লাগিয়াছে, তথাপি ধৈর্য্যচ্যুতি ঘটে নাই। উৎকট দৈহিক পীড়া এমন অক্ষোভে সহ্য করিয়াছেন, দেখিলে বিস্মিত হইতে হয়। রমণীর সহগুণ অনেকটা স্বভাবসিদ্ধ বটে কিন্তু তাঁর মত সহগুণ কদাচিত্ দেখা যায়। বহুদিনের অভ্যাস না থাকিলে লোকের চিত্ত এতটা দৃঢ় ও কষ্টমহিষ্ণু হয় না। সমস্ত

জীবনে যে ব্রহ্মচর্য্য ও তপোনিষ্ঠা ছিল তাহার শেষফল তিনি মৃত্যুকালেও দেখাইয়া গিয়াছেন। রোগের তীব্র যাতনাও তাঁহাকে চিরাভ্যস্ত সংযম হইতে ভ্রষ্ট করিতে পারে নাই। পুরুষোত্তমধামে জীবনের শেষ নিশ্বাস পর্য্যন্ত ভগবৎ নাম গ্রহণ করিতে করিতে যোগীজনোচিত দিব্যধামপ্রাপ্ত হইয়াছেন।

আর একটা আদর্শ সহনশীলতা ও ভগবৎ নির্ভরের দৃষ্টান্ত না দিয়া থাকিতে পারিলাম না। আমার পরম পূজ্যপাদ বন্ধু ৩কৃষ্ণা-৩কৃষ্ণারাম নিকটে বাস করিতেন। তিনি একজন আদর্শ ব্রহ্মচারী। সাধু পুরুষ ছিলেন। অসাধারণ ধৈর্য্য, সহগুণ এবং ভগবৎ নির্ভর তাঁহার চরিত্রের বিশেষত্ব ছিল। স্ত্রীবিয়োগ ঘটিল, উপযুক্ত জ্যেষ্ঠ পুত্রটি অকালে কালকবলিত হইল, তৃতীয় পুত্রটি জ্বররোগে ভুগিয়া ভুগিয়া যৌবনে পদার্পণ করিতে না করিতে লোকান্তরে চলিয়া গেল, কিন্তু তাহাতে তাঁহার অক্ষেপও নাই। মাতৃহীন রুগ্ন বালকটিকে তিনি যেরূপ সেবা ও যত্ন করিতেন, আমি ভাবিতাম, এই বালকের মৃত্যুর পর কৃষ্ণারাম অত্যন্ত শোক পাইবেন। বালকটির মৃত্যুর পরদিন গিয়া তাঁহাকে দেখি যেন সংসারে কোন দুর্ঘটনাই ঘটে নাই—বেশ শান্ত ও নিশ্চিন্ত। সেই মধুর হাস্যজ্যোতি, সেই স্নিগ্ধ গাভীর্য্য মুখের চারিদিকে বিকীর্ণ! তাঁহার এ রকম অবস্থা দেখিয়া আমি ধারণা করিতেই পারি নাই যে গত রাত্রে তাঁহার পুত্রের দেহান্ত ঘটয়াছে, সুতরাং পুত্রটি কেমন আছে জিজ্ঞাসা করিলাম। তিনি প্রশন্ন মুখে উত্তর করিলেন “তাহার কাশীলাভ হইয়াছে।”

শুনিয়া তো আমি নিব্বাক্ নিস্পন্দ ! তাঁহার আয়ের কোন স্থায়ী ব্যবস্থা ছিল না, অথচ পোষ্য অনেকগুলি ; শুধু তাহাই নহে, অতিথি অভ্যাগতের সমাগমও বিলক্ষণ ছিল, কিন্তু তথাপি একদিনের জন্তও কেহ তাঁহাকে কখনও উদ্বিগ্ন দেখে নাই । সময়ে সময়ে এমন অভাবের মধ্যে পড়িতেন, যে দিন চলা ভার হইত কিন্তু তথাপি কাহারও নিকট প্রার্থনা করিয়া লোককে ব্যতিব্যস্ত করিতেন না । পাছে দিতে না পারিলে অন্তরঙ্গ বন্ধুরা কষ্ট পান, এইজন্ত তাঁহাদিগের নিকটেও অভাব জ্ঞাপন করিতেন না । অথচ সন্ধান করিয়া যখন তাঁহার অভাবের কথা আমরা জানিতে পারিতাম, তখন অনেক অনুযোগ করিতে তিনি একটু হাসিয়া বলিতেন, “না বলিলেও যিনি যোগাড় করিয়া দিতেছেন, আর তাঁহাকে বলিয়া কি জানাইব ? তিনি জানেন না এমন তো নয়—প্রয়োজন হইলে তিনিই বিধান করিবেন ।” এমন আশ্চর্য্য লোক ছিলেন, কত লোক কত ফরমায়েস্ তাঁহাকে করিত, কত কাজের ভার তাঁহার ক্ষেপে চাপাইত, তিনি কুলীর মত সেই সকল কার্য্য কুণ্ঠাবিহীন চিন্তে সমাপন করিয়া দিতেন, অথচ কখনও তজ্জন্ত কাহার কাছে প্রার্থী হইতেন না, পাইবার আশাও রাখিতেন না । যে মনোযোগ করিয়া যাহা কিছু দিত, তাহাই প্রসন্নচিন্তে গ্রহণ করিতেন, না দিলেও কোন ক্ষোভ ছিল না । লোকের কাজ কর্ত্ত্ব লইয়া সময়ে সময়ে সারাদিন ছুটাছুটি করিয়া বেড়াইতেন, কিছু বলিলে বলিতেন “মহারাজ, আমার তো নিজের কোন কাজ নাই, অথ লোক কাজ দিলে স্তুতরাং আমি করিতে

বাধ্য ! আমি সেই তো বসিয়াই থাকিতাম ।” পরিচিত অপরিচিত সকলেই তাঁহাকে দিয়া কাজ করাইয়া লইত, তিনিও কোন দিন তজ্জন্ত কোন আপত্তি করিতেন না । তাঁহার গৃহে রাখাক্ষের বিগ্রহ এবং অনেকগুলি শালগ্রাম শিলা ও মহাদেবের সেবা ছিল । তজ্জন্ত পৌষ, মাঘ মাসের ছরন্ত শীতেও প্রাতঃ-স্নান সমাপনান্তে প্রায় অনাবৃত অবস্থায়, ভক্তি বিগলিত চিন্তে সেই সকল বিগ্রহগুলির পূজাৰ্চনা করিতেন । এত যে অভাব ছিল, তজ্জন্ত কিছু ক্ষোভ ছিল না । যদি গৃহে কিছু খাবার থাকিত, তাহাও প্রতিবেশী—ইতর জাতির শিশুদিগের মধ্যে বিতরণ করিয়া দিতেন । মিষ্টদ্রব্যের লোভে প্রত্যহই শিশুরা তাঁহার ঘরের কাছে আসিয়া ভিড় করিত । তাহার কত গোলমাল উপদ্রব করিত, কিন্তু তজ্জন্ত কখনও বিরক্ত হইতে দেখি নাই । আবার এদিকে পরম বৈরাগ্যবান পুরুষ ছিলেন । তাঁহার চরিত্রের কোন স্থানে দাগ ছিল না । কেমন সরল, সবল, সহিষ্ণু ও স্থির চিত্ত ! ঠিক তেমন লোকটি আর দেখা যায় না । একটি অতিবৃদ্ধ মূক বধির পুরুষকে অনাহারে মৃতপ্রায় দেখিয়া গঙ্গার ঘাট হইতে নিজ গৃহে তুলিয়া আনেন । তাঁহার সেবার গুণে অল্প কয়েকদিনের মধ্যেই বৃদ্ধ সতেজ ও সবল হইয়া উঠিল । সুস্থ হওয়ার পরও সেই অসহায় বৃদ্ধ কৃষ্ণারামজীর আশ্রয়েই রহিয়া গেল । মধ্যে মধ্যে তাহার রোগ—উদরাময় বাটার অন্যান্য পরিজনবর্গকে বিরক্ত করিয়া তুলিত, কিন্তু কৃষ্ণারাম হস্তমুখে তাহার সমস্ত র্ত্ত্ব পরিষ্কার করিয়া দিতেন, একদিনও তজ্জন্ত তাহাকে কোন রুঢ় কথা বলিতেন

না। বোধ হয় বৃদ্ধ পিতাকেও লোকে এত সেবা করিয়া উঠিতে পারে না। এমনই তাঁহার সুন্দর চরিত্র ছিল, পথের পথিকও যে একবার তাঁহাকে দেখিয়াছে, বা তাঁহার সহিত একটাবার কথা কহিয়াছে, সে কখনও তাঁহার সেই মাধুর্য্যবিমণ্ডিত হাস্যপূর্ণ মুখমণ্ডল ভুলিতে পারিবে না। অস্থলিত ব্রহ্মচর্য্যের জীবন্ত প্রমাণস্বরূপ প্রৌঢ় বয়সেও তাঁহার উজ্জ্বল গৌরবর্ণ বলিষ্ঠ দেহ, যুবকোচিত লাভ্য ও শ্রমপটুতা সকলের চিত্তকেই আকৃষ্ট করিত। তাঁহার গুরুভক্তিও অসাধারণ ছিল। চরিত্রের এত সৌন্দর্য্য এত গুণ যঁার তাঁহাকে কত কষ্টে কত পরিশ্রমে যে ইহা লাভ করিতে হইয়াছিল তাহা স্মরণ করিলে বিস্মিত না হইয়া থাকা যায় না। বাল্যকালের কত সঙ্গী তাঁর এখনও আছে, অথচ তিনি কখন কেমন করিয়া নীরব সাধনায় সকলের অগোচরে, আপনাকে এত উচ্চ স্থানে উপনীত করিতে সমর্থ হইয়াছিলেন, আপনার মনঃপ্রাণ বিশ্বদেবতার চরণে অঞ্জলি দিবার সামর্থ্যলাভ করিয়াছিলেন—তাহা আমরা কেহই জানি না—কিন্তু তাঁহার অপূর্ব সার্থকতা লাভের কথা মনে করিলে, তাঁহার বিরাট অথচ সুন্দর মনুষ্যত্বের প্রতি একটি প্রগাঢ় শ্রদ্ধা আসিয়া উপস্থিত হয়, এবং বিনা তর্কেই তাঁহার নিকট এই মস্তককে অবনত করিতে ইচ্ছা করে। হায়! এখনও সেই কাশী আছে, কত সাধু সঙ্জন, সদ্ধিমান সেখানে এখনও বর্তমান রহিয়াছেন; কিন্তু কুষ্ণারামের ন্যায় অমন উদার ত্যাগী, ভক্তিনিষ্ঠ প্রেমিক সাধুপুরুষ আর দৃষ্টিগোচর হয় না। কত স্থানে গিয়াছি, কত তীর্থ দেখিয়াছি, কিন্তু এমন ধৈর্য্যশীল অমন মনুষ্যত্ব পরিপূর্ণ ভক্তি শ্রদ্ধাযুক্ত

সবল সুদৃঢ় অথচ মধুমাখা হৃদয় আর আমি কোথাও দেখি নাই।

৩৭য় বরদাকান্ত লাহিড়ী মহাশয়ের জীবনটিও একটি পুরুষকারের উজ্জ্বল দৃষ্টান্ত স্থল। বাল্যকালে পারিবারিক অবস্থা দেখিয়া যখন তিনি বুঝিলেন বিদ্যাজ্জন করিয়া ৩৭য় বরদাকান্ত আয় বৃদ্ধি করিতে না পারিলে সংসারের কষ্ট লাহিড়ী মোচন করা অসম্ভব, তখনই তিনি বিদ্যাভ্যাসের জগৎ দৃঢ় প্রযত্ন করিতে লাগিলেন। কিন্তু বাটীতে থাকিয়া পরিচিত স্বজন বন্ধু-বান্ধবের মধ্যে পাঠের বিঘ্ন হইবে ইহা তিনি বুঝিতে পারিলেন, সুতরাং তিনি কাহাকেও কিছু না বলিয়া একদিন একবারে একাকী দিল্লীতে আসিয়া উপস্থিত হইলেন। তাঁহার তখন লাহোর বাইবার ইচ্ছা কিন্তু তখন রেলপথ মাত্র দিল্লী পর্য্যন্ত খুলিয়াছে। সেই অবস্থাতেই তিনি অনেক কষ্ট সহ করিয়া লাহোরে আসিয়া উপস্থিত হইলেন। সেখানে কেহ আশ্রয় ছিল না, বন্ধু ছিল না, সে দেশের ভাষা তিনি বুঝিতেন না—এই অবস্থায় একটি সদাশয় ভদ্রলোক তাঁহাকে নিজের বাটীতে রাখিয়া তাঁহার অধ্যয়নের বন্দোবস্ত করিয়া দিলেন। কয়েক বৎসরের মধ্যে বিশ্ববিদ্যালয়ের পাঠ শেষ করিয়া আইন পরীক্ষা দিবার জগৎ প্রস্তুত হইলেন। আইন পরীক্ষায় সর্বোচ্চস্থান অধিকার করিয়া কৰ্মক্ষেত্রে প্রবেশ করিলেন। আইন ব্যবসাতে পরিশ্রম ও অধ্যবসায়ের গুণে শীঘ্রই পাঞ্জাবের ব্যবহারজীবীদের মধ্যে প্রতিষ্ঠা লাভ করিলেন। তাঁহার আইন ব্যবসাতে দক্ষতা এবং মনের তেজ দেখিয়া সাহেব সুবারা সকলেই তাঁহাকে শ্রদ্ধা করিত। পাঞ্জাব

প্রদেশে করিদকোট নামে একটি শিখরাজ্য আছে, সেখানকার বৃদ্ধ রাজার মৃত্যুকালের অনুরোধবাক্যে বাধ্য হইয়া তাঁহার পুত্রের রাজত্বকাল সময়ে তিনি তথাকার মন্ত্রীর পদ গ্রহণ করেন এবং তথায় সুখ্যাতির সহিত ১০১২ বৎসর কাল থাকিয়া রাজ্যের সুবন্দোবস্ত করিয়া দেন। কি অধ্যয়ন কালে, কি কৰ্মক্ষেত্রে, সর্বত্রই তাঁহার একটি বিশুদ্ধ চরিত্রবল দেখিয়া মুগ্ধ হইতে হয়। বৃদ্ধ বয়সেও কখনও তাঁহাকে চূপ করিয়া বসিয়া থাকিতে দেখি নাই। কোন কাজ না থাকিলে নিরন্তর অধ্যয়নে তাঁহার ক্লাস্তি নাই, কিন্তু আলস্যে কালক্ষেপ করা তাঁহার পক্ষে অসম্ভব ছিল। এই প্রবল পুরুষকার প্রভাবে সমস্ত বিরুদ্ধ অবস্থাকে অতিক্রম করিয়া তিনি আর্থিক ও আধ্যাত্মিক সকল বিষয়েই বথোপযুক্ত উন্নতির শিখরে আরোহণ করিয়াছিলেন। চরিত্রের এতখানি দৃঢ়তার মধ্যেও আবার অপূৰ্ব্ব কোমলতা ও তাঁহার বালকোচিত সরল-ভাব সকলের হৃদয়কেই মুগ্ধ করিত। কষ্টে পড়িয়া, অভাবে পড়িয়া কেহ কখনও তাঁহার সহানুভূতি হইতে বঞ্চিত হয় নাই। ইনি কোন কারণবশতঃ অহিফেন সেবনে অভ্যস্ত হইয়া পড়িয়াছিলেন, কিন্তু যখন ইহার অপকারিতা হৃদয়ঙ্গম করিলেন, সেই দিন সেই মুহূর্ত্তে তাহা ত্যাগ করিলেন। সকলেই আশঙ্কা করিয়াছিল, অনেক দিনের অভ্যস্ত বিষয় হঠাৎ তিনি পরিত্যাগ করিতে পারিবেন না, বা করিলেও রোগগ্রস্ত হইয়া পড়িবেন; কিন্তু তিনি অত্যন্ত মানসিক বল প্রযুক্ত অহিফেন আর কখনও গ্রহণ করিলেন না, কিন্তু তৎক্ষণাৎ তাঁহার পীড়াদিও হয় নাই। ইহা কম দৃঢ়তা ও পৌরুষের পরিচয় নহে।

৮ আশুতোষ মুখোপাধ্যায় আমাদের অনেক পরিচিত বন্ধু-বান্ধবের নিকট মুখ্যজ্যে মশায় নামে পরিচিত। ইঁহার নিবাস কোথায় কি পরিচয় আমরা অনেকেই বিশেষ কিছু জানি না।

লোকে তাঁহাকে পরিচয় জিজ্ঞাসা করিলে

৮ আশুতোষ বলিতেন “আমার নাম আশুতোষ মুখ্যজ্যে, মুখোপাধ্যায়। নিবাস ছমকো”—ইহা ছাড়া আর কিছু শুনি

নাই। তাঁহাকে আমরা অনেক বৎসর যাবৎ

জানি, অনেকে আরও অধিকদিন হইতে জানিতেন। কিন্তু এই ‘নামগোত্রহীন’ লোকটি অনন্তসাধারণ পুরুষ, পুরুষকারের জ্বলন্ত দৃষ্টান্ত, গীতোক্ত নিষ্কাম কৰ্ম্মযোগী। তাঁহার সুদীর্ঘ জীবনকাল পরহিতব্রতে ও পরছঃখমোচনেই ব্যয়িত হইয়াছে। ভারতবিশুদ্ধ প্রাতঃস্মরণীয় বিদ্যাসাগর মহাশয় যে জন্ম সাধারণ লোকের নিকট ‘দয়ার সাগর’ নামে খ্যাতি লাভ করিয়াছিলেন, এই আড়ম্বরহীন, বেশভূষাবিহীন মহাত্মাকেও আমি ঠিক সেই আখ্যায় আখ্যাত করিতে পারি। হাঁহারা তাঁহাকে জানেন আমার এ কথা তাঁহাদিগের নিকট অতিরঞ্জিত বলিয়া বোধ হইবে না। আমাদের এই মুখ্যজ্যে মশায়, পরিধানে একখানি মলিনবাস, খেলো একটি ছঁকা হস্তে ভারতের সর্বত্রই বিচরণ করিতেন। কাহারও নিকট সম্মানের প্রত্যাশা নাই, কোন লোকের কাছে আর্থিক প্রত্যাশাও নাই, অতিমাত্র উদাসীন—তথাপি সর্বদাই তাঁহাকে কত ব্যতিব্যস্ত দেখিয়াছি। কে কোথায় বসিয়া আছে, আহাৰ জুটিতেছে না, কাহারও বেতন অল্প স্তুরাং পরিবার প্রতিপালনে অসমর্থ, কেহ বিদ্যার্থী অথচ

অর্থাভাবে লেখা পড়া শিক্ষা হইতেছে না; কাহারও ঐশ্বর্য জুটিতেছে না, কাহারও পথ্য জুটিতেছে না—তিনি এই সমস্ত অসহায় ও নিরাশ্রয় লোকদিগের সুখশান্তি বিধানের জন্ত সর্বদা ঘুরিয়া বেড়াইতেছেন। কাহাকে ধরিলে অমূকের বিপদ উদ্ধার হইবে; কিরূপে অমূকের সুপারিশ যোগাড় করিয়া এই দরিদ্র যুবকের অন্নসংস্থান হয়, দিবারাত্রিই এই বোধ হয় তাঁহার একমাত্র চিন্তা। শুধু চিন্তায় নহে, এই সকল ব্যাপারকে প্রকৃত কার্যে পরিণত করা অসামান্য ক্ষমতার কথা, কিন্তু এইরূপ পৌরুষ তাঁহার মধ্যে প্রচুর পরিমাণে দেখিতে পাওয়া যাইত। কখনও দেখি কোন কন্যাদায়গ্রস্ত বিপন্নলোকের কন্যার পাত্র অন্বেষণ করিয়া বেড়াইতেছেন, কখনও দেখি দেনার দায়ে যে ভুবিয়াছে, তাহাকে ঋণমুক্ত করিবার জন্ত সুপারামর্শ দিতেছেন, কখনও কোন দরিদ্র ভদ্রসন্তানের স্ত্রী প্রবল রোগে পীড়িত, তার ছোট ছোট ছেলেমেয়েদের তত্ত্বাবধানের কেহ নাই, তাহারও সময়ের অভাব—সেই সব স্থলে দেখা গিয়াছে মুখুজ্যে মহাশয় একাধারে জননী পাচক, ও রোগিণীর শুশ্রূষার ভার গ্রহণ করিয়াছেন। কর্মবীরের তিলমাত্র বিশ্রাম নাই, একদিনের জন্ত আরাম খোঁজা নাই। যদি দশ ক্রোশ হাঁটিয়া গেলে কার্যোদ্ধার হয়, মুখুজ্যে মহাশয় হুঁকা হস্তে তখনি প্রস্তুত। “কষ্ট হইতেছে” কি “আর পারি না” এ বলিয়া কোন দিন বিরক্তি প্রকাশ করা নাই! যে কর্ম সম্পূর্ণ আসিতেছে তাহাই প্রণত অন্তঃকরণে সর্বদা প্রফুল্লমুখে গ্রহণ করিতেছেন। এত কর্মোত্তম, এত উৎসাহ, কিন্তু বিফলতার জন্ত কখনও তাঁহার খৈর্য বিচলিত হয় না। হুৎখে মুখ ভার করিয়া

বসিয়া আছেন—এ অবস্থা আমি কখনও তাঁহার দেখি নাই। পৃথিবীতে কেহ যে তাঁহার দ্বেষ আছে তাহা তো মনেই হয় না। সকলের প্রতিই সহানুভূতি, সকলের জন্তই অনুকম্পা তাঁহার সমস্ত চরিত্রটিকে বরণীয় করিয়া রাখিয়াছে। কোন কার্য ২১ বার বিফল হইলে সে কার্যে স্বার্থ থাকিলেও আমাদের আর উৎসাহ থাকে না, কিন্তু তাঁহার কোন স্বার্থ নাই, কেবল অণ্ডের জন্ত কর্ম করিতেছেন—অথচ পুনঃ পুনঃ বিফল মনোরথ হইয়াও তিনি তিনি নিরুৎসাহিত হইবার পাত্র নহেন। পুরুষকারের নিখুঁত উজ্জ্বল দৃষ্টান্ত অথচ এমন নিরহঙ্কার পুরুষ বর্তমান কালে খুঁজিয়া পাওয়াই কঠিন। সুদীর্ঘ জীবনের অধিকাংশ কাল এইরূপ পরহিত ব্রতে ব্যয়িত করিয়া, সর্বপ্রকার অভাব হুৎখে ও ক্রেশকে স্বীকার করিয়া লইয়া, তাঁহার কর্মময় জীবনমধ্যাহ্ন-তপন অন্তাচল শিখরে হেলিয়া পড়িয়াছে, দেবশরীর ভগ্ন-প্রায় হইয়াছে—তখনও মুখে সেই প্রসন্নতার কোন বৈলক্ষ্য্য ঘটে নাই। তাঁহার গায় নিরভিমান লোকহিতৈষী পুরুষেরা যে দেশে জন্মগ্রহণ করেন, সে দেশ তাঁহাদের পাদস্পর্শে ধন্য হইয়া যায়। আমরা যে তাঁহার স্নেহ লাভ করিতে পারিয়াছি, ইহাতে আপনাকে ভাগ্যবান বলিয়া মনে করি। কয়েক বৎসর হইল এই মহাত্মাও অমরধামে চলিয়া গিয়াছেন। তাঁহার অভাবে যে আজ কত লোক নীরবে অশ্রুমোচন করিতেছে, কত লোক আশ্রয়হীন হইয়াছে তাহার সংখ্যা নাই।

বাঙ্গলার সুপ্রসিদ্ধ ঔপন্যাসিক শ্রীশচন্দ্র মজুমদারের চরিত্রও অভ্যাসের দ্বারা উন্নতি লাভের প্রকৃষ্ট উদাহরণ। তাঁহার সত্য-

বাদিতা, কর্তব্যনিষ্ঠা, স্বাধীনচিত্ততা, তেজস্বিতা সকলের প্রতি
 শ্রীতি, সুমধুর ব্যবহার এবং জ্ঞানানুরাগ যে
 ৮শ্রীশচন্দ্র দেখিত সে-ই মুগ্ধ হইত। তাঁহার মত
 মজুমদার। অকৃত্রিম সুহৃদ, স্নেহময় আত্মীয়, কর্তব্যনিষ্ঠ
 কর্মচারী, সদালাপী সভাসদ, ধর্মভীরু বিচারক
 কদাচিৎ দেখা যাইত। গুরুতর রাজকর্মের সূত্রে নানা প্রলোভনের
 মধ্যে তাঁহাকে পড়িতে হইয়াছিল, কিন্তু কোনদিন লোভের বশবর্তী
 হইয়া তিনি কর্তব্যপথ হইতে প্রস্থ হন নাই। ঋণ করিয়াও তিনি
 দূর সম্পর্কীয় আত্মীয়কে পালন করিতেন, নিজে যাহা কর্তব্য
 বলিয়া বুঝিতেন—প্রলোভন বা ভীতি প্রদর্শনে কদাচ তাহা
 হইতে পরিপ্রস্থ হইতেন না। তাঁহার সুমধুর স্নেহময় সবিনয়
 চরিত্রের অভ্যঙ্গরে একটা অনমনীয় দৃঢ়তা ছিল। অপমান
 বা অবিচার তিনি কদাচ সহ্য করিতেন না। এ কারণে তাঁহাকে
 অনেক সময় অবিবেচক ক্ষমতালোলুপ রাজপুরুষের বিবদৃষ্টিতে
 পড়িতে হইয়াছিল, কিন্তু কোনদিন স্বার্থের দিকে চাহিয়া তিনি
 আপনার মর্যাদাবুদ্ধিকে বা কর্তব্যবুদ্ধিকে খর্ব করেন নাই।

চরিত্রের এই মহত্ত্ব ও দৃঢ়ত্ব কঠিন অভ্যাসের ফল। তিনি
 নিজ জীবনে আপনার সম্মানদিগকে আপনার আদর্শ অনুসারে
 শিক্ষিত করিতে চেষ্টা করিতেন। আশা করি তাহার সে চেষ্টা
 কতকাংশে সফল হইয়াছে।

সাধু শ্রীধর :—আর একটি মহাত্মার আখ্যায়িকা না দিলে
 এই চরিত্রাবলী অসম্পূর্ণ থাকিবে। ইনি ভক্ত শ্রীধর—পূজ্যপাদ
 ৮বিজয়কৃষ্ণ গোস্বামী মহাশয়ের জনৈক শিষ্য ও ভক্ত। ইঁহার

মধ্যে এমন একটি তেজ ও ধৈর্য ছিল, এমনি একটি বিশ্বাস ও
 নিষ্ঠা ছিল যাহা স্বরণ করিলে বিশ্বয়াভিত্ত হইতে হয়। নিরন্তর
 সাধনাভ্যাস বলে তিনি এমন একটি চরিত্রবল
 শ্রীধর লাভ করিয়াছিলেন যাহাতে তিনি এক ঈশ্বর
 ছাড়া আর কাহাকেও গ্রাহ্য করিতেন না। অবস্থা যতদূর
 অসচ্ছল হইতে হয়, তথাপি প্রয়োজন স্থলে একমাত্র
 গাত্রবাসখানি দান করিতে কখনও দ্বিধা প্রকাশ করিতেন না।
 যেমন বিশ্বাস তেমনি দৃঢ়তা অথচ বিনয়পূর্ণ শান্তভাব এই
 মহাত্মার মুখমণ্ডলে ক্রীড়া করিয়া বেড়াইত। এমন সরল ও
 সত্যবাদী ছিলেন যে লোকে সময়ে সময়ে তাঁহাকে পাগল মনে
 করিত। আপনার কোন ক্রটি অত্যন্ত লজ্জাকর হইলেও
 তাহা তিনি নির্ভয়ে প্রকাশ করিতে কুণ্ঠিত হইতেন না। বিশেষ
 আধ্যাত্মিক বল ও ভগবৎবিশ্বাস না থাকিলে কখনই লোকে
 এতটা সত্যব্রত হইতে পারে না। সে-ই পাপকে গোপন করে,
 যে বিশ্বতশ্চক্ষু ভগবানকে মানে না—সে-ই গোপনে পাপ করিয়া
 লোকের নিকট সাধু সাজিয়া বসিয়া থাকে, যে লোকাপবাদকেই
 ভয় করে কিন্তু ভগবানকে ভয় করে না। কিন্তু সর্বত্র তাঁহাকে
 যে অহুভব করে, সে কাহার নিকট, কোন কথা, গোপন
 করিবে? তাঁহার মৃত্যুও বড় সুন্দর, বড় বিস্ময়কর। মৃত্যুর
 কিছু পূর্বে তাঁহার শরীর একবার খারাপ হয়, কলিকাতায়
 চিকিৎসা চলিতেছিল। তার পর সকলেই জানে তিনি
 ক্রমশঃই সারিয়া উঠিতেছেন। তবু তাঁহার জনৈক অন্তরঙ্গ
 বন্ধুর পরামর্শক্রমে আর একবার তাঁহাকে ডাক্তার দ্বারা

দেখানো স্থির হইল। তিনি ও তাঁহার বন্ধু উভয়েই পরদিন প্রাতঃকালে ডাক্তারের কাছে যাইবেন ইহাই স্থির ছিল। রাত্রে বাসস্থানে শুইয়া আছেন হঠাৎ তাঁহার মনে হইল তাঁহার শরীর অস্বস্থ হইতেছে। ঘাঁহাদের বাড়াতে ছিলেন, রাত্রিতে তাঁহাদের ডাকাইয়া বলিলেন, 'অচ্ছ আমার প্রাণান্ত হইবে, আপনারা এইখানে থাকুন'। উপস্থিত সকলেই মনে করিলেন এ তাঁহার পাগলামি, সুতরাং তাঁহাকে বুঝাইয়া ও কিছু ভৎসনা করিয়া তাঁহারা সকলেই শয়নক্ষেত্র চলিয়া গেলেন। পুনশ্চ রাত্রি মধ্যে আবার তাঁহাদিগকে ডাকিয়া পাঠাইলেন এবং তাঁহাকে নাম শুনাইবার জন্ত সকলকেই কাতরস্বরে অনুনয় করিলেন। তাঁহার যে তখনই মৃত্যু হইবে এ কথা কেহই বুঝিতে পারেন নাই, সুতরাং তাঁহারা তাঁহার কথায় মনোযোগ দেওয়া তত আবশ্যক বোধ করেন নাই। শ্রীধরের অপূর্ব সাধু-হৃদয় কেহ বুঝিতে পারিল না, কারণ সে দরিদ্র ও তাহার মাথায় জটাও নাই, পরিধানে রঙ্গিন কাপড়ও নাই। যাই হ'ক যখন কেহই আসিল না তখন আসন্ন সময়ে আপনিই আপনার হৃদয়-দেবতাকে স্মরণ করিতে লাগিলেন। তারপর কাহাকে দেখিয়া যেন কৃতাজলিপুটে ভূমিষ্ঠ হইয়া প্রণাম করিলেন, আর উঠিলেন না। দীনের বন্ধু তাঁর সেই দীন ভক্তের গাত্র হইতে ধূলি ঝাড়িয়া তাহাকে আপনার কোলে তুলিয়া লইলেন। প্রাতঃকালে সকলে শ্রীধরের ঘরে আসিয়া বিস্ময় বিহ্বল-নেত্রে দেখিতে পাইল শ্রীধরের প্রাণবায়ু দেহপিঞ্জর পরিত্যাগ করিয়া বৈকুণ্ঠধামে চলিয়া গিয়াছে।

গ্যাংটা বা খাঁকী বাবার নাম অনেকেই হয়তো শুনিয়াছেন। অনেকের ধারণা তিনি সিদ্ধপুরুষ। যে গাঁজা অধিক মাত্রায় খাইলে লোকের মস্তিষ্ক বিকৃত হইয়া উঠে, গ্যাংটা বাবা -তিনি তাহা দিব্যরাত্র সেবন করিয়াও বেশ সুস্থ ও সবল থাকিতেন। খুব ঘোরাল মাতাল যতটা মত্ত একবারে গ্রহণ করে, তিনি তাহার চতুর্গুণ ব্যবহার করিয়াও শুনিয়াছি বিক্ষিপ্ত হইয়া পড়িতেন না। আবার বহু দিন হয়তো সামান্য মাত্রাও গ্রহণ করেন না, তাহাতেও কোন কষ্ট নাই,—মনের উপর এতটা আধিপত্য জন্মিয়াছিল। যখন তিনি মৃত্যুশয্যায় শায়িত, আমি তাঁহার সহিত দেখা করিতে গিয়াছিলাম। সঙ্গে করিয়া তাঁহার জন্ত কিছু ফল লইয়া গিয়াছিলাম। তাঁহার অনুচরগুণি আমাকে নিকটেই বাইতে দিল না। বহু কষ্টে তাঁহার নিকট গিয়া পৌঁছিলাম, দেখি পূর্বের সেই কাস্তি নাই। মৃতের ত্রায় পড়িয়া আছেন, মুখে গাত্রে মাছি ভ্যান ভ্যান করিতেছে। দেখিয়া বড় দুঃখ হইল। এমন কেহ নাই যে একটু ভাল করিয়া তাঁহাকে শুষ্কসা করে। কিছুক্ষণ পরে দেখি গ্যাংটা চক্ষু মেলিয়া তাকাইলেন এবং আমার পরিচয় লইলেন। আমি ফলগুলি তুলিয়া দিলাম। এত যে জীর্ণ ও রোগাতুর দেহ কিন্তু সে অবস্থাতেও তাঁহার সেই স্বাভাবিক চরিত্রের মধুরতা তখনও বেশ অক্ষুণ্ণ রহিয়াছে।

সুপ্রসিদ্ধ তান্ত্রিক ৬বামাচরণের নাম অনেকেই শুনিয়াছেন। যে শাশান শৃগাল কুকুরেরই বিহারস্থল, দিবা কালে একক যাইতে যথায় অনেকের অন্তঃকরণ কম্পিত হইয়া উঠে,

অমাবস্তার ঘোর নিশীথ রাতে বাযাচরণ সেখানে বসিয়া থাকিতেন, নিশ্চিন্ত মনে শুইয়া থাকিতেন।
বামা ক্ষ্যাপা। ফেরদুল নিতান্ত বন্ধুজ্ঞানে তাঁহার পদলেহন করিয়া চলিয়া যাইত। অভ্যাসবশতঃ এতটা নিঘূর্ণা অবস্থা আসিয়াছিল যে কুকুরগুলিকে লইয়া একসঙ্গে আহার করিতে তাঁহাকে দেখিয়াছি। শুধু তাহাই নহে তাহাদের মুখবিবর হইতে অন্ন লইয়া অন্নানবদনে ভোজন করিতেছেন। এই যে ভয়শূণ্যতা, নিঘূর্ণ্যতা—ইহা কম মানসিক বলের পরিচয় নহে। কতদিনের সুদৃঢ় অভ্যাসে তবে এই শক্তিকে তিনি আয়ত্ত করিয়াছিলেন।

৩৭রামতনু লাহিড়ী মহাশয়ের নাম শিক্ষিত সমাজের মধ্যে সবিশেষ পরিচিত। তাঁহার গ্রাম সরল স্বভাব বিছানুরাগী, সত্যবাদী, ঈশ্বরনিষ্ঠ ব্যক্তি অল্পই বঙ্গদেশে জন্মগ্রহণ করিয়াছে। বঙ্গদেশে এখনও অনেক উচ্চশিক্ষিত পদস্থ ব্যক্তি জীবিত রহিয়াছেন, যাহারা তাঁহার সরলতা, উচ্চাস্তঃকরণ ও ধর্ম্মানুরাগের সাক্ষ্য প্রদান করিবেন।

এই মহাত্মার পঠদশার সময় হইতে সঙ্গদোষে অত্যন্ত পানাসক্তি ঘটিয়াছিল। ইহার অপকারিতা বুঝিয়াও তাঁহার গ্রাম সাধুব্যক্তি সুদীর্ঘ জীবন কালের মধ্যেও সেই কদভ্যাসের হস্ত হইতে মুক্তিলাভ করিতে পারেন নাই। অভ্যাসের এমনি ভয়ঙ্কর প্রভাব!

প্রাতঃস্মরণীয় পূজ্যপাদ পিতৃদেব ৩কৈলাসচন্দ্র সাহাণ :-

আজকাল সামান্য কাজ করিয়া তাহার চতুর্গুণ ডকা বাজাইয়া স্বকার্যের মহিমা প্রচার করিতে আমরা আর ৩কৈলাসচন্দ্র কিছুমাত্র লজ্জা অনুভব করি না। কিন্তু উপরে যে মহাত্মার নাম লিখিত রহিয়াছে, তিনি কোনও ধনীর সন্তান নহেন, বিদ্বান, অথবা আজকাল যাহাকে স্বদেশহিতৈষী বলে—সেরূপও কিছু ছিলেন না, তবুও তিনি যে ক্ষুদ্র পল্লীটিতে বাস করিতেন, আজ প্রায় অর্ধ শতাব্দী অতীত হইল তাঁহার দেহাবসান হইয়াছে, তবুও সেই গ্রামের ও সেই গ্রামের নিকটবর্তী পল্লীসমূহের অনেক বৃদ্ধ লোক তাঁহার নাম স্মরণ করিয়া এখনও অশ্রুবিসর্জন করিয়া থাকেন। এমন দীনার্ঘের সেবা করিতে, অনাথ দীনকে আশ্রয় দান করিতে, লোকের হুঃখে ব্যথিত হইয়া তাহা দূরীকরণার্থ প্রবৃত্ত করিতে এমন লোক বড় বেশী দেখিতে পাওয়া যায় না। গ্রাম হইতে দূরে তাঁহাকে কার্যোপলক্ষ্যে প্রায়ই থাকিতে হইত, কিন্তু যখন তিনি গ্রামে আসিতেন তখন গ্রামে আনন্দোৎসব হইত। ক্ষুদ্র পল্লীটি তাঁহার সদৃশ্য ও উদারচরিত্রে আকৃষ্ট হইয়া তাঁহাকে কত না শ্রদ্ধার চক্ষে দেখিত, এবং সকল কাজে তাঁহার উপর তাহাদের কতটা নির্ভর ছিল তাহা বলিয়া শেষ করা যায় না। গ্রামে যেখানে রোগাতুর পীড়িতের কাতর আর্জনাদ উথিত হইতেছে, কৈলাসচন্দ্র সেই রোগশয্যার পার্শ্বে বসিয়া দিবারাত্রি রোগীর সেবা ও শুশ্রূষায় মগ্ন হইয়া থাকিতেন, আপনার আহার নিদ্রার প্রতিও লক্ষ্যপ করিতেন না। যে গৃহপ্রাঙ্গণ গৃহস্বামীর অকালমৃত্যুতে,

তাঁহার আশ্রিত বিধবা ও পোষ্যবর্গের কোলাহল ক্রন্দনে মুখরিত, সেখানে তাঁহার করুণার্দ্ৰ হৃদয় তৎক্ষণাৎ তাহাদের অভাব ও ক্লেশ বিমোচনে বন্ধ-পরিষ্কার। যাহার কেহ নাই, যে গৃহহীন অনাথ, তাহাকে নিজগৃহে আনিয়া অথবা তাহার কিছু অন্ন সংস্থানের ব্যবস্থা করিয়া দিয়া তবে তিনি নিশ্চিন্ত হইতেন। শারদীয়া পূজা মহোৎসবের সময় যখন বাঙ্গলার প্রতি পল্লী আনন্দে হাসিয়া উঠিত, যখন প্রতি গৃহস্থের গৃহ ও প্রাঙ্গণভূমি শোভন শয্যায় সজ্জিত ও প্রফুল্ল হইয়া উঠিত, শিশুদের নববস্ত্র পরিধানে ও আনন্দ কলরবে গৃহপ্রাঙ্গণ ও পথ, ঘাট ও মাঠ আনন্দ পরিপূর্ণ হইয়া উঠিত, তখনও হয়তো কোন গৃহস্থের উপযুক্ত উপার্জনক্ষম ব্যক্তির অভাববশতঃ তাহার গৃহ তখন শোকের বস্তায় বিপ্লাবিত ও বিধ্বস্ত। সে গৃহের অনাথা বৃদ্ধাদের ও শিশুসন্তানদিগের দুঃখ শোকাকর্ষ মলিন মুখগুলি দেখিয়া কাহার হৃদয় কাঁদিয়া উঠিত, কে তাহাদের ক্লেশ দূরীকরণার্থ সর্ব্বাগ্রে সেইখানে পূজোপহার নব বস্ত্রাদি প্রেরণ করিতেন? —তিনিই সাধনপাড়ার ঋষিপ্রতিম ৩কৈলাসচন্দ্র দেবশর্মা। বিপন্ন ব্যক্তিকে বিপদছাড়া সাহায্য করিয়া, নিরন্নের অন্নসংস্থানের ব্যবস্থা করিয়া, উৎসবের সময় উৎসবোপযোগী উৎসাহ দ্বারা পল্লীবাসীদিগকে উৎসাহিত ও প্রমোদিত করিয়া এক সুগন্ধময় সমুজ্জ্বল বনফুলের স্থায় তিনি জীবন যাপন করিয়া গিয়াছেন, তাহা স্মরণ করিলেও চিত্ত পুলকে পূর্ণ হইয়া উঠে। তাঁহার নিজ গৃহে ও কর্মস্থানে কত এইরূপ দুঃখীর, আশ্রয়হীনের প্রতিপালন হইত, অথচ তাঁহার আয় সেই পরিমাণে কত স্বল্প ছিল, কিন্তু

তাঁহার উদারচরিত্র এই সকল দুঃখরাশির প্রতিবিধান না করিয়া কখনই নীরব থাকিতে পারিত না, ইহা স্মরণ করিলে চিত্ত বিস্ময়ে অভিভূত হইয়া পড়ে। মনুষ্যের প্রতি উদার প্রেম ও মহতী সহানুভূতি এবং ঈশ্বরের প্রতি অকপট ভক্তিই তাঁহার চরিত্রকে বিশেষভাবে বরণীয় করিয়াছিল। তাঁহার সমগ্র জীবনটিই একটি সাধুর জীবন। এত পরদুঃখকাতর এবং পরদুঃখ বিমোচনার্থ এত প্রযত্ন ছিল যে গ্রামের একটি নীচজাতির মৃতদেহ পড়িয়া রহিয়াছে, লোকাভাবে তাহার অস্ত্যোষ্টিক্রিয়া হইতেছে না, গ্রামের উচ্চবর্ণেরা সে মৃতদেহ স্পর্শ করিবে না, তিনি যখনই ইহা জানিতে পারিলেন, তখনই তাহাদের গৃহে গিয়া সেই শবদেহ শ্মশানভূমিতে বহন করিয়া লইয়া গেলেন। সমাজের নিকট কত লাঞ্চিত হইতে হইবে জানিয়াও তিনি মানুষের এই ঘোর বিপত্তিকালে তাহাকে সাহায্য না করিয়া থাকিতে পারেন নাই। এ বিষয়ে তাঁহার একটি অভিন্নহৃদয় বন্ধু ছিলেন, তাঁহার নাম দ্বারিক। তিনিও অতিশয় সজ্জন ও সদাশয় পুরুষ ছিলেন, কৈলাসচন্দ্রের এবং তাঁহার সৎকর্মের সহায়ক ছিলেন। কেহ উৎপীড়ন করিলে, সাধ্য থাকিলেও তাহার কখনও প্রতিশোধ লইবার চেষ্টা করিতেন না, নীরবে অশ্রুর উৎপীড়ন সহ্য করা তাঁহার স্বভাবসিদ্ধ সদগুণ ছিল। আবার সেই সকল উৎপীড়ন কারীরা বিপন্ন হইয়া যখন তাহার শরণাপন্ন হইত, তিনি তাহাদের কৃত লাঞ্চার কথা স্মরণ না করিয়াই তাহাদের উপকারের জন্য প্রাণপণ চেষ্টা করিতেন। তাঁহার সমগ্র জীবনটি প্রস্ফুটিত পুষ্পের স্থায় সৌরভময় ও শোভাময় হইয়া বিকশিত হইয়াছিল—আজ

কত দিন হইল সেই দেবদেহের সেই বিশ্বাস ভক্তির কমনীয় মূর্তির অবসান হইয়াছে, এখনও গ্রামের বুদ্ধেরা তাঁহার স্মৃতিটিকে মনে মনে স্মরণ করিয়া আনন্দিত হন। তাঁহার প্রতিভামণ্ডিত অথচ গর্বহীন মুখমণ্ডলের কিরণরাশি কত আর্দ্র পীড়িতকে সান্ত্বনা দিয়াছে—তাহা স্মরণ করিয়া সেই মোহনীয় চরিত্রের নিকট করষোড়ে দণ্ডবৎ হইয়া পড়িতে ইচ্ছা করে, এবং সেই দেব-সদৃশ পুরুষের চরণধূলায় নিজ শরীরকে লুটাইতে ইচ্ছা করে। আরও কিছুদিন পরে হয়তো তাঁহার নামটিও কাহারও স্মরণ পথে উদ্ভিত হইবে না, কিন্তু যে পবিত্র দেবচরিত্রের আদর্শ তিনি রাখিয়া গিয়াছেন—তাঁহার সেই কৃতকর্মের পুণ্যগন্ধ এখনও বোধ হয় সেই ক্ষুদ্র পল্লীটির আকাশে বাতাসে ভরিয়া আছে, তাহা বলকাল অভীত হইলেও নিঃশেষিত হইবে না। এ কথা যখনই স্মরণ হয়, তখনই পুলকে অন্তঃকরণ ভরিয়া উঠে, এবং যে গ্রামটি তাঁহার পদস্পর্শে ধন্য হইয়াছে সেই গ্রামের ধূলায় আপনার সর্বদিককে লুটাইয়া দিতে ইচ্ছা করে।

যে বিষ স্বল্প মাত্রা গ্রহণেও প্রাণান্ত ঘটে, কত লোক অভ্যাসের বলে সেই বিষ অধিক মাত্রায় ব্যবহার করিয়াও বেশ নিরাপদে দিন যাপন করিতেছে।

কেহ কেহ ভূতপ্রেত দেখিতে এত অভ্যস্ত যে গাছের পাতাটি নড়িলে অথবা বায়ুভরে গাছের ছায়াটি ছুলিলে তাহার হৃৎকম্প উপস্থিত হয়—সর্বশরীর রোমাক্ত হইয়া উঠে। আবার কেহ কেহ জনশূন্য শব্দভোজী গৃধ্রসকুল শ্রশানে যথায়

শৃগাল কুকুর মৃতশরীর লইয়া কাড়াকাড়ি করিতেছে, তথায় রাত্রি যাপন করিতেও কোন শঙ্কা বা উদ্বেগ বোধ করে না। ইহা অভ্যাস ছাড়া আর কি ?

সাহসিকতাও অভ্যাসের ফল। ইহাতে শারীরিক শক্তির প্রাচুর্যের অপেক্ষা করে না। একজন বাল্যাবধি ব্যাঙ্গ শীকারে অভ্যস্ত, তাহার বাঘ দেখিলে বা বাঘের শব্দ শুনিলে ততটা ভীতির উদ্বেক হয় না, আর একজন অনভ্যস্ত অথচ হয়তো বেশ বলবান, কিন্তু বনের মধ্যে ব্যাঙ্গ দেখিলে তাহার হৃদয় কাঁপিয়া উঠে। ৩শ্যামাকান্তের জীবন এ বিষয়ে উজ্জল দৃষ্টান্ত।

বুদ্ধির উৎকর্ষ বা অপকর্ষের কারণও এই অভ্যাস। স্বভাবতঃ কেহ বুদ্ধিমান না হইলেও অভ্যাস করিতে করিতে তাহার বুদ্ধির বিকাশ হয়।

আহারের সম্বন্ধেও অভ্যাসের ক্ষমতা যথেষ্ট। কেহ ঝাল খাইতে অভ্যস্ত নয়, কাহারও তিক্ত ভাল লাগে, কাহারও ঝালে অত্যধিক প্রীতি, কাহারও বা লবণে অধিক অভিক্রমি ; কাহারও মিষ্ট দ্রব্যে অনুরাগ, কাহারও অল্পে বিশেষ আসক্তি। কাহারও নিরামিষ ভোজনে অধিক আগ্রহ, কেহবা মৎস্য মাংসের জন্ত লালায়িত। এ সমস্তই ন্যূনধিক অভ্যাসের উপর নির্ভর করে।

কেহ উপকার করিয়া আনন্দলাভ করে, কাহারও ঠকাইয়া আনন্দ। অল্পেই কেহ বিরক্ত হন, কেহবা অভ্যস্ত উপদ্রবও সহিষ্ণু ভাবে সহ্য করেন ; কেহবা অভ্যস্ত ইন্দ্রিয়াসক্ত, কেহবা বেশ সংযমশীল, কেহবা ভোজনে এত পটু যে ৮১০ জনের আহার একাই ভোজন করিতে পারেন। “মুনকে রঘোর” নাম

এখনও প্রসিদ্ধ। আবার নিরাহারে থাকার অভ্যাসও কেই কেহ আশ্চর্য্যরূপে আয়ত্ত করিয়াছেন। একজনের কিছুই নাই, তথাপি সে একমাত্র পরিবেশ বস্ত্র খণ্ডকেও প্রয়োজন হইলে ত্যাগ করিতে প্রস্তুত; আর একজন লক্ষপতি অথচ কপর্দক ব্যয় করিতে তাহার প্রাণ মৃত্যুযাতনা অনুভব করে। ইহাও পূর্বকৃত অভ্যাসেরই পরিণাম।

কাহারও পরিজনে পরিবৃত হইয়া থাকার অভ্যাস, তিনি একলা কিছুতেই থাকিতে পারেন না, আর একজন সুদীর্ঘকাল সুদূর প্রবাসে থাকিয়াও বেশ শান্তিতে থাকেন।

একজন ভিক্ষায় অনভ্যস্ত, কাহারও নিকট কিছু লইতে তাহার যেন মাথা কাটা যায়; আবার এক এক জন সকলের নিকটেই অসঙ্কোচে হস্ত পাতিয়া থাকে। কেহ সকলের সহিত সহজেই বেশ মিশিতে পারেন, কেহ এত লাজুক যে কাহারও সহিত একটি কথাও বলিতে সাহসে কুলায় না। কোন কোন লোক স্বভাবতঃই সূক্ষ্ম, সে অন্নায়াসেই উচ্চ শ্রেণীর গায়ক হইতে পারে, কিন্তু বাহার আর্দ্রা গলা নাই, সে-ও যদি অভ্যাস করে, খুব উচ্চদরের গায়ক না হউক, কতকটা গলা তাহার খুলিয়া যায় ইহা নিশ্চিত।

এই সকল পর্যালোচনা করিলে সুস্পষ্ট বোঝা যায় যে ভাল মন্দ যাহা কিছু সমস্তই অভ্যাসের ফল। সদভ্যাসের ফলে অন্ত-নিহিত সূক্ষ্ম শক্তি জাগ্রত হইয়া উঠে। কু-অভ্যাসের ফল এই যে, ইহা শারীরিক বা মানসিক কোন শক্তিকেই বলবান করে না পরন্তু দুর্বল করিয়া ফেলে—কিন্তু সদভ্যাসে দৈহিক মানসিক

উজ্জয় শক্তিই অভিনব বিকাশলাভ করিয়া মানুষকে দেবতা করিয়া তুলে। যাহা প্রথম দৃষ্টিতে অসম্ভব বলিয়া বোধ হয়, পুরুষকার প্রভাবে তাহাকেও কতকাংশে সম্ভব করিয়া তোলা যাইতে পারে। মহাবীর কর্ণের সেই বীরোচিত বাক্য স্মরণ করুন তাঁহাকে 'সুতপুত্র' বলিয়া কৌরবসভায় অপমানিত করিবার চেষ্টা করিলে তাঁহার মুখ হইতে যে প্রদীপ্ত বাক্য নির্গত হইয়াছিল, তাহা সকলেরই প্রতিদিন একবার করিয়া স্মরণ করা কর্তব্য।

“সুতো বা সুতপুত্রো বাষো বা কো বা ভবাম্যহম্।

দৈবায়ত্তং কুলে জন্ম মমায়ত্তং হি পৌরুষং ॥”

অতএব যিনি শ্রেয়োলাভ করিতে ইচ্ছুক, তিনি অভ্যাস-যোগের আশ্রয় গ্রহণ করিয়া উত্তম গতিকে প্রাপ্ত হউন। অভ্যাসের দ্বারায় মানুষ আবদ্ধ, মোহযুক্ত, দুর্বল—আবার অভ্যাসই তাহাকে সবল, জ্ঞানী ও বিমুক্ত করিতে সমর্থ। কদভ্যাসের ফলেই আমাদের এই অধোগতি, আবার সদভ্যাসই (কর্ম বা চেষ্টা) আমাদের সমুন্নত করিবে। অভ্যাস অপেক্ষা বলবত্তর শক্তি আর কিছুই নাই। অতএব আলস্য ত্যাগ করিয়া আজ একবার ভগবদ্বাক্য স্মরণ করুন—

“তস্মাদজ্ঞানসমুত্তং হৃৎস্থং জ্ঞানাসিনাশ্রমঃ।

ছিত্ত্বেনং সংশয়ং যোগমাতিষ্ঠোত্তিষ্ঠ ভারত ॥

ক্লেব্যং মাস্ম গমঃ পার্থ নৈতৎ তয্যুপপচ্ছতে।

ক্ষুদ্রং হৃদয়দৌর্বল্যং ত্যাক্ত্বোত্তিষ্ঠ পরন্তপ ॥”

সমাপ্ত।